

New Testament

Sakachep Language

Sakachep - Bible - New Testament

Matthew	3	
Mark	77	
Luke	125	
John	197	
Sinthongei	254	
Rom	321	
1 Korinth	350	
2 Korinth	381	
Galatia	401	
Ephesi	412	
Philipi	422	
Kolossa	430	
1 Thessalonika	437	
2 Thessalonika	444	
1 Timothy	448	
2 Timothy	457	
Titus	463	
Philimon	467	
Hebrew	469	
Jakob	491	
1 Peter	499	
2 Peter	507	
1 John	512	
2 John	420	
3 John	521	
Jude	523	
Chongphuong	526	

Sakachep - Bible - New Testament

Matthew

Matthew 1

Jisua Khrista richibulngei

(Luk 3:23-38)

¹Hi ngei hih Abraham jâisuon, David jâisuon Jisua Khrista richibulngei an ni.

²⁻⁶^aAbraham renga Rêng David tena, anuoia anghin richibulngei hah adônin mintâng ani: Abraham'n Isaac a neia, Isaac'n Jakob a neia, Jakob'n Judah le a lâibungngei a neia; hanchu Judah'n Perez le Zerah a nei ngeia, (an nu chu Tamar ani) Perez'n Hezron a neia; Hezron'n Ram a neia, Ram'n Amminadab a neia, Amminadab'n Nahshon a neia; Nahshon'n Salmon a neia; Salmon'n Boaz a neia, (a nu chu Rahab ani) Boaz'n Obed a neia, (a nu chu Ruth ani) Obed'n Jesse a neia; Jesse'n Rêng David a nei ani.

^{6b-11} David zora renga Israel mipui ngei Babylon suoka intânga an om tena anuoia anghin an richibulngei hah adônin mintâng ani: David'n Uriah lômnu leh Solomon a neia; Solomon'n Rehoboam a neia; Rehoboam'n Abijah a neia; Abijah'n Asa a neia; Asa'n Jehoshaphat a neia; Jehoshaphat'n Jehoram a neia; Jehoram'n Uzziah a neia; Uzziah'n Jotham a neia; Jotham'n Ahaz a neia; Ahaz'n Hezekiah a neia; Hezekiah'n Manasseh a neia; Manasseh'n Amon a neia; Amon'n Josiah a neia; Josiah'n Jehoiachin le a lâibungngei a nei ngei ani.

¹²⁻¹⁶ Hanchu, Babylon suoka an intâng suonûk renga Jisua suok tena hi anuoia anghin richibulngei adônin mintâng ani: Jehoiachin'n Shealtiel a neia; Shealtiel'n Zerubbabel a neia; Zerubbabel'n Abiud a neia; Abiud'n Eliakim a neia; Eliakim'n Azor a neia; Azor'n Zadok a neia, Zadok'n Achim a neia; Achim'n Eliud a neia; Eliud'n Eleazar a neia; Eleazar'n Matthan a neia, Matthan'n Jacob a neia; Jacob'n, Joseph, Mary inneipupu hah a neia; ha Mary renga han Jisua Messiah an ti hih ajuong inzir ani,

¹⁷ Masikin, Abraham renga David tena ruol sômleiminli ania; David renga Babylon tieng suoka an tuong ngei tena ruol sômleiminli ania; ma renga hah Messiah ânzir tena ruol sômleiminli ani.

Jisua Khrista ânzirna roi

(Luk 2:1-7)

¹⁸ Mahih Jisua Khrista ajuong inzir tie chu ani. A nu Mary hah Joseph han ava bieka, in-annei mân, Ratha Inthiengin nâi a vonga,

¹⁹Joseph hah zoratina mi diktak ani sikin mipui rietin Mary hah mâimôkshak rang nuom maka; masikin inrûktên an inbiekna setin mâkchien rangin a mintuo ani.

²⁰Hima roi hah a mindon lâitakin, a ramangin Pumapa Vântîrton inkhat a kôm a juong inlâra, a kôm han, “Joseph, David jâisuon, Mary hih lômnua nei rang chi no roh. Amanu nâivong hih Ratha Inthieng renga kêng ani.

²¹Amanu han Nâipasal nei a ta, male a riming Jisua ni phuo rang ani. Ama han a mingei an nunsienangei renga a sanminring ngei rang sikin,” a tia.

²²Atûn hin Pumapa'n dêipu manga a lei misîr hah adikin ahong tung theina ranga hima ngei murdi hih ahong oma,

²³“Dôngmate inthienghieï hah inrâi a ta nâipasal nei atih, male a riming Immanuel phuo an tih,” (ma omtie chu, “Ei kôm Pathien aom tina ani.”)

²⁴Masikin, Joseph ânthoi lehan, Pumapa vântîrtonin a tipe anghan, Mary hah lômnûn a nei zoi.

²⁵Aniatachu, a nâivong hah a nei mâka chu ompui mah. Hanchu, Joseph'n a riming hah Jisua a phuo zoi ani.

Matthew 2

Nisuotieng renga mivârngei

¹Rêng Herod ânlal lâihan Judea rama Bethlehem khopuia Jisua ajuong inzira. Ânzirsuo, harengan, ârsi tienga lekha inchû ngâi mivârngei senkhat nisuotieng renga Jerusalema an juonga

²“Khotieng mo Judangei rêng ajuong inzir nâïtesen hah a om? Nisuotienga ama ârsi kin mua, ama chubaimûk rangin kin juong ani,” an tia.

³Ma roi hah Rêng Herod'n a rietin chu, a mulungjîng sabaka, Jerusalema mi murdi khom an mulung ajîng sa ani.

⁴Ochaisingei le Balam minchupungei murdi munkhatin a koibûm ngeia, an kôm han, “Khotieng mo Messiah ânzir rang?” tiin a rekel ngeia.

⁵Hanchu, anni han a kôm, “Judea ram Bethlehem khopuia,” tiin an thuona, Dêipu'n hi anghin a lei mizieka:

⁶“Judah ram sînga Bethlehem, nangma Judah khopuïlienngieï lâia achîntak ni tet mak che; na sîng renga ruoïpu alân zir rang ani, ki mi Israelngei ruoï rangpu hah.”

⁷Masikin Herod'n nisuotienga mivârngei hah a koi ngeia, ârsi ânlang zora tak hah anni renga a man theina rangin inrûktên ântongpui ngei zoi.

⁸Hanchu hi chong hih bê'n anni hah Bethlehem'a a tîr ngei: “Se unglâ, nâite hah asadimin va rok unglâ, nin mûn chu mi hong ril nôk roi, masikin keima khom ama chubaimûk ke se theina rangin,” a tia.

⁹⁻¹⁰Hanchu an mâka, male an lampuia an sea, nisuotienga ârsi dên hah an mu nôka. Ârsi hah an mûn chu an râiasân sabaka, idôr taka râisân mo an ni zoi! Nâite omna chung ridîn aphâk mâka chu inngam loiin an moton a ruoi ngei banga.

¹¹Insûnga an va lûta, male a nu Mary leh nâite hah an va mua, khûkinbilin chubai an mûk zoi. Neinunpêk ranga an chôî, rângkachak, bero le myrrh (murrâh) an kaisuoâ, a kôm an pêk zoi.

¹²Hanchu, Herod kôm tieng se nôk khâiloi rangin an ramangin Pathien'n inningna a pêk ngei sikin lampui danga an ram tieng an kîrnôk zoi.

Egypt tieng an rot

¹³Hanchu, anni ngei hah an mâk suole chu, Pumapa vântîrton inkhat Joseph kôm ramangin ajuong inlâra, a kôm han, “Herod'n nâite that rangin a rok rang kêng. Masikin inthoi inla, nâite le a nu hah tuong inla, Egypt rama rotpui ngei roh, hong nôk rangin nang ki ril mâka chu mahan omchien roi,” a tia.

¹⁴Joseph ânthoia nâite le a nu a tuong ngeia, hani jân renghan Egypt ram an pan kelen zoi.

¹⁵Herod thi mâka chu mahan an omchien zoi. Pumapa'n dêipu bâia, “Ka nâipasal chu Egypt ram renga ko koi suok,” a lei ti hah ajuongtung dikna rangin maha ahong om ani.

Nâipangngei thatin an om

¹⁶Herod'n nisuotienga mivârngei han an huong ti a rietin chu a ningathik sabaka. Mivârngei kôm renga ârsi ânlang zora roi a riet dungjûiin Bethlehem le a revêla nâipang pasal kumnik nuotienga murdi chu that riei rangin chong a pêk zoi.

¹⁷Dêipu Jeremiah'n a lei misîr:

¹⁸“Ramah khuoa in-iek miring rietin aoma, Rangâisie taka chap miring hah. Rachel'n a nâingei ranga a châ; amanu hah tâi thei khâi mak an thi pe zoi sikin,” ti hah ahongtung zoi ani.

Egypt ram renga an hongkîr nôk

¹⁹Herod a thi suole chu, Pumapa vântîrton inkhat Egypt rama Joseph kôm ramangin ânlarâ,

²⁰a kôm, “Inthoi inla, nâite le a nu hah tuong inla, Israel rama se nôk ta roi, nâite that ranga bôkngêi hah an thi zoi,” a tia.

²¹Hanchu, Joseph ânthoia, nâite le a nu a tuonga Israel rama an se nôk zoi.

²²Aniatachu, Archelaus a pa Herod ruthûlin Judea rama rêng a chang ti Joseph'n a rietin chu ha taka se hah a chia. A ramangin rilin a om nôka, masikin Galilee ramhuol tiengkâng han an sea

²³khopui inkhat Nazareth an tia han anva om zoi. Hanchu dêipungeiin, “Ama hah Nazareth mi tîng an tih,” tia an lei ti hah adikin ahongtung ani.

Matthew 3

Baptispu John tângghâi

(Mk 1:1-8; Luk 3:1-18; Joh 1:19-28)

¹Ma zora han Baptispu John, Judea ramchâra a hong a male tângghâi a phuta,

²“Nin nunsienangei renga inhei ta roi, Invân Rênggram anâi zoi,” a tia.

³John hih ani, Dêipu Isaiah'n: “Ramchâra mi inkhat tângghâi han,

‘Pumapa rang lamlien sin unglâ, a lôna rang lampui khom mintûn roi!’” tia a chungroi a lei misîr hah ani.

⁴John a puonsilngei hah ût mula sin ania, savun kongkhit a khita, a sâk ngâi chu khâimimsiengei le rama khuoilutui ani.

⁵Jerusalem renga, Judea ramhuol pumpui renga, le Jordan tuidung revêla ramtin renga mingei a kôm an hong a.

⁶An nunsienangei an phuonga, male ama'n Jordan tuidunga a Baptis ngei zoi.

⁷John'n Phariseengei le Sadduceengei tamtak a kôm Baptis chang rangin an hong a mu lehan an kôm, “Murûl richingei, Pathien sepna juong chulna rang renga hih rotpai theina rangin tumo nangni ril?”

⁸Nin sietna renga nin inhei zoi ti riettheina rangin sinngei hah tho roi.

⁹Male Abraham richisuonpârngei kêng kin ni tiin sepna renga rotpai thei rangin mindon no roi. Nangni ki ril, Pathien'n hi lungngei khom hih Abraham richisuonpârngei a min chang thei!

¹⁰Thingkungngei a ruzung renga phûr rangin reipui min râkchien sai kêng ani zoi; thingkung murdi mara sân ânra loi kai chu phûr an ta, meia vôrpai an tih.

¹¹Keima'n chu nin insîr zoi ti rietna rangin tuiin nangni ka Baptis ngâia, aniatachu ku nûka juong rangpu'n chu Ratha Inthieng le meiin nangni baptis a tih. Ama chu keima nêka roiinpui uol ok ani; keima chu a kekok chôi rangin luoi inhoi mu-ung.

¹²Bungei jâpna rangin relei a dôna, a ruijôl jâp minsâi liei a ta, a butakngei kai chu sapang sũa thun a ta, arishi chu mei thithei ngâiloia hâl minmang a tih," a tia.

Jisua baptis a chang

(Mk 1:9-11; Luk 3:21-22)

¹³Ma zora lâihan John kôm Baptis chang rangin Jisua'n Galilee ram renga Jordan dunga a hongga,

¹⁴Aniatachu, John'n khap rang a bôka, a kôm, "Nangman kêng mi ni Baptis anânga," John'n, "kho angin mo ko kôm te no hongga!" a tia.

¹⁵Hannirese Jisua'n a kôm, "Atûn hin asa ti chien roh. Ma angdênin Pathien'n a minnângngei murdi chu ei tho rang ani," tiin a thuona. Hanchu John a jôt zoi ani.

¹⁶Jisua Baptis a chang suo, harengan, tui renga a hong jôka. Hanchu ama rangin invân ajuon onga, male Pathien Ratha hah vasu angin a juongchuma a chungga chuongin a mua.

¹⁷Hanchu, invân renga rôl ajuon ringa, "Mahih ka Nâipasal moroitak, a chungga ku mulung atâiriem ani," a tia.

Matthew 4

Jisua'n methêmna a tongna

(Mk 1:12-13; Luk 4:1-13)

¹Male Jisua hah Diabol methêma a om rangin Ratha'n ramchâra a tuong zoi.

²Sûn sômminli jân sômminli sâk sâkloiin a om suolechu Jisua hah a vonchâm zoia.

³Hanchu Diabol a hongga, a kôm, "Pathien Nâipasal ni nîn chu, hi lungngei hih vâipôl chang rangin chongpêk roh," a tia.

⁴Hannirese, Jisua'n a kôm han, "Pathien Lekhabu'n Miriem hi vâipôl korongin ring no nia, Pathien bâia chong hongsuokin kêng an a ring rang ani," tiin a thuona.

⁵Hanchu Diabol'n Jisua hah, Khopuilien Inthieng Jerusalema a tuonga, Biekin sîpinsângtaka a mindinga,

⁶male a kôm, "Pathien Nâipasal ni nîn chu nangma nethenin inchôm inla, Pathien Lekhabu'n ati anghan: "Nu chungroia chu Pathien'n a vântîrtonngei chongpêk ngei a ta; an kutngei leh nang lei modong an tih, masikin ne kengei luo khom lunga nên sũi loina rangin," a tia.

⁷Jisua'n a kôm, "Aniatachu Pathien Lekhabu'n, Pumapa na Pathien minsin no roh, ti khom ânziek sa," tiin a thuona.

⁸Male, Diabol hah muol insângtaka a tuonga rammuola rêngramngei murdi le an roiinpuinangei a min mua.

⁹A kôm, “khûkinbilin chubai mi ni mûkin chu hi ngei murdi hih nang pêk let ki tih,” a ti pea.

¹⁰Male Jisua'n a kôm, “Soitan, rotpai roh! Pathien Lekhabu'n, ‘Pumapa na Pathien vai chubaimûk inla, ama sin vai tho roh a ti!’” tiin a thuona.

¹¹Masuole chu Diabol'n Jisua a mâka; male vântîrtonngei an juonga, ama an juong san zoi.

Galilee rama Jisua sintho a phutna roi

(Mk 1:14-15; Luk 4:14-15)

¹²Jisua'n, John an sôr ti a riet lechu, Galilee rama a thengpata.

¹³Nazareth a mâka, Capernaum khopuia ava om zoia, mahah Galilee Dîl pang Zebulun le Naphtali ramhuola om ani.

¹⁴Mahi dêipu Isaiah lei ti hah ahongtung adikna ranga ani:

¹⁵“Zebulun ram le Naphtali ram, tuipui panna lampuia, Jordan râl kângkhat tieng, Galilee, Jentailngei ram!

¹⁶Ijîng nuoia om mingei han vâr roiinpuitak mûng an ta. Thina ram ijîng nuoia omngei chung a han vâr hah hong êl atih.”

¹⁷Ma zora renga hah Jisua'n, “Nin nunsienangei renga inhei ta roi, Invân Rêngram hih anâi zoi sikin!” tiin thurchi misôr a phut kelen zoi.

Jisua'n ngasûrpungei minli a koi

(Mk 1:16-20; Luk 5:1-11)

¹⁸Jisua'n Galilee dîl pang rûla a chai anghan ngasûrpungei lâibungsa inik a mu ngeia, Simon (Peter an ti) le anâipa Andrew, dîla lên leh nga an sôra.

¹⁹Jisua'n an kôm, “Ko kôm hong ungla, miriem sôrna chang nangni minchu ki tih,” a tipe ngeia.

²⁰Voikhat rengin an lênngei an mâkraka, an jûi kelen zoi.

²¹Ava se nôk uol vietin chu lâibungsa adang, Zebedee nâipasalngei Jacob le John ava mu ngei nôka. Anni ngei hah an pa Zebedee leh an rukuong sûnga an lei oma, an lênngei an lei sina. Jisua'n a koi ngeia,

²²male voikhat rengin rukuong le an pa mâkrakin, an jûi kelen zoi.

Jisua minchuna, thurchi misôrna, le mindamna ngei

(Luk 6:17-19)

²³Jisua'n Galilee ram pumpuia a sea, synagog in sûng ngeia a minchua, Rêngram Thurchi Sa a misira, mingei lâia natna le damloina jât tamtak a mindama.

²⁴Ama chungroi hah Syria ram pumpuia ânthang zoia, masikin mingei han damloi murdi, natna jât tamtak le intakngei renga an hong tuong ngeia: ramkhorî sârngêi, risangol inveingei, phalkhatthi ngei, hah Jisua'n a lei mindam ngei pak ani.

²⁵Galilee ram le Khopui Sôm ngei renga, Jerusalem renga, Judea ram renga le Jordan râla ramngei renga mipui tamtak ama an jûi zoi ani.

Matthew 5

Muol chungga A chongril

¹Jisua'n loko ngei hah a mûn chu muol chungga a kala, mahan ânsunga. A ruoisingei a kôla an hong intûpa,

²male anni ngei hah a minchu phut zoi:

Satvurna dik

(Luk 6:20-23)

³“Ratha tienga inrienga ânriet ngei chu satvur anni; Invân Rêngram an ta ani sikin.

⁴Rathanvâingei chu satvur anni; Pathien'n rathanngamna a pêk ngei rang ani!

⁵Rangâiinchînngêi chu satvur anni; Pathien chonginkhâm an la man rang ani!

⁶Pathien'n a minnângngei sin ranga ôina lientak dônngei chu satvur anni; Pathien'n mulungchukna a pêk ngei rang ani!

⁷Mulungjûrpuina dôn ngei chu satvur anni; Pathien mulungjûrpuina an chang rang ani!

⁸Mulung inthiengngei chu satvur anni; Pathien an la mu rang ani!

⁹Inngêina ranga sintho ngei chu satvur anni; Pathien'n ama nâingei tiin a la koi ngei rang ani!

¹⁰Pathien'n a minnângngei sin sikin nuomlona tuong ngei chu satvur anni; Invân Rêngram an ta ani!”

¹¹“Ku nûkjûingei nin nina sika min nangni an êroa, an nunuom nangni an loa, milak saloi ngeiin nangni an nôn tika chu satvur nin ni.

¹²Nin râiminsân unglâ, nin ta rangin râisânman lientak invâna darin aom sikin. Nin motona lei om dêipungei hah khom nunuomlona an lei tuong ngâi ani.”

Michi le vâ

(Mk 9:50; Luk 14:34-35)

¹³ “Mitin ta rangin michi angin nin ni. Aniatachu michi hih a âlna ahong dongin chu min âl nôk thei ni khâi mak. Mangmunboi ahong changa, masikin an paia, mingeiin an sirpol ngâi ani.

14“Nangni ngei hah rammuol pumpui rangin vâ angin nin ni. Tângsîpa khopui aom chu inthup thei ngâi mak.

15Tutên châti mochokin khuriâi nuoia dar ngâi mak ngei; manêkin chu in sînga mi murdi a êlminvârna rangin châtidarna kêng an dar ngâi ani.

16Ma angdên han nin vâ hah mingei makunga vâ ngêt rese, hankêng nin neinun sa tho ngei hah mûng an ta, male invâna om nin Pa minpâk thei an tih.

Balam chungroia minchuna

17“Moses le Dêipungei Balam minchûnangei minboi ranga juongin ni be no roi. Ma ngei hah minboi ranga juong ni mu-unga, an minchûnangei ajuongtung dikna ranga kêng ki ni.

18Pilchung le invân a om kêr chu Balam chong ânziek ahâng chînte mo, miziek dukriekte mo hi boi no nih, neinunngai murdi mongna ahongtung mâka chu ti hi riëttit roi.

19Masikin tukhomin hi chongpêkngai lâia achîntak khom jômloiin, ma angdênin tho sa rangin midangngai khom a minchûn chu invân Rêngrama chu mi chîntak nîng a tih. Nikhomrese tukhomin Balam a jôma, ma angdênin tho sa rangin mi a minchûa anin chu invân Rêngrama chu mi lien nîng a tih.

20Hanchu, Pathien lungdo sinna lama Balam minchupungei le Phariseengei nêkin taksôn-omin nin om vaiin kêng invân Rêngrama nin lût thei rang tiin nangni ki ril ani.

Taksina chungu minchûna

21“Tienlâia mingei kôm chu, ‘Mi that no roh; tukhom mi that chu roijêkna makunga inding a tih,’ tiin an ril ngâi ti nin riet.

22Ania, atûn keiman chu: Tukhom a lâibungpa chungu a taksîn chu roijêkna makunga tuongin om a tih, tukhom a lâibungpa kôm, ‘Mangmunboipa!’ ti chu roijêkna makunga tuongin om a tih, male tukhom a lâibungpa kôm mangmunboi, amopa ti chu meidîla se rangin ichi aom ani.

23Masikin mâichâm motona Pathien kôm neinunpêk ne pêk rang lâitak khomin na lâibungpa'n nu chungu mulung hoiloina a dôn iti ni riëttitin chu,

24mâichâm motona ne neinunpêk ne pêk rang hah mâk inla, inrangin sênla, na lâibungpa leh inngêina va sin bak inla, masuole chu hongkîr nôk inla Pathien kôma ne neinunpêk rang hah pêk roh.

25“Mîn dabi thôn nang an doia roijêkna muna nang an tuongin chu zora ala om sîngin nin bâiinkhamna hah inngêipui roh, roijêkna mun nin tung mân. Amuna voikhat pai na va tungin chu, ama'n roijêkpu kuta nang bâng a ta, misûrngai kuta nang bâng a ta, male jêl-ina khum nini rang ani.

26 Nangni ki ril, poisate tena luo lei nu thvon mâka chu ma muna han om tit ni tih.

Inrê chungroia minchûna

27 “Inrê no roh, an lei ti hah nin riet.

28 Ania, atûn Keiman chu: tukhomin nupang midit enin a ena, amanu hah luo rang a nuomin chu a mulungrîla amanu leh han an inrêa, theiloi changin aom zoi, tiin nangni ki ril ani.

29 Masikin ni mit chang tieng han nang aminpalin chu kêlpai inla, vôrpai kelen roh! Na takpum, pumpuia meidîla se nêkin chu na takpuma abâk inkhat ânsam hah chu nata rangin asa uol.

30 Nu kut changtieng nang aminpalin chu tanpai inla, pai kelen roh! Na takpum, pumpuia meidîla se nêkin chu na takpuma abâk inkhat ânsam hah chu nata rangin asa uol ani.”

Inmâkna chungroia minchuna

(Mat 19:9; Mk 10:11-12; Luk 16:18)

31 “Tukhom a lômnu a mâkin chu mâkna lekha a pêk rang ani,’ an ti sa.

32 Hannirese atûn Keiman chu: tukhom pasalin a lômnu hah roi danga niloiiin, taksôn omloina sika a mâka anin chu a lômnu hah inrê a minchang ani; male mi lômnu mâksai inneipui nôkpu chu amanu hah a inrêpuiin theiloi a changsa ani, ti nangni ki ril ani.

Inkhâmrangei chungroia minchuna

33 “Tienlâia mingei kôm chu, ‘No chonginkhâm hah set nôn la, Pumapa makunga nêk khâmna hah tho roh,’ an ti, tiin nin riet sa.

34 Aniatachu atûn keiman chu, chonginkhâm nin sin zorân inkhâmna ite mang no roi. Invân sâmin khom, khomâkinsâm no roi, Pathien Rêngsukmun ani sikin;

35 pilchung sâmin khom, khomâkinsâm no roi, a ke darna ani sikin. Jerusalem sâmin khom, khomâkinsâm no roi, ma khi Rêng roiinputak khopui ani sikin.

36 Nin lu sâmin khom khomâkinsâm no roi, samsang inkhat luo hih nin minchek thei le nin minhâng thei aom loi sikin.

37 ‘Ani’ nônchu ‘Nimak’ vai ti roi, mapêna nin ti hah chu Saloipa Inkhat renga hong kêng ani.”

Phubaluok chungroia minchuna

(Luk 6:29-30)

38 “Mit ruthûla mit,’ ‘hâ ruthûla hâ,’ an ti hah nin riet.

³⁹Aniatachu atûn keiman chu: nin chung a asaloï tho ngei chung a phubaluok no roi. Tukhomin ni bieng chang tieng a bênin chu, voi tieng a ni bieng khom minbên sa roh.

⁴⁰Tukhom nu sùng kancholi lâk rang a râyala roijêkna muna nang tuong rang a bôkin chu na kâncholiinчуol khom pêk sa roh.

⁴¹Mi'n a puok kilometer khat pêl rangin nang a tiin chu kilometer inik pêlpe roh.

⁴²Mi'n neinun imini nang a zong zorân chu, maha a kôm pêk roh; mi lâkâi nang a zongpu hah lei min pûk roh.”

Râyngai ranga lungkhamna

(Luk 6:27,28,32-36)

⁴³“Na malngai lungkham inla, na râyngai mumâk roh,” an ti iti nin riet.

⁴⁴Aniatachu atûn keiman chu: nin râyngai lungkham unglâ, an nunuom nangni lo ngei hah chubai tho pe roi,

⁴⁵masikin invâna nin Pa nâyngai nin hongni theina rangin. Ama'n misiengai le misangai chung a nisa hah ân-angbangin a min suok ngâia, asa sinngai le asie sinngai chung a khom ruo a min juong pe ngei ngâi.

⁴⁶Nang lungkhamngai vai nu lungkham ngeiin te ithomo Pathien'n râyânman nang a pêk ranga? Mahah chu sum rusuonpungei khomin an tho ngâi!

⁴⁷Hanchu, nin malngai kôm vai nin chongin te imo aliek nin tho uola? Mahah chu sonongngai khomin an tho ngâi!

⁴⁸Invâna nin Pa asa akipphar anghan nangni khom nan satna hah akipphar ngêt rang ani!

Matthew 6

Lungkhamna sin chungroia minchuna

¹“Nin sakhuo sintumngai nin sinngai hah miriem mitmua, mi mu rangin sin no roi. Ma neinunngai hah mi mu rangin nin sinin chu, invâna nin Pa kôm renga ite râyânman man no tunui.

²“Masikin miriem a nâyngai neinun nin pêkin, maha alienin minlang no roi, asarothol ngeiin mi minpâkna an chang theina rangin inkhôm inngai le lamliengngai an tho ngâi anghan tho no roi. Nangni ki ril an râyânman chu an man suozoi.

³Hannirese, nangni chu miriem intakngai nin sanin, nin ruol satakngai khomin an riet loi rang lamin tho roi.

⁴Hanchu, inrûka sin tho nîng nin ta, male inrûka nin sintho mu ngâipu nan Pa han râisânman nangni pêk a tih.”

Chubaithona roia minchuna

(Luk 11:2-4)

⁵“Chubai nin tho zorân, asarotholngei angin tho no roi! Mîn an mu theina rangin inkhôm inngeia le lamlien sîrngeia indinga chubaitho an minlut ngâi, adiktakin nangni ki ril, an râisânman chu pêkin an omsuo zoi.

⁶Aniatachu nangni chu chubai nin thôn, nin khâltana lût unglâ, inkhâr khâr unglâ, male mita mutheiloï nin Pa kôm chubaitho roi. Hanchu, inrûka nin sintho mu ngâipu, nin Pa han râisânman nangni pêng a tih.”

⁷“Chubai nin tho zorân, sonongngei anghan chongkâmboi ngei mang no roi, anni ngei han an chubai tho sôt sikin an pathien'n riet uol rangin an mindon ngâi ani.

⁸Anni angin om no roi. Nin ngên mân nin Pa'n nin nâng chu a rietsai kêng ani.

⁹Hanchu, mahi nin chubai tho rang lam chu ani:” “Kan Pa invana mi: Nirming inthieng mirit om rese.

¹⁰Na Rêngam juong tung rese; nu lungdo invâna mân an sin angin nuoia mân sin rese ngei.

¹¹Anîngtina kin nâng ngâi dôr sâk avien hin mi pêk roh.

¹²Kin chungâ sin minchâingei kin ngâidam anghan, nang khomin kin minchâinangei mi ngâidam roh.

¹³Sietna ranga methêmna tieng mi tuong nônlâ, Asaloina renga chu mi mojôk roh,” tiin.

¹⁴Nin chungâ midangngei tho minchâi ngei nin ngâidamin chu, invâna nin Pa khomin nangni ngâidam a tih.

¹⁵Aniatachu midangngei nin ngâidam nônchu, nin tho minchâina ngei nin Pa'n nangni ngâidam no nih.

Bungêi chungroia minchuna

¹⁶“Bu nin ngêi zorân, asarotholngei anghan inngûi mêl pêl no roi. Anni chu mi mitmua bu ngêia an inlang theina rangin an inngûi ngâi ani. Adiktakin nangni ki ril, an râisânman chu an man suozoi.

¹⁷Nangni chu bu nin ngêi zora khomin nin mâi phie unglâ, nin sam khûi roi,

¹⁸hankêng nin bungêi hah midangngeiin riet thei noni ngeia, mita mutheiloï nin Pa vaiin riet a tih. Male inrûka nin sintho mu ngâipu nin Pa han râisânman nangni a pêk rang ani.”

Invâna rochon mintûp

(Luk 12:33-34)

19“Pila, arenge le aêkin asiet theina, inrungeiin an murûk theina hin ninta rangin rochon mintûp no roi.

20Manêkin invâna, arenge le thîr-êkin asiet thei khâiloina le inrungei khomin an murûk thei khâiloina muna ninta rangin rochon mintûp roi.

21No rochon omna muna han zoratin nu mulungrîl om atih.”

Takpuma vâ

(Luk 11:34-36)

22“Mitngei hih takpum ranga châti angin ani. Nin mitngei hah asân chu nin takpum pumpui vârin sip a ta;

23Aniatachu nin mitngei hah asa nôncu nin takpum pumpui ajîngkhap rang ani. Masikin nin sûnga vâ hah ajîng nisenla, kho dôra jîngindên mo ani rang!”

Pathien le neinangei

(Luk 16:13; 12:22-31)

24“Tutên puma inik tîrlâm chang thei noni ngei; ama han inkhat mumâk a ta; inkhat lungkham a tih, aninônchu, ama han inkhat midituol a ta, inkhat heng a tih. Pathien le sum sintho molop thei no tunui.

25“Masika han, nangni ki ril, nin ringna rangin imo ka sâkin ke nêk rang, aninônchu takpum rangin imo ki sillin ko bom rang tiin nin kângmindoi no roi. Sâknêk rangin ringna alut uol ok nimak mo? Sil le bom nêkin takpum alut uol nimak mo?

26Chunga vuong vangei khi en roi; chimu tû mak ngeia, bu ât uol mak ngeia, sasiera bu mintûp uol mak ngei; hankhoma Invâna om nin Pa'n a donsui ngei tit ngâi! Nangni vâng chu, vangei nêkin nin lut uol ok nimak mo?

27Tumo nin ringna chungroia a kângmindoi sika a ringna minsei uol thei rang nin ni?

28“Ithomo sil le bom rang sikin nin mulung nin min kâng? Rama pârngei insôn tie so en ta u: an ta rangin sin khom tho uol mâk ngeia, puon khom không mak ngei.

29“Aniatachu, nangni ki ril, Rêng Solomon luo a neina murdi leh ânvo khomin hima pârngei mêlsa inkhat dô hih enhoi mak.

30Ram sûl avien a oma, nangtûka aboi nôka lungthu meia tuorip rang sûl luo hah ma angtak han Pathien'n a minvôn anînle, sil le bom khom nangni pêk uol ngêt no ni mo? Idôra taksônna chîn dôn mo nin ni!

31“Masikin, khotieng renga mo ka sâk, ke nêk rang le ki sil ko bom rang ahong suok rang? Tiin nin kângmindoi no roi.

³²“(Sonongngei chu ma neinunngiei vai hah kêng an mindon ngâi.) Ma neinunngiei murdi hah nin nâng tiin invâna nan Pa'n a riet let ngâi ani.

³³Manêkin chu, neinun dang dangngei nêkin Pathien Rêngram le nangnia a minnângngei hah mindon bak unglâ, hanchu, ma neinunngiei murdi ha chu nangni a pêk sa rang ani.

³⁴Masikin nangtûka rangin nan kângmindoi no roi; maha khom kângdoinangei ahun rang dôr a dôna. Sûn zeta intaknangei a hongchôi ngâi pênâ chu bôk rang nâng mak.”

Matthew 7

Midangngei roijêk

(Luk 6:37,38,41,42)

¹“Mi chungroi jêk no unglâ, Pathien'n nin chungroi jêk no nih,

²mi chungroi nin jêk angdênin Pathien'n nin chungroi jêk a ta, male midangngei chungâ balam nin mang anghan nin chungâ khom a mang rang ani.

³Hanchu, ithomo ni mita thingbong om hah mindon loiin nu sângsuok mita ronok chînte om hah nu mu hi?

⁴Inmo ni mita thingbong om chienin nu sângsuok kôm, ‘Rangâihoitakin, ni mita ronok chînte hah nang pai pe rong,’ ni ti ngam?

⁵Nangma asarothol! Ni mita thingbong hah pai bak inla, hanchu, nu sângsuok mita ronok chînte aom pai rangin ânthârlakin mu thei ni tih.

⁶“Uingei kôm neinun inthieng hah pêk no unglâ, hong inhei an ta nangni pêt an tih. Vokngei makunga khom nin lungmantam hah vôr no roi, an kên chîlpol an tih.”

Zong, rok, tôk

(Luk 11:9-13)

⁷“Zong unglâ pêkin om nin tih, rok unglâ man nin tih; tôk roi, inkhâr nangni mong pe nîng atih.

⁸Tukhom a zong kai chu pêk nîng an ta, a rok kaiin chu man an ta, a tôk kai chu inkhâr mong pe nîng atih.

⁹Nangni pangei lâia tukhomin nin nâingei vâipôl nangni zong senla ngei, lung nin pêk rang mini?

¹⁰Aninônchu, nga nangni zong senla ngei, murûl nin pêk rang mini?

¹¹Nangni misie ngeiin luo nin nâingei neinun sa pêk nin rietin te, invâna nin Pa vângin chu a zongngei kôm neinun sa a pêk mintam bâk rang na!

12“Mîn nin chung a sin rang nin nuom tak hah mi chung a khom sin roi: mahi Moses Balam le dêipungei minchûna omtie chu ani.”

Mokot ân-ep

(Luk 13:24)

13“Mokot ân-epa han lût roi, meidîl mokot chu ânzara, a lampui khom ahoia, a se khom tamtak an ni sikin.

14Aniatachu ringna mokot chu ân-epa, asena lampui khom ântaka, aman ngei khom mi tômtie an ni.”

Thingkung le amarangei

(Luk 6:43-44)

15“Dêipu dikloingei renga indîn roi; pêntieng chu belri angin nin kôm an hong a, ania an sêngtieng chu melangngei tatak angin an ni.

16Ma ngei hah chu an sinthoa riet kelen nin tih. Riling rângngei han grape inra ngâi maka, riling kungngeia khom theichangngei inrâ ngâi maka.

17Thingkung asa chu amara khom asa ngâi, thingkung saloi chu amara khom asiet ngâi ani.

18Thingkung adamin chu amara siet ngâi maka, thingkung adamloiin chu amara sa ngâi mak ani.

19Thingkung murdi amara saloi chu an phûra meia an vôrpai ngâi.

20Masikin dêipu dikloingei chu an sinthoa riet thei nin tih.

Nangni riet tet ngâi mu-ung

(Luk 13:25-27)

21“Pumapa, Pumapa, mi ti papai murdi invân Rêngrama lût noni ngeia, invâna ka Pa lungdo sinngei kai kêng an lût rang ani.

22Roijêk Nikhuo ahong tungin chu mi tamtakin, ‘Pumapa, Pumapa! Ni rimingin Pathien thurchi kin misîr ngâia, ramkhoringei kin rujûl ngâia, sininkhêl khom mun tamtaka kin sin ngâi!’ la tîng an tih.

23Ma tikin chu keiman an kôm, ‘Nangni riet tet ngâi mu-ung. Ko kôm renga rotpai roi, nangni misiengei!’ la tîng ki tih.

In sinpu inik ngei

(Luk 6:47-49)

24“Masikin tukhomin hi ko chongngei hih a rieta jôm chu mivâr lungpui chung a in sinpu angin ani.

25Ruo ajuonga, tui ahong liena, phâivuo ahong râta, ma in hah ahong nama. Aniatachu inlet mak, lungpui chung a sin ani sikin.

²⁶“Hannirese, tukhom hi ko chongngei a rieta, jômloi chu amo sietsâi chung a in sin angin ani.

²⁷Ruo ajuonga, tui ahong liena, phâivuo ahong râta, ma in hah ahong nama, ânleta. Ânlet tie khom ana sabak ani!”

Jisua rachamneina

²⁸Jisua'n ma neinunngai hah a misâr suole chu loko ngeiin a minchuna hah an kamâm sabak ani.

²⁹Ama chu Balam minchupungei angin niloiin; manêkin chu, rachamneina leh mi a minchu ani.

Matthew 8

Jisua'n mi phâr inkhat a mindam

(Mk 1:40-45; Luk 5:12-16)

¹Jisua hah tâng renga a juong chum lehan chu mipui tamtakin an jûia.

²Hanchu a kôm mi phâr inkhat a hong a, a makunga khûkinbilin, “Pu, nu nuomin chu, mi ni minthieng thei,” a tia.

³Jisua'n a kut a hongsona, a tona, “Ku nuom, Inthieng ta roh!” tiin a thuona. Harengan a phâr hah ahon thieng kelena.

⁴Male Jisua'n a kôm han, “Rangâi roh! Tute ril no roh, hannirese, Ochai kôm thengpat inla, va min en roh; hanchu mi murdîn na damzoi, ti an rietna rangin Moses'n inbôlna pêk ranga a lei khâmsai hah va pêk roh a tipea.”

Jisua'n Rom râlmi ruoipu tîrlâm a mindam

(Luk 7:1-10)

⁵Jisua capernaum khuoa a hong lûtin chu, Rom râlmi ruoipu ahon tongpuia san rangin ânviua:

⁶“Pu, ki tîrlâm damloiin insûnga jâlmuna sînginsa theiloiin ana sabakin aom,” a tia.

⁷Jisua'n, “Hong ka ta mindam ki tih,” a tia.

⁸Ruoipu han a kôm, “O Pu, ma anghan nimak,” tiin a thuona. “Ki ina chu nu lûtina ngâi jât nimak. Chongbâi korongin tiin la ki tîrlâm dam kelen a tih.

⁹Kei khom ruoipu inchungtak rachamneina nuoa om ki nia, male ku nuoa khom râlmingei an oma. Mi inkhat kôm, ‘Se roh!’ tiin chong ke pêkin chu a se ngâia, midang inkhat kôm ‘Hong roh!’ tiin chong ke pêkin chu a hong ngâi; male ki tîrlâm kôm khom, ‘Mahi sin roh!’ ki tiin chu a sin ngâi.”

¹⁰Jisua'n ma chong hah a rietin chu a kamâm sabaka, loko a jûngei kôm han, “Nangni ki ril, Israelngei lâia khom tute hima dôra taksônna dôn hi chu la mu tet ngâi mu-ung.

¹¹Adiktakin nangni ki ril, nisuo tieng le nitâk tieng renga mi tamtak hong an ta, Abraham, Isaac, Jacob ngei kôm invân Rêngrama ruolhoia insung an tih.

¹²Aniatachu Rêngram nâingei hah chu pêntieng ijînga paiin om an ta, male mahan chap le hâ rielin om an tih.”

¹³Male Jisua'n râlmi ruoipu tîrlâm kôm han, “Ni ina se ta roh, ni iem angin nata rangin sin nîng atih,” a tia. Hanchu ma mit misim kongkâr han râlmi ruoipu tîrlâm hah a dam zoi.

Jisua'n mi tamtak a mindam

(Mk 1:29-34; Luk 4:38-41)

¹⁴Jisua hah Peter ina a sea, Peter tarpi jâlmuna jâlin ritun damloiin a juong mua.

¹⁵Amanu kut hah a tôn pea, a mintun hah a mathâna, male ânthoia a sin a tho pe zoi ani.

¹⁶Kholoi ahong nînchu, mipui ngeiin, Jisua kôm ramkhorî sûr mi tamtak an hong tuonga. Jisua'n chongbâiin ratha saloi ngei hah a notpaia, male damloi murdi khom an dam sa zoi.

¹⁷Dêipu Isaiah'n, “Ama lelên ei natna ngei a lâk paia, ei damloina ngei a pêl zoi,” tia alei misîr hah ahong tung adik theina rangin maha a tho ani.

Jisua jûi rang a bôkngai

(Luk 9:57-62)

¹⁸Jisua'n mipui ngei an hong ûm a mûn chu, dîl râl tienga inkân rangin a ruoisingei chong a pêk ngeia.

¹⁹Balam minchupu a kôm ahonga. “Minchupu,” “Ne sena muntina nangma leh se rangin inthoksai ki ni zoi,” a tia.

²⁰Jisua'n a kôm han, “Sialngei kuo an dôna, vangei khomin rubu an dôna, aniatachu Miriem Nâipasal chu a lu minngamna rang luô dôn mak,” tiin a thuona.

²¹Midang inkhat, ruoisi lâia mi han a kôm, “Pu, insûnga mi min se nôk inla, ka pa la vaphûm bak hi rong,” a tia.

²²Jisua'n a kôm han, “Ni jûi roh, mithi ngeiin an mithi champui chu phûm rese ngei,” tiin a thuona.

Jisua'n phâivuopui a ngomindâi

(Mk 4:35-41; Luk 8:22-25)

²³Jisua rukuong chung a chuonga, a ruoisingei khom ama leh an se sa.

²⁴Inningloiin phâivuopui râtak hah dîl ahong dea, male rukuong hah ngîm rang dôrin tuidâr ânsoka. Aniatachu Jisua chu a lei inphara.

²⁵Ruoisingei hah a kôm an sea, an va kaithoia. “Pumapa, mi sanmojôk ta roh! kin thi rang kêng ani zoi!” an tia.

²⁶Jisua'n an kôm han, “Ithomo nin chi bâka?” “Nin taksôna dôn khom hi idôrtaka chîn mo ani zoi!” tiin a thuona. Hanchu ânthoia, phâivuopui le tuidârinsok hah mong rangin chong a pêka, male chu ânthim ngung zoi.

²⁷Mi murdi'n an kamâm sabaka, “Hi mi hih kho anga miriem mo ani hi? Phâivuopui le tuidârinsok ten khom a chong an jôm hi!” an tia.

Jisua'n ramkhorî sûr mi inik a mindam

(Mk 5:1-20; Luk 8:26-39)

²⁸Dîl râl tieng Gadara rama Jisua a hongtung lehan, ramkhorî sûr mi inik thân renga hongsuok ngeiin an intongpuia, Ma ngei hah chi an om sikin ma lampuia han tute se ngam ngâi mak ngeia.

²⁹Harengan anni hah an in-ieka, “Pathien Nâipasal, imo mi lo rang ni ti? Zora khâm atung mân dûk mi tho ranga juong mo ni ni?” an tia.

³⁰Ala bâkloina han vok pâlpa sâk rok an oma.

³¹Masikin ramkhorîngei han, “Mi ni rujûl rangin chu vok pâlgei sûnga son mi min se roh,” tiin Jisua an ngêna.

³²Jisua'n, “Se roi,” a tipe ngeia; hanchu an jôka, vokngei sûnga an va lûta. Vok pâl murdi hah dîl rakham rôlsora an tâna, dîla an tâkriei zoi ani.

³³Vok donsûi mingei hah an tâna, khopui sûnga an sea, a thurchi anrêngin an va misîra, ramkhorî sûrgei chung a neinin omtie ngei murdi khom hah an va misîr zoia.

³⁴Masikin khopui renga mi murdi Jisua intongpui rangin an suoka; male an va mua anin chu, an ram renga jôkpai rangin an ngên zoi.

Matthew 9

Jisua'n mi phalkhatthi a mindam

(Mk 2:1-12; Luk 5:17-26)

¹Jisua rukuonga a chuonga, dîl râl rakânin a omna khopui tieng a kîr nôka,

²mahan mi senkhat ngeiin phalkhatthi a jâlmun leh a kôm an hong rojôna. Jisua'n taksôn an dôntie hah a mua, phalkhatthipa kôm han, “Ka nâipasal rathannam takin om roh! na nunsiengei ngâidam ani zoi,” a tia.

³Hanchu Balam minchupu senkhat ngeiin an mulungrîlin, “Hi mi hin Pathien a rilsiet kêng!” an tia.

⁴Jisua'n an mulungrîla an mindon ngei hah a lei rieta, masikin an kôm han, "Ithomo ma anga neinun saloi hah nin mulungrîla nin mindon?"

⁵'Nu nungsiengi ngâidam ani zoi,' nônchu, 'Inthoi inla, lôn ta roh,' ti hih kho hi mo a ti abai uol?

⁶Miriam Nâipasal hih pilchunga nungsiengi ngâidam theina rachamneina a dôn, ti nangni lei min mu rong" a tia. Masikin phalkhatthipa kôm han, "Inthoi inla, na jâlmun luok inla, ni ina se ta roh!" a tipea.

⁷Ha mi hah ânthoia male a ina a se zoi.

⁸Mipui ngei han maha an mûn chu, an chia, miriemngei kôma ma anga rachamneina pêkpu Pathien an minpâk zoi ani.

Jisua'n Matthew a koi

(Mk 2:13-17; Luk 5:27-32)

⁹Jisua'n ha mun hah a mâka, a senân sum rusuongpu inkhat a riming Matthew an ti, a sukmana ânsung lâitak a mua, a kôm, "Ni jûi roh," a tipea. Matthew hah ânthoia, a jûi kelen zoi.

¹⁰Jisua hah Matthew ina bu a nêk lâitakin, sum rusuongpu tamtakngei le mitelloi ngei an hongga, Jisua le a ruoisingei dosânga bu an nêkpui ngei sa zoi.

¹¹Pharisee senkhat ngeiin maha an mûn chu a ruoisingei kôm han, "Ithomo nangni minchupu'n hi anga mingei leh bu a nêka hi?" tiin an rekel ngeia.

¹²Jisua'n an chong hah a lei rieta, an kôm han, "Mi dam ngeiin doctor nâng ngâi mak ngeia, mi damloi ngei vaiin kêng an nâng ngâi.

¹³Pathien lekhabu'n: 'Lungkhamna kêng ku nuom, inbôlna sa ngei nuom mu-ung,' a ti hih, se unglâ a omtie va riet roi. Midikngei ralam ranga juong ni mu-unga, midikloingei ralam ranga juong kêng ki ni," tiin a thuan ngeia.

Bungêi chungroia chongrekel

(Mk 2:18-22; Luk 5:33-39)

¹⁴Male, Baptispu John nûkjûi ngei Jisua kôm an hongga, "Ithomo keini le Phariseengei hin bungêi kin tho bang ngâia, na ruoisingei rêkinte an ngêi tet ngâi loi?" tiin an rekela.

¹⁵Jisua'n an kôm han, "Inneina sâknêk thona taka khuolmingei hah moipumapa an kôm aom sângin an beimindong rangin nin mindon mini? Ni thei no ni! Hannirese, an kôm renga moipumapa an tuong pai pe nikhuo la tung ata, ma tikin chu bu la ngêi an tih.

¹⁶"Tutên puon muruo hah puon thar hâr leh chitpho ngâi mak ngeia, puon thar hah inchirup ata, puon an ongna hah manêkin lien uol nôk atih.

¹⁷Tutên uain thar savun ûm muruo thun ngâi mak ngeia, thun ngân senla, uain thar han savun ûm hah mûtkhoi ata, uain le savun ûm hah mangnaboi chang

atih. Manêkin chu uain thar chu savun ûm thara an thuna, an ruonin asa ngâi a tia.”

Zairus nâinupang le Jisua puonmor tôn nuvengte

(Mk 5:21-43; Luk 8:40-56)

¹⁸Jisua'n hi chong hih a misîr lâitakin, Juda ruoipu inkhat a hongga, a makunga, khûkinbilin a kôm han, “Ka nâinupang atûn renghan a thia; aniatachu hong inla, a chungga nu kut minngam inla, hong ring nôk a tih,” a tia.

¹⁹Masikin Jisua ânthoia male a jûia, a ruoisingei khom ama leh an se sa.

²⁰Nuvengte inkhat kum sômleinik hulloia damloinu han Jisua nûka a hongga male a puonmor a tôna.

²¹Amanu nanâkin “A puon morte luo khom tôn inlang chu dam kelen ki tih,” a tia.

²²Jisua ânhei titira male amanu hah a mua, a kôm, “Ka nâinupang rathanngam takin om roh! na taksônna hih na dampuina ani,” a tia. Ha mit misim kongkâr han nuvengtenu hah a hong dam zoi.

²³Hanchu, Jisua hah ruoipu ina han a lûta. Berlem tum ngâi ngei le mithi-uop mipui kuorchok omngei hah ava mûn chu an kôm han,

²⁴nin rêngin “Jôkpai roi! Nupangte hih athi nimaka, a in kêng!” a tia. Hanchu anni han ama hah an munuisana.

²⁵Hannirese, mipui ngei an notpai ngei suole harengan, Jisua hah nupangte omna khâltana han a lûta a kut a sûr pea nupangte hah a hon thoi zoi.

²⁶Ma roi hah ma ram pumpuia han ânthang zit zoi.

Jisua'n mitcho inik a mindam

²⁷Jisua'n ma mun hah a mâka, ava sên chu mitcho inikin an jûia, “David Nâipasal, inrieng mi mu roh!” tiin ân in-ieka.

²⁸Jisua insûnga a lûtin chu, mitcho inik ngei hah a kôm an hongga, male Jisua'n an kôm, “Nangni mindam thei ki tih, ti nin iem mo?” tiin a rekel ngeia. “O kin iem, Pu!” tiin an thuona.

²⁹Male Jisua'n an mitngei a tôna, an kôm, “Nin iem anghan nin chungga tung rese!” a tia.

³⁰Hanchu an mit ahong vâ pe ngei zoi. Jisua'n, “Mahi tute kôm ril no roi!” tiin chong a be ngei sabaka.

³¹Hannirese, anni ngei hah an sea, ma ram pumpuia han Jisua chungroi hah an va mazarzit zoi ani.

Jisua'n pasal chong theiloi a mindam

³²Ha mingei hah an mâkin chu, mi senkhat ramkhorî sôr chong theiloi inkhat Jisua kôm an hong tuonga.

³³Aniatachu ramkhorî hah notpai ani suole, harengan ma miriem hah a hong chong thei zoia, mi murdi'n an kamâm sabak zoi. "Israelngei lâia hima anga mi reng hih la mu ngâi mak me!" an tia.

³⁴Aniatachu Phariseengeiin chu, "Ramkhorîngei an ulientakpa'n kêng Jisua hih ramkhorî rujûl theina ranak a pêk ani hi," an tia.

Jisua'n mipui ngei inriengmuna a dôn

³⁵Jisua'n khopuingei le khuo chîn ngeia a chai titira. Synagog inngeia a minchua, Rêngram Thurchi Sa a misîra, damloi murdi le natna jât tamtakngei a mindama.

³⁶Mipui ngei hah a mûn chu, a mulungrîla anni ngei inriengmunân a sipa, belringei ahôlpu boi angin, kângdoiin le san rang boiin an om anni sîkin.

³⁷Masikin a ruoisingei kôm han, "Bu ât rang chu atam sabaka, aniatachu, a mintûp ranga sinthopungei chu tômte an ni.

³⁸Masikin a bu ât ranga sinthopu ngei a juongtîrna rangin bu pumapa kôm han chubai tho roi," a ti.

Matthew 10

Tîrton sômleini ngei

(Mk 3:13-19; Luk 6:12-16)

¹Jisua'n a ruoisi sômleini ngei hah a koitûp ngeia, ratha saloi ngei rujûlpai theina le damloina le ri murdi mindam theina ranak a pêk ngeia.

²Tîrton sômleini ngei rîming chu hi ngei hih an ni: Amotontaka Simon (Peter an ti) le a nâipa Andrew; Jebedee nâipasal inik Jacob le a nâipa John,

³Philip le Bartholomew; Thomas le chôiruol rusuongpu Mathew; Alphaeus nâipasal Jacob le Thaddaeus;

⁴Canan mi Simon le a minsûrpu Judas Iscariot ngei an ni.

Sômleini ngei an sintho rang

(Mk 6:7-13; Luk 9:1-6)

⁵Hi miriem sômleini ngei hih Jisua'n a tîr ngeia, an kôm hi angin a ril ngeia: "Jentailngei rama le Samari mingei khopuingeia chu se no roi.

⁶Manêkin, Israel mingei lâia belri inmangngei kôm nin se rang ani.

⁷Se unglâ, 'Invân Rêngram chu anâi zoi!' tiin va misîr roi.

⁸Damloingei mindam unglâ, athi ngei kaithoi unglâ, aphârngei minthieng unglâ, ramkhorîngei rujûlpai roi. Manboia nin man ania, manboi nanâkin pêk roi.

- ⁹Nin pepa rângkachak sumdâr mo, ruphâi mo, sumpen mo chôi no roi;
- ¹⁰nin chaina rangin cholite mo, kancholi bob mo, kekok bob mo, khiengrol bob mo chôi no roi. Sinthopungei chu an nângngei hah pêk rang ani.
- ¹¹“Khopuia mo, khochinna mo nin lûtin nangni mintung rang nuoma nangni lei phâm mi rok unglâ, ma mun hah nin mâknôk mâka chu ama kôm han om tit roi.
- ¹²Insung nin lûtin chu, ‘Nin chungâ rathanngamna om rese,’ ti roi.
- ¹³Ma ina omngei han nangni an lei modômin chu nin rathanngamna chibaimûkna hah an chungâ tung rese; hannirese nangni an lei modôm nôn chu nin chibai chongbâi hah lâk mikhîr nôk roi.
- ¹⁴Male, kho in khoma, kho khuo khoma nangni an lei phâm noa, nin chong an rangâi nôn chu ma mun hah mâkrak unglâ, nin kea pildi hah không mathâk roi.
- ¹⁵Adiktakin nangni ki ril, Roijêk Nikhuon chu ha khopuia mingei tuong rang nêkin chu Pathien'n Sodom le Gomora khopuia mingei tuong rang chu inriengmuna minlang uol a tih!”

Nuomlonangei hongtung rang

(Mk 13:9-13; Luk 21:12-17)

- ¹⁶“Rangâi roi! Melang pâl kêra belri om angin nangni ki tîr ani. Murûngei anghan vârin le vasu-ngei anghan nuninêmin nin om ngêt rang ani.
- ¹⁷Aniatachu indîn roi, nangni sûra, roijêknâmunâ nangni tuonga, synagog inngeia nangni vîk rang an om rang sikin.
- ¹⁸Keima sika roijêkpungei le rêngngei makunga lân ding nin tih, anni le Jentailngei Thurchi Sa nin misîr pe ngei theina rangin.
- ¹⁹Nin chung roijêk ranga nangni an tuong tika, imo nin ti rang aninônchu kho angin mo nin ti rang lei mindonin nan kângmindoi no roi; azora ahong tungin chu nin ti rang hah pêkin om nin tih.
- ²⁰Chong nin ti rang ngei hah nangni nin chong nino nia; nin Pa Ratha renga juongin nangnia a chong rang ani.
- ²¹“Miriemngeiin an lâibungngei nanâk khom that rangin la minsûr an ta, ma angdên han pangei khomin an nângei la minsûr sâng an ta; nângei khomin an nulepangei doi an ta male that ngei an tih.
- ²²Keima sikin mitinin nangni mumâk an tih. Aniatachu tukhom among dêna tuongdierpu chu sanminringin om an tih.
- ²³Khopui inkhata an nuom nangni an lôn chu khopui danga rotpat roi. Adiktakin nangni ki ril, Miriem Nâipasal a juong mân Israel rama khopuingei murdia nin sintho zoi no tunui.

24“Inchulâi hah a minchupu nêkin lien uol mak; suok khom a pu nêkin lien uol mak.

25Masikin inchulâi hah a minchupu angin hong om rang hah a mulung a minchuk rang ani, tîrlâm khom a pu angin hong om rang hah a mulung achuk rang ani. In pumapa luo Beelzebul, tiin an koiin te, a in mingei vang chu khodôra riming saloi uolin mo an koi rang ni zoi!”

Tumo chiruo

(Luk 12:2-7)

26“Masikin miriemngei hah chi no roi. Atûna thupa om murdi lân lang let ata, ippa om murdi la phuong nîng atih.

27Ajînga nangni ki ril hih sînkhovâra misîr ungla, kuor kunga nin riet hih inchungspâ chuongin tânghai roi.

28Taksa thata ratha that theiloi ngei chu chi no ungla; manêk han Pathien meidîla taksa le ratha anruona that theipu hah chi roi.

29Invâ inik poisakhatin nin rochôk thei, nikhomrese, an lâia inkhat luo nin Pa rachamin ninôn chu pilchunga tak noni ngei.

30Ma anghan nangni rang khom nin samsang tena khom tellet kêng ani.

31Masikin chi no roi; invâ tamtakngei nêkin nin lût uol ok kêng!

Khrista thop le heng

(Luk 12:8-9)

32“Tutu loko rieta ni thop kai chu kei khom invâna ka pa makunga thop ki tih.

33Aniatachu tutu loko rieta ni heng kai chu invâna ka Pa makunga heng ki tih.

Inngêina niloiin, khandai minlêng rang roi

(Luk 12:51-53; 14:26-27)

34“Rammuola hin inngêina minlêng ranga juongin mi mindon no roi. Inngêina minlêng ranga juong ni mu unga, khandai minlêng ranga juong kêng ki ni.

35Nâipasalngeiin an pangei mindoi rang, nâinupangngeiin an nungei mindoi rang, moi ngeiin an tarpingei mindoi ranga juong kêng ki ni;

36na râl saloitakngei chu ni insûng mingei nanâk nîng an tih.

37“Tutu keima nêka an nungei mo, an pangei mo lungkham uol ngei chu ku ruoisi rangin chuk mak ngei; tutu keima nêka an nâipasalngei mo, an nâinupangngei mo lungkham uol ngei chu ka ruoisi rangin chuk mak ngei.

38Tutu an khros ruputa ku nûk jûiloi ngei chu ku ruoisi rangin chuk mak ngei.

39Tutu an ringna man rang bôk ngei kaiin chu machân an ta; aniatachu, keima rang sika an ringna machân ngei kaiin chu man uol an tih.

Râisânmanngai

(Mk 9:41)

⁴⁰“Tukhom nangni modôm chu keima ni modôm ani, tukhom keima ni pom chu mitîrpu a pom ani.

⁴¹Tukhom Pathien tîrlam hah Pathien tîrlam anina sikin a lei modômin chu Pathien tîrlam, râisânman chang sâng a tih. Tukhom misa hah misa anina sikin a lei pomini chu misa râisânman chang sâng a tih.

⁴²Tukhom ku nûkjûi ngei lâia a chîntak khom ka ruoisi anina sikin tuidâi kilât khat khom lei min nêk chu, nangni ki ril, râisânman chu man ngêt a tih,” a tia.

Matthew 11

Baptispu John renga tîrlamngei

(Luk 7:18-35)

¹Jisua'n hi rilnangei hih a ruoisi sômleini ngei kôm a pêk suo lechu, ma mun hah a mâka, male a revêla khopuingeia minchu rang le thurchi misîr rangin a se zoia.

²Baptispu John'n Jisua sintho ngei hah jêl ina a lei rietin chu, a ruoisingei senkhat Jisua kôm a tîra.

³Jisua kôm han, “Ni ril roh, ‘John'n a juong rangpu a ti hah nini mo?’ Aninônchu mi dang kin la sabei rang mo?” tiin an rekela.

⁴Jisua'n an kôm, “Se nôk unglâ, neinun nin mu le nin riet ngei hih John kôm va ril roi:

⁵mitcho ngeiin an mu thei zoi, kholrangeiin an lôn thei zoi, vun ri saloitak ngei minthieng ani zoi, kuorsêtngei khom an riet thei zoi, athi ngei minring nôk ani zoi, inriengngei kôm Thurchi Sa misîr ani zoi.

⁶Tutu ku chungroia mulungokchâna neilo ngei chu satvur an ni!” tiin a ani thvon ngeia.

⁷John ruoisingei hah an se nôkin chu, Jisu a'n lokongei kôm han John chungroi a misîra: “John kôm ramchâra nin se lâihan imo mu rangin nin sabei ha? Phâivuo'n sûl ngei asêm minkûm hah mo?

⁸Imo en rangin nin se? Mi puon innêmngei leh invo mo? Ma anga ânvo ngâi mingei chu rêng-ina kêng an om ngâi!

⁹Ni ril roi, imo en rangin nin se? Dêipu mo? Ani tatak, aniatachu, dêipu nêka lien uol ok nin mu hi te.

¹⁰John chungroi rang hi kêng Pathien Lekhabu'n, ‘Pathien'n ki tîrlam no motona na lampui mo-ong rangin tîr ki tih,’ a lei ti hah ani.

11 Adiktakin nangni ki ti, Baptispu John nêka lien uol tute lân zir ngâi mak ngei. Hannirese, invân Rêngrama a chintakpu khom John nêkin chu alien uol ani.

12 Baptispu John'n a thurchi a misîr lâi renga aviensûn tena invân Rêngram chu rangrâta doina ngei atuong ngâia, mi tukdullien ngeiin ma ram hah lâk rang an pût ngâi.

13 Dêipungei murdi le Moses Balam chong han John juong om dênin, Rêngram Thurchi an misîra;

14 an thurchi misîr nin iem nuomin chu, a juong rang chongphuonga lei om chu, John hih Elijah ani.

15 Hanchu, kuor nin dônin chu rangai roi!

16 “Atûn lâia thoitharngai hih ile mo ki mintêk rang? Nâipangngai bazar muna insungngai angin an ni, pâl khatin pâl dangngai an mi-ieaka,

17 “Inneina miringhoi nangni kin tum pea, aniatachu, lâm mak cheia! Chûlna la kin tho khomin chap mak chei!”

18 John a juong lâihan bu a ngêia, uain nêk maka, mitinin, ‘Ama chu ramkhorî sût kêng an tia!’

19 Miriem Nâipasal chu a juonga, a sâka, a nêka, mitinin, ‘Hi mi hih en ta u! Bu mudupa le uain mudupa, sum rusuongngai leh midikloi ngei malpa so!’ an tia. Nikhomrese, Pathien vârna chu adik iti a mara han minlangin aom ani,” a tia.

A iemloi khopuingei

(Luk 10:13-15)

20 Jisua'n sininkhêl a thona khopuingeia mingei han an nunsienangei renga inhei mak ngeia, masikin ha khopuingei hah a ngo ngeia.

21 “Korazin, nu chungroi arik bah na! Bethsaida, khom nu chungroi arik bah na! Nangnia sininkhêl sina omngai hah Tyre le Sidon'a lei sin nisenla chu, ma taka mingei han an nunsiena ngei renga an inhei minlangnân thoilapuon insilin ruvuta an inbuolna sôt atih zoi!

22 Adiktakin nangni ki ril, Roijêk Nikhuon chu Pathien'n nangni nêkin chu Tyre le Sidon mingei chungga mulungjûrpuina minlang uol atih!

23 Nangma, Capernaum rang khom! nangma nethenin invân dênin indomsâng rang nu nuom mini? Meidîla vôrpaî nîng ni tih! Nu sînga sininkhêl sina omngai hah Sodom'a lei sin nisenla chu aviensûn tena hin la om tit atih!

24 Nang ki ril, Roijêk Nikhuon chu Pathien'n nangma nêkin chu Sodom chungga mulungjûrpuina minlang uol atih!” a tia.

Ko kôm hong unglâ inngam roi

(Luk 10:21-22)

²⁵Ma zora lâihan Jisua'n, "Pa, invân le pilchung Pumapa! mivâr, mitheingei kôma ni ip hah mi inmôlgei kôm ni minlang sikin no kôm râisânchong ki ril.

²⁶Ani, Pa, ma anga hongni rang hah nu lungdo tak ani.

²⁷"Neinunngai murdi ka Pa'n ni pêk zoi. Pa tiloiin chu tutên Nâipasal hah riet mak ngei, male Nâipasal tiloiin chu tutên Pa khom riet mak ngei, Nâipasalin ân phuongna ranga a thang ngeia tiloiin chu.

²⁸"Nangni, puok rik pêla sôlgei, nin rêngin ko kôm hong ungla, keima'n inngamna nangni pêk ki tih.

²⁹Ki ringkol lâk ungla pêl roi, male ko kôm inchû roi, ratha han nuninnêm tak le rangâiinchîn tak ki ni sikin; inngamna man nin tih.

³⁰Ki ringkol nangni ke pêk rang chu apêl ahoia, ku puok khom ajângheie ani," a tia.

Matthew 12

Sabbathni chungroia chongrekel

(Mk 2:23-28; Luk 6:1-5)

¹Sûn sôtbâkloi suolechu Sabbathnin Jisua bubilngeia a lônâ. A ruoisingei an von achâma, masikin buvûingei chinin an chipa.

²Phariseengeiin an mu'n chu, Jisua kôm, "En ta, Sabbathnia nu ruoisingeiin an tho hih ei Balamin ai khap ani!" an tia.

³Jisua'n an kôm, "David le a mingeiin an vonchâm lâia an tho hah nin la pore tet ngâiloi mo?"

⁴Ama hah Pathien ina a lûta, ama le a mingeiin Pathien kôma pêksai vâipôl, an sâk ranga Balamin ai khap ochaingei vaiin an sâk ranga phala omngâi vâipôl hah an sâk ani.

⁵Aninônchu, adiktakin Sabbathni racham ochai Biekina omngâi ngeiin Sabbathni balam an minchâi ngâia, hannoma, theiloiintum ngâi mak ngei ti Moses Balam lekhabu nin la pore loi mo?"

⁶Nangni ki ril, mahin neinun imini Biekin nêka roiinpui uol aom.

⁷Pathien lekhabu'n, 'Inbôlna nuom mu-unga moroina kêng ku nuom,' ai ti hih a omtie nin riet minthâr tatak nisenla chu minchâinaboi mingei hah theiloi mintum no tunui;

⁸Miriam Nâipasal hih Sabbathni Pumapa ani sikin," a tia.

Jisua'n pasal kut kângkhat phalkhatthi a mindam

(Mk 3:1-6; Luk 6:6-11)

- ⁹Jisua'n ha mun hah mâkin synagog ina a lûta,
- ¹⁰mahan mi inkhat kut phalkhatthi alei oma. Mi senkhat Jisua a tho minchâi tia nôn nuom ngei an lei om sa, masikin anni han a kôm, "Sabbathnia mi mindam hih ei Balamín a khap mo?" tiin an rekela.
- ¹¹Jisua'n an kôm, "Nin lâia tumakhatin belri inkhat dôn senla male Sabbathni han khur inthûka tâk pe senla, juong rûtin nin kelsuo loi rang mo?"
- ¹²Miriam chu belri nêkin a lut uol ok ani! Masikin, Sabbathnia tumini san rangin ei Balamín mi phal ani," tiin a thuona.
- ¹³Male kut phalkhatthipa kôm han, "Nu kut phar roh," a tipea. A kut a phara, kângkhat tienga angin a hong dam phar zoi.
- ¹⁴Hanchu Phariseengei hah an rota male Jisua that rangtie an mintuo zoi.

Pathien tîrlâm thang

- ¹⁵An that rangtie an phan chungroi hah Jisua'n a rietin chu ha mun renga hah a rota; lokongeiin a nûk an jûi zoi. Damloi ngei murdi a mindam ngeia
- ¹⁶male ama chungroi tute kôm misîr loi rangin chong a pêk ngeia.
- ¹⁷Masikin, Pathien'n dêipu Isaiâh kôma alei ti hah ajuong tung adik theina rangin mahi a tho ani:
- ¹⁸"Mahi ki tîrlâm, ka thangsaipu hah, ku lungkhampu, le a chungka ku mulungtâiriempu hah ani. A chungka ka ratha tîr ka ta, male ama'n namtingei kôm ko roijêkna phuông a tih.
- ¹⁹Ama chu makhal nonia, hanchu in-ieak uol nonia; aninônchu lamlienngiea khom ruhulum tho noni.
- ²⁰Ama'n lâiluông inkûichara om hah khiekpai nonia, aninônchu châti meiduoiriep hah khâipai no nih. Roijêkdikna han a zoi mâka chu khan tit a ta,
- ²¹male mingei murdi'n ama chungka han an sabeina minngam an tih."

Jisua le Beelzebul

(Mk 3:20-30; Luk 11:14-23)

- ²²Hanchu mi senkhat ngeiin Jisua kôm han mi inkhat a mitcho le ramkhorî sûr sikin chong theiloî an hong tuônga. Jisua'n ama hah a mindama, masikin ama hah a chong theia, a mu thei zoi ani.
- ²³Jisua sintho hah lokongei murdi'n an kamâm sabaka, "Ama hih David Nâipasal ni thei ni mo?" tiin an rekela.
- ²⁴Maha Phariseengeiin an rietin chu, "Hi mi hin ramkhorîngei a rujûl theina chu an rêngpa Beelzebul'n ranak a pêk sikin ani," tiin chong an mele.

25Jisua'n imo an mindon hah a rieta, masikin an kôm, “Kho ram khom apâlpâlin an insema an indoi inlômin chu sôl ngâi mak. Kho khopui khom, aninônchu insungmingei khom apâlpâlin an insenna an indoi inlômin chu an inlet rang ani.

26Masikin soitan rama khom pâl khatin pâl dang an doiin chu, pâl an insen tina nîng ata, male ânlet kelen rang ani!

27Beelzebul'n ranak ni pêk sikin ramkhorî ngei ku rujûl thei nin tia. Asa, nônchu, nin nûkjûi ngei hah tumo ranak a pêk ngeia anni ngei han an rujûlpai ngâi? Nin nûkjûingei nanâkin an lei tho ngâi han nin tho minchâina a minlang ani!

28Nimak, mahi Beelzebul nimaka, Pathien Ratha kêng ramkhorî rujûlpai theina ranak ni pêk, mahin Pathien Rêngam nin kôm a juong tung zoi ti a minlang ani.

29“Tutên mi rât ina lûtin a neinunngêi lâk pe thei no nih, mi rât hah a khit bak nônchu; hanchu a in hah minram pe thei a tih.

30“Tutu keima ranga niloi kai chu atatakin mi doi ani; tutu a mintûp ni sanloipu chu ataktakin chekaminchâi ani.

31Masikin nangni ki ril, mingei an sietna murdi le Pathien doia asaloî an ti ngei murdi chu ngâidam thei nîng ata; aniatachu, Ratha Inthieng doia asaloî an ti ngei chu ngâidam nino nih.

32Tutu Miriem Nâipasal doia asaloî an ti ngei chu ngâidam thei nîng ata; aniatachu, tutu Ratha Inthieng doia asaloî an ti ngei chu atûn le tuonsôtin ngâidam nino nih.

Thingkung le amara

(Luk 6:43-45)

33“Mara sa dôn rangin chu thingkung adam nin dôn ngêt anâng; thingkung damloi nin dônin chu mara saloi dôn nin tih. Thingkung chu a marân riet thei ani.

34Murûl ngei nangni asaloî lei ni chienin kho-angin mo chongsa nin tho thei ranga? Mulung sûnga sipa liem hah kêng bâiin ai suo ngâi ani.

35Mi sân a rochonkok renga neinun sa a kaisuo ngâia; mi saloiin chu a rochonkoka neinun saloi a kaisuo ngâi.

36“Nangni ki ril, Roijêk Nikhuon chu mitinin chongkâmboi an tho ngei hah la misîr let an tih.

37Minchâinaboi mo ni ni aninônchu theiloîintum mo ni ni minthârna rangin no chongngei hah mangin nu chungroi jêk nîng atih.”

Sininkhêl tho rang an zong

(Mk 8:11-12; Luk 11:29-32)

38Hanchu Balam minchupu senkhat le Pharisee senkhat ngeiin a kôm, “Minchupu, sininkhêl no tho mu rang kin nuom,” an tia.

³⁹Jisua jâminzalin an kôm, “Atûnlâia mingei idôrtaka saloi le Pathien dônloi mo nin ni zoi!” Sininkhêl tho rangin mi nin ngêna? Nimak! Dêipu Jonah sininkhêl tho tilooin chu sininkhêl dang nangni pêk ni no nih.

⁴⁰Jonah hah sûnthum jân thum ngapui vonsûnga a oma, ma angdên han Miriem Nâipasal hih sûnthum jân thum pil inthûk sûnga aom rang ani.

⁴¹Roijêk Nikhuon chu Nineveh mingei hah inding an ta, nangni nôn an tih; anni chu Jonah thurchi misîr an rieta; an sietnagei renga an inhei sikin; male nangni ki ril, Jonah nêka lien uol mahin aom!

⁴²Roijêk Nikhuon chu Rêngnu Sheba hah inding a ta, nangni nôn a tih, Rêng Solomon vâ minchûna rangâi rangin a ram latak renga a hong sikin; adiktakin nangni ki ril, Solomon nêka lien uol mahin aom!

Ratha saloi hongkîr nôk

(Luk 11:24-26)

⁴³“Ratha saloi hah mi sûng renga a jôkin chu inngâmna mun rokin tui boina rama a chai titira, aman loi tika chu,

⁴⁴‘ki ina kîr nôk ki tih’ a tia. Hanchu a kîr nôka, a in atongrieiin, phiet minsâivarin, le cherêl irin ava mua.

⁴⁵Hanchu, a jôkpaia ratha dang sari ama nêka puoloi uol a hong tuong ngeia, mahan an lûta, an om zoi. Masuole chu ha miriem nunchan hah aphuta nêkin a puoloi uol ok zoi. Hima ang hin atûnlâia mi saloi ngei chungala tung rang ani,” a tia.

Jisua nû le lâibungngei

(Mk 3:31-35; Luk 8:19-21)

⁴⁶Mipui ngei kôm han Jisua ala chong lâitakin, a nû le lâibungngei an hong tunga. Ama chongpui nuomin, pêntieng an indinga.

⁴⁷Masikin ha muna mi inkhatin a kôm, “En ta, nu nû le na lâibungngei nang chongpui rang an nuoma pêntieng nang an ngâk,” a ti pea.

⁴⁸Jisua'n a kôm, “Tumo ku nû? Tumo ka lâibungngei?” tiin a thuona.

⁴⁹Male a ruoisingei tieng a khînna, “En roi! Hi ngei hih ku nû le ka lâibungngei an ni!

⁵⁰Tutu invâna Ka Pa lungdo sinngei hih ka lâibungngei, ka sarnungei, ku nû ngei an ni,” a tia.

Matthew 13

Sachirethepa chongmintêk

(Mk 4:1-9; Luk 8:4-8)

- ¹Mani sùn nanâk han Jisua hah in mâkin dîl rakham tieng a sea, mahan minchu rangin ânsunga.
- ²Loko ahong intûp hah an tamrai sikin rukuonga ânsunga, loko ngei chu dîl rakhama an indinga.
- ³Chongmintêkngai mangin neinun tamtak a misîr pe ngei. “Rangai ta u, voikhat chu mi inkhatin burît rangin a sea.
- ⁴Loilâia sachi a rethea, senkhat lampui kôla achula, vâ ngei an hong a an sâkripa.
- ⁵Senkhat lungpherpha chung a pil inphânna achula, pil abitloi sikin a hongkei kelena.
- ⁶Aniatachu nisa ahôn sânga, alumin bukung innoinarte hah a em minthêma, aruzung mathâk hah ânthûkpe loi sikin achârip zoi.
- ⁷Sachi senkhatngai chu riling râng kêra achula, riling hah ahong insôna, adîp min mang riei zoi.
- ⁸Aniatachu, senkhat chu pil sana achula, senkhat razan, senkhat sômrukin, senkhat sômthumin ahong inra zoi.”
- ⁹Male Jisua'n chongkhârnan an kôm, “Kuor nin dônin chu rangâi roi!” a tia.

Chongmintêkngai neinunkhîn

(Mk 4:10-12; Luk 8:9-10)

- ¹⁰Hanchu ruoisingei hah Jisua kôm an hong a, mipui ngei kôm thurchi ni misîrin “Ithomo chongmintêk na mang ngâia?” tiin an rekela.
- ¹¹Jisua'n an kôm, “Invân Rêngam chonginthup roia rietna chu nin kôm pêk ani zoia, midang ngei kôm chu pêk nimak.
- ¹²Tukhom neinun imini a dônsai kai chu pêk sa nîng ata, masikin ahundôr nêka tam dôn a tih; hannirese tukhom neinun ite dônloi chu a dônsai te hah khom lâk pe rip nîng a tih.
- ¹³An kôm chongmintêk manga ko chongpui ngei ngâina abitak chu an ena an mu loina rang, le an rangâia, aniatachu an rietthei loina ranga ani.
- ¹⁴Masikin dêipu Isaiah lei ril hah an chung a ahong tung ani: “Hi mingei hin rangâi an ta aniatachu rietthei noni ngei; en, en an ta aniatachu mu thei noni ngeia,
- ¹⁵an mulungngai alên môl zoia, an kuorngai an lei min sêt zoia, male an mitngai khom an lei sîng zoi sikin. Ninosenla, chu an mitin mûng an ta, an kuorin riet an ta, an mulungbôk ngeiin rietthei an ta, Pathien'n, ko kôm an hon heia, ke lei mindam ngei duoi mo tâk,” a tia.

16“Nangni rangin, idôra satvur mo nin ni zoi! Nin mitin a mua, nin kuorin a riet ani.

17Adiktakin nangni ki ril, nin mu hih dêipu tamtakngei le Pathien mi tam takngei mu rang an nuom sabaka, aniatachu mu thei mak ngei, nin riet khom hih a riet an nuom sabaka, hannirese riet thei mak ngei ani.”

Jisua'n sachirethepa chongmintêk a rilminthâr

(Mk 4:13-20; Luk 8:11-15)

18“Hanchu, rangâi unglâ, sachirethepa chongmintêk omtie hih inchu roi.

19Tutu khom Rêngam thurchi rieta, aniatachu rietminthârna dônloi chu sachi lampui kôla chul angin an ni. Misie hah a hongâ, an mulungrîla rethea om hah a lâkpai pe ngei ngâi.

20Sachi lungpherpha chungâ pil inphânna chul chu thurchi hah a riet lehan râisântaka pom kelen ngei hih an ni.

21Aniatachu ruzung inthûk amathâk loi sikin om sôt ngâi maka; ma thurchi sikin imokhat intakna mini nuomlona mini ahong om tena chu an mâk nôk kelen ngâi.

22Sachi, riling râng kêra chul chu thurchi lei rietsai ngei an ni; hannirese hi taksa ringnuna hoina le nei rang nuomna roia kangdôina ngeiin chongtak hah adîpa, mara dôn ngâi mak ngei.

23Hanchu sachi pil sana chul chu thurchi hah an rieta, male a rietthei ngei hah an ni. An mara ngei senkhat razan, senkhat sômrukin, senkhat sômthumin an hong pung ngâi,” a tia.

Bu rotholngei chongmintêk

24Jisua'n chongmintêk dang a rilngei nôka: “Invân Rêngam chu ma ang hin ani. Mi inkhatin a loia sachi sa rethepa leh mintêk ani.

25Jân khat chu mi an inriei suole, a râl ahonga, bu lâia han bu rothol arthea, a rotpat nôka.

26Hanchu bu hah a hong mônga, ahong vuiin chu bu rothol khom ahong inlang sa zoi.

27Loi pumapa tîrlâmngei hah an hongâ, a kôm, ‘Pu, no loia sachi sa nerthe hah; bu rothol so kho renga hong om mini?’ an tia.

28Ama'n an kôm, ‘mahah chu râlngei lei tho kêng,’ tiin a thuona. Anni han, ‘bu rotholngei so va chuon unglang nu nuom mo?’ tiin an rekela.

29‘Nâng mak,’ bu rothol nin chuonin chu butak khom nin phôidelsa rang kêng tiin a thun ngeia.

30 Bu ât zora dên mâka chu butak le arothol anruonin munkhatin insôn rese ngei. Hanchu bu ât ngâingei kôm bu arothol hah phoipaia, khita, hâl baka masuole butak hah ka sasiera thun rangin chong la be ta rong a tia.”

Ancham ru chongmintêk

(Mk 4:30-32; Luk 13:18-19)

31 Jisua'n chongmintêk dang a misîr pe ngei nôka, “Invân Rêngam chu min ancham ru a chôia, a loia a rethe ang hi ani.

32 Mahi chimuru murdi lâia a chîntak ani, aniatachu, ahong lien tikin chu chimu dang ngei nêka alientak ani ngâi. Thingkung ahong changa, masikin vâ ngei an hong, amachanga han rubu an phan ngâi,” a tia.

Chol chongmintêk

(Luk 13:20-21)

33 Jisua'n chongmintêk dang a misîr nôka: “Invân Rêngam chu nuvengte inkhatin chol a lâka vâipôl her sômminli leh athoi mâka tâidôna a minpola a bil angin ani,” a tia.

Jisua chongmintêk a mangna

(Mk 4:33-34)

34 Ha ngei murdi hah Jisua'n lokongei kôm chongmintêkin a ril ngeia; chongmintêk mang loiin chu an kôm han ite misîr mak.

35 Mahi a thona bi chu dêipu'n alei misîr: “An kôm chong ki rillin chongmintêk mang ka ta; Khuonsieng renga neinun inthupngei hah misîr pe ngei ki tih,” ti hah ahong tung adikna ranga ani.

Jisua'n bu rotholngei chongmintêk a rilminthâr

36 Jisua'n lokongei hah mâkin insûnga a lûtin chu a ruoisingei an hong, a kôm, “Loia bu rothol chongmintêk roi hah khoi tina mo mi ril roh,” an tia.

37 Jisua'n an kôm, “Mi sachi sa rethepu hah Miriem Nâipasal ania;

38 loi chu rammuol hih ani; Sachi sa chu Rêngam nâingei hih an ni, bu rothol chu Misie nâingei an ni;

39 male râl, bu rothol rethepu hah chu Diabol ani. Bu ât zora chu rammuol mongna rang nikhuo ania, bu âtpu ngei hah vântîrtonngei an ni.

40 Bu rotholngei hah an mintûpa, meia an hâl angdên han rammuol mong tika chu ala tung rang ani:

41 Miriem Nâipasal'n a vântîrtonngei hah tîr a ta, a Rêngam renga mi sietna sin ngâi ngei le saloi sin ngâi ngei chu minchun an ta,

42 mei thithe ngâiloia han pai ngei an ta, mahan chap an ta, an rakam riel an tih.

⁴³Hanchu Pathien mingei chu an Pa Rêngrama nisa angin vâ an tih zoi. Rangâi roi, kuor nin dônnin chu!

Rochon inthup chongmintêk

⁴⁴“Invân Rêngram chu mi inkhatin loilâia rochon phûm inrûkten amu suoka; a phûm nôka, a râisân rai sikin a sea, a dôngei murdi ava juor leta, a kîr nôka male ma loi hah a rochôk angin ani.

Lungmantam chongmintêk

⁴⁵“Invân Rêngram chu mi inkhatin lungmantam satak a roka,

⁴⁶lungmantam satak hah a mûn chu, a sea, a dôngei murdi ava juor leta, male ma lungmantam hah a rochôk angin ani.

Lên chongmintêk

⁴⁷“Invân Rêngram chu ngasûrpu senkhat ngeiin an lên dîla an vôra, nga jât dang an sûr angin ani nôk.

⁴⁸Lên hah asipmat tena chu dîl rakhama an kaisuo, mahan nga insem rangin an insunga: asa murdi chu koka an thuna asaloi kai chu an paia.

⁴⁹Rammuol mong tika chu ma anghan la nîng atih: vântîrtongei juong suok an ta, misangei lâi renga misaloingei hah mintûp an ta

⁵⁰mei thithei ngâiloia han pai an ta, mahan chap an ta, an hâ riel an tih,” a tia.

Chongtak athar le amuruo

⁵¹Jisua'n an kôm, “Ma neinungei murdi hah nin rietthei mo?” tiin a rekel ngeia. “O, kin rietthei,” tiin an thuona.

⁵²Ama'n an kôm, “Ma omtie chu, Balam minchupungei murdi invân Rêngrama ruoisi changngei kai chu, in pumapa a rochondarna khâltan renga neinun thar le neinun muruo a kaisuo angin ani,” a tia.

Nazareth a Jisua hengin aom

(Mk 6:1-6; Luk 4:16-39)

⁵³Jisua'n ma chongmintêkngai hah a misîr suolechu ma mun hah a mâka,

⁵⁴a omna ngâi khopui tieng a kîr nôka. synagog ina a minchua, a thurchi misîr ariet murdi'n chu an kamâm sabaka, “Hima anga vârna hih kho renga a man mo?” male “Sininkhêl sintheina hih kho renga a man mo?” tiin an rekela.

⁵⁵“Hi mi hih thing kutthiempu nâipasal hah nimak mo? Mary hah a nu nimak mo? A lâibungngei khom, Jacob, Joseph, Simon le Judas ngei nimak mo?”

⁵⁶A sarnungei khom hitaka om nimak ngei mo? Kho renga mo hi ngei murdi hih a man?”

⁵⁷Male ama hah an heng zoi. Jisua'n an kôm, “Dêipu chu a khopui sînga le a insîngmingei lâia tiloiin chu muntina an mirit ngâi,” a tipe ngeia.

⁵⁸Taksônna an dônloi sikin ma mun han chu sininkhêl sin mintam ok mak ani.

Matthew 14

Baptispu John thina roi

(Mk 6:14-29; Luk 9:7-9)

¹Ma zora han Galilee rama, rêng Herod'n Jisua chungroi a lei rieta.

²A sinthopu uliengei kôm han, “Hi mi hih Baptispu John, a hong ring nôk ngêt ani rang.” “Masikin kêng hi sininkhêl sintheina ranak hih a dôn,” a tia.

³Motona han Herod'n John hah a lei minsûra, a khita jêl-ina alei khum ani. Ma anga a thona bitak chu a lâibungpa Philip lômnua Herodias sika ani.

⁴Baptispu John han Herod kôm, “Herodias lômnua ne nei hih dik mak!” a lei tipea.

⁵Herod'n ama hah that rang a jôta, aniatachu Juda mipui ngei a chi ani, John hah Dêipu'n an lei be sikin.

⁶Herod suokni han Herodias nâinupang hah mipui ngei makunga a lâma. Herod hah a râisân tataka

⁷a kôm han chonginkhâmin, “Ikhom no zong kai chu nang pêk rangin chong kên khâm!” a tia.

⁸Hanchu a nû'n a tipe lam angin, “Hi muna hin atûn mâirânga Baptispu John lu mi pêk roh!” tiin Herod kôm han a ngêna.

⁹Rêngpa han a mulungdûk atong sabak zoia, nikhomrese, a khuolmi ngei makunga chong a lênkham zoi sikin, a ngên lam anghan tho pe rangin chong a pêk ngeia.

¹⁰Hanchu jêl-ina han John lu hah a min tan ngei zoi.

¹¹A lu hah mâirânga an hong chôia, nupangte kôm an pêka, amanu han a nû kôm a chôia zoi.

¹²John ruoisingei an hongga, a ruok hah an chôia, an phûm zoi; hanchu an sea, Jisua an va misîr pe zoi ani.

Jisua'n mi isâng rangnga a vâina roi

(Mk 6:30-44; Luk 9:10-17; Joh 6:1-14)

¹³Jisua'n John chungroi a rietin chu, ma mun hah a mâka, rukuongin a theivaiin mun inthimngangna a se zoi. Ma roi hah mipuingeiin an rieta, masikin an khopuingei ha mâkin ama omna tâng tieng an jûia.

¹⁴Jisua rukuong renga a jôka, mipui ngei hah a mu'n chu inrieng amu ngei tataka, male damloi ngei hah a mindama.

¹⁵Mani kholoi han a ruoisingei an hong a kôm, “Nisa laka ase ok zoia, mahi mun inthimngang kêng ani; Mipui ngei hih tîrpai ngei inla, khosûngngeia se rese ngei, anthenin sâk rang rochôk rese ngei,” an ti pea.

¹⁶Jisua'n an kôm, “An se rang nâng maka, nangnin an sâk rang imakhat pêk ngei roi!” tiin a thuona.

¹⁷Anni han a kôm, “Hitaka kin dôn chu anrêngin vâipôl rangnga le nga inik vai kêng,” tiin an thuona.

¹⁸Hanchu Jisua'n, “Hin ko kôm hong chôi roi,” a tia.

¹⁹Mipui ngei hah durba chung a insung rangin chong a pêk ngeia; hanchu, vâipôl rangnga le nga inik hah a lâka, invân tieng tangin Pathien kôm râisânchong a rila. Vâipôl ngei hah a khoia, ruoisingei kôm a pêka, male ruoisingei han mipui ngei kôm an sem zoia.

²⁰Mi murdi'n an sâka, an khoptanga, an sâk minieng tabong sômleunik an la rût minsipa.

²¹Asâk ngei mijôn chu nupangngei le nâipangngei telloiin mi isâng rangnga dôr an ni.

Jisua tui chung a lôn

(Mk 6:45-52; Joh 6:15-21)

²²Male Jisua'n mipui ngei hah a minchînna, a ruoisingei rukuonga a min chuong ngeia, dîl râl kângkhat tieng alei min se ngeia.

²³Mipui ngei a min se ngei suolechu a thenin tâng chung a chubaitho rangin a sea. Kholoi a hongnin chu, mahan Jisua atheivaiin a oma;

²⁴ma zora han rukuong hah dîla alazanna a om zoia, phâivuo'n ale tieng asêm sikin, tuidârinsokin kângkhat tieng khom, kângkhat tieng khom a soka.

²⁵Jînga dâr thum le dâr ruk kongkâra Jisua tui chung a lôn nin, a ruoisingei kôm a hong a.

²⁶Tui chung a hong lôn an mûn chu an chia. “Mirluoi kêng!” tiin, ichin an iniek rarâka.

²⁷Jisua'n a hong rokôk ngei kelena, “Nin rathamathâk no roi!” chi no roi, “Keima kêng ki ni!” a tipe ngeia.

²⁸Hanchu Peter a hong chong a. “Pumapa, nangma ni ni tatakin chu, tui chung a no kôm hong rangin chong ni pêk roh,” a tia.

²⁹Jisua'n, "Hong roh!" tiin a thuona. Masikin Peter hah rukuong renga a jôka, Jisua kôm panin tui chung a lôn phut zoia.

³⁰Hannirese, phâivuo rât hah a mûn chu a chia, tuia a ngim phut zoi. "Pumapa, ni mojôk roh!" tiin a chapa.

³¹Jisua a hong tung kelena male a muturap kelen zoia, a kôm, "Na taksônna dôn hah achîn bâkna! Ithomo ni iem zoi loi?" a tipea.

³²An ruonin rukuong sũa an lûta, phâivuo khom ânthem ruoi zoi.

³³Male rukuong sũa ruoisingei han Jisua chubai an mûk zoi. "Pathien Nâipasal tatak kêng ni ni!" an tia.

Jisua Gennesaret'a damloi ngei a mindam

(Mk 6:53-56)

³⁴Dîl râl tieng an inkânin chu Genesaret ram an hong tunga,

³⁵Ma taka mingei han Jisua hah an lei riet kelena. Masikin ma revêla ram murdia han mi an tîra, damloi murdi hah Jisua kôm an hong tuonga.

³⁶Damloi ngei hah a puon morte luo mintôn ngei rangin an ngêna; male a tôn murdi chu an dam pak zoi ani.

Matthew 15

Pipungei chongmâk

(Mk 7:1-13)

¹Hanchu Jerusalem renga pharisee le Balam minchupungei senkhat Jisua kôm an hong male a kôm.

²"Ithomo nu ruoisingeiin ei pipungei chongmâk ngei hih an jôm ngâiloi? Sâk an sâk rang khomin balam angin an kut rusûk ngâi mak ngei!" tiin an rekela.

³Jisua'n an kôm, "Ithomo Pathien chongpêk jômloiin nin theia chongmâk nin jûi hih?"

⁴Pathien'n, 'Nu nû le na pa mirit tho roh,' male 'Tukhom a nû mo, a pa mo, khomâksâm chu that rang ani,' a ti ani.

⁵Hannirese, nangnin chu tutu a nu mo, a pa mo, sanna rang imini neinun a dôna, aniatachu, 'Mahi Pathien ta kêng ani zoi a tiin chu,'

⁶a nû mo, a pa mo mirit a tho rang nâng khâi mak nin ti ngâia. Ma ang han, nin chongmâk nin jôm theina rangin Pathien chongpêk chu itên nin be ngâiloi ani.

⁷Nangni asarotholngei! Isaiah'n nin chungroi alei misîr hah adik bâkna!":

⁸"Hi mingei hin an chongbâiin min mirita, aniatachu an mulungrîl chu adiktakin kei renga alazan.

⁹An miriem minchuna balamngei hah ka balamngei anghan an be sikin min biekna hih anni rangin kamnângloi kêng ani, Pathien'n a ti!" tiin a thuona.

Miriam minnim ngâi neinunngai

(Mk 7:14-23)

¹⁰Hanchu Jisua'n lokongei hah a kôm a koi ngeia, an kôm, "Rangâi unglâ, rietthei roi!

¹¹Mi bâia lût han a minnim ngâi ni maka; manêkin chu a bâi renga hong suok han kêng a minnim ngâi," a tia.

¹²Male a ruoisingei an hongâ, a kôm, "No chong han Phariseengei mulung amophop ti ni riet mo?" an tia.

¹³Jisua'n, "Kung murdi invâna ka Pa phun niloi chu phôiapaiin om an tih," tiin a thuona.

¹⁴"An chungroia nin kângmindoi no roi! Anni ngei hah mitcho ngei ruoipu mitcho an nia; mitcho hah mitcho nanâkin a kairuoiin chu an ruonin khura tâk an tih," tiin a thuona.

¹⁵Peter a chonga, "Ma chong omtie hih mi rilminthâr pe roh," a tia.

¹⁶Jisua'n an kôm, "Midangngei nêkin atûnten la vâ uol mak chei.

¹⁷Nin rietthei loi mo ani? I neinun khom miriem bâia lût murdi chu a phûnga a lûta, masuole chu a nômsena ajôkpai ngâi ani.

¹⁸Aniatachu neinunngai bâi renga hong suok chu mulungrîl renga hong suok ania, ma neinunngai hah kêng miriem minnim ngâi.

¹⁹A mulungrîl renga mindonna saloi ngei ahong suoka, manglei han kêng a ruoia mi thatnangei, inrênangei, hur inditnangei, inrunangei, mi huongnangei le adikloi teta midang êronangei a musuok ngâi ani.

²⁰Hi neinunngai hih, miriem minnim ngâi chu ani. Aniatachu an ti anghan nin kutngei rusûk loa sâknêk nin sâk hin chu miriem minnim ngâi mak," a tia.

Nuvengtenu taksôna

(Mk 7:24-30)

²¹Jisua'n ha mun hah mâkin Tyre le Sidon khopuilienggei kôla ramhuol revêla a sea.

²²Ha rama om Canaan nuvengte inkhat a kôm a hongâ, "David Nâipasal! Inrieng ni mu roh, pu! Ka nâinupang ramkhorin a sûra, changrangintak sabakin aom ani," tiin ânieka.

²³Hannirese, Jisua'n chongbâi khat luon thun mak. A ruoisingei a kôm an hongâ, "Hi nu hih tîrpa ta roh! Ei nûk mi jûia, michok chuchur!" tiin an ngêna.

24Male Jisua'n, "Israel mingei lâia belri in mangngei kôm vai kêng tîr ki ni," tiin a thuona.

25Ha chong hah nuvengtenu han a rietin chu a hong a, a ke bula an boka. "Pu, ni san roh!" a tia.

26Jisua'n, "Nâingei vâipôl lâk pea uingei kôma pêk chu dik mak," tiin a thuona.

27Nuvengtenu han a kôm, "Pu, maha chu adik, aniatachu uingei khomin an pungei dosâng nuoia vâipôl hâr atâk chu an sâk ngâi mo ka ta," tiin a thuona.

28Masikin Jisua'n a kôm, "Nuvengtenu taksônna lientak dôn ni ni! Nu nuom tak hah na ta rangin sinin om a tih," a tipea. Male a nâinupang hah ma zoratak han a hong dam pe zoi ani.

Jisua'n mi tamtak a mindam

29Jisua'n ha mun renga hah a sea, Galilee dîl kôla a lônâ. Tânga a kala male ân sung zoi.

30Mipui tamtak a kôm an hong a, kholra, mitcho, achôp, chongtheilo le damloi dang tamtak Jisua ke bula an hong tuonga; a lei mindam ngei leta.

31Mipui ngei han chongtheilo hong chong, ân-ûng a hong dam, kholra hong lônthei le mitcho hong muthei ngei hah an mûn chu an kamâm sabaka, hanchu Israel Pathien an minpâk zoi ani.

Jisua'n mipui isâng minli a vâina roi

(Mk 8:1-10)

32Hanchu Jisua'n a ruoisingei a koia, an kôm, "Mipui ngei hih sînthumb ko kôm an om zoia, atûn hin ite sâk rang an dônloi sikin ku lungkham ngei tatak. Bungêiin tîrpaie ngei rang nuom mu-ung, aninôn chu lampuia châmsôl invei an tih," a tia.

33Ruoisingei han a kôm, "Hi dôra mipui vâi minkhopna rangin hi ramchâra hin khonmo sâknêk ei man ranga?" tiin an rekela.

34Jisua'n, "Vâipôl idôrmô nin dôn?" tiin a rekela; Anni han "Vâipôltâp sari" le "ngate atômte," an tia.

35Masikin Jisua'n mipui ngei hah nuoia insung rangin chong a pêka.

36Male vâipôltâp sari le nga hah a lâka, Pathien kôm râisânchong rilin a khoa, ruoisingei kôm a pêka; male ruoisingei han mipui ngei kôm an pêka.

37An rêngin an sâka an khoppaka. Hanchu ruoisingei han an sâk minieng arnôi tabông sari an rût minsipa.

38Asâkngêi hah nupangngei le nâipangngei telloiin mi isâng minli an ni.

³⁹Masuole chu Jisua'n mipui ngei a tîrpaï ngei suolechü rukuonga a chuonga, Magadan ramhuol tieng a se zoi ani.

Matthew 16

Sininkhêl sin rang an zong

(Mk 8:11-13; Luk 12:54-56)

¹Pharisee le Sadducee senkhatngei Jisua kôma hong ngeiin ama min-ôk rang an nuoma, masikin Pathien'n ama a pom, tih riet theina rangin sininkhêl thôn minlang rangin an ngêna.

²Nikhomrese, Jisua'n an kôm, "Nisa ahong tâkin chu, 'kôlkung asen sikin khuo ahoi rang kêng nin ti ngâi.'

³Male jînga chu, 'Kôl asena, invân ânânim sikin ruo ajuong rang kêng,' nin ti ngâi. Invân enin khuohoi rang le hoiloï rang nin leiphuong theia, aniatachu, atûnlâia minsinnangei hi chu minlen thei mak chei!

⁴Atûnlâi mingei hih idôrtaka saloi le pathienboi mo an ni zoi! Minsinna mi nin zong na? Nimak! Jonah minsinna hi vai kêng nin kôma minsinna nangni pêk rang chu ani zoi," tiin a thuona. Masikin a mâk ngeia male a rotpat zoi.

Phariseengei le Sadduceengei chol

(Mk 8:14-21)

⁵Ruoisingei hah dîl râl an rakânin chu, vâipôl chôi rang an hong mingila.

⁶Jisua'n an kôm, "Singthei roi; Phariseengei le Sadduceengei chol renga indîn roi," a tipe ngeia.

⁷Anni han, "Vâipôl ei hong chôi loi sika mahi a ti ani," tiin an lâia an injêk phut zoi.

⁸Jisua'n an misîrngei hah a rieta, an kôm, "Ithomo nin vâipôl hong chôi loi roi hah nin lâia nangni nanâkin nin jêk bang? Idôra taksônna chîn dôn mo nin ni zoi!

⁹Nin la rietthei tet loi mini? Mi isâng rangnga ngei ta ranga vâipôltâp rangnga ko khi lâia hah nin riet khâiloï mo? An sâk minieng tabong izetmo nin rût minsip ha?

¹⁰Mi isâng minli ngei ranga vâipôltâp sari chungroi rek ha te? An sâk minieng tabong izetmo nin rût minsip ha?

¹¹Nônte ithomo nin kôm vâipôl roi misîr mu-ung ti nin riet thei loi? Nangni nanâkin Phariseengei le Sadduceengei chol renga indîn roi!" a tia.

¹²Male ruoisingei han vâipôla chol mang ngâi renga indîn rang ni loiin, Phariseengei le Sadduceengei minchuna renga indîn ranga inningna ani ti an riet thei zoi.

Peter'n Jisua chungroi a phuongna

(Mk 8:27-30; Luk 9:18-21)

- 13**Jisua hah Caesarea Philippi khopui kôla ramhuola a sea, mahan a ruoisingei kôm, “Miriem Nâipasal hih mingeiin tumo ani an ti?” tiin a rekel ngeia.
- 14**“Senkhatin chu Baptispu John ani,” Adangngeiin chu “Elijah ani,” senkhat nôkin chu “Jeremiah aninônchu dêipu tumakhat mini, nang an ti,” tiin an thuona.
- 15**“Nangnîn rêkte?” ama'n, “Tumo ki ni nin ti?” tiin a rekel ngeia.
- 16**Simon Peter'n a kôm, “Messiah, Pathien ring Nâipasal hah ni ni,” tiin a thuona.
- 17**Jisua'n a kôm, “Simon John nâipasal, na ta rangin asa bâk na! Hi chongtak hih munisi renga no kôm ahong nimaka, invâna om ka Pa'n adiktakin nang a pêk ani.
- 18**Masikin Peter; lungpui ni ni, ti nang ki ril. Hi lungpui chung a hin ko koiindang minding ka ta, thina khomin mene no nih.
- 19**Invân Rêngram chabi nang pêk ka ta; pilchunga na khap kai chu invâna khom khap nîng a ta, pilchunga na phal kai chu invâna khom phal ani rang ani,” a tipea.
- 20**Male Messiah ani ti tute ril loi rangin ruoisingei hah chong a pêk ngei zoi.

Jisua tuong rang le a thi rang roi a misîr

(Mk 8:31; 9:1; Luk 9:22-27)

- 21**Ma zora renga chu Jisua'n a ruoisingei kôm ânthârlakin a misîr phut zoia, an kôm, “Jerusalema ke se ngêt rang ani, upangei, Ochaisingei le Balam minchupungei kuta tuong ok ki tih. Thatin om ka ta, nikhomrese, sûnthum suolechu aringin kaithoiin om ki tih,” a tipea.
- 22**Peter'n ama hah atheiin a tuonga, a kôm, “Pathien'n maha akhap, Pumapa!” ama'n, “Mahah nu chung a tung tet no nih!” tiin a ngoa.
- 23**Jisua ânheia Peter kôm, “Soitan, ko kôm renga rotpai roh! ka lampui ni ni chakal, ni mindonngi hih Pathien renga hong suok ni maka, munisi nina renga ani sikin,” a tia.
- 24**Male Jisua'n a ruoisingei kôm, “Tutu mi jûi a nuomin chu ama taksa rang mingilin a khros ruputin mi jûi rese.
- 25**Tukhom a ringna mojôk a nuom kaiin machân an ta; aniatachu, keima sika an ringna machân kaiin man an tih.
- 26**Mi'n rammuol hih apumin dôn senla, an ringna chu machân ta senla ngei, imo alâp an man ranga? Man noni ngei! An ringna man nôkna rangin ite pêk rang an dôn loi sikin.

²⁷Miriem Nâipasal hih a Pa roiinpuinan invôn a vantîrtonngei leh a juong rang kêng ani zoi, ma tikin chu mitinin an sintho dungjûiin râisânman a pêk rang ani.

²⁸Adiktakin nangni ki ril, hi taka om senkhatngei hih Miriem Nâipasal Rêng angin a juong an mu mâka chu thi loi rang an om,” a tia.

Matthew 17

Mêl inthûlna

(Mk 9:2-13; Luk 9:28-36)

¹Sûnruk suole chu Jisua'n Peter le a lâibungngei Jacob le John a tuong ngeia, an theivaiin muol insângna a se pui ngeia.

²An mit muchungin Jisua mêl a hong inthûla: a mâi nisa angin a hong vâra, a puonsilngei khom ântêrrakin ahong cheka.

³Male ruoisingei inthum han Moses le Elijah ngeiin Jisua an chongpui an mua.

⁴Hanchu Peter'n Jisua kôm, “Pumapa, hitaka om hih ei ta rangin idôra asa mo ni zoi! Nu nuomin chu puon-in inthum sin ka ta, nangma rang inkhat, Moses rang inkhat male Elijah rang inkhat,” a tia.

⁵Ala chonglâitakin, sôm vârin ajuong mukhu ngeia, sûmlâi renga rôl ajuon ringa, “Ama hih ka Nâipasal moroitak, a chungu ku mulungtâiriem ani, a he rangâi roi!” a tia.

⁶Ruoisingei han rôl hah an rietin chu, an chi rai sikin pila an inbokraka.

⁷Jisua an kôm a hongu, a tôn ngeia, “Inthoi roi, chi no roi,” a tipe ngeia.

⁸Masikin an ena, Jisua telloiin chu tute adang mu mak ngei.

⁹Muol chung renga an juong chumin chu, Jisua'n an kôm, “Miriem Nâipasal hih thina renga ânthoinôk mâka chu nin neinun mu hih tute ril no roi,” tiin chong a pêk ngei zoi.

¹⁰Male ruoisingei han Jisua kôm, “Ithomo Balam minchupungeiin Elijah a juong bak rang ani, an ti?” tiin an rekela.

¹¹Jisua'n, “Adiktakin Elijah a juong bak rang ani,” male “jâtin ama'n cherêl let a tih.

¹²Hannirese, nangni ki ril, Elijah chu a juongsai piel kêng ani zoi, mingeiin lei riet mak ngei, an nunuom an lei lo zoi. Ma angdênin Miriem Nâipasal khom an nunuom an lo rang ani,” tiin a thuona.

¹³Male ruoisingeiin Baptispu John chungroi an kôm a misîr ani, ti an hong riet zoi.

Jisua'n ramkhorî sûr pasalte a mindam

(Mk 9:14-29; Luk 9:37-43)

¹⁴Mipui ngei kôm an kêr nôkin chu mi inkhat Jisua kôm a hong, a makunga khûkinbilin,

¹⁵male “Pu, ka nâipasal chung a inriengmu roh! Ama chu risangol invei ania, a tuong ok zoia, voizet mo meia le tua ânlet zoia.

¹⁶Nu ruoisingei kôm ko hong tuonga, aniatachu mindam thei mak ngei,” a tia.

¹⁷Jisua'n, “Kho anga iemnaboi rai le mi dikloi mo nin ni zoi! Idôr sôt mo nin kôm ko om rang? Idôr sôt mo nangni ko donsui thei ranga? Pasalte hah ko kôm hong tuong roi!” a tia.

¹⁸Jisua'n ramkhorî hah chong a pêka, male pasalte sùng renga hah a hong jôkpaia, ma zoratak han a dam kelen zoi.

¹⁹Male ruoisingei hah Jisua kôm an hong, “Ithomo keinin te ramkhorî hah kin rujûlpai theilo?” tiin mi riet loiin an rekel chiena.

²⁰Jisua'n an kôm, “Taksônna ahundôr nin dônloi sika ani.” “Adiktakin nangni ki ti, taksônna ancham ru te dôr nin dônin chu hi muol kôm hin, ‘Hi renga hih sosen vânthon roh!’ tîng nin ta, inthon atih. Neinun nâm nin thothei let rang ani!

²¹Aniatachu, hi anga hih chu chubaithona le bungêi tinôn chu itên rujûlpai thei nimak,” tiin a thuona.

Jisua a thina rang roi a misîr nôkna

(Mk 9:30-32; Luk 9:43-45)

²²Ruoisingei hah an rêngin Galilee rama munkhatin an hong suokin chu, Jisua'n an kôm, “Miriem Nâipasal hih mingei kuta min sûrin om a ta,

²³anni han ama that an tih; aniatachu sûnthum suole chu aringin kaithoiin om a tih,” a tia. Ruoisingei chu beidong takin an om zoi ani.

Biekin chôiruol chôî roi

²⁴Jisua le a ruoisingei Capernaum an hong tungin chu biekin chôiruol rusuonpu ngeiin Peter kôm an hong, “Nangni Minchupu hin biekin chôiruol a chôî ngâi mo?” tiin an rekela.

²⁵Peter'n “A chôî ngâi,” tiin a thuona. Peter hah insûnga a lûtin chu, Jisua'n a lei rokôk masa, “Simon kho angin mo ni mindonlam? Hi rammuola rêngngei kôm hin tumo choitumngiei aninônchu chôiruolngei a chôî ngâi? A ramsûngmingei mo, ramdangmingei mo?”

²⁶Peter'n, “Ramdangmingei,” tiin a thuona. Jisua'n, “Asa, mahah aomtie chu a ramsûngmingei chu an chôî nâng mak, tiin chong a mele ani.

²⁷Aniatachu hi mingei mulunghoilo rang hi nuom mak me. Masikin dîla senla rukuoi vavôr roh. Nga no thok masatak bâia han nangma le keima rang biekin

chôiruol rukbak rang sumthîr man ni tih. Mahah hong chôî inla, ei chôitum hah an kôm pêk ngei roh,” a tia.

Matthew 18

Tumo alientak

(Mk 9:33-37; Luk 9:46-48)

- ¹Ma zora han ruoisingei Jisua kôm an hong, “Invân Rêngrama tumo alientak?” tiin an rekela.
- ²Masikin Jisua'n nâipangte a koia, an makunga a minding pe ngeia, an kôm,
- ³“Adiktakin nangni ki ti, nin hong inthûla, nâipangte ngei angin nin om nôncu invân Rêngrama lût thei tet no tunui.
- ⁴Invân Rêngrama alientak chu amananâkin nuninêma hi nâipangte anga hong om hih ani.
- ⁵Male tukhom ki riming sika hi nâipangte anga lei modôm chu keima mi modôm an ni.”

Sietna ranga methêmna

(Mk 9:42-48; Luk 17:1-2)

- ⁶“Tukhomin ka chung a taksônna dônngei lâia nâipangte inkhat khom hih a minpalin chu a ringa bu nôina lung lienpa minlîn tuikhanglien inthûk taka inchôm senla ata rangin sa uol atih.
- ⁷Mingei an taksônna minmang pe ngâi neinunnggei sikin rammuol rangin ichi aom bâk na! Inpalna ngei chu om bang a ta, aniatachu, inpalna ngei min ompu chungroi chu ichi aombâk na!
- ⁸Nu kutin mo, ne ke'n mo, nang aminpalin chu tan pai inla, pai kelen roh! Kut inik mo, ke inik mo dôna kumtuong meidîla nang pai nêkin chu kut boi mo, ke boia mo ringna han lût chu na ta rangin asa uol.
- ⁹Ni mit khomin nang aminpalin chu kêpai inla, pai kelen roh! Mit inik dôna meidîla nang pai nêkin chu inkhat vai dôna ringna taka lût chu na ta rangin asa uol ani.”

Belri inmang chongmintêk

(Luk 15:3-7)

- ¹⁰“En roi, hi mi chînte ngei lâia inkhat luo hih mumâkloi rangin indîn roi. Invâna an vântîrtonnggei hih invâna ka Pa makunga an om tit ngâi ti nangni ki ril.
- ¹¹Miriam Nâipasal hi ân mang ngei roka, sanminring rang piela juong ani.
- ¹²“Mi inkhatin belri razakhat dôncenla, an lâia inkhat inmang rese, kho angin mo a tho rangin nin mindôn? Sômkuoleikuo ngei hah muol panga bu min sâk a ta, male sêng a ta, ân mangpu hah va rok a tih.

13Nangni ki ril, ava manin chu sômkuoleikuo ân mangloi ngei nêkin inkhatpu chung a han a râisân uol ok a tih.

14Ma angdênin, hi mi chînte ngei lâia inkhat in mang khom hih nin Pa invâna omin nuom mak.

Lâibung aninônchu sarnu sietna sin

15“Na lâibungpa nang doiin sietna a sinin chu, senla a minchâina min mûn la, dâirekin nin ruona riet rang vaiin ril roh. No chong a rangâiin chu na lâibungpa hah ne mene nôk nîng a tih.

16Aniatachu no chong a rangâi nôn chu midang inkhat mini, inik mini tuong sân la, masikin Pathien lekhabu'n a ti anghan, saloinônna chong nâm hah rietpuipungei mi inik mo, inthum mo bâia mindet ani theina rangin.

17Hanchu an chong khom arngâi non chu, neinun murdi koiindang kôm min tung roh. Azoinataka chu koiindang chong khom a rangâi nuom nôn chu ha mi hah chu sonong anghan mini, sum rusuongpu angin mini be roh.

Khap le phal

18“Masikin nin rêngin nangni ki ril: pilchunga nin khap kai invâna khap nîng a ta, pilchunga nin phal kai invâna phal nîng atih.

19“Nangni ki ril uol sa: pilchunga hin mi inikin nin ngênna han nin inruolin chu, invâna ka Pa'n nangni tho pe a tih.

20Mi inik mo, inthum mo ki rilinga an hong intûpna muna han anni leh ko om ngâi sikin,” a tia.

Tîrlâm ngâidamloi chongmintêk

21Male Peter hah Jisua kôm a hong a, “Pumapa ka lâibungpa'n ku chung a sietna sin bang senla, voizet mo ka ngâidam rang? Voi sari mo?” tiin a rekela.

22Jisua'n a kôm, “Nimak, voi sari ni loiin, voi sômsari mun sari tena,” tiin a thuona,

23“Invân Rêngam chu, voikhat chu rêngpa inkhatin a tîrlâmngei kôm an sum thurchi enmindik ranga masatpu angin ani sikin.

24A hong enmindik phutin chu mi inkhat talent isângsôm intâng a kôm an hong tuonga.

25Ma tîrlâm han a lakâi pêk rang ahundôr a dônloi sikin rêngpa han ama, a lômnû, a nâingei leh a dôn murdi juorin, a lakâi thun rangin chong a pêka.

26Tîrlâm han rêngpa makunga khûkinbilin ân boka. ‘Ka chung a nu phûkminsei viet inla, anrêngin nang thun let ki tih!’ tiin ân vûia.

27Rêngpa han inrieng a mua, hanchu a lakâi hah a ngâidam phara, a min se zoi.

28“Hanchu ha mi hah a jôkpaia, a tîrlâm champui ngei lâia inkhat duli razakhat intâng ava mua. Ava sùrrapa, a ringôn a sôm pea, Na lakâi hah ni thvon ta roh!” a tia.

29A tîrlâm champui hah ânboka, “Ku chungu nu phûkminsei viet inla, nang thvon ki tih!” tiin ânvuia.

30Hannirese nuom maka; manêkin a lakâi a thvon mâka chu intâng ina a khum zoi.

31Tîrlâm dang ngeiin a sintho lam hah an mûn chu an mulunghoi maka, rêngpa kôm an sea, neinun nâm an va misîr pea.

32Masikin rêngpa han tîrlâm hah a koia, a kôm, Nangma tîrlâm kâmnângloi! nênu vûi sikin na lakâi murdi nang ka ngâidam ani.

33Keiman nu chungu moroina ko dôn anghan, nang khomin ni tîrlâm champui chungu moroina no dôn rang kêng ani, a tipea.

34Rêngpa hah atakasi sabaka, male ha tîrlâm hah a lakâi a thvon suo mâka rangin intâng ina a khum zoi.

35Jisua'n, “Ma angdênin mitinin nin lâibungngei nin mulungrîl tatak renga nin ngâidam nônchu invâna ka Pa khomin nin chungu ma angdênin thông a tih,” tiin chongkhârnan a ti ani.

Matthew 19

Inmâkna roia Jisua minchuna

(Mk 10:1-12)

1Jisua'n ha chongngei hah a misîr suole chu Galilee ram renga a suoka, Jordan Tuidung râla Judea rama a sea.

2Mipui tamtakin an jûia, male ma muna han a mindam ngeia.

3Pharisee senkhatngei a kôm an hongu, ama min ôk rang pûtin, “I-ihsika khomin min a lômnu a mâk hih ei Balam in aphal mo?” tiin an rekela.

4Jisua'n an kôm, Pathien lekhabu'n, “Aphut renga miriemngei Mizirpu'n Pasal le nupang a sin, a ti hah nin pore ngâiloi mini?”

5Mapêna, Pathien'n, ‘Hi sika hin pasalin a nu le a pa mâk a ta, a lômnu leh inruol an ta, male, an ruonin takpum khat hongni an tih,’ a ti ani.

6Masikin mi inik nikhâi mak ngeia, pumkhat kêng an ni zoi. Pathien'n munkhata a mozomsai chu miriem in an sensâi tet rang nimak,” tiin a thuona.

7Phariseengei han a kôm, “Nônthe ithomo Moses'n pasalin inmâkna lekha miziekin a lômnu a pêkin chu inmâk a phalin amanu hah tîrpai in aom ngâia?” tiin an rekela.

⁸Jisua'n an kôm, “Moses'n nin lômnungei mâk rang nangni a phal pena chu nin mulung ânngara minchu nin intak rai sika ani. Hannirese, sinphuta han chu ma anghin nimak.

⁹Hanchu, keima nangni ki ril chu, tukhom pasalin a lômnu hah roi danga niloiiin, taksôn omloina sika a mâka anin chu a lômnu hah inrê a minchang ani; male mi lômnu mâksai inneipui nôkpu chu amanu hah a inrêpuiin theiloi a chang sa ani,” a tia.

¹⁰A ruoisingeiin a kôm, “Lômpa le lômnu kongkâra ma anghan anin chu innei loi asa uol,” an tia.

¹¹Jisua'n an kôm, “Hi minchuna hih mitin chungga mang rang nimaka, Pathien'n a pêk ngei chungga vai mang nîng atih, tiin a thuona.

¹²Pasalin innei theiloina abi chu adadang aom: senkhat, chu neiloi rang piela suok an ni; senkhat chu ha anga ranga miriemîn an sin khom an om; senkhat chu invân Rêngram sikin an neiloi ani. Tukhom hi minchuna pom thei kaiin chu pom rese ngei,” tiin a thuona.

Jisua nâipangtengei sat a vur

(Mk 10:13-16; Luk 18:15-17)

¹³Mi senkhatin nâipangtengei Jisua kôm an chungga a kut a minngam theina rang le chubai tho pe ngei theina rangin an hong tuonga, aniatachu, ruoisingeiin an lei ngoa.

¹⁴Jisua'n an kôm, “Nâipangtengei ko kôm min hong unglâ khap no roi, invân Rêngram chu hi anga mingei ta ani sikin,” a tia.

¹⁵An chungga a kut a minngama male chu a se zoi.

Ruotharte mineipa chungroi

(Mk 10:17-31; Luk 18:18-30)

¹⁶Voikhat chu mi inkhat Jisua kôm a hongga, “Minchupu, kumtuong ringna ka man theina rangin imo sin sa ki sin rang?” tiin a rekela.

¹⁷“Ithomo asa thurchi mini rekel?” Jisua'n, “Asa chu mi Inkhat vai kêng aom. Ringna han lût nu nuomin chu chongpêkngai hah jôm roh,” tiin a thuona.

¹⁸Ama han, “Kho chongpêkngai ha mo?” tiin a rekela. Jisua'n, “Mi that no roh; inrê no roh; inru no roh; dikloitakin mi nôn no roh;

¹⁹nu nû le na pa mirit roh; nangma nêl lungkham angin nu bungmingei lungkham roh,” ti ngei hi tiin a thuona.

²⁰Ruolthartepa han, “Ma chongpêkngai nâm ha chu ko jôm suolet zoi. Imo ki sin rang ala nâng?” a tia.

²¹Jisua'n a kôm, “Asa akiphara om nu nuomin chu senla, no dôn murdi juor inla, ma sum hah inriengngei kôm pêk roh, male chu invâna rochon dôn ni tih; masuole chu hong inla, mi hong jûi roh,” a tipea.

²²Ruolthartepa'n ha chong hah a rietin chu ngâisiet takin a rot zoi, mi neipa ani sikin.

²³Hanchu Jisua'n a ruoisingei kôm, “Adiktakin nangni ki ril: mineingei rangin chu invân Rêngrama lût ântak sabak rang ani.

²⁴Nangni ki ril nôk: mineingei Pathien Rêngrama lût nêkin chu út simphuoi kuora lût bai uol atih,” a tia.

²⁵Hi chong hih, ruoisingeiin an rietin chu, an kamâm tataka, “Nôte, tumo saminringin aom thei rang?” tiin an rekela.

²⁶Jisua'n anni enlakin an kôm, “Mahih miriem rangin chu nithei maka, aniatachu Pathien rangin chu neinun murdi anithei let,” tiin a thuon ngeia.

²⁷Male Peter a hong chonga. A kôm, “En roh, keinin jâttin mâkin nang kin jûia. Imo kin man rang?” a tia.

²⁸Jisua'n an kôm, “Adiktakin nangni ki ril, Ruol Thar hong om ranga Miriem Nâipasal a rêngsukmun roiinpuitaka âsung tikin chu nangni ku nûkjûi ngâi sômleinik ngei khom rêngsukmunngeia insung nin ta, Israel jât sômleinik ngei chungâ roijêk nin tih.

²⁹Hanchu tutu keima sika inngei mo, lâibungngei mo, sarnungei mo, pa mo, nu mo, nâingei mo, loi ngei mo, amâkpu ngei chu abâk razakhatin man an ta, kumtuong ringna khom pêk sa nîng an tih.

³⁰Aniatachu, atûna amasatakngai khom nûkintatak la nîng an ta, male nûkintatak ngei khom amasatak la nîng an tih,” a tia.

Matthew 20

Grapebila sinthopungei

¹“Invân Rêngram chu mi inkhatin a grapebila mi senkhat inloa sintho rang rokin jîng renga ajôkpaï angin ani.

²Ama'n a sinthopungei hah asûna duli pêk ngei rangin a jôta, male a grapebila sintho rangin a tîr ngei zoi.

³Jîng dâr kuo ânringin chu bazar muna a se nôka, mahan mi senkhat ite tho loia an inding ava mua,

⁴masikin an kôm, ‘Nangni khom se unglâ, grapebila va sin unglâ, rathamân asadên nangni pêk ki tih,’ a tipe ngeia.

- ⁵Masikin an se zoi. Hanchu sîn dâr sômleinik le chonûk dâr thuma khom ma angdênin a thoa.
- ⁶Kholoi dâr rangnga ânring rangtôn bazar muna ava se nôka, mi senkhat ite sin loia ânding chien ava mu ngei nôka. An kôm, 'Ithomo ite sin loiin mahin sîn nin min hek?' tiin a rekel ngeia.
- ⁷Anni han a kôm, 'tutên mi min lo mak ngei,' tiin an thuona. Asa, hanchu, nangni khom se unglâ grapebila sin va tho roi," a tipe ngeia.
- ⁸Kholoi ahong nîn chu, a pumapa han a sum vongpu kôm han, "Sinthopu ngei hah koi inla, anûktaka hong inlopu ngei renga phutin amasataka hong inlopu ngei dênin an rathaman pêk ngei roh," a tia.
- ⁹Kholoi dâr rangnga sintho koppu ngei ha chu duli chit pêk an nia.
- ¹⁰Masikin motontaka sintho koppu ngei hah an hongin chu atam uol man rangin an mindona; hannirese anni khom duli chit kêng pêk an ni.
- ¹¹An sum hah an lâka, a pumapa chungâ an chier phut zoi.
- ¹²"Hi mi nûktaka hôn lo ngei hi chu dâr khat vai an sinna ania, keini chu nisa luma sîntuonin kin sina, hannoma, keini mi ni pêk dôr nanâk anni khom ne pêka!" an tia.
- ¹³A pumapa han, an lâia inkhat kôm han, " 'Rangâi ta, mal,' nang huong mu-ung. Ikhomnirse asûna duli loa sintho ranga no jôt ani.
- ¹⁴Atûn na rathaman lâk inla, ni ina se roh. Nangma nang ke pêk dôr hih hi anûktaka a hon lopu khom hih pêk ku nuom ani.
- ¹⁵Ka sum chu ki ti lamtaka mang rangin rachamneina dôn mu-ung mo? Aninônchu ka mannarloi sikin na narsa mini?" a tipea.
- ¹⁶Hanchu Jisua'n, "Masikin anûktak ngei hah amotontak la nîng an ta, amotontak ngei hah anûktak la nîng an tih," tiin chongkhârânân a tia.

Jisua a thi rang roi a misîr voithumna

(Mk 10:32-34; Luk 18:31-34)

- ¹⁷Jisua Jerusalem tena se lâihan, ruoisingei sômleinik hah an theiin a tuong ngeia, lampuia an lôn pumin inrûkten an kôm,
- ¹⁸"Rangâi ta u, Jerusalema ei se rang ania, mahan Miriem Nâipasal hi Ochaisingei le Balam minchupungei kuta minsûrin om a tih. Thi rangin theiloimintum an ta,
- ¹⁹hanchu Jentailngei kuta pêk an ta, anni han munui inzanân mang an ta, vîk an ta, khrosa jêmdel an tih; hannirese sînthumbu sole chu aringin kaithoiin om a tih," a tia.

Nû inkhat ngêna

(Mk 10:35-45)

²⁰Hanchu Jebedee lômnu hah a nâipasal inik ngei leh Jisua kôm an hongga, amakunga khûkinbilin, a lungkhamna a zonga.

²¹Jisua'n a kôm, "Imo nu nuom?" tiin amanu hah a rekela. Amanu han, "Hi ka nâipasal inik ngei hih Rêng nini tika na chang tieng inkhat no voitieng inkhat min sung rangin chong mênkhâm pe roh," tiin a thuona.

²²Jisua'n, nâipasalngei kôm han, "Nin zong hih nin riet loi ani, Tuongna kilât ki nêk rang hih nin nêk thei rang mo?" a tia. "Thei kin tih," tiin an thuona.

²³Jisua'n an kôm, "Ki kilât chu nêk tatak nan ta," hannirese, "tumo ka chang tieng le ko voi tienga ânsung rang chu keiman zen rangin racham dôn mu-ung. Hi munngei hih chu ka Pa'n a mintuo pe ngei ta rang kêng ani," a tia.

²⁴Ruoisi dang sômngei han ma chong hah an rietin chu, lâibung inik ngei chungga an ningathik zoia.

²⁵Masikin Jisua'n an rêngin a koitûp ngeia, an kôm, "Jentailngei chungga roijêkpua an phunngei chu an chungga an inlaltatak ngâia, an ruoipungei khom an chungga rachamneina an dôn ok ngâi iti nin riet.

²⁶Nikhomrese, nin lâia chu ma anghin ani rang nimak. Tukhomin alien a nuomin chu, nin tîrlâm ani bak ngêt rang ani;

²⁷Mapêna, nin lâia tukhomin amotontak ani nuomin chu nin tîrlâm a chang bak ngêt rang ani.

²⁸Miriam Nâipasal luoman a sin an tho pe rangin juong maka, mi sin tho pe rang le mi tamtak rattan ranga a ringna pêk rangin kêng a juong ani," a tia.

Jisua'n mitcho inik a mindam

(Mk 10:46-52; Luk 18:35-43)

²⁹Jisua le a ruoisingei Jericho hah an mâkin chu, mipui tamtakin an jûia.

³⁰Mitcho inik lampui kôla insungin Jisua a hongvun iti an rietin chu, "David Nâipasal! Kin chungga inrieng mi mu roh, Pu!" tiin an in-ieka.

³¹Mipui ngei han dâirek rangin an ngo ngeia. Aniatachu anni han, "David Nâipasal! Kin chungga inrieng mimu roh, Pu!" tiin an iniek minring uola.

³²Jisua ânngama a koi ngeia, "Imo nangni rangin ni min tho nin nuom?" tiin a rekel ngeia.

³³"Pu, mitvârna mi ni pêk rang hih kin nuom ani!" tiin an thuona.

³⁴Jisua'n an chungga inriengmuna a dôna, an mitngei hah a tôn pe ngeia, voikhatrengin an hong mu thei kelena, a nûk an jûi zoi ani.

Matthew 21

Jisua inlaltakin Jerusalema a lût

(Mk 11:1-11; Luk 19:28-40; Joh 12:12-19)

- ¹Jisua le a ruoisingei Jerusalem an hongtung rangtôn Olive Muola Bethphage khuo an hongtung. Mahan Jisua'n a ruoisingei lâia mi inik a tîr ngeia,
- ²an kôm, "Nin motona khuo son se unglâ, sakuording, akôla ate leh ânthung mu kelen nin tih. Sût unglâ, ko kôm hong kai roi.
- ³Tukhomin nin kôm imini an ti khomin, 'Pumapa'n amin nâng kêng,' tiin ril ngei roi; hanchu nangni hong min chôl kelen a tih," a tipe ngeia.
- ⁴Dêipu'n a lei ti sai ahongtung dik theina ranga mahah ahong om ani:
- ⁵"Zion khopuilien hah ril roh, En ta, ne rêng hah no kôm a hong zoi ani! Ama hah rangâinchîn takin sakuording chungâ chuongin, male sakuording ate innoi chungâ chuongin," ti hih.
- ⁶Masikin ruoisingei hah an va sea, Jisua'n tho ranga a tipe ngei ang han an va thoa:
- ⁷Sakuording leh ate hah an hong kaia, an chungâ han an puonngai an dâpa, male Jisua a chuonga.
- ⁸Mipui tamtakin lampuia an puonngai an dâpa; adangngaiin thingbuo an tuka, lampuia an dâpa.
- ⁹Mipui Jisua moton tiengâ lônngai le a nûk tiengâ jûngai han, "David Nâipasal minpâkin om rese! Pumapa rilingâ juongpu chu Pathien'n satvur rese! Pathien minpâkin om rese!" tiin an in-ieka.
- ¹⁰Jisua hah Jerusalem a lûtin chu, khopuilien pumpui anrêngin anin tirnata, "Hi mi hih tu mini?" tiin mipui ngeiin an rekela.
- ¹¹Lokongai han, "Hi mi hih Dêipu Jisua, Galilee ram Nazareth renga ani," tiin an thuona.

Jisua Biekina a se roi

(Mk 11:15-19; Luk 19:45-48; Joh 2:13-22)

- ¹²Jisua hah Biekina a lûta, Biekin sûnga neinin juorngai le rochôkngai murdi a rujûlpai ngeia. Sumthûlngai dosângngai le pharvali juorngai sukmunngai khom a nammelet pe ngeia,
- ¹³male an kôm, "Pathien lekhabua Pathien'n, 'Ki in chu chubaithona in tîng an tih,' tiin ânziek ani. Hannirese nangnin chu inru ngei inthupna khûrin kêng nin sin hi!" a tipe ngeia.
- ¹⁴Biekina han mitcho ngei le kholrangei a kôm an hongâ, a lei mindam ngeia.

¹⁵Ochaisingei le Balam minchupungeiin sinkamâmruoi a sinngai le nâipanggei Biekina, “David Nâipasal kôm Hosanna, Minpâkin om rese!” tia an in-iek hah an mûn chu an ningathik zoia.

¹⁶Masikin Jisua kôm, “Hi mingei an ti hih ni riet mo?” tiin an rekela. Jisua'n, “Adiktakin ki riet, Minpâkna akipphar pêk rangin nâipanggei le nâitesenngai nin minchu zoi, ti hih nin la pore tet ngâiloi mini?” tiin a thuona.

¹⁷Hanchu Jisua'n anni ngei hah a mâka, khopuilien renga Bethany'a a sea, mahan jân a riek zoi.

Jisua'n theichang kung khomâk a sâm

(Mk 11:12-14,20-24)

¹⁸Anangtûk jînga chu khopuilien tieng a kîr nôkin Jisua a vonchâm zoia.

¹⁹Lampui kôla theichang kung ava mua, male ava pana, hannirese abuongei tiloiiin chu ite man mâka. Masikin theichang kung kôm han, “Inra nôk tet khâi no roh!” a tipea. Voikhat rengin theichang kung hah ahong thêm zoi.

²⁰Ruoisingeiin maha an mua, an kamâmzala, “Kho angin mo theichang kung hih athêmpiel kelen hi?” tiin an rekela.

²¹Jisua'n an kôm, “Adiktakin nangni ki ril, iemna nin dôna mulungokchâna nin dôn tet nônchu hi theichang kung chung a ko tho ang hin tho thei nin tih. Mahi vai niloiiin hi muol kôm khom hin, ‘Inthon inla, tuikhangliena juon pai roh,’ ti ungl a juon pai atih.

²²Nin iemin chu, chubaithoa nin ngên murdi chu man nin tih,” tiin a thuona.

Jisua rachamneina chungroia chongrekel

(Mk 11:27-33; Luk 20:1-8)

²³Jisua hah Biekina a hong nôka, a minchu lâitakin, Ochaisingei le upangei an hong a kôm, “Tu rachamin mo hi neinunngai hih ni sin? Tumo hi racham nang pêk?” an tia.

²⁴Jisua'n an kôm, “Chongrekel inkhat kei khomin nangni lei rekel rong, ni nin thun theiin chu, tu rachamin mo hi neinunngai hih ki sin nangni ril ki tih.

²⁵John Baptisma hah kho renga rachamneina mo: Pathien renga mo, miriem renga mo?” a tia. Anni le anni an inkhal zoia, “Imo ei ti rang hi? ‘Pathien renga tiin ei thun lakin,’ ama'n ei kôm, ‘Ithomo John hah nin iem loi?’ mi tîng a ta.

²⁶‘Miriem renga ei ti lakin,’ mipui ngeiin imo minlo rang ei chi, mipui ngeiin John hah Dêipua an be sikin,” an tia.

²⁷Masikin Jisua kôm, “Riet mak me.” tiin an thuona. Jisua'n an kôm, “Kei khomin tu rachama mo hi neinunngai hih ki sin, nangni ril uol noning,” a tipe ngeia.

Nâipasal inik ngei chongmintêk

28“Atûn, Imo nin mindon? Tienlâia han mi inkhatin nâipasal inik a dôna. A nâi ulienpu kôm ava sea, a kôm, ‘Ka Nâipasal, avien chu grapebila senla, sin va tho roh,’ a tia.

29‘Ama han nuom mu-ung,’ tiin a thuona, aninâka chomolte suole chu a mindon a thûla male a se zoia.

30Male inkhat kôm han khom a sea, ma angdênin ava ti nôka. Ama han, ‘O, Pa,’ sêng ki tih, tiin a thuona. Hannirese se maka.

31Ha mi inik ngei han tu ha mo an pa nuomlam a sin uol?” a tia. “Ulienpu han,” tiin an thuona. Masikin Jisua'n an kôm, “Nangni ki ril: sum rusuonpungei le notizuorngeni hin Pathien Rêngrama lût nangni an khêl rang ani hi.

32Baptispu John'n lampui dik nin jûi rang nangni a juong min mua, ama lei iem mak cheia; sum rusuonpungei le notizuorngeniin chu an lei iem ani. Nangni chu nin mu suonûk khomin nin mulungbôkngeni thûlin ama iem mak chei.”

Grapebila inlo mingei Chongmintêk

(Mk 12:1-12; Luk 20:9-19)

33Jisua'n an kôm nanâk, chongmintêk dang rangâi nôk roi a tia. “Voikhat chu tu mini ram pumapa a oma, hah mi han grapebil a thoa, bêr a minkula, grape epna rang khur a choia, a ngâkna rang in insâng a sina. Hanchu grapebil hah inlo mingei ngâk rang ngei kuta bângin, ram danga khuolchai a se zoia.

34Grape mara pot zora ahong tungin chu, ânlo mingei kôm han a chang rangtum va lâk rangin a suokngeni a tîra.

35Ânlo mingei han a suokngeni hah an lei sûra, inkhat an jêma, inkhat an thata, inkhat lung leh an dênga.

36Atharin suok dangngeni motona nêka tam uolin a tîr nôka, motona ngei angdênin an lei tho nôk rêka.

37Anûktaka chu, ‘Ka nâipasal hi chu lei jâ ngêt an tih,’ tiin a nâipasal hah an kôm a tîra.

38Hannirese, ânlo mingei han a nâipasal hah an lei mûn chu, ‘Hi mi hih a pumapa nâipasal ani. Hong roi lei that rei u, male a rochon ei man rang ani!’ an tia.

39Masikin an sûra, grapebil pêntieng an vôrpaia, ama hah an that zoi.”

40“Atûn, grapebil pumapa a hong tikin, ha ânlo mingei hah imo hong lo ta nih?” tiin Jisua'n a rekela.

41Anni han a kôm, “Ha mi saloi ngei hah that ngei ngêt a ta, grapebil hah ânlo mingei adang, amara pot zora diktaka changrangtum a pêk ngâi rangpu kôm pêng a tih,” tiin an thuona.

⁴²Jisua'n an kôm, Pathien Lekhabu'n, "In sinpu ngeiin lung mangmunboi anga an hengpai hah, akila lung kâmomtak achang zoi. Ma hah Pumapa tho ania; ei mitmua hin kamâmom ani! a ti hih nin pore ngâloi mo?" a tipe ngeia.

⁴³Jisua'n a bôksa nôka, "Masikin nangni ki ril, Pathien Rêngam hih nin kôm renga lâkpai nîng ata, amara musuo rang mingei kôm pêk nîng atih.

⁴⁴Tutu hi lung chung a ânpal chu ahârârin om an ta, hi lungin adel vâng chu innôichit an tih," a tia.

⁴⁵Ochaisingei le Phariseengeiin Jisua chongmintêk misîr hah an rietin chu, an chungroi a misîr ani ti an riet zoia.

⁴⁶Masikin ama sîr rang an pût zoi. Aniatachu anni ngei han mipui ngei an chia, mipui ngeiin Jisua hah dêipu'n an be sikin.

Matthew 22

Inneina ruolhoi chongmintêk

(Luk 14:15-24)

¹Jisua'n mipui ngei a rokôka, chongmintêk a mang nôka.

²"Invân Rêngam chu rêngpa inkhatin a nâipasal ranga inneina ruolhoi tho leh mintêk ani.

³Bukhalâi ot rangin a mîsiel ngei koi rangin a tîrlâmngai a tîra, hannirese hong nuom mak ngeia.

⁴Masikin tîrlâm dangngai a tîr nôka, a mi sielngai kôm hi anghin ti rangin chong a be ngeia: 'Atûn hin bukhalâi ot rangin ki sinsiem suozoi; ke sechalngai le ke serâttuoi vai minthai ngei ka thata, neinunngai murdi sinsiem suo ani zoi. Inneina bukhalâi ot rangin hong ta roi!' ti rangin.

⁵Aniatachu siela omngai han itên lei be mak ngeia, male an sadai chita an sina: inkhat a loaia a sea, inkhat chu a dôra a sea.

⁶Midang ngeiin tîrlâmngai hah an sîrrapa an jêm ngeia, an that ngei zoi.

⁷Rêngpa hah a taksi sabaka; masikin a râlmngai a tîra, ha mithatpungei hah a min thatngeia, male an khopuilien khom a min hâl pe ngei zoia.

⁸Hanchu a tîrlâmngai a koia, an kôm, Inneina bukhalâi chu minsûk suo ani zoia, aniatachu ki mi sielngai hah a nêk ruo nimak ngei.

⁹Atûn chu lamliena se unglâ, mi nin mu murdi bukhalâi ot rangin hong koi roi, a tipe ngeia.

¹⁰Masikin tîrlâmngai hah lamlienngai an sea, mi an mu murdi, misa le misie; an hong koibûma, inneina in hah mipuiin an sip zoia.

11“Rêngpa hah khuolmingei en rangin ava lûta, inneina puon insil loi mi inkhat ava mua.

12Rêngpa han a kôm, ‘Mala, inneina puon insil loiin khoangin mo asûnga no hong lût?’ tiin a rekela. Hannirese ha mi han ite ti maka.

13Male rêngpa han a tîrlâmngai kôm, ‘A kut le ke khit unglâ, pêntieng ajîngna vôrpai roi. Mahan chap a ta a hâ riel a tih,’” a tia.

14Hanchu Jisua'n, “Mi siela om chu tamtak an nia, aniatachu, thanga om chu atômte kêng an ni,” tiin chongkhârân a tia.

Chôiruol pêk roia chongrekel

(Mk 12:13-17; Luk 20:20-26)

15Phariseengei hah an jôkpaia male Jisua chongrekelin min ôk rang chang an mintuo zoi.

16Hanchu an ruoisi senkhatngai le Herod pâla mi senkhatngai a kôm an tîra, ha mingei han, “Minchupu, chongtak ni misîr ngâi ti kin riet. Tute lunghâng tho uol ngâi mak chea, tute mindona chungroia khom kângdoina dôn loiin miriemngai ta rangin Pathien lungdo chongtak hah ni minchu ngâia.

17Hanchu, ni ril ta, imo ni mindon? Roman Rêng Ceasar kôma chôiruol pêk hih ei Balamîn ânkal mo, ânkal loi mo?” an tia.

18Nikhomrese, Jisua'n asalo an mintuo hah a riet chiena, an kôm, “Nangni Asarotholngai! ithomo ni min ôk rang nin pût hi?

19Chôiruol chôi ranga sumthîr hah ni min en ta u!” a tia. Sumthîr hah a kôm an hong chôi,

20male a rekel ngeia, “Tu mâi rimil le tu riming ngei mo an ni hi?” a tia.

21Anni han “Ceasar” tiin an thuona. Masikin Jisua'n an kôm, “Asa, hanchu, Ceasar ta chu Ceasar kôm pêk unglâ, Pathien ta chu Pathien kôm pêk roi,” a tipe ngeia.

22Mahi an rietin chu an kamâm tataka; ama an mâka an rotpat zoi ani.

Thina renga inthoi nôkna roia chongrekel

(Mk 12:18-27; Luk 20:27-40)

23Mani sîn nanâk han, Sadducee senkhatngai Jisua kôm an hong mingei hih thina renga inthoi nôk no ni ngei an tia.

24Anni han, “Minchupu, ‘Moses'n mi nâi neiloiin a lômnu thisan senla, a nâipa'n ha meithâi hah luô nôk ngêtin a upa ta rangin nâi a nei pe rang ani,’ a tia.

25Atûn hin, kin lâia lâibungrêng sari an oma; ulientakin in a neia, nâi neiloiin a thia, masikin a lômnu hah a nâipa kôm a mâka.

²⁶A nâipa iniknapu chung a khom ma anghan a hong om nôka, a inthumnapu chung a khom, azoinataka sarinapu dênin an luo paka.

²⁷Anûktaka chu nupangnu khom a thi zoia.

²⁸Atûn, mithi ngei inthoi nôk tika han tu lômnû tak mo ani rang ani zoi? An rêngin laka an luo paka,” an tia.

²⁹Jisua'n an kôm, “Idôra dikloi ngei mo nin ni zoi!! Pathien Lekhabu nôncu Pathien sinthotheina nin riet loi sika kêng ani.

³⁰Mithi ngei aringin an inthoinôk tika chu invâna vântîrtonngei angin om an ti zoi, innei khâi noni ngei.

³¹Atûn ithingei aringa an inthoinôkna roi: Pathien'n nangni a misîr pe hah nin la pore tet ngâloi mini?” a tia

³²Pathien'n, “Keima Abraham Pathien, Isaac Pathien, Jacob Pathien ki ni,” a tia. “Ama chu iringnei Pathien kêng ani, ithingei Pathien nimak,” tiin a thuona.

³³Mipui ngei han mahi an rietin chu, a minchûna hah an kamâm tatak zoi ani.

Chongpêk roiinputak

(Mk 12:28-34; Luk 10:25-28)

³⁴Jisua'n Sadduceengei hah a makhal mindokngei tih Phariseengeiin an rietin chu a pâlin an hong,

³⁵an lâia Balam minchupu inkhatin chongrekelin min ôk rang a bôka.

³⁶“Minchupu, Balama hin kho chongpêk tak himo a roiinputak?” tiin a rekela.

³⁷Jisua'n a kôm, “ ‘Pumapa na Pathien chu nu mulungrîl murdi'n, na ratha murdi'n, nu mulungbôk murdi'n lungkham mu roh iti hi,’ ani tiin a thuona.

³⁸Mahih chongpêk roiinputak le a kâmomtak ani.

³⁹Chongpêk inikna kâmom nôk ân angpui chu: ‘Nangma nên lungkham anghan nu bungmingei lungkham mu roh’ iti hih ani.

⁴⁰Moses Balam pumpui le dêipungei minchûna ngei murdi khom hi chongpêk inik chung a hin ânngam let ani,” a tia.

Messiah chungroia chongrekel

(Mk 12:35-37; Luk 20:41-44)

⁴¹Pharisee senkhatngei munkhatin an intûp laiin, Jisua'n an kôm,

⁴²“Messiah chungroi hih imo nin mindon? Tu richisuonpâr mo ani?” tiin a rekel ngeia. “Ama chu David jâisuona mi ani,” tiin an thuona.

⁴³Jisua'n an kôm, “Nôte, ithomo Ratha han David hah ‘Pumapa’ tiin a min koi? David'n,

⁴⁴“Pumapa han ka Pumapa kôm a tia: Ka chang tieng insung tit roh Na râlngei ne kepha nuoia ka dar suo mâka chu,” a ti ani.

⁴⁵David'n, “Pumapa tiin a koiin te, i angin mo Messiah hah David richisuonpâr ani thei rang?” a tia.

⁴⁶Tutên Jisua hah thoun thei mak ngeia, male mani sôn renga chu tutên ite chongrekel rang ngam khâi mak ngei.

Matthew 23

Jisua'n balam minchupungei le phariseengei renga indîn ranga a rilna

(Mk 12:38-39; Luk 11:43-46; 20:45-46)

¹Hanchu, Jisua'n mipuingei le a ruoisingei kôm chong a rila.

²“Balam minchupungei le Phariseengei hih Moses Balamngei rilminthârpu ngei ni ranga phal an ni.

³Masikin itho ranga nangni an be murdi chu nin jômin nin jûi rang ani; Hannirese, an omchan chu jûi no roi, an misîr ngei hih an mang ngâi loi sikin.

⁴Puok arik le apêl intak takngei an siema, mingei chung a an bâng ngâia, aniatachu, ha mingei sanna rangin an kutpârngei luom mang nuom ngâi mak ngei.

⁵An sintho murdi khom miriem mu rangin kêng an sin ngâi. An machalngei le an bângei khitna hih Pathien chong miziek ngei hih en ta u, an inrol bâk na! An kâncholiin chuol minvona ngei khom hih en ta u, aseï bâk na!

⁶Ruolhoi thona muna munhoi tatakna ngei le synagog ngeia sukmun asa an ngên ngâia;

⁷Bazar mun ngeia min chubai an mûk le ‘Minchupu’ tia an koingei an minlut ngâia.

⁸Nangni chu ‘Minchupu’ tiin koi ni tet no tunui, urêng korong nin nia, minchupu inkhat mang nin dôn sikin.

⁹Pilchung hin tute O, Pa, ti no roi, Pa inkhat mamang invâna nin dôn sikin.

¹⁰‘Ruoipu’ ti khomin koi ni no tunui. Messiah mang hih nin ruoipu ani sikin.

¹¹Nin lâia a roiinputak chu nin tîrlâm ani rang ani.

¹²Tutu a omlien kai chu chîn an ta, a omchîn kai chu minlutin om an tih.”

Jisua asarotholngei demna

(Mk 12:40; Luk 11:39-42,44,52; 20:47)

¹³“Nangni Balam minchupungei le Pharisee asarotholngei! Nin chung arik! Invân Rêngam inkhâr hah mingei nin khâr pea; nangni laka lût uol mak cheia mi a lût rang ngei khom nin khap ngâi.

14Nangni Balam minchupungei le Pharisee asarotholngei! Nin chung arik! Meithângei sum nin sâk pea, mi huongnân asôt zazan chubai nin tho ngâi; masikin nin dûk tuong rik uol ok atih!

15Nangni Balam minchupungei le Pharisee asarotholngei! Nin chung arik! Mi inkhat insîrna rangin tuikhanglien le ram pumpui nin sir ngâia; a hong inletin chu ha mi hah nangni nêka bâknika dûkmuna se rangin nin tho ngâi!

16Nangni ruoipu mitcho, Tukhom Biekin dêna khomâkinsâm chu ite nâng ngâi maka; aniatachu tukhom Biekina rângkachak dêna khomakinsâm chu anângna aom." Ti ngâi ngei nin chung arik.

17Mitcho inmôlungei! Imo akâm aom uol, rângkachak mo aninônchu rângkachak inthieng Biekin hah mo?

18Mapêna Tukhom mâichâm dêna khomakinsâm chu ite anângna omaka, ania mâichâm chunganeinunpêk dêna khomakinsâm chu anângna aom, nin ti sa ngâi.

19Idôra mitcho nin ni! Imo akâmaom uol, neinunpêk minthieng ngâipu mâichâm ha mo, mo neinunpêk ha mo?

20Masikin tukhom mâichâm le a chunganeinunpêk aom murdi'n ânsâmdelsa ani.

21Tukhom Biekin dêna khomâkinsâm kaiin chu Biekin leh a sûnga Pathien om hah dênin ân sâm ania;

22male tukhom invân dêna khomâkinsâm chu Pathien sukmun le a chunganeinunpêk dênin ân sâm ani.

23Nangni Balam minchupungei le Pharisee asarotholngei! Nin chung arik! Sâkruo avâng ngâi chimungei, lêngmesêr le sâkbakhêr tenah khom sômakhat nin pêk ngâia, hannirese, Balama akâm aom uol, dikna ngei le mulungjûrpuina le iemomna ngei jôm rangin chu lunghâng tho ngâi mak chei. Hi ngei hih nin jôm rang ani, adangngei khom mathân uol loiin.

24Ruoipu mitcho ngei! Nin tui nêkna thoihir chu nin rithît minsâia, ania saringsei chu nin movol ngâi ani.

25Nangni Balam minchupungei le Pharisee asarotholngei! Nin chung arik! Nin kilât le nin mâirâng pênthieng nin minsâia, a sêngtieng chu, inrûksâkna le indînloi nân ai sip ani.

26Pharisee mitcho ngei! Kilât sêngtieng hah minsâi bak unglâ, hanchu apênthieng khom sâi sâng atih!

27“Nangni Balam minchupungei le Pharisee asarotholngei! Thân lung, nôtminvâra apêntieng chu en ahoi zata, hannirese, asûngtieng chu ru le ruok athûa sip angha nin ni.

28Ma anghan mitin mitmua pêntieng chu asa anghan nin inlanga, hannirese, nin sûngtieng chu asarotholna le sietnangeia sipmat nin ni.

Jisua a dûktong rang a misîr

(Luk 11:47-51)

29“Nangni Balam minchupungei le Pharisee asarotholngei! Nin chung arik! Dêipungei thân nin sinsiama, midikngei riëttit nân lungngei nin minvo ngâia;

30male ei richibulngei om lâia han ei lei omsai nikhom senla, dêipungei thisen an musuok han chu inchel no ih, nin ti ngâi.

31Masikin Dêipungei lei that ngei richia mi nin ni ti nin minlang chak ani.

32Se unglâ, nin richibulngeiin an lei phut hah minzoi roi.

33Nangni murûlungei le murûl nâingei! Dûkmuna se ranga jêkmasatna renga inmo jôk thei rangin nin insabei?

34Masikin nangni ki ril, nin kôm dêipungei, mivârngei, minchupungei juongtîr ka ta, an lâia senkhat chu that nin ta, senkhat chu jêmdel nin ta, senkhat chu synagog ngeia jêm nin ta, khopui ankhat renga khopui ankhata rujûlpai nin tih.

35Masikin midiktak Abel thisen renga Biekin le mâichâm kêra Barakia nâipasal, theiloinaboi, Zakaria nin that thisen tena han, pilchunga midikngei thatna sika dûktuongna chu nin chungâ la chul atih.

36Adiktakin nangni ki ril: ha mingei thatna sika dûktuongna ngei murdi chu atûna mingei chungâ chul let atih.

Jisua'n Jerusalem a lungkhamna roi

(Luk 13:34,35)

37“Jerusalem, Jerusalem! Dêipungei thata, Pathien'n no kôma thangthei a hongtîr ngei lung leh a dêng thatpu! Ârpuinu'n ate ngei a mantha nuoia ai opbûm ngâi anghan ni mingei anrêngin voizet mo ka bân nuoia opbûm rang ko bôka, hankhoma nuom mak che!

38Masikin nin Biekin hah mâkrakin, a korongin om atih.

39Nangni ki ril, ‘Pumapa rilinga hong chu Pathien'n satvur rese,’ nin ti mâka chu atûn renga ni mu nôk khâi no tunui a tia.”

Matthew 24

Jisua'n Biekin siet rang a misîrna

(Mk 13:1,2; Luk 21:5,6)

¹Hanchu, Jisua hah a jôka, Biekin renga a se lâiin Biekin min en rangin a ruoisingei a kôm an hong.

²Ama han an kôm, “En roi, Adiktakin nangni ki ril, hitaka lung inkhat luo khom hih amuna om no nih; anrêngin paiin om riei an tih,” a tia.

Intakna le nuomlona

(Mk 13:3-13; Luk 21:7-19)

³Hanchu, Jisua Oliv tângah âsung lâiin, a ruoisingeiin a theiin an hong intongpuia. “Mi ril ta, hi ngei hih itika mo ai tung rang,” male “Nu juong nôkna rang le rammuol mongna rang minsinna hah imo ai ni rang,” tiin an rekela.

⁴Jisua'n an kôm han, “Tutên nangni an huong lona rangin, indîn roi.

⁵Mi tamtakin, ‘Messiah hah ki ni!’ tiin keima riming songin hong an ta, mi tamtak lei huong an tih.

⁶Nin kôla indoina roi riet nin ta, ala takna indoina roi inthang la riet nin tih, nikhomrese, nin jâmminzal no roi. Ha neinunngai hah chu ahongtung ngêt rang ani, nikhomrese amongna chu lani no nih.

⁷Nam le nam indoi an ta, ram le ram indoi an tih. Muntina mâitâm chul ata, ningnu innîk atih.

⁸Ha ngei hah nâiha aphut chak ang hah ani.

⁹Hanchu, dûk nangni min tuong rang le nangni that rangin nangni la sôr an tih. Keima sikin nam tinin nangni la mumâk an tih.

¹⁰Ma tika chu mi tamtakin an taksônna la mâng an ta, lân sôr inlôm an ta, lân mumâk inlôm an tih.

¹¹Male, dêipu dikloi tamtak hong suok an ta, mi tamtak la huong an tih.

¹²Hanchu, sietna ala pung rang sikin mi tamtak lungkhamna la dâi atih.

¹³Nikhomrese, tutu among dêna diera tuong chu sanminringin om an tih.

¹⁴Male, hi ‘Rêngram Thurchi Sa’ hih namtin rietna rangin rammuol pumpuia misîrin la om a ta; male, amongna hong tung atih.”

Intakna Ichiom tak

(Mk 13:14-23; Luk 21:20-24)

¹⁵“Hanchu, ‘Intakna Ichiom Tak,’ dêipu Daniel ramanga lei misîr hah mûng nin ta, mun inthienga han inding a tih.” (Apore murdi'n aomtie riet rese ngei!)

¹⁶“Male Judea rama om ngei hah tânga rot ngêt rese ngei.

¹⁷Mi a inchunga om khom insûnga a neinun kaisuo rangin chum no rese.

¹⁸Mi loa om khom a puon lâk rangin kîr no rese.

¹⁹Ha ni han chu nâivongngei le nu nâite pomlâingei chung chu ântak bâk rang na!

²⁰Nin rot rang zora hah phalbia mo, sabbathni'n mo ani lolina rangin Pathien kôm chubaitho roi.

²¹Ha zora dûktongna ichiruoi inthang om rang ha chu rammuol insieng renga atûn tena la om ngâi maka, om nôk tet khâi no nih.

²²Nikhomsenla, Pathien'n ha sùn ngei hah a minbong zoi; ni no senla vang chu tute ringsuok thei noni ngei. A mi zenngai sikin Pathien'n ha sùn ngei hah minbong a tih.

²³“Male, tukhomin nin kôm, ‘En ta, Messiah chu hin a om!’ aninônchu ‘Soson a om!’ an ti khomin iem no roi.

²⁴Messiah rothol ngei le dêipu dikloi ngei an la suok rang ani; ha ngei han thei vang senla ngei chu Pathien zen mingei luo an huong theina rangin minsinna sininkhêl le sin kamâmruoi thông an tih.

²⁵Rangâi roi! Azora ahongtung mân nangni ki lei ril ani.

²⁶Aninônchu, nin kôm, ‘En ta, ramchâra aom!’ an ti khomin mahan se no roi; aninônchu hin ânthup an ti khomin iem no roi.

²⁷Miriem Nâipasal juong nôk rang chu kôlinleka dapdaptngai sak tieng renga thang tieng tenah ahonginlek anga han ani rang sikin.

²⁸“Kho munah khom saruok omna murdia sêlkuru khom intûp an tih.”

Miriem Nâipasal juong rang roi

(Mk 13:24-27; Luk 21:25-28)

²⁹“Ha intakna nikhuongei zoiin chu nisa jîng a ta, tha vâv khâi nonih, invân renga ârsi ngei tâk a ta, invân sinthotheina ngei hah inphêthet'n om an tih.

³⁰Masuale chu Miriem Nâipasal minsinna hah invâna inlang ata; pilchunga mi murdi'n Miriem Nâipasal invâna sôm chungâ sinthotheina le inlal taka juong an mu tikin chu chap an tih.

³¹Bekul miring inring tak tum nîng ata, hanchu, a vântîrtonngai hah rammuol rikil minlia tîr a ta, kôlkung renga kangkhat tiengâ kôlkung dênin a mi zenngai mintûp atih.”

Theichang kunga minchuna

(Mk 13:28-31; Luk 21:25-28)

³²“Ha chongmintêk hah theichang kunga inchu roi. Amachang ahong ringa, ahong innoia, abuo ahong incherin chu kholum ahong nâi zoi tiin nin riet ngâi.

³³Ha angdênin, ma neinunngai murdi hah nin mu'n chu, a zora ahong nâi zoi, ânphut rang ani zoi ti riet roi.

³⁴Atûnlâia mingei hih an thi riei mân, hi ngei nâm hih tung let atih ti riettit roi.

³⁵Pilchung le invân boi a ta, ko chong chu boi no nih.”

Tutên anikhuo le a zora riet loi

(Mk 13:23-37; Luk 17:26-30,34-36)

³⁶“Hannirese, ha nikhuo le a zora ha chu Pa telloiin chu tutên riet mak ngei; Invâna vântîrtongei khomin, Nâipasal khomin.

³⁷Miriam Nâipasal juong nôkna chu Noah damlâi angdên han nîng atih.

³⁸Tuilien mân, sùn ngeiah han chu Noah rukuonga a lût ni dênin an sâka an nêka, lômnû, lômpa an innei ngâia.

³⁹Tui ahongliena, an rêngin an in mang riei mâka chu imo ahongtung ite riet mak ngei. Miriem Nâipasal juong nôkna chu ha ang takah han nîng atih.

⁴⁰Ha tikin chu mi inik loia sin an ta inkhat tuongin om a ta, inkhat mâkin om a tih.

⁴¹Nupang inik sasum kunga sângsukin om an ta, inkhat mâkin om a ta, Inkhat tuongin om a tih.

⁴²Masikin inning chien roi, itiknimo nin Pumapa a juong rang riet mak chei.

⁴³In pumapa'n inru hong rang zora hah riet senla chu, lei meng a ta, a neinunngai min muruk no nih, ti hih riet roi.

⁴⁴Masikin nangni khom intûng chienin om roi, nin tûng loi zora takin Miriem Nâipasal a juong rang sikin.”

Tîrlâm taksônom le taksônomloi

(Luk 12:41-48)

⁴⁵“Tîrlâm taksônom avâr tak, a pun a insûng cherêla, tîrlâm dangngei zora tina an sâk sem pe ranga ulien a minchang chu tumo nini?

⁴⁶A pu'n a hong, ha anga sin thoa tîrlâm a hong mu ha chu a râisân ani,

⁴⁷Adiktakin nangni ki ril, a pu han a neinun murdi chung a ajêkpu minchang a tih.

⁴⁸Hannirese, tîrlâm saloi anîn chu, a mulungin ‘Ku pu chu hong vak no nih’ tîng a ta,

⁴⁹a tîrlâm champuingei lei jêm a ta, ju inrûingei kêra lei nêkin lei sâk a tih.

⁵⁰Male, ha tîrlâm hah a tûng loi lâitak le a riet loi zora takin a pu hong suok pe atih.

⁵¹A pu han rujûlpai a ta, asarotholngai chang anga han minchang a tih, Mahan chap a ta, a hâ riel a tih”.

Matthew 25

Dôngmate sôm ngei chongmintêk

- ¹“Ma tikin chu, Invân Rêngram hah dôngmate sôm ngei an châtingei chôia, moipumapa don ranga se ngei leh mintêk nîng atih zoi.
- ²An lâia mi rangnga hah an inmôla, mi rangnga hah an vâi ani.
- ³Ânmôl ngei han, an châtingei an chôia, a tui chôia sa mak ngeia,
- ⁴avâr ngei han chu an châtingei an chôia, a ûma han a tui khom an chôia sa.
- ⁵Moipumapa hah a juong innu sikin an in alên mua, an lei inphara.
- ⁶Jânchimrip takah chu ‘Moipumapa a juong zoi! Adon rangin hong suok ta roi’ tia iniek rahang a juong om zoia;
- ⁷hanchu, dôngmate sôm ngei hah an inthoia, an châtingei an minsûka.
- ⁸Male, ân môt ngei han avâr ngei kôm han, ‘Nin châtitui hah mi pêk sa roi ba! kin châti athi rang kêng’ an tia.
- ⁹Avâr rangnga ngei han, ‘Nangni pêk thei noning ung. Keini leh nangni rangin chu hun nonih. Dôrah se unglâ, va rochok roi,’ tiin an thuona.
- ¹⁰Hanchu, dôngmate in môt ngei hah châtitui rochôk rangin an sea, hanchu an se kârin moipumapa hah a juong zoia. Dôngmate rangnga ân thok ngei chu ama leh inbiek ruolhoi tho rangin an lûta, in an khâr zoi.
- ¹¹Nûkah chu dôngmate dang ngei khom an hongtung zoia, O pu, o pu, mi min lût roh! Tiin an in-ieka.
- ¹²Moipumapa han, Nangni min lût tet no ning! Nangni riet ngâi mu-ung tiin a thuona.”
- ¹³Male Jisua'n chongkhâr nân, “Intung chienin om roi, a nikhua le azora hah nin riet loi sikin,” a tia.

Tîrlâm inthum ngei chongmintêk

(Luk 19:11-27)

- ¹⁴“Ma tikin chu Invân Rêngram hah mi inkhat khuol a chai rangtoa, a tîrlâm ngei a koia, a rochon ngei enkol leh mintêk nîng atih zoi.
- ¹⁵An thei lam ang chitin a pêka, inkhat kôm sum isâng rangnga a pêka, inkhat isângnik a pêka, inkhat kôm isâng khat a pêka. Hanchu, khuolchai rangin ân phet zoi.
- ¹⁶Tîrlâm isâng rangnga changpu ha chu a se kelena, ava minpunga, isâng rangnga dang ava suo nôka.

17Ha anga han tîrlâm isâng nik a changpu ha chu a sea, adang isâng nik a muphung nôka,

18hannirese, tîrlâm isângkhat a changpu ha chu a sea, khur a choia, a pu sum hah athupa.

19Asôtzan suoleh chu tîrlâmngei an pu hah a hongkîr nôka, an kôm a sum thurchi a minthâr zoia.

20Tîrlâm, isâng rangnga changpu hah a hongga, isâng rangnga dang a hong pêka, o pu isâng rangnga mi ni pêk hah en ta! hi isâng rangnga adang ke lei man nôk hi a tia.

21A pu han a kôm, No tho minsa, nangma tîrlâm asa le iemom, atômte chungga taksônomin no om sikin, atampa chungga khom a enkolpu'n nang minchang ki tih. Hong inla, ka râisâna hong chang sa roh! a tia.

22Hanchu tîrlâm isâng nik changpu hah a hongga, O pu, isâng nik mi ni pêk hah en ta! Hi isâng nik dang ke lei man nôk hi! a tia.

23A pu han a kôm, No tho minsa, nangma, tîrlâm asa le taksônôm! Atômte chungga taksônôm ni ni sikin, atampa chungga khom a enkolpu'n nang min om ki tih. Hong inla, ka râisâna hong chang sa roh!" a tia.

24Hanchu tîrlâm isâng khat changpu hah a hongga, O pu, mi inngartak ni ni ti ki riet; nu tu lolina khoma na ât ngâia, sachi ne rethe lolina munna khom bu ni mintûp ngâia.

25Ki chia, masikin ke sea, pil rilah nu sum hah ka va thup ani. En ta hi nata nanâk hah, a tia.

26A pu han a kôm han, "Nangma tîrlâm puoloi le thaboipa! Ka tu lolina khoma ka âtta, sachi kerthe lolina khoma bu ki mintûp ngâi ti ni riet na?"

27Ha anghan aninte, ithomo ku sum hah sumsiena inah ne lei sie loi, nino senla chu, ko hong nôka hin ku sum hih apung leh ka man rang kêng ai ni.

28Atûn chu sum hih a kôm renga lâk unglâ, isâng sôm dônpu kôm pêk roi.

29Tutu a dôn chu pêk mintam uol nîng a ta, dôn ok a tih; tutu a dôn loi kai chu ai dôn chête khom lâk pe rip nîng a tih.

30Hi tîrlâm mangmunboi hih pêntieng ajîngna vôrpai roi; mahan chap a ta, a hâriel a tih," tiin a rila.

Azoinataka Roijêkna

31"Miriem Nâipasal hih vântîrtonngei murdi leh inlal taka a juong tikin chu Rêngsukmuna insung a ta,

32 male a makunga namtina mingei intûp an tih. Hanchu, belrihôlpu'n kêt le belri a sensâi anghan pâl nikin sensâi a tih.

33 Midikngei hah a changtieng dar a ta, adangngei hah a voitieng dar a tih.

34 Hanchu Rêng han a chang tienga mingei kôma han, Hong roi ka pan sat ai vur ngei! Hong unglâ, rammuol inzir renga nin ta ranga rêngram minsûk hih hong luo ta roi.

35 Ko von achâmin sâk mi nin pêka, ku tuiân râlin nêk rang mi nin pêka; khuolmi ki nîn nin ina mi nin mintunga.

36 Dierboiin ko omin puon mi nin min sila; ka damloi zorân mi nin donsûia, intâng ina ko om khomin mi nin pan ngâi," la tîng a tih.

37 Midikngei han, "Pumapa tikhanmo no vonchâmin nang kin mua, sâk nang kin pêka, tui inrâlin nang kin mua nêk rang nang kin pêk?"

38 Tikhanmo khuolmin nang kin mua, kin inah nang kin mintunga, dierboiin nang kin mua, puonsil rang nang kin pêk?

39 Tikhanmo damloiin mo, intâng ina mo nang kin mua, nang kan pan ngâia?"

40 Rêng han an kôm, "Nangni ki ril, hi ku sîngsuok achîntak ngei lâia mi inkhat chungâ nin sin hah ku chungâ nin sin ani," tiin la tîng a tih.

41 "Hanchu a voi tienga mingei kôm han chu, Nangni chu Pathien khomâksâmna nuoia om roi! Diabol le a tîrtonngei ta ranga sin kumtuong meiah han se ta roi!

42 Ko von achâmin sâk mi pêk mak cheia, ku tui ân râlin nêk rang mi pêk mak cheia;

43 Khuolmi kinîn nin inah mi mintung mak cheia, dierboiin ko omin puon ni min sil mak cheia, damloiin le intâng ina ko om khomin mi pan ngâi mak chei," la tîng a tih.

44 Hanchu anni han an kôm, "Pumapa tikhanmo no von achâmin mo, tui ân râlin mo, khuolmin mo, dierboiin mo, damloiin mo, intâng ina mo nang kin mua, ni sin nang kin tho pe ngâi loi?" Tiin la thvon an tih.

45 Rêng han an kôm, "Nangni ki ril, hi mi chînte ngei lâia inkhat chungâ nin sin nuom loi chu ku chungâ nin sin loi ani," la tîng a tih.

46 "Hi mingei hih kumtuong dûktuongna sêng an ta, hannirese, midikngei chu kumtuonga ringna han sêng an tih," a tia.

Matthew 26

Jisua that rangtie an mintuo
(Mk 14:1-2; Luk 22:1-2; Joh 11:45-53)

- ¹Hanchu Jisua'n ha chongngei murdi hah a ril zoiin chu a ruoisingei kôm,
²“Sûnnik suoleh, Kalkân kût hong om atih iti nin rieta. Miriem Nâipasal hih jêmdel rangin pêk nîng atih,” a tia.
³Hanchu ochaisingei le Upangei hah Ochai Inlal Caiaphas inpuia intongna an neia,
⁴inrûkin an sûra, an that rang lam an mintuoa.
⁵Nikhomrese, “Kût sîngin chu ni no rese, mipui lâia injêlna tete om duoi nih,” an tia.

Bethany'a Jisua sariiek polin a om

(Mk 14:3-9; Joh 12:1-8)

- ⁶Hanchu, Jisua hah Bethany'a aphârpa Simon inah a oma.
⁷Jisua bu a nêk lâitakin, nupang inkhat alabaster bilôrin sariiek mirimhoi man luttak ahong chôia, a luah a buok pea.
⁸Ruoisingeiin an mu inchu an ningathika. “Irangmo hi anga a incek hi?
⁹Hi mirimhoi hih man tamtaka zuora, inriengngei kôma sem thei kêng ani,” an tia.
¹⁰Jisua'n an ti ngei hah a rieta, an kôm, “Ithomo hi nupangnu hih nin rokôk? kata rangin sin asa le enhoi tak ai tho ani.
¹¹Inriengngei chu nin kôma om tit an nia, hannirese, kei chu nin kôma om bang noning.
¹²Hi sariiek mirimhoi ka takpuma ai buok hih phûm ranga ni sinsiamna ranga ai tho ani.
¹³Atûn, chongdiktak nangni ki ril, rammuol pumpuia thurchisa an misîrna nâma, hi nupangnu sintho khom hih ama riettina rangin misîr sa ngâi an tih,” a tia.

Juda'n Jisua minsûr rang a nuom

(Mk 14:10-11; Luk 22:3-6)

- ¹⁴Masuole Ruosisi sômleinik ngei lâia inkhat a riming Judas Iscariot an ti hah ochaisingei kôm a sea
¹⁵Male ama'n, “Jisua nangni ki minsûr inte imo mi nin pêk rang?” a tia. Anni han sumdâr sômthum an tela ama an pêka.
¹⁶Masuo renga chu Judas han Jisua an kuta a pêk theina rangin chuminrên a rok tit zoi.

Jisua a ruoisingei leh kalkân ruoi an sâk

(Mk 14:12-21; Luk 22:7-13,21-23; Joh 13:21-30)

¹⁷Cholboivâipôl Kût ni sùn motontakah han, ruoisingei an hong, Jisua kôm, “Kalkân Kût hih khotieng mo va minsûk unglang nu nuom?” tiin an rekela.

¹⁸Ama han an kôm, “khopuiliena mi inkhat kôm se ungl, a kôm. ‘Minchupu'n ko zora anâi zoia; ku ruoisingei leh Kalkân Kût ni inah mang kin tih’, a ti va ti roi,” a tia.

¹⁹Jisua'n an kôm he a be lam angtakan an thoa, Kalkân Kût hah an va minsûk zoia.

²⁰Kholoi ahong nînchu, Jisua le ruoisi sômleinik hah khalâi ottin an insung lâiin.

²¹Khalâi an ot lâitakin Jisua'n an kôm, “Nangni ki ril, nin lâia mi inkhat hin ni minsûr a tih,” a tipe ngeia.

²²Hanchu ruoisingei mulung dûkatonga, a kôm, “Pumapa, keima mo mi ni ti?” tiin inkhat inkhatin an rekel paka.

²³Jisua'n an kôm, “Khênga vâipôl mi pûrpuipu hin ni minsûr a tih.

²⁴Pathien Lekhabu'n ai ti anghan, Miriem Nâipasal hih thîng a tih, nikhomrese, Miriem Nâipasal minsûrpu chung chu arik bâk rang na! Ha miriem ha chu ânzir tetloi nisenla ata rangin sa uol a tih,” a tia.

²⁵A minsûr rangpu Judas hah a hongchong, “Minchupu, keima mo mini ti tatak?” tiin a rekela. Jisua'n a kôm, “Nên ti hate” tiin a thuona.

Pumapa Jânbu

(Mk 14:22-26; Luk 22:14-20; 1 Kor 11:23-25)

²⁶Hanchu an sâk lâitakin, Jisua'n vâipôl a lâka, râisânchong a ril zoiin chu a khoia, a ruoisingei kôm a pêka, an kôma, “Lâk ungl, sâk roi, hi hih ka taksa ani,” a tia.

²⁷Masuole chu, kilât a lâka, Pathien kôm râisânchong a ril zoiin chu an kôm a pêka, “Nêk roi, nin rêngin;

²⁸ma hih ki thisen mi tamtak nunsie ngâidamna ranga suok rang, Pathien chonginkhit mindet rang chu ani.

²⁹Nangni ki ril, Ka Pa Rêngrama nangni leh uain thar ke nêk ni atung mâka chu hi uain hih nêk nôk khâi no ning,” a tia.

³⁰Masuole chu la inkhat an thoa, an tho suolechu Oliv tâng tieng an se zoi.

Peter'n a minlêm rang Jisua'n a leiril

(Mk 14:27-31; Luk 22:31-34; Joh 13:36-38)

³¹Hanchu Jisua'n an kôm, “Avien jân lelea hin nin rêngin rot let nin ta, ni mâk riei nin tih, Pathien Lekhabu'n, ‘Pathien'n belrihôlpu hah that an ta, belringei hah chekinchâi chit an tih,’ a ti sikin.

³²nikhomrese, kên thoinôk suoleh Galilee rama nin motona lei sêng ki tih,” a tia.

³³Peter'n a kôm, “Adangngeiin nang mâk riei khomrese ngei, keiman chu nang mâk tet no ning!” a tia.

³⁴Jisua'n Peter kôm, “Nang ki ril, avien jân ârkhuong mân nangma'n voithum keima hih riet ngâi mu-ung ni tîng ni tih,” a tipea.

³⁵Peter'n a kôm, “Ni thina thisa rang khom nînlang ma anghan ti tet no ning,” tiin a thuona. Ruosisi dangngei khomin ha angdên han an ti paka.

Gethsemani ruhuona Jisua chubaito

(Mk 14:32-43; Luk 22:39-46)

³⁶Hanchu Jisua hah a ruoisingei leh munkhatin Gethsemani an tina han an sea, Jisua'n an kôm, “Soson chubai ka va tho sêngkâr chu hin lên sung roi,” a tipe ngeia.

³⁷Peter le Jebedee nâipasal inik ngei hah a tuonga, Rathainvâina le mulungdûk tongnân ahong sipa,

³⁸male an kôm, “ka mulungdûk atong raia athi rang dôrin kêng ki ni zoi. Hin om unglâ mên ning pui roi,” a tia.

³⁹Hanchu, mântieng ava se uol vieta, pila ânboke, chubai a thoa, “O Pa, anitheiin chu, hi tuongna kilât hih ko kôm renga ni khâi pai pe roh! Nikhomrese, keima racham niloiiin nangma racham ni rese,” a tia.

⁴⁰Masuole chu a hongkâr nôka, ruosisi inthum ngei hah an inin a hong mua; Peter kôm, “Inmo nangni inthum hite dârkâr khat luokhom mi inningpui thei loi tie hi?”

⁴¹Huongna nin lût loina rangin intûng chienin chubai roi. Ratha'n chu a nuoma, taksa'n ai phari loi ani” a tia.

⁴²Hanchu, avoiniknân Jisua a se nôka, a chubai nôka, “O pa hi tuongna kilât hi ke nêk loa pai thei aninônchu nangma racham ni rese,” a tia.

⁴³A hong nôkin chu ruoisingei hah ain dênin a mu nôka; an mitngei reng an meng zoi loi sikin.

⁴⁴Jisua'n a mâk ngei nôka, a voithumnân a ti nanâk hah tiin chubai a tho nôka.

⁴⁵Male ruoisingei kôm a hong nôka, an kôm, “Atûn tena inngamin nin la in bang na? En ta u, Miriem Nâipasal hih mi nunsiengei kuta pêk rang zora ahongtung zoi.

⁴⁶Inthoi unglâ, sêng ei ti zoi. En ta u, ni sâr rangpu hih ahong nâi zoi!” a tia.

Jisua an sâr

(Mk 14:43-50; Luk 22:47-53; Joh 18:3-12)

⁴⁷Hanchu, Jisua a chong la mong loiin ruoisi sômleini ngei lâia Judas hah a hong tunga. Ama lômin Ochaisingei le Upangei hongtîr mipui, khandai le tôkmol chôiin an hong sa.

⁴⁸A minsûr rangpu han, “A bieng ku tum takhah nin rokpu nîng a tih, sûr kelen roi!” tiin minsinna a lei pêksai ani.

⁴⁹Judas hah Jisua kôm a se pata, a kôm, “Minchupu, nu chung a rathanngamna om rese,” tiin a bieng a tuma.

⁵⁰Jisua'n a kôm, “Mal, no hongna abi tho kelen roh!” a ti pea, Hanchu an hong a, Jisua hah an sûr zoi.

⁵¹Jisua kôma om ngei lâia inkhatin a khandai a leka Ochai Inlaltak, a tîrlâmpa kuor a tukthâk pea.

⁵²Jisua'n a kôm, “Na khandai hah a koka thun nôk ta roh. khandai a lek ngei chu khandai nanâkin thîng an tih.

⁵³Ka Pa kôm sanna ko zong theia, ama'n voikhatrengin vântîrton isâng ruk pâl sômleini nêka tam a juongtîr thei iti ni riet loi mini?

⁵⁴Nikhomrese, ngên ta inlang, i angin mo Pathien chong hih hi anga hong iom rang hih ai tung thei ranga?” a tia.

⁵⁵Hanchu, Jisua'n lokongei kôm han, “Khandai leh tôkmol chôiin inru sûr rang leh in-ang bangin misûr rangin nin hong na? Nîngtin Biekinah kên sunga, ki minchu ngâia, mahan misûr mak cheia.

⁵⁶Nikhomrese, dêipungei chong miziek ngei hah ahong tung dik theina rangin, hi ngei murdi hih a hong iom ani hi,” a tia. Hanchu, ruoisingei murdi'n ama an mâk raka an rêngin an rot riei zoi.

Jisua roijêkna makunga ânding

(Mk 14:53-65; Luk 22:54,55,63-71; Joh 18:13,14,19-24)

⁵⁷Hanchu, Jisua sûrngei han, Ochai Inlaltak Caiaphas inah Balam minchupungei le Upangei lei intûpna han an tuong zoia.

⁵⁸Peter'n alazanin a jûia, Ochai Inlaltak in khalâi dênin a jûia. Khalâidung a lûta a mongna mu rang nuomin a rungpuengei kâra han ânsunga.

⁵⁹Jisua an that theina rangin Ochaisingei le roijêkpu murdi han theilo an mintum theina rang abi an roka;

⁶⁰nikhomrese, mu mak ngei, mi tamtak hongin a chungroia milak ril khom senla ngei. Anûktakah mi inik an hong a,

⁶¹male, “Hi mi hin, Biekin hih setin sînthumbin ki sin nôk thei,” a ti an tia.

⁶²Ochai Inlaltak hah ândinga, Jisua kôm, “Hi nang an nôna roia hin ite thuonna ni nei loi rang mo?” a tia.

⁶³Nikhomrese, Jisua chu a dâireka. Ochai Inlaltak han arkôk nôka, “Pathien aring rimingin nang ki ti; ni ril roh, Pathien Nâipasal Messiah hah nini mo?” a tia.

⁶⁴Jisua'n a kôm, “Ni na ti hate. Mahah ninôn khom nang ki ril; atûn renga Miriem Nâipasal hih Râtinchung chang tienga, insunga, invâna sôm chung a juong la mûng nin tih,” a tia.

⁶⁵Ochai Inlal han a puonsilngei a potkhêra, “Pathien a rilsiet zoi; Rietpuipu dang nâng khâi mak meh! Pathien a rilsiet tie chu nin riet zoi!

⁶⁶I angin mo nin mindon?” a tia. Anni han, “A tho minchâi, athi ngêt rang ani” an tia.

⁶⁷Hanchu a mâia an michila male an jêma; senkhatin,

⁶⁸“Ni ril roh, Messiah, Tumo nang a jêm?” tiin an bêna.

Peter'n Jisua a minlêm

(Mk 14:66-72; Luk 22:56-62; Joh 18:15-18,25-27)

⁶⁹Hanchu, Peter hah rukul sùng khalâiah ânsunga, Ochai Inlaltak tîrlâm dôngmate inkhat a hong a, a kôm, “Nang khom, Jisua Galilee rama mi kôm no om ngâi,” a tipea.

⁷⁰Hannirese, an rênga makunga a minlêma. “I thurchi mo nin misîr reng riet mu-ung” tiin a thuona.

⁷¹Rukul mokot pêngtieng ava jôka, tîrlâm dôngmate dangin a lei mu nôka. Ha takah omngei kôma han, “Hi mi hih, Nazareth Jisua kôma a om ngâi” a tia.

⁷²Peter'n a minlêm nôka, “Khomâk insâmin ki ti ani, ha mi hah riet mu-ung!” a ti nôka.

⁷³Chomolte suoleh chu hataka inding ngei hah Peter kôm an hong a, a kôm, “Nang khom an lâia mi nini khet, No chong lam renga hin ei riet thei!” an tipea.

⁷⁴Male Peter'n an kôm, “Chongdik rillin khomâk kên sâm ani! Adik nônchu Pathien'n dûk ni mintong rese! Ha mi hah riet tet mu-ung!” a tia. Masuolechu âr akhuong kelen zoi,

⁷⁵male Peter han, Jisua'n a kôma, “Âr akhuong mân voithum ni minlêm ni tih,” ai tipe chong hah a hong rietsuok nôka. A jôka a chap ngu-ngui zoi.

Matthew 27

Jisua Pilat makunga ânding

(Mk 15:1; Luk 23:1-2; Joh 18:28-32)

¹Jîng ahongnin chu Ochaisingei murdi le Upangei han Jisua that rang lampui an sinna.

²Zingjirûiin an khita, an tuonga, Pilat, Rom râiôt kôm an pêka.

Judas thina roi

(Sin 1:18-19)

³A minsûrpu Judas han, Jisua theiloi an mintum ti a riet inchu ânsîra, a sumdâr sômthum hah Ochaisingei le Upangei kôm a hongchôi nôka.

⁴“Midik thi ranga ki minsûr ha chu ki minchâi sabak kêng ani zoi,” a tia. Anni han a kôm han, “Mahah kan ta rangin imo asena. Maha chu nangma sintho kêng!” an tipea.

⁵Judas han ma sumdâr hah Biekin sunga a paia, a rota; hanchu, a sea, avan khâi that zoi.

⁶Ochaisingei han sum hah an rûta, “Mahih chu thisen man sum ani sikin Biekina sum darna munna dar rangin chu inthieng mak” an tia.

⁷Hanchu, an inruola, ramdangmingei phûmna mun rangin Bêlvuokpu mun an rochôka.

⁸Masikin ma mun hah atûn tena (Akeldama) “Thisen Mun” an ti tit zoi.

⁹Hanchu Dêipu Jeremiah'n, “sumdâr sômthum hah an lâka Israelngeiin ama man ranga adôr an masat hah,

¹⁰male Pumapa chongpêk anghan, bêlvuokpu mun man rangin sum hah an mang zoi,” ai ti hah ahong dik zoi ani.

Pilat'n Jisua chong a rekel

(Mk 15:2-5; Luk 23:3-5; Joh 18:33-38)

¹¹Jisua hah Rom râiôt makunga ândinga, râiôt'n, “Judangei rêng nini mo?” tiin chong a rekela, Jisua'n, “Ni ni, ni ni ti zoi hate,” tiin a thuona.

¹²Hannirese, Ochaisingei le Upangeiin an nôнна roia chu itên thun mak.

¹³Masikin, Pilat'n a kôm, “Nang an nôнна roi hih ni riet loi mini?” a tia.

¹⁴Nikhomrese, bâikhat luo khomin thun maka, Râiôt chu asân a kamâma.

Jisua thi ranga a roi an jêk

(Mk 15:6-15; Luk 23:13-15; Joh 18:39; 19:16)

¹⁵Hanchu Rom râiôt han Kalkân Kût zora racham mi intâng inkhat lokongei an ti tak a mojôk pe ngei ngâia,

¹⁶Ha lâia han mi intâng, riming inthang tak Barabbas an ti hah a oma.

¹⁷Masikin lokongei an hong intûp inchu Pilat han an kôm, “Tu himo nangni mojôk pe inlang nin nuom? Barabbas himo, Jisua Messiah an tipu himo?” tiin a rekela.

¹⁸Juda rachamneipungei han Jisua hah an narsa sika a kutah an hong pêk ani ti ânthârtakin a rieta.

¹⁹Hanchu Pilat hah roijêkna munah ânsung lâitakin a lômnûn, “Ha midik chungah han ite tho no roh, jânin han ka ramangin ama sikin ku tuong ok kêng” tiin chong a hong bea.

²⁰Ochaisingei le Upangeiin Barabbas mojôka Jisua that ranga Pilat kôma ngên rangin mipui ngei an methêma.

²¹Hannirese Pilat'n mipui ngei kôm han, “Hi mi inik ngei lâia hin tu himo nangni mojôk pe rongah nin nuom?” tiin a rekela. Anni han, “Barabbas” tiin an thuona.

²²Pilat'n an kôm, “Hanchu, Jisua Messiah an ti hih, imo ko lo rang ani zoi?” tiin a rekel ngeia. “Khrosa jêmdel roh” tiin an thuona

²³Nikhomrese, Pilat'n an kôm, “Imo ai tho minchâi?” tiin a rekel ngeia. “Khrosa jêmdel roh!” tiin an rât dodôrin an inieka.

²⁴Pilat'n ite anêmna om no nia, injêlna vai kêng ai suok rang ti amun chu tui a lâka, lokongei makunga a kut a rusuka, an kôm, “Hi miriem thina hin ite theiloina dôn mu-ung! Mahih nin sintho kêng ani!” a tia.

²⁵Loko murdi'n, “Hi mi thina sika dûk chu keini le kin nâingei chungah chul rese!” an tia.

²⁶Hanchu Pilat'n Barabbas hah a mojôk pe ngeia; male Jisua hah a jêm suolechu Khrosa jêmdel rangin an kutah a pêk ngei zoi.

Râlmingeiin Jisua an phengsan

(Mk 15:16-20; Joh 19:2-3)

²⁷Hanchu, Pilat râlmingei'n Jisua hah râiôt inpuia an tuonga, an pâla mi murdi a kôla an intûpa.

²⁸A puonngai an lîk pea, puon senduk an minsila.

²⁹Male, riling tapor an phana, an min khuma, a kut chang tieng khiengrol an min chôia; a makungah khûkinbilin, “Juda ngei Rêng ring sôt roh!” tiin an phengsana.

³⁰An michila, a khiengrol hah an suta, a luah an tôka.

³¹Hanchu, an phengsan suolechu puon senduk hah an lâk nôka, ama puon dên hah an minsil nôka. Hanchu, Khrosa jêmdel rangin an tuong zoi.

Jisua jêmdela a om

(Mk 15:21-32; Luk 23:26-43; Joh 19:17-27)

³²Hanchu, an se lâiin Cyrene khuo mi inkhat a riming Simon an tonga, râlmingei'n Jisua Khros ruput rangin an dânde.

³³Golgotha, "Luru Mun" an ti hah an hong tunga,

³⁴Mahan Jisua hah uain, tuikha leh inpol an pêka, a tem zoiin chu nêk nuom maka.

³⁵Hanchu, Khrosa an jêmdela, male, taruosânin a puonsilngei an insema.

³⁶Masuole chu, mahan insungin, an enna.

³⁷A lu chungah an nôнна miziek, "Hi mi hih Jisua, Judangei Rêng ani," tiin an târa.

³⁸Hanchu, ama leh lômin inru inik a voitieng inkhat, a changtieng inkhat an jêmdel sa.

³⁹Hanchu, ânloi murdi'n an lu thukin Jisua an deia.

⁴⁰"Biekin set na ta, sînthumbin ni minding nôk rang na! Pathien Nâipasal ni nîn chu ne theiin insaninjôk roh! Khros lêr renga juong chum ta roh!" an tia.

⁴¹Ma angdên han, Ochaisingei le Balam minchupungei le Upangei khomin ama an deia:

⁴²"Mi dangngei laka a minjôk ngâia, ama chu injôk thei maka! Israelngei rêng ni mak mo? Atûn Khros lêr renga juong chum rese chu iem ei tih!

⁴³Pathien a iema, Pathien Nâipasal'n ânbea. Tho lei en rei u, Pathien'n atûn a minjôk nuom mo!" an tia.

⁴⁴Inru, ama leh an jêmdel ngei khomin ha angdênin an dei sa.

Jisua thina

(Mk 15:33-41; Luk 23:44-49; Joh 19:28-30)

⁴⁵Hanchu sîn dâr sômleinik renga kholoi dârthum tenah chu rammuol ajîng khapa.

⁴⁶Dârthumin chu Jisua rôl inring takin ânieka, "*Eloi, Eloi, lema Sabacthani?*" a tia. Mahah aomtie chu, "Ka Pathien, Ka Pathien, ithomo nina mâksan?" tina ani.

⁴⁷Ha munah ânding senkhat ngeiin mahah an rieta, "Elizah ai koi kêng" an tia.

⁴⁸Hanchu, an lâia mi inkhatin a tâna sponj a lâka, uain thûra a michia, tôkmol mongah a târa, hong min nêk rang a thoa.

⁴⁹Hannirese, mi dang ngeiin, "La ngâk roh, a minjôk rangin Elizah mo a juong lei en bak hi rei" an tia.

⁵⁰Jisua rôl inring takin âniek nôka, arang achat zoi.

⁵¹Hanchu, Biekina puonjâr hah alu renga among dênin akêr pata. Masuole chu pilchung ânîka, lungpuingei an koia,

⁵²thânngêi ahôn onga, Pathien mi tamtak alei thi ngei hah kaithoiin an oma.

⁵³Thânngêi hah an mâka, Jisua, thina renga ân thoinôk suoleh Khopuilien Inthiengah an lûta mahan mi tamtak kôm an inlâr zoi.

⁵⁴Râlmi ulien le a kôla râlmi aom Jisua thîr ngei han, ningnu innîk le neinun om tie ngei hah an mûn chu an chia, “Hi mi hih Pathien Nâi ani khêt!” an tia.

⁵⁵Ma munah han nupang tamtak, Galilee ram renga Jisua nûkjûia asan ngâi ngei han alazanna renga an thîra.

⁵⁶Ha ngei hah Mary Magdalene ngei Jacob le Joseph nu Mary ngei le Jebedee lômnû ngei an ni.

Jisua an phûm

(Mk 15:42-47; Luk 23:50-56; Joh 19:38-42)

⁵⁷Kholoi ahong nin chu mineipa Arimathea khuo mi a riming Joseph a hong tunga; ama khom Jisua ruoisi a lei nia.

⁵⁸Pilat makunga ava sea Jisua ruok hah ava zonga, ruok hah Joseph kôm pêk rangin Pilat'n chong a pêka.

⁵⁹Masikin Joseph han ruok hah a musuma puoninnêm athar leh a thoma,

⁶⁰male thân lunga iver zoisuobila han a min jâla. Hanchu thân bâu hah lung alienpa leh a hîp zoiin chu a sea.

⁶¹Mary Magdalene le Mary dang hah thân tieng mâithakin an insunga.

Thân ngâkngêi

⁶²Anangtûkah Sabbathni sînin chu Ochaisingei le Phariseengei hah Pilat kôm an hong,

⁶³male a kôm, “O pu, ha milaka han aring lâiin, ‘Sûnthum suoleh chu inthoinôk ki tih’ a ti kin riet.

⁶⁴Masikin thân hah sûnthum sîng chu asadima ngâk rangin chong pêk roh, a ruoisingeiin an sea, an va muruka, mipui lâia, ‘Thina renga ânthoinôk zoi’ an ti thei loina rangin. Ma anghan aninônchu hi huongna nûktak hih motona nêkin siet uol nih,” an tia.

⁶⁵Pilat'n an kôm, “Râlmi tuong unglâ,” male “se unglâ thân hah nin thei lam dôra asân min ngâk roi,” a tipe ngeia.

⁶⁶Hanchu an sea, thân lung hah sîn thôn, a ngâk rang ngei hah an min ngâk ngei zoi.

Matthew 28

Inthoinôkna

(Mk 16:1-10; Luk 24:1-12; Joh 20:1-10)

- ¹Sabbathni ahong heka, Pathienni jînga khuo ahongvâra, Mary Magdalene le Mary dang hah thân en rangin an sea.
- ²Inningloiin ningnu râtta ahong innîka, invân renga Pumapa Vântîrton a juonga; lung hah a muluoi paia a chungah ânsunga.
- ³A mêl chu kôlinlek ang ania, a puonsilngei khom rodokang anga chek ani.
- ⁴Râlmi a ngâkngai han an chi rai zoi sikin an innîka, athi anghan an oma.
- ⁵Vântîrton han nupangngai kôm, “Nangni chu chino roi, Jisua an jêmdelpu hah nin rok ani ti ki riet.
- ⁶Hin om khâi maka; ai ti anghan ân thoinôk zoi. Hin hong unglâ, a jâlna hih hong en roi.
- ⁷Atûn inrangtakin se unglâ, a ruoisingei kôm, Thina renga ân thoinôk zoi, Galilee rama nin motona a lei se; mason mûng nin tih! Nangni ki ril hih riettit roi” a tia.
- ⁸Hanchu, ichi le râisâna sipin, thân renga an se lalaia, ruoisingei varil rangin an tân zoi.
- ⁹Inningloiin Jisua'n anni hah a tonga, an kôm, “Nin chungâ rathanngamna om rese” a tia. Hanchu, a kôm an hongâ, a kepha an sûra, chubai an mûka.
- ¹⁰Jisua'n an kôm, “Chino roi, se unglâ, Galilee rama se rangin ku sûngsuokngai varil roi; mason ni mûng an tih” a tia.

Thân ngâkngai chongril

- ¹¹Nupangngai hah lama an lôn lâitakin thân ngak râlmi senkhatngai hah khopuiliena an kîr nôka, neinum om tie murdi hah ochaisingei an va rila.
- ¹²Ochaisingei hah Upangei leh anin mua lungvâr an thoa; râlmingei kôm han sum tamtatak an pêka,
- ¹³an kôm, “Jâna kin inkârin a ruoisingei an hongâ, a ruok an hong muruk ani, tiin misîr roi.
- ¹⁴Râiôt han ha thurchi hah a lei riet lekhom, theiloina dôn mak chei tiin nangni rilpui kin ta, ite nin mulung nin minjîngna rang omak,” an tia.
- ¹⁵Râlmingei han sum hah an lâka, chong an be lam angtakhan an tho zoi. Masikin atûn tenah ha thurchi hah Judangei lâia an la ril minlum bang ngâi ani.

Jisua a ruoisingei kôm ânlar

(Mk 16:14-18; Luk 24:36-49; Joh 20:19-23; Sin 1:6-8)

16Hanchu ruoisi sômleikhat ngei hah Galilee rama tâng inkhata Jisua'n se roi a tipe ngeina han an sea.

17Ama an mûn chu chubai an mûka, senkhatin iem tatak no khom senla ngei.

18Jisua'n ahong nâia, an kôm, "Pilchunga le Invâna rachamneina murdi ko kôm pêk ani zoi.

19Hanchu, muntina mingei murdi kôm se unglâ, ku ruoisîn sin ngei unglâ: Pa, Nâipasal le Ratha Inthieng rimingin Baptis ngei unglâ,

20chong nangni ke pêk murdi jôm rangin ril ngei roi. Male Keima zoratin rammuol mong dênin nin kôma om tit ki tih," a tia.

Mark

Mark 1

Baptispu John thurchi misîr

(Mat 3:1-12; Luk 3:1-18; Joh 1:19-28)

- ¹Pathien Nâipasal Jisua Khrista Thurchi Sa chungroi chu mahi ani.
- ²Dêipu Isaiah Lekhabua: “Pathien'n, ‘Na lampui sinsiem rangin ka thangtheipu no motona tîr ka ta.’
- ³Ramchâra mi inkhat tânghai han,
‘Pumapa lamlien sin unгла; a lônâ rang lampui mintûn roi!’” tia ânziek anghan ânphut ani.
- ⁴Masikin John hah Baptis tho le thurchi misîrin ramchâra han a juong ani. Mingei kôm han, “Nin sietnagei renga insîr unгла, baptisma chang roi,” hanchu, “Pathien'n nin sietnagei nangni ngâidam atih” tiin a misîr ngâia.
- ⁵Judea ram le Jerusalem khopui renga mi tam tak John thurchi misîr rangai rangin an sea. An sietnagei an phuonga, male ama'n Jordan dunga a Baptis ngei zoi.
- ⁶John'n ûtmul puonngei ânsila, savun kongkhit a khita, a sâk chu khâimimsie, le rama khuoilutui ani.
- ⁷Mingei kôm han, “Ku nûka juong rangpu hi chu keima nêka roiinpui uol ok ania, kei chu inkûna a kekok rûi sût rang luô inhoi mu-ung.
- ⁸Keima chu tui leh nangni ka Baptis ngâia, ama'n chu Ratha Inthiengin nangni Baptis atih,” a tia.

Jisua baptisma chang le methêmna tongna

(Mat 3:13—4:11; Luk 3:21,22—4:1-13)

- ⁹Galilee ramhuola Nazareth khuo renga Jisua hongna la sôt bâkloiin, Jordan dunga John'n Baptis a thoa.
- ¹⁰Jisua hah tui renga a hong jôk harengan, invân ân-onga male Ratha Inthieng pharvali angati a chungâ juong chum a mua.
- ¹¹Male invân renga rôlin, “Nangma ka Nâipasal moroitak ni ni, nu chungâ ka râiasântatak ani” ti chong ajuong tunga.
- ¹²Voikhatrengin Ratha'n ramchâra a min se zoia,
- ¹³mahan Soitan methêmin sùn sômminli a oma. Mahan ram sângei khom an oma, aniatachu vântîrtonngei han an juong san ngâi.

Jisua'n ngasûrpungei minli a koina

(Mat 4:12-22; Luk 4:14,15; 5:1-11)

¹⁴John hah intâng ina an khum suole chu, Jisua hah Pathien renga Thurchi Sa misîr rangin Galilee rama a sea.

¹⁵“Azora diktak hah ahongtung zoi,” male, “Pathien Rêngam khom anâi zoi! Nin sietnagei renga insîr unglâ male Thurchi Sa hi iem ta roi!” tiin a misîra.

¹⁶Jisua'n Galilee dîl panga a lôn lâiin ngasûrpu inik Simon le a nâipa Andrew lèn lei vôr hah a mua.

¹⁷Jisua'n an kôm, “Ni jûi unglâ, miriem sûr rangin nangni minchu ki tih” a tipe ngeia.

¹⁸Marenghan an lènngai an mâkraka male an jûi kelen zoi.

¹⁹A se nôk uol vietin chu lâibungsa dang Zebedee nâipasalngai, Jacob le a nâipa John a mu nôka. An lènngai sinsiemîn rukuong chungâ an lei oma.

²⁰Jisua'n anni ngei hah a mu ngei lehan, a koi ngeia; an pa Zebedee hah inlo mingei kôm rukuonga an mâka, male Jisua leh an se kelen zoi.

Miriam inkhat ramkhorî sûr

(Luk 4:31-37)

²¹Jisua le a ruoisingei hah Capernaum khopuia an hongâ, Sabbathni sùn anîn chu Jisua Synagog taka a lûta, male mi a minchu kelen zoia.

²²A minchu lam ariet mingei han kamâm aom sabak an tia, Balam minchupungei angin niloiin; manêkin, rachamneitakin anni ngei ha a minchu sîkin.

²³Masuole han, ramkhorî sûr mi inkhat synagog han a hongâ an iek raka,

²⁴ha mi han, “Nazareth Jisua, keini renga imo na nuom aom? Mi minmang ranga hong mo ni ni? Nang ki riet Pathien thangtheipu inthieng ni ni!” a tia.

²⁵Jisua'n ratha kôm han, “Dâirek inla, male ha miriem sùng renga hah hong jôk pai roh!” tiin chong a pêka.

²⁶Ratha saloi han amapa hah anîkbit suole chu inringtakin ân ieka, male a sùng renga a hong jôk pai zoia.

²⁷Mingei han kamâm aom sabak an tia, “Ma hih imo ani hi? Mahi minchuna thar mo ani? Ratha saloingei khom rachamneitakin chong a pêk ngeia, male a chong an jôm kelen hi?” Inkhat le inkhat anin rekel inlôma.

²⁸Masikin Galilee ramhuol pumpuia Jisua thurchi ânthang zit zoi.

Jisua'n mi tamtak ngei a mindam

(Mat 8:14-17; Luk 4:38-41)

²⁹Jisua le a ruoisingei, Jacob le John telsân Synagog renga an jôka, male Simon le Andrew ina rangin an thengpata.

³⁰Simon tarpi hah ritun damloiin jâlmuna a lei oma; Jisua ava tungin chu harengan, amanu damloi roi hah an lei rila.

³¹Amanu kôm han a sea, a kuta a mutua, sanin a kaithoia. Amanu mintun hah a dama, male amanu han an sin a tho pe ngei zoi.

³²Masuole chu kholoi ahong nia male nisa ahong tâkin chu, mingeiin Jisua kôm damloi murdi le ramkhorî sôr ngei an hong tuonga.

³³Khopui sônga mingei nâm inkot kôla an hong intûpa.

³⁴Jisua'n ri jât tamtak ngei a mindama male ramkhorî tamtak a rujûlpaia. Ramkhorîngei han ama an riet sikin, ite an ti rangin phal ngei mak.

Jisua'n Galilee rama thurchi a misôr

(Luk 4:42-44)

³⁵Anangtûk jînga chu avâr mân rengin Jisua ânthoia, in renga hah a jôka. Khopui renga mun inthimna a sea, mahan chubaithona ava manga.

³⁶Hannirese Simon le a champuingei han ama an hong roka,

³⁷male an va mu lehan, a kôm, "Mitinin nang an rok," an tipea.

³⁸Hannirese Jisua'n an kôm, "Hi revêla khuo dangngeia khom hin ei se ngêt rang ani. Hi ngei hin khom thurchi ki misôr rang anâng ani, maha ku juongna abi ani sikin," tiin a thuona.

³⁹Masikin synagogngeia thurchi misôrîin le ramkhorîngei rujûlpaiin Galilee ram pumpuia a chai zoia.

Jisua'n mi a mindam

(Mat 8:1-4; Luk 5:12-16)

⁴⁰Jisua kôm mi inkhat vun ri dôn a hong, khûkinbilin, male san rang a ngêna, "Nu nuomin chu mi ni minthieng thei," a tia.

⁴¹Jisua'n inriengmunân asipa, male a kut ahong sôna, male a tôna, "Ka nuom," hong, "Inthieng ta roh!" tiin a thuona.

⁴²Voikhatrengin a pangphâr hah ahong boi kelena, male ânthieng zoi.

⁴³Jisua'n chongnazatin a tipea, a tîr kelena,

⁴⁴a kôm a ti suole, "Rangâi roh, hi roi hih tute ril tet no roh duo. Hannirese ochai kôm thengpat inla va min mu roh; masuole chu mitinin nên thieng nôk zoi ti an riet minthârna rangin Moses chongpêka inbôlna pêk ranga ati hah pêk roh" a tipea.

⁴⁵Hannirese amapa hah a jôka, ma thurchi hah muntina a phuong minzara. Adikin, a ril minlum rai sikin Jisua chu ânlangin khopuia lût thei khâi maka, mun inthim ngeia a va oma, male muntin renga a kôm mingei an hong ngâi ani.

Mark 2

Jisua'n phalkhatthi a mindam

(Mat 9:1-8; Luk 5:17-26)

- ¹Sûn tømte suole chu Jisua Capernaum taka a se nôka, male ina a om ti roi ânthanga.
- ²Masikin mi tamtak an hong intûpa, inkhâr pêntieng luo mun tong khâi maka. Jisua'n an kôm thurchi a misâr lâitakin
- ³phalkhatthi inkhat mi minlîn a kôm an hong rojôna.
- ⁴Nikhomrese loko an tam rai sikin a kôma hong tungpui thei mak ngeia, masikin Jisua omna ridîn taka inchung an phêna. An phên zoiin chu phalkhatthipu hah a jâmpher leh an juong musuma.
- ⁵Jisua'n an taksôn tie hah a mua, phalkhatthipa kôm han, “Ka nâipasal, ni sietnagei ngâidam ani zoi,” a tia.
- ⁶Balam minchupungei senkhat ma muna insung ngei han an mindonna,
- ⁷“Hi mi hin ithomo hi anga a chong ngam hi? Pathien a rilminsiet ani! Pathien vai ke sietnagei ngâidam thei!” an tia.
- ⁸Harengan Jisua'n an mindon hah a rieta, an kôm, “Ithomo ma anghan nin mindonna?”
- ⁹Phalkhatthi kôm han, ‘Ni sietnagei ngâidam ani zoi,’ ti le ‘Inthoi inla, na jâmpher luok inla lôn ta roh,’ ti hih kho hi mo a ti abai uol?
- ¹⁰Hanchu, philchung hin Miriem Nâipasal'n sietnagei ngâidam theina racham a dôn ti nangni lei min mu rong” a tia. Masikin phalkhatthi kôm han,
- ¹¹“Inthoi inla, na jâmpher luok inla, ni ina se ta roh!” tiin nang ki ril a tia.
- ¹²An rêngin an enchungchakin ama hah ânthoia, a jâmpher a luoka, a se kelen zoia. An rêngin an kamâm sabaka, Pathien an minpâka, “Hima anga neinun hih chu la mu tet ngâi mak me!” an tia.

Jisua'n Levi a koina

(Mat 9:9-13; Luk 5:27-32)

- ¹³Jisua Galilee dîl panga a se nôka. Loko ngei a kôm an sea, male a minchu ngei phut zoia.
- ¹⁴A sena sumrusuongpa Levi Alphaeus nâipasal, a office taka ânsung a mua. Jisua'n a kôm, “Ni hong jûi roh,” a tipea. Levi ânthoia, male ama a jûi zoi.
- ¹⁵Chomolte suole chu Levi ina bukhalâi an ota. Sumrusuong ngâi mi tamtak le mitelloingei Jisua an jûia, male mi tamtakin Jisua le a ruoisingei bukhalâi otna dosânga an inchela.

¹⁶Phariseengei le Balam minchupungei senkhatin, Jisua chu mitelloingei le sumrusuonpungei leh bu a nêk an mûn chu a ruoisingei kôm, “Khoitho mo ma anga mingei lâia bu a nêk?” tiin an rekela.

¹⁷Jisua'n an chong hah a lei rieta, an kôm, “Adamngeiin doctor nâng ngâi mak ngeia, aniatachu adamloi ngei chu doctor an nâng ngâi. Midikngei ralam ranga juong ni ma-unga, mitelloingei ralam ranga juong ke ki ni,” tiin a thuona.

Bungêi chungroia chongrekel

(Mat 9:14-17; Luk 5:33-39)

¹⁸Zora khat chu Baptispu John nûkjûingei le Phariseengei han bu an ngêia. Mingei senkhatin Jisua kôm an hongga, a kôm, “Ithomo John nûkjûingei le Pharisee ruoisingei hi bu an ngêi ngena, aniatachu nu ruoisingei hi an ngêi ngâi loi?” tiin an rekela.

¹⁹Jisua'n an kôm, “Inneina khuolmingei ha bungêi rangin nin lei sabei mini?” Ni thei no ni! Mâkpa hah an kôma aom kêr chu bungêi no ni ngei.

²⁰Hannirese an kôm renga mâkpa ha an tuong pai nikhuo la tung a ta, ma tika chu la ngêi an tih.

²¹“Tutên puon muruo chitphonân puon thar relek mang ngâi mak ngei, mang ngân khom senla athar han amuruo hah minchîrup a ta chet uol atih.

²²Tutên uain thar khom savun ûm muruo taka thun ngâi mak ngei, thun ngân khom senla, uain thar han savun ûm hah mût khoi a ta, uain le savun ûm le mangmunboi chang atih. Manêkin, uain thar chu savun ûm thara ngêt thun nîng atih” tiin a thuona.

Sabbathni chungroia chongrekel

(Mat 12:1-8; Luk 6:1-5)

²³ Sabbathnin Jisua bubilngei senkhata a lônâ. A ruoisingeiin ama leh an lôn pumin buvûingei ha an china

²⁴Masikin Phariseengeiin Jisua kôm, “En ta, nu ruoisingeiin Sabbathnia an tho hi! Mahi ei Balamin akhap ani,” an tia.

²⁵ Jisua'n an kôm, “David'n sâk rang ânsam lâihan a tho hah nin la pore tet ngâi loi mini? Ama le a miriemngei an voncham sabaka,

²⁶ masikin David han Pathien ina a lûta, Pathien kôma pêksai vâipôl hah a sâka. Mahi Abiathar Ochai Inlaltak a chang lâihan ani. Ei Balam dungjûiin chu ha vâipôl hah Ochangei vai ke an sâk thei ngâi ani, aniatachu David'n a sâka male a miriemngei khom a sem ngei sa.”

²⁷Male Jisua'n, “Sabbathni chu miriemngei sana ranga sin ania, miriem chu Sabbathni ranga sin nimak.

²⁸Masikin Miriem Nâipasal hih Sabbathni a Pumapa khom ani” tiin chong a khâr zoi.

Mark 3

Jisua'n kut phalkhatthi a mindam

(Mat 12:9-14; Luk 6:6-11)

¹Hanchu Jisua ha Synagog a se nôka, mahan mi inkhat a kut phalkhatthi a lei oma.

²Sabbathni ani sikin Jisua rângeiin a tho minchâia an nôn theina rangin; Sabbathni mi a mindam pupui mo tiin mi senkhat ngeiin an en richika.

³Jisua'n kut phalkhatthi kôm han, “Moton tieng hong inding roh,” a tipea.

⁴Hanchu Jisua'n mingei kôm han, “Ei Balamín Sabbathnin imo ei tho rangin mi phal? San rang mo, aninônchu minna rang mo? Mi ringna mojôk rang mo, aninônchu mi minmang mo?” tiin a rekel ngeia. Hannirese ite ti mak ngeia.

⁵Jisua'n an tieng a en ngeia a taksi oka, aniatachu an mulungngar raina le an dikloi raina hah a riet sikin asân a jâm a manzala. Hanchu amapa kôm han, “Nu kut lêng roh” a tipea. A kut a lênga male a dam nôk zoia.

⁶Masikin Phariseengei hah synagog renga an jôka, Herod pâla mi senkhatngei leh an intonga, Jisua an that rang lam mintuonangei an sin zoia.

Dîl panga lokongei

⁷Jisua le a ruoisingei ha Galilee dîl tieng an se kelena, male loko tamtakin ama an jûi sa. Anni ngei ha Galilee ram renga, Judea ram renga,

⁸Jerusalem renga, Idumea ram renga, Jordan râl nisuo tieng renga, male Tyre le Sidon khopuiliengei kôlrevêla hong ngei an ni. Hi mingei murdi hih Jisua neinin tho ngei an lei riet sika hong an ni.

⁹Lokongei an tam rai sika han ama an neng loina rangin Jisua'n a ruoisingei kôm, ama rang rukuong inkhat lei dar rangin chong a be ngeia.

¹⁰Mi tamtak a mindama, male ana ngei murdi ama an tôn theina rangin an inbûmlula.

¹¹Male an sûnga ramkhorî dôn ngei khomin ama an mu racham inbokin, “Nangma ha Pathien Nâipasal ni ni!” tiin an iniek ngâi.

¹²Jisua'n ramkhorîngêi kôm han, tumo ani ha tute kôm an misâr loina rangin chongnazatin, chong a pêk ngei zoi.

Jisua'n Tîrton somleinik ngei a thangna

(Mat 10:1-4; Luk 6:12-16)

- ¹³Hanchu Jisua muol chung a kala, ama'n a nuom ngei kai a koia. Anni ngei ha an jûia,
- ¹⁴male sômleunik ngei a thanga, “Mangei ha tîrtongei tiin riming a phuo, an kôm, ko kôma om rangin nangni ka thang zoi ani,” male, “Thurchi misîr rang khomin nangni tîr suok ka ta,
- ¹⁵male ramkhoringei rujûlpai theina rachamneina khom dôn nin tih,” tiin a ril ngeia.
- ¹⁶Sômleunik a thang ngei ha hi ngei hih an ni: Simon (Jisua'n, Peter tia riming a phuo pe ha);
- ¹⁷Zebedee nâipasal Jacob le a nâipa John (Jisua'n, Boanerges tia riming a phuo pe ngei ha, maha aomtie chu “Khuonri Miriemngei tina ani”);
- ¹⁸Andrew, Phillip, Bartholomai, Matthew, Thomas, Alphaeus nâipasal Jacob, Thaddeaus, Canan mi Simon (an ram lungkham le inpâkpui ngâipu,)
- ¹⁹male a minsûrpu Judas Iscariot.

Jisua le Beelzebul

(Mat 12:22-32; Luk 11:14-23—12:10)

- ²⁰Hanchu Jisua ha in tieng a kîr sir zoia. Lokongei hah an juong intûp nôka, Jisua le a ruoisingei ha sâknêk zora luo man mak ngeia.
- ²¹Mingeiin, “Achâng ke ani zoi!” an ti roi ha a insungmingei an riet lehan, ama tuong rangin an inthoka.
- ²²Balam minchupu senkhat Jerusalem renga juong ngei han, “A sûnga Beelzebul a dôn ani! Ramkhoringei ulientak kêng, ramkhoru rujûlpai theina rangin sinthotheina a kôma pêk ngâi” an tia.
- ²³Masikin Jisua'n anni hah a koia, chongmintêkin a chongpui ngeia; “Kho angin mo Soitan'n Soitan a rujûl thei ranga?”
- ²⁴Rambung khom athenin apâlin insenin inkhat le inkhat an indoi inlômin chu, ma rambung hah inlet atih.
- ²⁵Insûngkuo khom athenin apâlin insenin inkhat le inkhat an indoi inlômin chu, ma insûngkuo hah inlet atih.
- ²⁶Masikin Soitan rêngram khom athenin apâlin an insenin chu, ma hah asôt dier no nia, inlet a ta male ân mang rang ani.
- ²⁷“Tutên mi rât ina lûtin a neinunngai lâk pe thei ngâi mak ngei, mi rât hah an khitbel masa vaiin ke; a neinunngai an muruk thei ngâi.
- ²⁸“Adiktakin nangni ki ril mingei hih an sietnangei murdi le asaloi neinunngai an ti ngei murdi chu la ngâidam thei nîng a ta.

²⁹Aniatachu tukhom Ratha Inthieng doia asaloi neinunngai a ti ngei hah chu ngâidamin om tet no ni, kumtuonga sietna a sin ani sikin” a tia.

³⁰(Mahi Jisua'n mingei senkhatin, “Ratha saloi a dôn” an ti sika a ti ani.)

Jisua nû le lâibungngai

(Mat 12:46-50; Luk 8:19-21)

³¹Hanchu Jisua nû le lâibungngai an hongtunga. Khalâia an indinga, ama koi rangin mi an tîra.

³²Jisua rihîlin lokongei an insunga, male ha ngei han a kôm, “En roh, Nu nû le na lâibungngai le na sarnungeiin nang an roka, khalâia son an oma, nang intongpui rang an nuom,” an tipea.

³³Jisua'n an kôm, “Tu mo ku nû? Tu ngei mo ka lâibungngai?” Tiin a thuona.

³⁴A rihîla an sung ngei hah a en ngeia, an kôm, “En ngei roi! Hi ngei hih ku nû le ka lâibungngai an ni!

³⁵Tukhom Pathien nuom lama sintho ngei kai chu ka lâibungngai, ka sarnungei, le ku nûngai an ni” a tia.

Mark 4

Sachirethepa chongmintêk

(Mat 13:1-9; Luk 8:4-8)

¹Galilee dîl kôla Jisua'n a minchu nôka, mipuingei a kôma juong intûp ngei hah an tam rai sikin rukuonga a chuonga, ânsunga, mipuingei hah chu tui rakham asortea tânga han an indinga.

²Anni ngei minchuna rangin chongmintêkngai mangin neinun tamtak ngei a misîr pe ngeia, an kôm han:

³“Rangai roi! voikhat chu mi inkhatin burît rangin a sea.

⁴Loia han sachi a rethea, senkhat lampui kôla achula, vângei an hongma male an sâk ripa.

⁵Senkhat lungpherpha pil ânphâna chungma achula, pil ânphân sikin ahong mông kelena,

⁶Hanchu, nisa ahong insângin chu akung innoinar ngei ha a em minjuota, aruzung amathâk hah ânthuk loi sikin akângrip kelena.

⁷Senkhat chu riling kêra achula, riling han akungngai ha adîpa, male inra thei khâi mak ngei.

⁸Aniatachu senkhat chu pil sana achula, akungngai ahong kêia, ahong insôna, avûia: senkhat sômthumin, senkhat sômrukin, male senkhat raza khatin ahong pung zoi” a tia.

⁹Male Jisua'n a chongkharnân an kôm “Kuor nin dônin chu rangâi roi!” a tipe ngeia.

Chongmintêkgei neinunkhîn

(Mat 13:10-17; Luk 8:9-10)

¹⁰Jisua athenin aom lehan, a ruoisingei sômleunik le midang senkhat ngei ma chong riet ngei han a kôm an hong a male ha chongmintêkgei hah rilminthâr pe ngei rangin an ngêna.

¹¹Jisua'n an kôm, “Pathien Rêngam chonginthup riettheina nin kôm pêk ani zoi.” Hannirese, “Midangngei pêntienga omngei rangin chu, neinunngai murdi chongmintêkgei vaiin misâr pe an nia,

¹²“Masikin an en, an en khomin an mu lina rangin le; an rangâi an rangâi khomin, an rietthei lina rangin. Ma anghan an thôn chu, Pathien tieng inhei nôk an ta, male ama'n lei ngâidam ngei thei atih” a tia.

Jisua'n sachirethepa chongmintêk a rilminthârna

(Mat 13:18-23; Luk 8:11-15)

¹³Hanchu Jisua'n an kôm, “Hi chongmintêk hih nin rietthei loi mo? Hanchu, kho angin mo chongmintêk dangngei ngân khom nin rietthei ranga?”

¹⁴Sachirethepa han Pathien chong a rethe ngâi.

¹⁵Mi senkhat ngei chu, sachi lampui kôla chul angin an nia; chong hah an riet harengan, Soitan a hong a mulungrîla om hah a lâk pe ngei ngâi.

¹⁶Midang senkhat ngei chu sachi lungpherpha chung a chul angin an ni. Thurchi hah an riet harengan, râisântakin an pom kelen ngâia.

¹⁷Hannirese, ruzung inthûk an mathâk loi sikin om sôt ngâi maka. Thurchi sika intakna mini nuomlona mini, ahong om lehan chu anin let nôk kelen ngâi.

¹⁸Mi senkhat ngei chu sachi riling kâra achul angin an ni. Ma ngei hah chu thurchi rangâipu ngei hah an nia,

¹⁹aniatachu an ringnuna kângdoinangei, rammuol hoina le neinangei le jât dadang an ôinangei ahong lûta chong hah adîpa, amara musuo ngâi mak.

²⁰Hannirese mi senkhat ngei chu pil asana achul ngei angin an ni. Chong hah an rieta, an poma, male ânra ngâi: senkhat sômthumin, senkhat sômrukin, senkhat raza khatin an hong pung zoi, a tia.”

Bêl nuoia châti

(Luk 8:16-18)

²¹Jisua'n a chong a la zombanga, “Tumo châti hongchôia adarna muna dar loiin, bêl nuoia mo, aninônchu jâlmun nuoia mini a dar ngâia? adarna munna ke an va dar ngâi nimak mo?”

²²^Anthup murdi tâng la musuo nîng a ta, hîpa om ngei murdi lîkpai la nîng atih.

²³Hanchu, kuor nin dônin chu rangâi roi!” a tia.

²⁴Hanchu Jisua nanâkin an kôm, “Nin chong rangâi hih asadimin mindon roi! Midangngei nin jêkna balamngei nanâk hah Pathien'n nangni jêkna rangin mang atih, manêkin nangni min rik pe uol atih.

²⁵Tu tukhom imini dônpu ngei chu bôk pêk sa nîng a ta, male tukhom ite dôn loi ngei chu an dôn viette khom ha lâk pe rip nîng atih,” a tia.

Chimu ânsôn chongmintêk

²⁶Jisua'n thurchi a la misîr banga, an kôm, “Pathien Rêngram chu hi anghin ani.” Mi inkhatin a loa chimu a rethea.

²⁷Hanchu a sea, a van ngama jâna a inna, ânthoia sùn ngei ha a va manga, a riet loi kêrin chimu hah ahong kêia, ahong insôn zoia.

²⁸Pil ha athenin akungngei hah aminsôna, amara amin dôna; amotona akung ahong inlanga ngâi, hanchu avûia, male anûktaka aramala sip buvûi ahong oma.

²⁹Bu hah amin tena chu, ha mi han ât zora ahong tung zoi sikin a kôite lâkin bu ât aphut ngâi anghan ani, a tia.

Ancham ru chongmintêk

(Mat 13:31-32; Luk 8:11-15)

³⁰Jisua'n an kôm, “Pathien Rêngram hih imo a ang ei ti rang ân zoi? Khoi chongmintêk mangin mo ei rilminthâr rang ani zoi?

³¹Mi inkhatin ancham ru rammuola chimu murdi lâia achîntak ramal khat a lâka, pila a tua.

³²Chomolte suole chu ahong mônga, chimu murdi lâia a lientak ahongni ngâi. Machang lientak ngei ahong dôna, male vângei an hong a male a dâilîm han rubungei an phana mahan an riek thei ang ha ani” a tia.

³³Ma anghin Jisua'n mingei kôm han chongmintêk tamtak mangin, an rietthei rang do-dôrin a thurchi a misîr pe ngei ngâia.

³⁴Chongmintêk niloiiin chu an kôm, thurchi misîr ngâi maka; hannirese, a ruoisingei leh vai an om zorân chu jâtin a rilminthâr pe ngei ngâi ani.

Jisua'n phâivuopui a mindâingang

(Mat 8:23-27; Luk 8:22-25)

³⁵Mani nanâka han kholoi ahongnin chu Jisua'n a ruoisingei kôm, “Dîl râl tieng son vân kân ei ti u” a tia.

³⁶Masikin lokongei ha an mâka; Jisua a lei insungna rukuonga han ruoisingei hah an lûta, ama khom an tuonga. Mahan rukuong dangngei khom an om sa.

³⁷Inningloi rengin phâivuopui râttak ahong thoa, tuidârinsok khom hah rukuonga a lûta asip vâng zoia.

³⁸Jisua chu lukham khamin rukuong remei tienga han a lei ina. Ruoisingei han an kaithoia male a kôm, “Minchupu kin thi rang ani zoi, itên ni mindon loi mini?” an tia.

³⁹Jisua ânthoia, phâivuopui hah a ngoa, “Mong roh!” male tuidârinsok kôm han, “Omchien roh!” a tia. Phâivuopui hah amonga, male adâingang zoi.

⁴⁰Hanchu Jisua'n a ruoisingei kôm “Ithomo ma angta nân chi hi? Taksônna reng nin la dônloi mo?” a tia.

⁴¹Aniatachu an chi sabaka, male inkhat le inkhat kôm, “Hi mi hih tumo ani hi? Phâivuopui le tuidârinsok tena khomin a chong an don hi?” anin ti inlôma.

Mark 5

Jisua'n ratha saloingei dôn mi a mindam

(Mat 8:28-34; Luk 8:26-39)

¹Jisua le a ruoisingei hah Galilee dîl râl khangkhat tieng, Gerasa ram an hong tunga.

²Jisua hah rukuong renga a hong jôk harengan, mahan thângei renga hong suok mi inkhatin ântôngpuia. Ha mi hah a sûnga ratha saloi dôn ania

³male thangeia om ngâi ani. Tutên Zingjirûi lienpa leh luok khit thei mak ngeia;

⁴Vêl tamtak a kutngei le a kengei an lei khita, aniatachu a kengei an khitna Zingjirûingei le thîrkolngei hah a pot sata, a khiek chit ngâia. A rât rai sikin tutên an mene theiloi ani.

⁵Sûna le jâna, thangeia le tângngeia han ân ieka, amanânâkin lungngei leh an ât ngâi.

⁶Alazan renga Jisua a hong mua; masikin a hong tâna, amakunga ânboka,

⁷male rôl inringtakin ân ieka, “Jisua, Pathien Ânchung Tak Nâipasal, khoimo mi lo rang ni ti? Dûk mi tho tet loi rangin, Pathien rimingin nang ke ngên!” a tia.

⁸(Mahi a tina abi chu Jisua'n, a kôm, “Ratha saloi amapa sêng renga hih hong jôk roh!” a lei ti zoi sika ani.)

⁹Masikin Jisua'n a kôm, “Imo ni riming!?” tiin arkela. A kôm han, “Ki riming chu ‘Mob’ kin tam sabak ani” tiin a thuona.

¹⁰Male ha ram renga hah ratha saloingei a rujûlpai lina rangin Jisua kôm han a ngênrîta.

¹¹Ma mun kôla muol panga han vok pâl tamtak sâk rok an oma.

¹²Masikin ratha saloingei han, “Vokngei kôm son mi tîr inla, male an sûnga mi min lût roh” tiin Jisua kôm an ngêna.

¹³A min se ngeia, male ratha saloingei hah amapa sâng renga an jôk paia, vokngei sânga han an va lûta. Vokpâlnegei hah anrêngin isângnik dôr an nia, anrêngin rôlsora an tâna, dîla an inchôma, an thi let zoi.

¹⁴Vok donsuiungei hah an tâna, khopui le vokvainamun ngeia han ma thurchi hah an va misîra. Mingei han neinun ahongtung ha en rangin an se zoia,

¹⁵male Jisua kôm an tungin lehan, ramkhoringei an sârpu hah puon silin mulungbôk sing vanga insungin an va mua; male anrêngin an chi zoi.

¹⁶Amupu ngei han ramkhorî sârpa chung a neinun ahongtung le vokngei chungroi ha mingei an lei rila.

¹⁷Masikin anni ngei han Jisua hah an ram mâk rangin an ngên zoia.

¹⁸Jisua rukuonga a chuong rangtôn ramkhoringei sârpa han Jisua kôm, “No kôm hong rong ba!” tiin a ngêna.

¹⁹Hannirese Jisua'n phal maka. Manêkin, “Ni insûngmingei kôm senla, Pumapa'n sin nang a tho pe tie le idôrmo nang lungkham tie hih va ril ngei roh” a tipea.

²⁰Masikin amapa hah a sea, Khopui Sôm ngei han a chaia, Jisua'n ata ranga sin a tho pe ngei hah a misîra, ha a misîr a riet ngei murdi'n kamâmruoi sabak an tia.

Jairus nâinupang le Jisua puonmor tôn nuvengtenu

(Mat 9:18-26; Luk 8:40-56)

²¹Jisua'n dîl râk khangkhat tieng rakânin a se nôka, dîl panga loko tamtak a kôm an hong intûpa.

²²Synagog taka ulienpu a riming Jairus a hongtunga, male Jisua a mu lehan, Jisua ke kunga ânboka, a kôm,

²³male “Ka nâinupangte hih ana sabaka. Masikin rangâihoitakin juong inla, a hong dam nôka a ring theina rangin a chung a nu kutngei ni juong minngam pe roh!” tiin a ngênrîta.

²⁴Hanchu Jisua hah ama lehan an sea. Loko tamtakin an jûia, an ep rai sikin an innengin an innenga.

²⁵Mahan nuvengte inkhat kum sômleunik thisuoka damloi a oma,

²⁶doctorngei tamtakin an donsui suonûk khomin la dam thei maka. A sum dôn murdi a heklet zoia, hannirese dam nêkin inrikin ânrik pe uola.

²⁷Hanu han Jisua chungroi a rieta, masikin lokongei kêra Jisua nûka a hong,

²⁸a mulungrîlin, “A puonngei luokhom tôn inlang, dam kelen ki tih” a tia.

- ²⁹Amanu han a puonmor a tôna, male a thisuok ha harengan among pita; a natna hah mindam ani zoi tiin, ânriet kelen zoia.
- ³⁰Jisua'n a sâng renga sinthotheina ajôk ti a riet kelena, masikin lokongei tieng a hônheia, an kôm, “Tumo ku puonngai a tôn?” Tiin a rekel ngeia.
- ³¹A ruoisingeiin a kôm, “Lokongeiin madôr nang an neng hih nu mu nimak mo; itho mo tumo ku puon a tôn ni ti hih?” an tipea.
- ³²Hannirese Jisua'n chu a puon tônpu mu rangin a en titira.
- ³³nuvengtenu han a chungu neinun ahongtung hah ânrietin chu, chi leh innîk pumin a hongu, a ke kungu khûkinbilin, male a thurchi hah adiktakin a ril leta.
- ³⁴Jisua'n a kôm, “Ka nâinupang, na taksônân nang amindam zoi, rathângngamtakin senla, na natna renga hong damriem ta roh,” a tipea.
- ³⁵Jisua ala chonglâitakin, thangtheipungei senkhat Jairus in renga an hongu, Jairus kôm, “Na nâinupang chu athi suo zoi, ithomo Minchupu na la minjêl banga?” an tia.
- ³⁶Jisua'n chu an chong hah lunghâng tho maka, Jairus kôm han, “Chi nônlâ, iem ngit roh” a tipea.
- ³⁷Hanchu Peter, Jacob le a nâipa John telloin chu tute ama jûi rangin phal maka.
- ³⁸Jairus ina an va tungin chu, Jisua'n rahang râttaka chap ngei le an ieka, ânrum ngei hah ava mu ngeia.
- ³⁹In sângu a lûta, an kôm, “Itho mo nin chapa? Ithomo nin inngûia? Hi nupangte hi athi nimaka a in kêng ani!” a tia.
- ⁴⁰Anni han ama an munuisana, masikin an rêngin a nottuor ngei leta, nupangte a nû le a pa male a ruoisi inthum ngei leh nupangte jâlâna khâltana han an lûta.
- ⁴¹Nupangte kut hah a sûra male a kôm, “*Talitha kôum*” a tia, maha, “Nupangte, inthoi roh nang ki ti!” tina ani.
- ⁴²Hanchu, ha nupangte hah harengan a hong inthoia, a lôn thei kelen zoia. (Amanu hah kum sômleinik nupangte ani.) Ha anghan ahongni lehan, an kamâm sabaka.
- ⁴³Aniatachu Jisua'n tute ril tet loi rangin chongpêk inngartak a pêk ngeia, male “An kôm han a sâk rang imakhat pêk roi,” a tia.

Mark 6

Jisua hih Nazareth taka hengpaiin aom

(Mat 13:53-58; Luk 4:16-30)

¹Jisua'n ha mun hah a mâka, a omna ngâi khopui tieng a se nôka, a ruoisingei khomin an jûi tita.

²Sabbathnin chu Synagog taka mi a minchua. Mahan mi tamtak an oma; male a chongril hah an riet lehan anrêngin kamâm aom tatak an tia, “Hi mi hin hi ngei nâm hih kho renga mo a man hi?” an tia. “A kôm, khoi vârna mo pêkin aom hih? Kho angin mo sininkhêl ngei a sin thei hi?”

³Mary nâipasal, mistri sin ngâi, a lâibungngei khom Jacob, Joseph, Juda le Simon ngei nimak mo? A sarnungei khom ei kôma an om ngâi nimak ngei mo?” an tia. Male chu ama hah an hengpai zoia.

⁴Jisua'n an kôm, “Dêipungei chu an omna ngâi khopui le a sungsuokngei le a insungmingei lâia tiloiin chu muntina an jâ ngei ngâi a tia.”

⁵Ha muna han chu mi damloi ngei tômte chung a kutngei minngamin a mindam tiloiin chu ite sininkhêl ngei sin thei khâi mak.

⁶Mingei han taksônna an dôn loi sikin a jâmminzal sabaka.

Jisua'n ruoisi sômleunik ngei a tîrsuokna

(Mat 10:5-15; Luk 9:1-6)

Hanchu Jisua'n ha revêla khuongei han a chai titira, mingei ha a minchu tira.

⁷Ruoisi sômleunik ngei hah a koi mintûp ngeia inik, inikin a tîrsuoka. Ratha saloingei chung a rachamneina a pêk ngeia,

⁸male an kôm, “Nin khuolchaina khiengrol tiloiin chu ite vâipôl khom, kutdo choli khom, nin pepngeia sum khom chôi no roi.

⁹Kebunngiei chu bun unglâ, hannirese, kâncholi inshak chu chôi no roi” tiin chong a pêk ngeia.

¹⁰Amananâkin an kôm, “Nangni an lei modômna ina han om unglâ ma mun hah nin mâk, mâka chu madên han om tit roi.

¹¹Hanchu tu khopui khom mingeiin nangni an modôm noa, nin chong an rangâi nôchû mâkrak unglâ, nin ke rabab akop ngei hah không liei roi. Maha anni rangin inning roi tina nîng atih.”

¹²Masikin an sea, male mingeiin an sietnangei renga an insîr theina rangin thurchi an misîra.

¹³Ramkhoringei tamtak an rujûl pâia, male damloi tamtak ngei olive sariiek an pola an mindam ngei zoi.

Baptispu John thina roi

(Mat 14:1-12; Luk 9:7-9)

- 14** Hanchu Jisua riming muntina ânthang zit zoi sikin Rêng Herod'n a lei rieta. Mingei senkhatin chu, “Baptispu John hah a hong ring nôk zoi! Masika han hi sininkhêlgei sin theina ranak hi a dôn ani,” an tia.
- 15** Nikhomrese, adangngeiin chu, “Ama hih Elijah ani” an tia. Midangngei an ti nôk chu “Tiena dêipungei angin, ama hih dêipu inkhat ani” an tia.
- 16** Mahah a lei rieta, Herod'n chu, Batistpu John ani! “A lu ka tana nikhomrese, a hong ring nôk ani!” a tia.
- 17** Herod lelên John hah a minsûra, khitbelin jêl ina a lei khum ani. Herod'n ma anga a thona chu, Herodias hi a nâipa Phillip lômnu nikhomsenla a lômnu a minchang sika ani.
- 18** John'n Herod kôm, “Na nâipa lômnu in ne neipui nôk hih Balam nimak!” tiin a lei ril tit ngâia.
- 19** Masikin Herodias han John a mumâka that ngêt rang a bôka hannirese, Herod sikin that thei maka.
- 20** Herod'n John hah mi sa le mi inthieng ani ti a riet sikin a chia, masikin a mojôk ngâi ani. John chongril a riet racham asân injêlpui ngâi khomsenla, a chongril rangâi rang a nuom ngâi ani.
- 21** Azoinataka chu Herod suokni ahong tungin chu, sorkar uliengei, râlmi uliengei le Galilee rama mi liengei rangin bukhalâi otna a minsûka, ha ni han chu Herodias'n chuminrên a mana.
- 22** Herodias nâinupang a hong lûta, a lâma, Herod le a khuolmingei râiaminsân pe ngei oka. Masikin rêngpa han nupangte kôm han, “Imo dôn rang nu nuom? Nu nuom tak nang pêk ki tih” a tia.
- 23** Chonginkhâm tamtak dônin a kôm, “Kho khoi khom mi ni zong kai chu ke rêngram phalkhat tena khom nang pêk rangin chong kên khâm!” a tia.
- 24** Masikin nupangte hah a jôka, a nû kôm, “Imo mo ko zong rang?” tiin a va rekela. Anu'n, “Baptispu John lu” tiin a thuona.
- 25** Nupangte hah innottakin a kîra, rêngpa kôm han, “Atûn Baptispu John a lu mâirânga mi ni pêk rangin ku nuom” tiin a zonga.
- 26** Masikin rêngpa hah ân ngûikhak zoia, aniatachu a khuolmingei makunga inkhâmngaei a lei tho sika han mângti thei khâi maka.
- 27** Masikin rêngpa han a rungpu inkhat a tîr kelena, John lu hong lâk rangin chong a pêka. Rungpu han ânphêt kelena, male jêl ina a sea. John lu ava tana;
- 28** hanchu mâirânga a hong chôia, nupangte kôm a pêka, nupangte han a nû kôm ava pêk zoia.

29Ma roi hah a ruoisingeiin an riet lehan an hongga, John ruok hah an chôia, male an phûm zoi.

Jisua'n mi isâng rangnga a vâina roi

(Mat 14:13-21; Luk 9:10-17; Joh 6:1-14)

30Tîrtongei hah an kîr nôka male Jisua an intongpuia, male an sintho murdi le an minchu sai murdi Jisua kôm an rila.

31Mingei ha ase le ahong an tam rai sikin Jisua le a ruoisingei chu bunêk zora luo man mak ngeia. Masikin an kôm, “Tho ei theivaia ei om theina rangin mun senkhata chomola nin inngam theina rang muna se rei u” a tia.

32Masikin mun inthimngangna panin an theiviekin rukuonga an se zoia.

33Nikhomrese, mingei tamtakin an selâi an mua, anni ngei ti an riet kelena; masikin khopuingei murdi renga mingei hah tâng tieng renga an tânna, Jisua le a ruoisingei hah an lei chomtân ngeia.

34Jisua hah rukuong renga a juong chum lehan, loko tamtak a mu ngeia, male belri a holpu boi angin an ni sikin, anni ngei rangin a mulungrîla inriengmuna leh asipa. Masikin neinun tamtak ngei a minchu ngei phut zoi.

35Kholoi ahongni lehan, a ruoisingei hah Jisua kôm an hongga, male a kôm, “Mahi mun inthimngang ke ania, nisa khom ase ok zoia.

36Mingei hih tîr pai ngei inla, male akôl kienga loingeia mo, khuongeia mo, anninanâkin an sâkruo imakhat an rochôk theina rangin” an tia.

37Jisua'n an kôm, “Nangnin sâkruo imakhat pêk ngei roi,” tiin a thuan ngeia. Annin a kôm, “Anni ngei vâi theina rangin vâipôl chungga duli razannik kin va thâm rangin nu nuom mo?” tiin an rekela.

38Masikin Jisua'n an kôm, “Vâipôl kho dôr mo nin dôn? Se unglâ, va en roi” tiin a rekel ngeia. An dôn dôr hah an riet lehan, “Vâipôl rangnga le nga inik” tiin an rila.

39Hanchu Jisua'n mingei nâm hah apâl apâlin sensâi unglâ, durba chungga min sung ngei rangin ruoisingei a ril ngeia.

40Masikin mingei hah apâl apâlin, raza khat pâlîn le sômrangnga pâlîn an min sung ngeia.

41Hanchu Jisua'n vâipôl rangnga ngei le nga inik hah a lâka, invân tieng tangin Pathien kôm râisânchong a rila. Vâipôl hah a khoia, mingei hah sem pe ngei rangin a ruoisingei kuta a pêk ngeia. Nga khom hah anrêngin sem ngei rangin a pêk ngei sa zoi.

42Mitinin an sâka male an khop chita.

⁴³Hanchu an sâk minieng vâipôl hâr le nga ronôi hah tabong sômleini ruoisingeiin an rût min sipa.

⁴⁴A vâi ngei mijôn hah mi ulien kai isâng rangnga an ni.

Jisua tui chung a lôn

(Mat 14:22-23; Joh 6:15-21)

⁴⁵Lokongei a minchin suole harengan varâl tienga Bethsaida khuoa, a motona lei se rangin a ruoisingei rukuonga a min chuong ngeia.

⁴⁶Mingei hah chonghoiin a mathân suole chu chubaitho rangin muol chung a se zoia.

⁴⁷Kholoi ahongni lehan, rukuong hah dîl ânlaina taka aoma, Jisua chu atheivaiin tânga han aoma.

⁴⁸Phâivuo hah anôk tieng asêm sikin, a ruoisingeiin an rukuong jâp hah an mulungjîng okin a mua; masikin jîng kôlinsaluom rangtôn dîl chung a lônin an tieng a hong pana, anni ngei khêlpai rang angin aoma,

⁴⁹hannirese anni han tui chung a lôn an mua. “Mirluoi kêng ani!” tiin an mindonna, male an iniek raka.

⁵⁰Ama an mu lehan an rêngin an rathatâka. Harengan Jisua'n an kôm, “Hâitakin om roi!” ama'n, “Keima ke ki ni, chino roi!” a tipe ngeia.

⁵¹Hanchu an kôm rukuonga han a chuong sa zoia, male phâivuo hah amonga. Ruosingei chu an kamâm sabaka,

⁵²mi isâng rangnga a vâina roi aomtie diktak hah an rietthei loi sikin; an mulungbôkngai han amanphâk loi ani.

Jisua'n Genesaret taka damloingei a mindam

(Mat 14:34-36)

⁵³Dîl râl an inkâna, Genesaret rama an tunga, mahan an rukuong an thunga.

⁵⁴Rukuong renga an chuma, mingeiin harengan Jisua ani ti an riet kelena.

⁵⁵Ha ram pumpuia mingei hah an hong tân leta; a omna an rietna tena a kôm damloingei an jâmphera jâl pumin an hong rojôna.

⁵⁶Male Jisua a sena muntina, khuongei mo, khopuingei mo, loingei mo, bazar munngai khom damloingei an hong tuonga, a puonmor luô tôn thei rangin phalna an ngênna. Male a tôn ngei murdi chu an dam pak ani.

Mark 7

Pipungei chongmâk

(Mat 15:1-9)

¹Jerusalem renga hong phariseengei le Balam minchupungei senkhat ngeiin Jisua kôla an hong intûpa.

²Ha ngei han a ruoisengei senkhatin kut innima sâk an sâk an mua, maha, Phariseengeiin mingei an tho ranga an tipe lamtaka an rusûk loi sika ani.

³(Phariseengei le Judangei murdi'n chu an pipungei renga an man chongmâk hah an jûia: an kutngei, balam takin an rusûk noa anin chu ite sâk ngâi mak ngeia;

⁴bazâr renga neinun an hong chôi ngei murdi khom an rusûk masa nôncu sâk ngâi mak ngei. Male balam adang tamtak an man ngei hah an sûr mindet tit khom aom sa; ma ngei hah kilâtngai, bêlngai, sunsen khuriângai, male jâlmunngai rusûk min sâi rang ti ngei ha ani.)

⁵Masikin phariseengei le Balam minchupungei han Jisua kôm, "Ithomo nu ruoisengeiin pipungei chongmâk jôm loiin kutngai innim pumin sâk an sâk hi?" tiin an rekela.

⁶Jisua'n an kôm, "Isaiah'n nin chungroi a leiphuong hah adik ani!" A miziek anghan, asarotholngai nin ni: "Hi mingei hin an chongbângai leh min minpâka, aniatachu an mulungrîlngai chu keima renga alazan ani.

⁷Miriam minchuna balamngai hah ka balamngai anghan an mindon sikin chubai min mûkna hih anni rangin kâmnângloi kêng ani, Pathien'n a ti, tia lei inziek anghan!"

⁸"Pathien chongpêk nin henga, miriem minchunangei nin jôm ani hi" a tia.

⁹Male a la zombanga an kôm, "Nin minchuna nin jôm theina ranga Pathien chongpêkngai nin heng hi chu vârna lampui nin dôn ani hi.

¹⁰Moses'n, 'Nu nû le na pa jâ roh,' male 'Tukhom a nû mo a pa mo khomâksâm chu that ning atih,' tiin chong a lei pêka.

¹¹Aniatachu nangni rêkin chu, mîn a nû mo, a pa mo imini san rang anângin chu 'Ma hih Korban ani' tiin nin minchu ngâi, (maha aomtie chu, Pathien ta ani zoi tina ani),

¹²an nû mo an pa ngei rangin mo khoite sintho rangin jôt khâi ngâi mak choia.

¹³Ma angdên han balam muruo nin minchu banga hin Pathien chong amin mang ngâia. Hi anga sin nin tho adang khom tamtak ala om sa" a tia.

Miriam minnim ngâi neinunngai

(Mat 15:10-20)

¹⁴Hanchu Jisua'n lokongei hah vêlkhat a koi nôk ngeia, an kôm, "Nin rêngin ko chong rangâi unglâ, male rietthei roi.

15-16 Pêntieng renga miriem sũanga lũata ama minnim thei ite omak. Manêkin miriem sũanga renga hong suok ngei hi ke miriem minnim ngâi ani.”

17 Lokongei hah mâkin insũanga a lũat lehan, ha chong hah rilminthâr rangin a ruoisingeiin an ngênna.

18 Jisua'n an kôm, “Midangngei nêkin la vâr uol mak chei.” “Ite pêntieng renga nin sũanga lũatin nangni aminnim thei om mak, ti hih nin la rietthei loi mo? a tipe ngeia,

19 asikchu nin mulungrũala lũat loiin, nin phungpuia a lũata, male nin nôm sena tieng ajôk ngâi” a tia. (Ma hih Jisua'n sũakruo murdi chu ânthieng let tia minthâr nân a ti ani.)

20 Male a la ti banga, “Nin sũanga renga hong suok ha ke nangni minnim ngâi.

21 Asũanga tieng renga, nin mulungrũal renga kêng, mindonna saloi ahong suoka nunchan saloi neinunngiei tho rangin nangni ruoi ngâia, inruna, mi thatna,

22 inrêna, inruokna, saloi murdi tho nuomna; huongna, hurna, narsana, êrona, inpâkna, le inmôlna ngei aminsuok ngâi,

23 ma saloi neinunngiei murdi hah nin sũanga tieng renga ahong suoka, male nangni aminnim ngâi ani” a tia.

Nuvengtenu taksônna

(Mat 15:21-28)

24 Hanchu Jisua'n Galilee ramhuol mâkin Tyre khopuilien kũala a sea. In inkhata a lũata, tutên an riet rang khom jôt maka, aniatachu ama hah inthupin om thei maka.

25 Nuvengte inkhat, a nâinupang a sũanga ratha saloi dôn han, Jisua thurchi a riet lehan harengan a hong a kebula ân boka.

26 Ma nuvengtenu hah Jentail mi ania, Syria rama Phoenikia ramhuol sũanga suok ania. Amanu han a nâinupang sũanga ramkhoru rujûlpai pe rangin Jisua kôm a ngênna.

27 Hannirese, Jisua'n a kôm, “Nâingei khop bak rese ngei. Nâingei bu lũak pea male uingei kũama vôr chu dik mak,” tiin a thuona.

28 Nuvengtenu han a kôm, “Pu” ani chu ani, hannirese, “nâingeiin dosâng nuoia bu ramal an mathâk hah uingeiin an sũak ngâi nimak mo!” tiin a thuona.

29 Masikin Jisua'n amanu kôm han, “Ma thuona chongbâi sikin, ni ina se nôk inla, na nâinupang chu ramkhoru mâkin va mu ni ti zoi!” a tipea.

30 Amanu hah a ina a sea, a nâinupang chu ramkhoru mâkin jũalmuna jũalin ava mu zoi.

Kuorset chongloi Jisua'n a mindam

³¹Hanchu Tyre ram renga Jisua a jôk nôka, Sidon khopui sirin Khopui sôm ngei ramhuol hah palin Galilee dîl a tunga.

³²Mi senkhatin kuorset le chongloi a kôm an hong tuonga. Amapa chung a han a kutngei minngam rangin Jisua an ngêna.

³³Masikin amapa hah Jisua'n lokongei lâi renga atheivaiin a tuonga, a kutruolngei leh a kuor sâng ngei hah a tôn pea, a michil pea, a melei khom a tôn pea.

³⁴Hanchu Jisua'n invân tieng enin phûkasâna ân hûmma, a kôm, "*Ephatha*" a tia, mahah "In-ong roh!" tina ani.

³⁵Harengan, a kuorngai a hongvâra, a melei inkhitna ngei ahong insûta, ânthar vangin a chong thei zoi.

³⁶Hanchu Jisua'n mingei kôm han tute ril tet loi rangin chong a pêk ngeia; hannirese misîr loi ranga a khap ngei dôr hah an ril minlum uola.

³⁷Male ariet ngei murdi'n kamâmruoi sabak an tia, "Neinuntin a sin murdi hih idôra asa mo ani zoi!" anni han, "Kuorset khom a minvâr pea, chongloi khom a min chong thei hi, kamâm aom bah!" an tia.

Mark 8

Jisua'n mi isâng minli a vâina roi

(Mat 15:32-39)

¹Chomolte suole chu loko dang tamtak an hong intûp nôka. Ite an sâk rang an dônloi sikin Jisua'n a ruoisingei a koia, an kôm,

²"Hi mingei hih ko kôm sînthum an om zoia, male atûn hin ite sâk rang an dôn khâiloi sikin lungkham ku mu ngei tataka.

³Bungêiin an ina ki min se ngei lakin lamlâia chamsôlinvei an ta, senkhat vâng chu an hongna alazan ani sikin" a tia.

⁴A ruoisingeiin a kôm, "Hi ramchâra hin hi mingei vâina rangin tumo sâk an hun rang dôr aman zoi ranga?" an tipea.

⁵Jisua'n, "Vâipôl kho dôr mo nin dôn?" tiin a rekel ngeia. Anni han "Vâipôl tâp sari" tiin an thuona.

⁶Ama han lokongei hah pila insung rangin chong a pêk ngeia. Hanchu vâipôl tâp sari hah a lâka Pathien kôm râisânchong a rila, a khoia, lokongei sem pe rangin a ruoisingei kôm a pêk ngeia; male a ruoisingeiin an sema.

⁷Nga chînte atômte khom an dôn sa. Jisua'n ma chung a han khom râisânchong a ril nôka, male sem pe ngei rangin a ruoisingei kôm a pêk sa zoi.

8-9 Mitinin an khop dodôrin an sâka, asâk ngei ha mi isâng minli dôr an ni. Hanchu an sâk minieng arnôngei hah tabong sari an la rût min sipa. Jisua'n mingei ha a tîr pai ngeia

10 male a ruoisingei leh rukuonga an chuong kelena Dalmanutha ramhuola an se zoi.

Phariseengei sininkhêl sin rangin an ngên

(Mat 16:1-4)

11 Pharisee senkhat ngei Jisua kôm an hongga, an inkhalpuia. Ama min ôk rang an nuoma, masikin Pathien'n ama a pom ti minlangna rangin sininkhêl min mu ngei rangin an ngêna.

12 Hannirese Jisua'n a mulungrîl sûnga a chapa, "Ithomo atûnlai mingei hin sininkhêl an ngên hi? Nimak, nangni ki ril! Atûnlai mingei kôm hin ma anga riet theina reng hi pêk ni no nih!" a tia.

13 Anni hah a mâka, rukuonga a chuong nôka, male dîl varâl tieng ân kân zoi.

Phariseengei le Herod chol

(Mat 16:5-12)

14 Ruosingei han vâipôl an hun rang dôr chôi rangin an mingila male rukuonga han vâipôl tâp khat vai an dôna.

15 Jisua'n, "Singthei roi," male "Phariseengei le Herod chol renga indîn roi" tiin inningna a pêk ngeia.

16 Anninanâk han, "Vâipôl ei dôn loi sika, mahi a ti kêng ani rang," tiin an lâia an injêk khôm phut zoia.

17 Jisua'n an ti hah a lei rieta, an kôm, "Ithomo vâipôl nin dônloi roi nin injêk khôma? Nin la rietthei tet loi mini? Nin mulungbôkngai ân môl sabak zoi mini?"

18 Mitngei nin dôn chakin nin mu thei loi mini? Kuorngei nin dôn chakin nin riet thei loi mini? Nin riettit khâloi mini

19 mipui isâng rangnga ngei ta rangin vâipôl tâp rangnga ko khoi lâi ha? An sâk minieng vâipôl ronôngei tabong izet mo nin rût minsip ha?" tiin a rekel ngeia. "Tabong sômleini" tiin an thuona.

20 Male Jisua'n an kôm, "Mipui isâng minli ngei ta rangin vâipôl tâp sari ko khoi lâihan," an sâk "minieng vâipôl ronôngei hah tabong izet mo nin rût minsip ha?" tiin a rekel ngei nôka. "Tabong sari" tiin an thun nôka.

21 Male ama'n "Atûn ten nin la rietthei loi mo?" tiin a rekel ngeia.

Jisua'n Bethsaida taka mi mitcho a minvâr

22 Bethsaida taka an hong tunga, mahan mingei senkhatin Jisua kôm mi mitcho an hong tunga, male a tôn pe ngei rangin an ngênna.

²³Jisua'n mitchopa kut hah a sôra, khuo pêntieng a se puia. A mitngei a michil pe suole chu, Jisua'n a chung a kutngei a minngama male a kôm, "Nu mu thei mo ni zoi?" tiin a rekela.

²⁴Ha mi hah a tanga, "O, miriemngei chu ku mua, hannirese, thingkungngei an lôn titir anghan ke ku mu" a tia.

²⁵Jisua'n mitchopa mitngei han a kutngei a minngam nôka. Ma zora han chu mitchopa han a en ngita, a mitngei ahong vâz zoia, male jâtin a mu minthâr thei let zoi.

²⁶Hanchu Jisua'n, "Khuo sônga hin lût khâi no roh" tiin chong a bêa, in tieng a tîr zoi.

Peter'n Jisua chungroi a phuongna

(Mat 16:13-20; Luk 9:18-21)

²⁷Hanchu Jisua le a ruoisingei hah an jôka, Caesarea Philipi kôla khuongeia han an sea. Lampuia han an kôm, "Mi ril roi, mingeiin tumo ani min ti?" tiin a rekel ngeia.

²⁸Anni han, "Senkhatin chu Baptispu John ani," male "midangngei chu Elijah ani, senkhatngei nôkin chu dêipu inkhatlam ani" nang an ti, tiin an thuona.

²⁹Hanchu, an kôm han, "Nangni rêkte tumo ani mi nin ti?" tiin a rekel ngeia. Peter'n a kôm, "Messiah ni ni" tiin a thuona.

³⁰Hanchu Jisua'n an kôm han, "Ku chungroi hih tute kôm ril no roi" tiin chong a pêk ngei zoi.

Jisua'n a tuong rang le a thi rang roi a misîr

(Mat 16:21-28; Luk 9:22-27)

³¹Hanchu Jisua'n a ruoisingei a minchu ngeia, an kôm, "Miriem Nâipasal hi la tuong sabak ngêt a ta, upangei, ochaisingei le Balam minchupungeiin hengpai an tih. That an ta, aniatachu sînthum suole chu aringin inthoinôk atih," a tia.

³²Ma roi hih ânthârvangin a ril ngeia. Masikin Peter'n ama hah athenin a tuonga, a ngoa.

³³Hannirese Jisua'n ânheia, a ruoisingei tieng a ena, male "Soitan, keima renga rotpai roh," ama'n, "Ni mindonngai hih Pathien renga niloiiin miriem nina renga ke ani," tiin Peter a ngoa.

³⁴Hanchu Jisua'n lokongei le a ruoisingei a koia, an kôm, "Tutu khom mi jûi a nuomin chu ama le ama inmingil ngêtin a khros ruputin mi jûi rese.

³⁵Tukhom a ringna mojôk a nuomin chu machân a ta; hannirese, tukhom keima sika le thurchisa sika a ringna machân ngei chu mojôk nîng an tih.

³⁶Mîn rammuol hih apumin dôn senla, a ringna chu machân senla, ata rangin imo an lâpna aom ranga? Mangmunboi ani!

³⁷Mîn a ringna a man nôkna rangin ite a pêk thei rang om mak.

³⁸Tukhomin atûnlâi nikhuo saloi le pathienboi mingei kôma keima le ki minchuna chong inzakpui chu, Miriem Nâipasal a Pa roiinpuina insila a vântîrton inthieng ngei leh an juong tika chu ha mi hah inzakpui atih” a tia.

Mark 9

¹Male a la ti banga an kôm han, “Nangni ki ril, hi taka om senkhat ngei hih chu Pathien Rêngam hah a sinthotheina leh a juong tung an mu mâka chu thi no ni ngei” a tia.

Mêl inthûlna

(Mat 17:1-13; Luk 9:28-36)

²Sûnruk suole chu Jisua'n Peter, Jacob le John a tuong ngeia, an theivaiin an omna muol insânga han a ruoi ngeia. An mitmu chungchakin Jisua mêl ahong inthûla,

³male a puonsilngei khom achekin ântêrdapa rammuola mîn tutên madôr ha rusûk minsâi thei no ni ngei.

⁴Hanchu ruoisi inthum ngei han Elijah le Moses'n Jisua an chongpuilâitak an mua.

⁵Peter'n Jisua kôm, “Minchupu, hi taka om hi ei ta rangin idôra asa mo ni zoi! Puon in inthum sin kin ta nangma rang inkhat, Moses rang inkhat, Elijah rang inkhat sin kin tih” a tia.

⁶Ama le adangngei ha an chi rai sikin a ti rang tak khom riet mak ngeia.

⁷Hanchu sumpâi ajuong oma anni ngei hah sumpâiin ajuong mukhu ngeia, sumpâi renga hah chong ajuong inringa, “Ama hih ka Nâipasal moroitak ani, a chong rangâi roi!” a tia.

⁸Inrangin an en titira hannirese tute an kôla adang mu khâi mak ngeia; Jisua vai ke an kôm aom zoi.

⁹Muol chung renga an juong chuma Jisua'n an kôm, “Miriem Nâipasal hi thina renga ânthoinôk mâka chu nin neinun mu hi tute kôm ril no roi duo” tiin chong a bê ngeia.

¹⁰A chongbe ha an jôma, aniatachu ma roi ha an lâia, “Thina renga inthoinôk’ ti hih khi tina mi hi?” tiin an injêk khôm phut zoi.

¹¹Male anni han Jisua kôm, “Ithomo Balam minchupungeiin, Elijah a juong bak rang an ti?” tiin an rekela.

¹²Ama'n an kôm, “Neinun murdi cherel rangin Elijah chu a juong bak ngêt rang ani. Hankhoma, ithomo Pathien Lekhabu'n, Miriem Nâipasalin la tuong ok a ta, hengpaiin la om atih, a tia?”

¹³Nikhomrese, nangni ki ril Elijah chu a juong suo kêng ani zoi, male a chungroi Pathien Lekhabu'n ati anghan mingeiin a chung a nuom lamtakin an lo zoi,” a tia.

Jisua'n pasalte ratha saloi dôn a mindam

(Mat 17:14-21; Luk 9:37-43)

¹⁴Ruoisingei kôm an juong tungin chu an kôla loko tamtak ngei le Balam minchupungei senkhatin an lei inkhalpui lâitak an juong mua.

¹⁵Mingei han Jisua an mu lehan an kamâm sabaka, male ama tieng an tâna chibai an va pêka.

¹⁶Jisua'n a ruoisingei kôm, “Anni ngei lehan khoi thurchi mo nin lei inkhal ha?” tiin a rekel ngeia.

¹⁷Lokongei lâia mi inkhatin a kôm, “Minchupu, ka nâipasal ratha saloi a dôn male a chongloi sikin no kôm ko hong tuong tiin a thuona.

¹⁸Ratha saloi ahong tôn racham nuoia ânlet kelen ngâia, a cherhuon a suoka, a hâ a riela, angarjêt ngâi. Ratha saloi ha rujûlpai rangin nu ruoisingei ke ngênna, aniatachu thei mak ngei,” a tia.

¹⁹Jisua'n an kôm, “Kho anga mi iemnaboi mo nin ni! Idôrsôt mo nin kôm omin nangni ko donsui thei ranga? Pasalte hah ko kôm hong tuong roi!” a tia.

²⁰Ama ha Jisua kôm an hong tuonga. Ratha saloi han Jisua a hong mûn chu pasalte hah a nunuom alo bita, masikin nuoia ân leta, avânluoi ahônluoia, a cherhuon a suoka.

²¹Jisua'n a pa kôm, “Hi anga a om phutna hih khotik renga mo ani zoi?” tiin a rekela. “Nâipang a chang renga” tiin chong a melea.

²²“Ratha saloi hin ama that rang pûtin vêl tamtak meia le tuia a meleta. Ne thei ngâiin chu inrieng mi mu inla, mi san roh!” tiin a rila.

²³Jisua'n a kôm, “Ani,” “nangmananâkin ni ni theiin chu! Taksônna dôn mingei ta rangin chu neinuntin anithe let,” a tia.

²⁴A pa han harengan, ân ieka, “Taksônna ko dôn, hannirese hun zoi mak. Taksônna ko dôn uol theina rangin mi san roh!” a tia.

²⁵Jisua'n lokongei ama tieng an hong nâi titir a mua, masikin ratha saloi kôm han, “Ratha kuorset le chongloi,” ama han, “Pasalte sùng renga hong jôk roh, male a sunga lût nôk tet khâloi rangin chong nang ke pêk!” a tia.

²⁶Ratha saloi hah ân ieka, pasalte hah a vôrra a nunuom a lo bita, male a hong jôk paia. Pasalte hah athi angin angarzata, male mitinin, “Ama hih athi zoi!” an tia.

²⁷Hannirese Jisua'n a kuta a sôra, a kaithoia, male ânding zoi.

²⁸Masuole Jisua in sônga a lûta, a ruoisingeiin inrûkten an rekela, “Ithomo keinin ratha saloi ha kin rujûlpai theiloi?” an tia.

²⁹Jisua'n an kôm, “Ma jât hi chu chubaithona niloiiin chu, itên rujûl thei nimak,” tiin a thvon ngeia.

Jisua a thi rang roi a misîr nôkna

(Mat 17:22-23; Luk 9:43-45)

³⁰Jisua le a ruoisingeiin ha mun hah an mâka male Galilee ram palin an sea. Jisua'n a omna tutên an riet rangin nuom maka,

³¹“Miriem Nâipasal hih a that rangpu ngei kuta bangin om atih. Nikhomrese, sûnthum suole chu aringin inthoinôk atih” ti chong hih a ruoisingei a minchu ngei sikin.

³²Aniatachu hi minchuna aomtie hih rietthei mak ngeia, male ama rekel rang khom an chia.

Tu hih mo alientak?

(Mat 18:1-5; Luk 9:45-48)

³³Hanchu Capernaum an hong tunga, insônga an lût suole chu a ruoisingei kôm, “Lampuia han khoi roi mo nin rila nin inkhal hah?” tiin a rekel ngeia.

³⁴Hannirese anni han thvon mak ngeia, lampuia an hong inkhalna hah ei lâia hin tumo alientak rang? ti roi hah ani sikin.

³⁵Jisua ânsunga, ruoisi sômleinik ngei hah a koia, male an kôm, “Tukhom alientak ani nuomin chu achîntak changin mi murdi tîrlâm ani masa ngêt rang ani” a tia.

³⁶Hanchu nâipangte a koia, an motona a minding pe ngeia, a kuo ira, an kôm,

³⁷“Tukhom ki riming sika hi anga nâipangte inkhat khom a modômpu chu, keima mi modôm ania; male tukhom keima mi modômpu chu, keima mi modôm vai niloiiin ni tîrpu khom a modôm sa ani” a tia.

Tukhom mi chakal loi chu ei tienga kop ani

(Luk 9:49-50)

³⁸John'n a kôm, “Minchupu, mi inkhat ni riminga ramkhoringei rujûl kin mua, male ei pâla mi ani loi sikin kin hong khap” a tia.

³⁹Jisua'n an kôm, “Ama ha khap rang pût no roi,” tute ki riminga sininkhêl a sina harengan ku chungroia neinin saloi ngei ti thei kelen rang reng omak ngei, tiin a ril ngeia.

⁴⁰Tukhom mi chakal loi chu ei tienga kop ani.

⁴¹Adiktakin nangni ki ril, tukhom ki mi nin ni sika tuidâi kilât khat khom nangni a min nêkin chu râisânman a man ngêt rang ani.

Sietna ranga methêmnangei

(Mat 18:6-9; Luk 17:1-2)

⁴²“Tukhom keima taka taksônna dôn mi achînte ngei lâia inkhat khom a taksônna minmang pe chu a ringa bunôinalung lienpa orrin tuikhangliena inchôm senla ata rangin sa uol atih.”

⁴³Masikin nu kutin na taksônna aminmangin chu tan pai roh! Kutngei inik dôna dûkmun meidîla, mei thi tet ngâiloia se nêkin chu kut boia ringna taka lût nata rangin asa uol.

⁴⁵⁻⁴⁶Male ne kengei han na taksônna aminmangin chu, tan pai kelen roh! Kengei inik dôna dûkmuna paia om nêkin chu ke boia ringna taka lût chu nata rangin asa uol.

⁴⁷Male ni mitin na taksônna aminmangin chu kêl pai roh! Mitngei inik dôna dûkmuna paia om nêkin chu mit inkhat dôna Pathien Rêngrama lût nata rangin asa uol.

⁴⁸Ha muna han chu anni ngei sâk ngâi, “Rulungngei ha khom thi tet ngâi mak ngeia, mei khom thi tet ngâi mak.”

⁴⁹“Inbôlna michi alin aminthieng ngâi anghan mi murdi meiin la minthieng nîng an tih.”

⁵⁰“Michi hih a ala; aniatachu aalna hah adongin chu ile mo nin min al nôk ranga? “Nin lâia malinchangna michi dôn unglâ, male insûk irrin om roi” a tia.

Mark 10

Jisua'n inmâkna chungroia a minchuna

(Mat 19:1-2; Luk 16:18)

¹Hanchu Jisua'n ha mun hah a mâka, Judea ramhuola a sea, male Jordan Tuidung râl ânkânna lokongei apâlpa a kôm an hong intûp nôka, a tho tit ngâi anghan anni ngei ha a lei minchu ngeia.

²Phariseengei senkhat an hongâ, ama min okna rangin, “Mîn a lômnu mâk rangin ei Balam aphal mo?” mi ril roh, tiin an rekela.

³Jisua'n an kôm, “Moses'n inmo Balam nangni a pêk?” tiin chongrekel leh a thuo ngeia.

⁴Anni han, “Moses'n chu pasalin inmâkna lekha a mizieka male a lômnu tîr pai rangin inmâk hih a phal ngâi ani” ti hih an thuo chu ani.

⁵Jisua'n an kôm, “Minchu nin intak rai sika Moses'n hi Balam hih nangni rangin a miziek, a tipe ngeia.

⁶Aniatachu rammuol insieng phut renga Pathien Lekhabu'n ati anghan, 'Pathien'n pasal le nupang' a sin ngei ani.

⁷'Masika han pasalin a nû le a pa mâk a ta, male a lômnu leh inlop an ta,

⁸male inik hah takpum inkhat hongni an ti zoi.' Masikin inik ni khâi mak ngeia, inkhat an hongni zoi ani.

⁹Hanchu Pathien'n munkhata a minzom sai chu miriemin an minsen rang nimak,” a tia.

¹⁰In sêng an lût lehan a ruoisingeiin ma roi hah Jisua an rekela.

¹¹Ama han an kôm, “Tukhom a lômnu a mâka, male nupang dang inneipui chu a lômnu doiin a inrê ani.

¹²Ma angdênin, nupang khomin a pasal mâkin pasal dang inneipui chu a inrê ani,” a tia.

Jisua'n nâipangtengei satavur

(Mat 19:13-15; Luk 18:15-17)

¹³Jisua'n an chung a kutngei a minngama satavur theina rangin mi senkhatin a kôm nâipangtengei an hong tuonga, aniatachu ruoisingeiin mingei hah an lei ngokhuma.

¹⁴Jisua'n maha a mu lehan a ningathika, a ruoisingei kôm, “Nâipangtengei ko kôm min hong ungla, khap no roi, Pathien Rêngram chu hi anga mingei ta ani sikin.

¹⁵Adiktakin nangni ki ril tukhom nâipangte angin Pathien ram a modôm nôncu Pathien Rêngram lût tet no ni,” a tia.

¹⁶Hanchu nâipangtengei a kua, an chung chita a kutngei minngamin, male satavur ngei zoi.

Ruotharte mineipa thurchi

(Mat 19:16-30; Luk 18:18-30)

¹⁷Jisua'n se nôk ranga kalchôichakin, mi inkhat a hong tâna, amakunga khûkinbilin, a kôm, “Minchupu Sa, ringinlon ka chang theina rangin imo ki sin rang?” tiin a rekela.

¹⁸Jisua'n a kôm, “Ithomo asa mi ni tia?” “Pathien pêna chu tute mi sa om mak ngei.

¹⁹Balam chongpêkngai ha chu ni riet duo: ‘Mi that no roh; inrê no roh; inru no roh; adikloitakin tute batu tho no roh; mi huong no roh; nu nû le na pa jâ roh ti ngei hih’” a tia.

²⁰Hapa han a kôm, “Minchupu ma Balam chongpêkngai nâm ha chu ka nâipangte renga ke lei jôm sai kêng” a tia.

²¹Jisua'n amapa hah a en ngita, lungkhamna tak dônin a kôm, “Inkhat mamang na lân sam. Senla no dôn murdi zuor inla, male a sum hah inrieng ngei pêk inla, male invâna rochon dôn ni tih; hanchu hong inla, mi hong jûi roh” a tipea.

²²Amapa han ha chong hah a riet lehan, a mâimôk pe oka, mineipa ani sikin, innguikhakin a rot zoi.

²³Jisua'n a ruoisingei a vêng ngeia male an kôm “Anei ngei Pathien Rêngrama lûtna rangin khodôra ântak mo ani zoi!” a tia.

²⁴Ruoisingei han a chongril hah jâmzal aom sabak an tia, hannirese Jisua'n a la tibanga an kôm, “Ka nâingei, Pathien Rêngrama lût rang hi idôra ântak mo ani zoi!

²⁵Minei ngei Pathien Rêngrama lût nêkin chu simphuoi kuora út lût rang bai uol ok atih” a tia.

²⁶Haten hanchu ruoisingeiin an jâmânzal phar zoia, male inkhat le inkhat annin rekel inlôma, “Hanchu, tumo sanminjôkin aom thei rang?” an tia.

²⁷Jisua'n anni ngei hah a en ngita, an kôm, “Maha miriem rangin chu nitheimaka, aniatachu Pathien rangin chu anithei ani; Pathien rangin chu neinuntin hih anithei let ani” tiin a thuona.

²⁸Hanchu Peter'n a kôm, “En ta, keini chu neinuntin kin mâka, male nang kin jûi ani hi” a tia.

²⁹Jisua'n an kôm, “Ani,” nangni ki ril tukhom keima sika le thurchisa sika, in mo, lâibungngei mo, sarnungei mo, nû mo, pa mo, nâingei mo, loingei mo amâk ngei chu,

³⁰hi damsûng renga hin inngei mo, lâibungngei mo, sarnungei mo, nûngei mo, pangei mo, nâingei mo, loingei mo, abâk razan man a ta, male mi nuomlonangei khom tuong sa a ta; male zora la hong tung ranga ringinlon khom man sa atih.

³¹“Aniatachu atûna amotontaka om mi tam ngei chu anûktaka la om an ta, male anûktaka om mi tam ngei chu amotontaka la om an tih,” a tia.

Jisua'n a thi rang roi a misîr voithumna

(Mat 20:17-19; Luk 18:31-34)

³²Jisua le a ruoisingei Jerusalem tena se rangin lampuia an oma, Jisua moton ânsa, ruoisingei hah kamâmnân an sipa; a nûkjûi mingei han an chia. Jisua'n, ruoisingei hah an theiviekin a tuong ngei nôka, male a chung a neinun ahongtung rang ngei hah a misîr pe ngei nôka.

³³“Rangâi roi, Jerusalem tena ei se rang ania, mahan Miriem Nâipasal hi ochaisingei le Balam minchupungei kuta bangin om atih. Thi rangin hengpai an ta masuole chu Jentailngei kuta bang an ta,

³⁴anni ngei han innuinân mang an ta, michil an ta, jêm an ta, that an tih; hannirese sînthum suole chu aringin inthoinôk a tih” a tia.

Jacob le John ngênna

(Mat 20:20-28)

³⁵Hanchu Zebedee nâipasalngei Jacob le John, Jisua kôm an hongga, “Minchupu, imini sin mi ni tho pe rangin kin nuom aom,” an tia.

³⁶Jisua'n an kôm, “Maha imo ani?” tiin a rekel ngeia.

³⁷Anni han, a kôm, “Ne Rêngram roiinputaka ne rêngsukmuna nên sung tika na changtieng inkhat voitieng inkhat mi ni min sung rangin kin nuom ani” tiin an thuona.

³⁸Jisua'n an kôm, “Nin ngên hi nin riet loi ani. Dûktuongna kilât ke nêk ngêt rang hi nin nêk thei rang mo? Ka baptisma chang rang khom nin chang thei rang mo?” a tipe ngeia.

³⁹Anni han, “Thei kin tih” tiin an thuona. Jisua'n an kôm, “Ki kilât nêk rang chu nêk nin ta, ka baptisma chang rang khom chang thei nin tih.

⁴⁰Aniatachu ka changtieng mo, ko voitieng mo tumo an sung rang thang rangin chu rachamnei mu-ung. Ha munngei hah chu Pathien'n tu ngei rang mo a minsûk pe ngei kôm han pêk ngei atih,” tiin a tipe ngeia.

⁴¹Ma roi hah ruoisi dang sôm ngeiin an lei rieta Jacob le John chungga an lei nuor zoia.

⁴²Masikin Jisua'n anrêngin munkhatin a koi ngeia, an kôm, “Jentailngei chungga roijêkpu an phun ngei chu an chungga an inlal sabak ngâia, male an ruoipungei khom an chungga racham an nei tatak ngâi ti khom nin riet.

⁴³Nikhomrese, nin lâia chu ma anghin ani rang nimak. Nin lâia tukhomin alien rang a nuomin chu nin tîrlâm ani bak ngêt rang ani;

⁴⁴male nin lâia tukhomin amotontak ani nuomin chu mi murdi suok ani bak ngêt rang ani.

⁴⁵Miriam Nâipasal luoman mîn a sin an tho pe rangin juong maka; mi sin tho pe rangin le mi tamtak ngei ratan ranga a ringna pêk rangin ke a juong ani” a tia.

Jisua'n Bartimaeus mitcho a mindam

(Mat 20:29-34; Luk 18:35-43)

⁴⁶Jericho an hong tunga, Jericho renga Jisua le a ruoisingei leh loko tamtak ngei mâkin an se lâiin kutdo Timaius nâipasal Bartimaeus lampui kôla a lei insunga.

⁴⁷Nazareth Jisua ani ti a riet lehan ân ieka, “Jisua! David Nâipasal, inrieng mi mu roh ba!” a tia.

⁴⁸Mi tamtakin dâirek rangin an ngokhuma, aniatachu ama'n, “David Nâipasal, inrieng mi mu roh!” tiin ânring uolin ân ieka.

⁴⁹Jisua ânngama male, “Ama hah hong koi roi” a tia. Masikin mitchopa hah an va koia, a kôm, “Tâihieiin om roh!” anni han, “Inthoi roh, nang a koi!” an tipea.

⁵⁰Masikin a puon a vôr paia, inrangtakin ân chôma, male Jisua kôm a hong zoi.

⁵¹Jisua'n a kôm, “Khoimo nang ko tho pe rangin nu nuom?” tiin a rekela. Mitchopa han a kôm, “Minchupu, mu nôk thei rangin ku nuom” tiin a thuona.

⁵²Jisua'n a kôm, “Se ta roh, na taksônân nang amindam zoi ani” tiin a rila. Voikhatrengin a mu thei kelena, male lampuia han Jisua a jûi zoi.

Mark 11

Jisua'n inlaltakin Jerusalema a lût

(Mat 21:1-11; Luk 19:28-40; Joh 12:12-19)

¹Jerusalem an hong tung rangtôn Bathphage le Bethany khopuingei kôla Olive Muol an hong tungin chu Jisua'n a ruoisingei lâia mi inik an motona a tîr ngeia,

²hi rilnangei leh an kôm, “Nin motona khuo son se unglâ, nin tung harengan, sakuordingte inthung, tute la chuongna ngâiloi mu nin tih. Sût unglâ, mahin hong kai roi.

³Male tukhomin itho mo ma anghin nin thoa, tiin nangni an rekel khomin, Pumapa'n a min nâng kêng, hong thak nôk kelen a tih ti roi” a tia.

⁴Masikin an sea lamliena inkhâr pên tienga sakuordingte inthung an va mua. Maha an sût lehan,

⁵hataka ânding senkhat ngeiin, “Ithomo sakuordingte hah nin sûtâ?” tiin an rekel ngeia.

⁶Jisua'n a ril ngei anghan an thuona, male lokongei han an min se ngei zoi.

⁷Sakuordingte hah Jisua kôm an hong kaia, a chungâ an puonngêi an dâpa male Jisua a chuonga.

⁸Mi tamtakin an puonngêi lampuia an dâpa, adangin loilâija sasôl an va tuka an dâp sa zoi.

⁹Amoton tienga se ngei le a nûk tienga a jûi mingêiin, “Hosanna! Pumapa rilinga juongpu chu Pathien'n satvur rese!

¹⁰Rêng David Rêngam juong tung rang ha, ei pa'n satvur rese! Pathien minpâkin om rese!

Ânchungtaka khin Hosana!" tiin an inieka.

11Jisua'n Jerusalem a tungin chu Biekin sũaga a lũata, male neinun nũam a ena. Aniatachu kholoi ahongni zoi sikin ruoisi sũamleinik ngei leh Bethany taka an se zoi.

Jisua'n theichang kung khomък a sũam

(Mat 21:18-19)

12Anangtũaka chu Bethany renga an hong kър nũaka, Jisua a von ahong cham pea.

13"Alazana renga theichang kung abuongei hah ava mua, masikin amara tete mo ka man" tiin ava pana. Hannirese ava tungin chu, theichang ânra zora ani loi sikin abuongei tilooin chu ite adang mu maka.

14Jisua'n theichang kung kũam han, "Tutên na mara sũak man khũa no rese ngei!" a tia. Male a ruoisngei khomin a chong ha an rieta.

Jisua Biekina a se

(Mat 21:12-17; Luk 19:45-48; Joh 2:12-22)

15Jerusalem an tung lehan, Jisua Biekina ava lũata, Biekina neinun juorngei le rochъкngei hah a rujũapai ngeia. Sum thũangei dosъngngei le pharvali juorngei sukmunngei khom a nammelet pe ngeia,

16male Biekin khalũaidung han tutên neinun chũa rangin phal khũa maka.

17Hanchu mingei kũam han Pathien Lekhabua, "Ki Biekin chu namtingei ta ranga chubaithona in ani,' tiin ânziek nimak mo? Aniatachu nangni ngei rêukin chu inrungei inthupna in ke nin minchang hi!" tiin a minchu ngeia.

18Mahi ochaisngei le Balam minchupungeiin an rieta, masikin Jisua thatna rang lampui an rok zoia. Lokongei ha a minchuna hah kamũam aom sabak an ti sikin ama hah an chia.

19Hanchu, kholoi ahongni lehan, Jisua le a ruoisngei hah khopuilien an mък zoia.

Theichang kung renga inचना

(Mat 21:20-22)

20Anangtũak jũaga chu ha lampuia an lũan chungin theichang kung hah arzungngei dênin athin an mua.

21Peter'n neinun ahongtung ha a riet nũaka male a kũam, "Minchupu, en ta theichang kung khomък na sũam hah athi phar zoi!" a tia.

22Jisua'n an kũam, "Pathien taksון roi," tiin a thuan ngeia.

23Adiktakin nangni ki ril; tukhomin hi tâng hih, "Inthon inla tuikhangliena van pai roh" ti senla, mulunglũaiinlakna boiin iemtakin a tiin chu, a ti anghan hongtung atih, ama rangin sinin om atih.

²⁴Masika han nangni ki ril: i-ih khom chubaithoa nin ngên ngei murdi chu maha nin man sai angin iem unglâ, male nin zong ngei murdi chu pêkin om nin tih.

²⁵Male chubaitho ranga nin inding tika, “Tu chungâ khom nourna nin dôn khomin ngâidam roi, masika han invâna nin Pa khomin nin minchâinangei hah nangni a ngâidam rang ani.”

Jisua rachamneina roia chongrekel

(Mat 21:23-27; Luk 20:1-8)

²⁷Jerusalema an tung nôka. Biekina a lônâitakin ochaisingei, Balam minchupungei le upangei Jisua kôm an hongâ

²⁸a kôm, “Tu rachamin mo hi neinunngêi hih ni sin? Ma angâ rachamneina hi tumo nang pêk?” tiin an rekela.

²⁹Jisua'n an kôm, “Kei khomin chongbâi khat nangni rekel ka ta, male mi nin thuin chu, tu rachamin mo hi neinunngêi hih ki sin nangni ril ki tih, tiin a thuin ngeia.

³⁰Ni ril roi, John Baptisma tho theina racham hah kho renga mo: Pathien renga mo miriem renga mo?”

³¹An lâia anninanâkin an inkhal phut zoia: “Imo ei ti rang? ‘Pathien renga,’ tiin ei thuin lakin, ama'n ‘Itho mo, John hah nin iem loi?’ Mi tîng a ta.

³²Aniatachu, ‘Miriem renga, ei tiin chu’” (Mitinin John hah dêipu tatakin an lei bê sîkin, mipuingei laka an chia.)

³³Masikin Jisua an thuna chu, “Riet mak meh,” an tia. Jisua'n an kôm, hanchu, “Kei khomin tu rachamin mo hi neinunngêi hih ki sin nangni ril uol no ning,” a tipe ngeia.

Mark 12

Grapebila inlo mingei chongmintêk

(Mat 21:33-46; Luk 20:9-19)

¹Hanchu Jisua'n chongmintêkin an kôm a misîra, “Voikhat chu mi inkhatin grapebil a thoa, bêr a minkula, grape epna rang khur a choia, male angâkna rang in insâng a sina. Hanchu inlo mingei kôm a chuon inlo rangin a pêk ngeia, ram danga khuolchai a se zoia.

²Grape pot zora ahongnin chu a chang rangtum lâk rangin inlo mingei kôm a suok inkhat a tîra.

³Inlo mingeiin a suok hah an lei sîra, an jêma, kut korongin an min se zoi.

⁴Hanchu a pumapa'n suok dang a tîr nôka; inlo mingei han a lu an lei mophop pea mâimôk an lei shak bita.

⁵A pumapa han suok dang a tîr nôk rêka, amapa hah chu an lei thata; male ma angdênin adang tamtak ngei khom senkhat an lei jêma, senkhat an lei thata.

⁶Ha mi han tîr ranga a dôn chu a nâpasal lelê a moroitak vai ha ani zoia; ‘Ka nâpasal hi chu lei jâ ngêt an tih’ tiin a nâpasal hah anûktaka a tîra.

⁷Hannirese ha inlo mingei han inkhat le inkhat kôm, ‘Hipa hih a pumapa nâpasal ani hi. Hong roi, ama hih that rei u, male a rochon hih ei ta ani rang!’ an tia.

⁸Masikin a nâpasal hah an sûra, an thata a ruok khom grapebil pêntieng an paia.

⁹“Hanchu, kho angin mo grapebil pumapa han a lo ngei rang ni zoi?” tiin Jisua'n a rekela. “Hong a ta, ha mingei hah that a ta, grapebil hah donsui rangin midangnei kut chung a pêk ngei atih.”

¹⁰Adiktakin hi Pathien lekhabu hih nin pore loi mini? “In sinpungeiin lung mangmunboi anga an hengpai hah akila lung kâmnâng tak achang zoi.

¹¹Maha Pumapa tho ania; ma hih ei mitmua kamâmaruoi sabak na!” ti hih a tia.

¹²Ma chongmintêk hah anni ngei demnân a misîr ani ti an riet sikin; Juda ruoipungeiin Jisua sûr rangin an pûta. Hannirese lokongei hah an chia, masikin ama an mâka, male an rot zoi.

Chôiruol pêk roia chongrekel

(Mat 22:15-22; Luk 20:20-26)

¹³Chongrekelnei leh min ôk rangin phariseengei senkhat le Herod pâla mi senkhat ngei a kôm an tîra.

¹⁴Anni ngei hah a kôm an hong a, “Minchupu, chongtak ni misîr ngâi ti kin rieta, mingeiin imo an mindon rang kângdoi loiin, tute dingmun lunghâng tho loiin, hannirese mingei rangin Pathien lungdo ni minchu ngâia, Roman Rêng Ceasar kôma chôiruol pêk rangin ei Balamîn ânkalpui mo? Kin pêk ngei rang mo, kin pêk ngei loi rang mo?” mi ril roh, an tia.

¹⁵Aniatachu Jisua'n an huongvâr tho hah a riet chiena, male an kôm, “Ithomo ni min ôk rang nin tho hi? Duli sumthîr inkhat hah hong chôi ngân hi roi, lei en rong,” tiin a thuon ngeia.

¹⁶Inkhat an hongchôi pea, an kôm han, “Tu mâisuo le tu riming mo ani hi?” tiin a rekel ngeia. Anni ngei han, “Ceasar” tiin an thuona.

¹⁷Masikin Jisua'n an kôm, “Asa, hanchu Ceasar ta chu Ceasar pêk unglâ, male Pathien ta chu Pathien pêk roi,” a tipe ngeia. Male Jisua chung a han an kamâm sabak zoi.

Thina renga inthoinôkna chongrekel

(Mat 22:23-33; Luk 20:27-40)

18Hanchu mingei inthoinôkna omak ti ngâi Saduceengei Jisua kôm an hongâ, male

19“Minchupu, Moses balam hih kin ta rangin a miziêka: ‘Mîn nâingei nei loiin a lômnû a thisanin chu, a nâipa han ha meithâi hah a luô ngêt rang ani, nâingei an neia athipu ulienpa nâingeia bê ani theina rangin.’

20Voikhat chu lâibung sari an oma; ulientakin in a neia male nâingei nei loiin a thia.

21Hanchu inikna han ma nupang ha a luô nôka, male nâingei nei loi dênin a thi nôka. Lâibung inthumna khom ma angdên ania,

22male anrêngin: ma lâibung sari ngei han ma nupang hah an luô paka, tutên nâingei nei pui loiin an thisan rieia. Anûktaka chu nupangnu khom hah a thia.

23Atûn, mithi ngei nâm aringin an inthoinôk nikhuo tikin tu lômnû tak mo ani rang ani zoi? Ma sari ngei laka han amanu hah anrêngin an luô paka” an tia.

24Jisua'n an kôm, “Idôra dikloi mo nin zoi! Male itho sika mo nin riet mo?” Ma ha Pathien lekhabu le Pathien sinthotheina nin riet loi sika ani.

25Athi ngei aringin an inthoinôk tika chu, invâna vântîrtonngei angin om an ta, innei no ni ngei.

26Atûn mithi ngei kaithoia an om rang roi chu, Moses lekhabua chîmbuka meichuong chungroia han Pathien'n Moses kôm, “Keima Abraham Pathien, Isaac Pathien, Jacob Pathien ki ni,’ tia ânziek hah nin la pore tet ngâi loi mini?

27‘Ama chu aring ngei Pathien ke ani, mithi ngei Pathien nimak. Nin minchâi phar zoi!’ tiin a thuan ngeia.

Chongpêk roiinputak

(Mat 22:34-40; Luk 10:25-28)

28Balam minchupu inkhatin an injêkhômna hah a rieta. Jisua'n Saduceengei hah thionna satak a pêk ngei hah a mûn chu a hongâ, masikin Jisua kôm, “Chongpêkngêi murdi lâia khotak hi mo akâmomtak?” tiin arkela.

29Jisua'n a kôm, “Akâmomtak chu ma hih ani: ‘Israelngei rangâi roi! Pumapa ei Pathien vai hih Pumapa ani.

30Pumapa na Pathien chu nu mulungrîl murdi leh, na ratha murdi leh, nu mulungbôk murdi leh, na râtna murdi leh lungkham roh.’

31Inikna chongpêk akâmom nôk chu ma hih ani: ‘Nangma nên lungkham anghan nu bungmingei khom lungkham roh’ ti hi. Hi Chongpêk inik ngei nêka roiinpui uol reng omak” tiin Jisua'n a thiona.

³²Balam minchupu han Jisua kôm, “Ani ai duo, Minchupu! Mahi adik, ni ti anghan, Pumapa vai hih Pathien ania male ama pêna chu pathien dang reng omak.

³³Male Pathien chu nu mulungrîl murdi leh, nu mulungbôk murdi leh, na râtna murdi leh nu lungkham ngêt rang ania; male nangma nêl lungkham anghan nu bungmingei hah nu lungkham ngêt rang ani. Pathien kôma mâichâma sâ pumhal inbôlnagei le inbôlna adangngei nêkin khom ma chongpêk inik ngei jôm hih akâmom uol ani” a tia.

³⁴Jisua'n inthârtakin a thuo ti a rieta, male a kôm, “Pathien Rêngam renga la mak che,” a tipea. Masuale chu tutên Jisua kôm chongrekel rangin ngam khâi mak ngei.

Messiah roia chongrekel

(Mat 22:41-46; Luk 20:41-44)

³⁵Jisua'n Biekina a minchu ngei lâihan an kôm, “Kho angin mo Balam minchupungeiin Messiah chu David richisuonpâr ani rang an ti thei?”

³⁶David ha Ratha Inthieng mangin: “Pumapa'n ku Pumapa kôm: Ka changtieng insung tit roh na rângei ne kepha nuoia ka dar mâka chu” a ti ani.

³⁷David han ama hah “‘Pumapa’ a tia; masikin kho angin mo Messiah hih David richisuonpâr ani thei ranga?” a tia.

Jisua'n Balam minchupungei renga inning ranga a rilna

(Mat 23:1-36; Luk 20:45-47)

Loko tamtakin Jisua chongril hah râisântakin an rangâia.

³⁸A minchu ngei anghan, an kôm, “Balam minchupungei renga indîn roi, anni chu kâncholiinчуol hâka lêng an nuom ngâia, bazar muna mîn an jâ ngeia chibai an pêk ngei rangin an nuoma,

³⁹Synagogngeia sukmun asatak ngei, le khohoithona munngeia, mun hoitak ngei an thang ngâi.

⁴⁰Meithâingei sum an sâka an inngei an muruka, male mi huongna rangin asôt tatak chubai an tho ngâia. Masika han an dûktuongna hah intak uol ok atih” a tia.

Meithâinu tholôm

(Luk 21:1-4)

⁴¹Jisua Biekina sumsienna kôla ânsunga, mingeiin asûnga an tholôm thâk ngei hah a ena. Minei tamtakin sum tam tatak an thâka;

⁴²hanchu meithâi inriengte a hongma male damali inik a thâka, maha poisa khat dôr ani.

⁴³A ruoisingei a koitupa male an kôm, “Nangni ki ril; tholôm dôngna tholôm thâk ngei murdi nêkin hi meithâi inriengte hih a thâk min tam uol tak ani.

⁴⁴Midangngeiin chu an nei minieng, an mang minieng ngei an thâka; aniatachu amanu hih chu, ânrieng anghan, a dôn nâm a thâkripa—a ringna ranga a dôn nâm te hah a pêkrip zoi,” a tia.

Mark 13

Jisua'n Biekin sietminmang rang A misîrna

(Mat 24:1-2; Luk 21:5-6)

¹Jisua Biekin renga a hong jôk lâihan a ruoisingei lâia mi inkhatin a kôm, “Minchupu, en ta! Lungngei le inngei kamâm aom tie hi!” a tia.

²Jisua'n a kôm, “Hi in roiinpui ngei hi nu mu na? Lung inkhat luo amuna hin mâkin om no nia; anrêngin misim zit la nîng atih,” a tia.

Intaknangei le nuomlonangei

(Mat 24:3-14; Luk 21:7-9)

³Jisua chu Biekin mâi tienga Olive Muola ânsung lâihan a kôm, Peter, Jacob, John le Andrew inrukin a kôm an hong.

⁴“Mahi khotika mo ahong om rang? Male ma neinunngai ha ahongtungna rangin imo minsina aom rang? Mi ril roh,” an tia.

⁵Jisua'n an kôm, “Tutên nangni an huong lolina rangin inning roi,” a tipe ngeia.

⁶Mi tamtakin, “Khrista ki ni!” tiin ki rimingin hong an ta, mi tamtak huong an tih.

⁷Male anâina mo, alazana mo râl ruhu thurchi ngei nin riet khomin nin jâmminzal no roi. Ma anga neinunngai hah chu aom ngêt rang ani, hannirese amongna chu la ni tak no ni.

⁸Jâtngai le Jâtngai lân doi an ta, ramngai le ramngai lân doi an tih, rêngramngai le rêngramngai lân doi an tih. Muntina ningnungei hong a ta, mâtâmngai la chul atih. Ma neinunngai ha nâiha aphutna ngei angin ani rang.

⁹“Nangninanâkin nin inning ngêt rang ani. Sûrin la om nin ta, male roijêknamuna tuongin la om nin tih. Synagogngai jêmpol la ni nin ta; keima jârin rênngai le roijêkpungei makunga Thurchi Sa misîr pe ngei rangin lân ding nin tih.”

¹⁰Aniatachu amongna ahong tung mân, Thurchisa hih mi murdi kôm misîrin aom bak ngêt rang ani.

¹¹Male sûrin nin oma, male roijêknamuna tuongin nin om tikin, nin ti rang lei mindonin azora aphâk mân nin jâmminzal no roi; azora taka, i-ih khom nangni

pêka aom tak hah ti roi. Chong nin ti rang ngei hah nangni nin chong ni no nia; anni ngei hah Ratha Inthieng renga ajuong rang ani.

¹²Mîn a lâibungngei nanâk khom that rangin la minsûr a ta, male pa khomin ma angdênin a nâingei la minsûr sa a ta, nâingei khomin an nulepangei doi an ta, male that an tih.

¹³Keima sikin mitinin nangni la mumâk an tih. Aniatachu tukhom among dênna tuongdierpu chu sanminringin om atih.

Intakna ichi omtak

(Mat 24:15-28; Luk 21:20-24)

¹⁴“Intakna Ichi Omtak’ ha ânding lolina rang muna ânding la mu nin tih.” (aporepungei ranga minrietna: mahi aomtie rietthei rese ngei!) “Hanchu Judea rama om ngei hah tângngei chung a han rot ngêt rese ngei.”

¹⁵In chung a ompu khomin chumin a chôî rang a in sûnga neinun juong lâk rangin azora minhek tet no rese.

¹⁶Loia ompu khomin a puon va lâk rangin in sûnga kêr tet no rese.

¹⁷Nupang nâivong ngei le nâitesen pomlâi nûngei rangin chu ma nikhuongei hah khodôra ichiruoi mo ani rang!

¹⁸Ma zora hah phalbia atung lolina rangin Pathien kôm chubaitho roi.

¹⁹Ma nikhuongeia intaknangei ha chu Pathien'n rammuol a sinphut renga avien sîn tena rammuolin a lei riet ngâi murdi nêkin ânchungtak ani rang sikin. Ma anga neinun ha chu khotiklâi khomin om nôk tet khâi no ni.

²⁰Aniatachu ma nikhuongei hah Pumapa'n a minbong ania; ninorese chu tute ring thei no ni ngei. Nikhomrese, a thangsai a mingei sikin ma nikhuongei hah a minbong ani.

²¹“Hanchu, tukhomin nin kôm, ‘En ta, hin Messiah aom!’ aninônchu, ‘En ta, son aom!’ an ti khomin maha iem no roi.

²²Messiah rotholngei le dêipu dikloingei an inlang rang sikin. Pathien'n a thangsai a mingei tena khom anitheiin chu an huong theina rangin sininkhêlungei le kamâmruoi neinunungei tho an tih.

²³Nangni chu inningchienen om roi! Azora ahong tung mân khokhoi khom nangni ke lei ril let zoi ani.

Miriam Nâipasal juong rang roi

(Mat 24:29-31; Luk 21:25-28)

²⁴“Ma intakna nikhuongei le azora avun suo nûkin chu nisa hah hong jîng a ta, tha khom vâk khâi no nia,

25Ar singei khom invân renga jountâk an ta, male munronga sinthotheinangei khom an omnangei renga inthîn pai atih.

26Hanchu Miriem Nâipasal hih sinthotheina inlaltak le roiinpuntak leh sumngei lâia khin juong inlang atih.

27Ama'n philchung kôlkil minlia, kôlmong khangkhat renga kôlmong khangkhat dênin rammuol pumpuia, Pathien'n a thangsai a mingei mintûp rangin a vântîrtonngei tîr atih.

Theichang kung renga inchuna

(Mat 24:32-35; Luk 21:29-33)

28“Theichang kungin nangni minchu rese. Amachangngei ahong ema, ahong innoia male abuongei ahong incherin chu kholum hih anâi zoi ti nin riet ngâi.

29Ma angdênin, nangni khomin ma neinunngai hah ahongtung nin mu tika chu azora ahong nâi zoi, ânphut rang ani zoi tiin nin riet rang ani.

30Ma neinunngai murdi hah atûnlâia mingei hih an thi riei mân ahongtung rang tiin riئتit roi.

31Pilchung le invân in mang pai a ta, hannirese ko chongbâingei chu in mang pai tet no ni.

Tutên anikhuo aninônchu azora riet mak ngei

(Mat 24:36-44)

32“Nikhomrese, anikhuo aninônchu azora chu khotika mo ahongtung rang, invâna vântîrtonngei khomin, Nâipasal khomin, tutên riet mak ngei; Pa vai kêng a riet ani.

33Azora hah khotika mo ahongtung rang nin riet loi sikin, inningchien ungla, intûngchienin om roi.

34Maha chu mân a in a mâka, a tîrlâmngai rachamneina a pêk ngeia, an sintho rang a pêk ngei chita, inkhârôtpu khom inningchiena om ranga chong a mâk pea, ram lataka khuolse angin ani.

35Masikin inningchienin om roi, in pumapa hong rang zora hah kholoia mo, jânchima mo, ârkhuona mo, jînga mo, ahongtung rang nin riet loi sikin.

36Inningloiin a hong duoi khomin, a inin nangni hong mu tet no rese.

37Hanchu, nin kôma ki ti hih mi murdi kôm ki ti ani: inningchienin om roi!” a tia.

Mark 14

Jisua that rangtie an mintuo

(Mat 26:1-5; Luk 22:1-2; Joh 11:45-53)

¹Kalkân kût le Cholboi Vâipôl Kût rang sûnnik motona ochaisingei le Balam minchupungeiin Jisua inruktea sûra male that rang lampui an rok banga.

²“Khohoi sûngin chu ei tho tet rang nimak,” aninônchu “mingei lâia injêlna om duoi ni,” an tia.

Bethany taka Jisua sariek polin aom

(Mat 26:6-13; Joh 12:1-8)

³Jisua chu Bethany taka Simon phârpa ina a oma, Jisua bunêk lâitakin, nuvengte inkhat nard sariek mirimhoi man luttak alabaster bilôr sipmat a hongchôia. Amanu han bilôr hah a khoia male a lu chung a buoka.

⁴Ha muna om mingei senkhatin chu an ningathika, “Khoitho mo hi sariek mirimhoi hih an minpâmchien hi?

⁵Duli razanthum nêka tama zuora asum hah inrieng ngei pêk thei ke ani duo!” an tia. Male amanu hah asân an chierkhum zoi.

⁶Hannirese, Jisua'n an kôm, “Amanu hah atheiin mâk roi! Khoitho mo nin jêl hi? Ka ta rangin neinun satak le enhoitak a tho ani.

⁷Mi inrieng ngei chu nin kôma an omtit rang an nia, male nin nuom titika nin san thei. Aniatachu keima chu nin kôm hin omtit no ning.

⁸Amanu hih a theidôrin a tho ania; ka takpum hih phûm ranga lei cherela mirimhoi a lei buok ani.

⁹Atûn hin, adiktakin nangni ki ril, rammuol pumpuia Thurchisa an misârna muntina hinu sintho khom hi an riettitna rangin misâr sa ngâi an tih,” a tia.

Judas'n Jisua minsûr rang a jôtna

(Mat 6:14-16; Luk 22:3-6)

¹⁰Hanchu ruoisi sômleunik ngei lâia mi inkhat, Judas Iscariot han Jisua a minsûr theina rangin ochaisingei kôm ava sea.

¹¹A ti rang an lei rieta an râiasân sabaka, male sum pêk rangin an inkhâma. Masikin Judas han Jisua ha an kuta a bang theina rangin chuminrên a rok zoi.

Jisua'n a Ruoisingei leh Kalkân Kût bukhâlâi an ot

(Mat 26:17-25; Luk 22:7-14,21-23; Joh 13:21-30)

¹²Khohoia Cholboi Vâipôl bukhâlâi otni sîn masatak han, Kalkân Kût bukhâlâi otna ranga belritengei an that ngâi ni han a ruoisingeiin a kôm, “Nangma rangin Kalkân Kût bukhâlâi hih khonmo nang va minsûk pe unglang nu nuom?” tiin an rekela.

¹³Hanchu a ruoisingei mi inik hi rilnangei lehin a tîr ngeia: an kôm, “Khopuiliena se unglâ, male pasal tuiûm rokot nangni intongpui atih. Ama hah jûi unglâ

¹⁴a lûtna taka in pumapa kôm han: ‘Minchupu'n, khonmo ku ruoisingei le Kalkân Kût kin sâkna rang khâltan hih?’ a ti, va ti roi.

¹⁵Hanchu ama rengin khâltan chunginhuon inzar lienpa, neinun aom sai, mintuodir sai nangni min mûng a ta, mahan eini rangin va minsûk roi,” a tia.

¹⁶Ruoisingei ha an inphêta, khopuilien han an sea, Jisua'n a ril ngei anghan neinun murdi ha an va mua; Kalkân Kût bukhalâi hah an va minsûk zoi.

¹⁷Kholoi ahongni lehan, Jisua hah ruoisi sômleunik ngei leh an se zoia.

¹⁸Dosânga bukhalâi an ot lâitakin Jisua'n, “Nangni ki ril; nin lâia mi inkhat, ko kôma sâk mi sâkpuipu lelê hin ni minsûr atih” a tipe ngeia.

¹⁹Ruoisingei an mulungdûk atông pe ngeia, male inkhat suole inkhat adônin, “Adiktakin keima mo mi ni tina?” tiin an rekel paka.

²⁰Jisua'n an kôm, “Nangni sômleunik ngei lâia inkhat, mâirânga a vâipôl mi michie puipu hi ani.

²¹Pathien Lekhabu'n, Miriem Nâipasal hih a thi ranga a lei ti anghan a thi rang ania; hannirese Miriem Nâipasal minsûrpu chungroi chu ântak sabak rang! Ma miriem rangin chu ânzir loi nisenla chu ama rangin asa uol rang ani!” tiin a thuon ngeia.

Pumapa jânbu

(Mat 26:26-30; Luk 22:14-20; 1 Kor 11:23-25)

²²An sâk lâitakin, Jisua'n vâipôl hâr a lâka, chubaithôn râsânchong a rila, maha a khoia, male a ruoisingei kôm maha a pêk ngeia. “Lâk unglâ sâk roi,” ama'n, “ma hih ka taksa ani,” a tia.

²³Hanchu kilât a lâka, Pathien kôm râsânchong a rila, male maha a pêk ngeia; male anrêngin an nêk pak zoi.

²⁴Jisua'n an kôm, “Ma hih ki thisen mi tamtak ranga asuok, Pathien chonginkhitna athar mindetna ani.

²⁵Nangni ki ril, Pathien Rêngrama uain thar ke nêk ni atung mâka chu hi uain hih nêk nôk khâi noning” a tia.

²⁶Hanchu minpâkna lâ inkhat an thoa, Olive Muola an se zoi.

Jisua'n Peter a ipdel rang a leiphuong

(Mat 26:31-35; Luk 22:31-34; Joh 13:36-38)

²⁷Jisua'n an kôm, “Nin rêngin rot riei nin ta, ni mâk riei nin tih, Pathien lekhabu'n, ‘Pathien'n belrihôlpui hah that a ta, belringei ha chekinchâi chit an tih’ ati sikin.

²⁸Aninâkachu aringin kên thoinôk suole chu Galilee rama nin motona lei se ki tih,” a tia.

²⁹Peter'n a kôm, “Adangngei nâmin nang mâksan riei khomsenla ngeia, keiman chu nang mâksan tet no ning!” tiin a thuona.

³⁰Jisua'n Peter kôm, “Nang ki ril avien jân voinik ârkhuong mân nangman voithum mi ipdel ni tih,” a tipea.

³¹Peter'n chong angar uolin a thuona, a kôm, “Ni thina thisa rang khom ni rongang nang ipdel tet noning!” a tia. Male ruoisi adangngei nâm khomin ma angdênin an ti paka.

Gethsemania Jisua chubaito

(Mat 26:36-46; Luk 22:39-46)

³²Gethsemani an ti mun hah an hong tunga, male Jisua'n a ruoisingei kôm, “Chubai ko tho sêngkâr chu mahin lei insung roi,” a tipe ngeia.

³³Peter, Jacob le John ngei hah a kôm a tuong ngeia, asân rathânvaiin a mulungdûk atong tataka,

³⁴male an kôm, “Ku mulungdûk ana rai sikin thi rang angin ke ko om zoi. Mahin om unglâ male inningchienin om roi” a tipe ngeia.

³⁵Amoton tieng ava se uol vieta, pila ânboka, male ha tuongna rang zora ha anitheiin chu a lôi theina rangin chubai a thoa.

³⁶“Pa,” “O ka Pa! Nangma rangin chu neinunngai murdi anithei let. Hi tuongna kilât hih ko kôm renga mi khâi pai pe roh. Aniatachu keima ka racham niloiiin nangma na racham tak nirse,” tiin chubai a thoa.

³⁷Hanchu a hongkîra, male ruoisi inthum ngei hah an innin a hong mu ngeia, Peter kôm han “Simon, na la in tit mo? Konta khat luo amengin nin om thei loi mo?”

³⁸Male an kôm, “Huongna nin lût lona rangin inningchienin om unglâ, male chubaito roi. Ratha'n chu a nuoma, hannirese taksân chu phari mâk” a tipe ngeia.

³⁹Vêlkhat ava se nôka, male chongbâingai a ti dên hah va tiin chubai ava tho nôka.

⁴⁰Hanchu a ruoisingei tieng a hongkîr nôka, male an lei in dênin a hong mu ngei nôka; an mitngai reng meng thei khâi maka. Male a kôm ti rang khom riet khâi mâk ngei.

⁴¹Avoithumna a hongkîr nôkin chu an kôm, “Atûn ten khom sôlinngamin nin la in dênna? Ahun zoi! Azora ahong tung zoi! En ta u, atûn Miriem Nâipasal hih mi nungsiengi sinthotheina kuta bangin aom rang ani.

⁴²Inthoi unglâ, se ei tih u zoi. En ta u, mahin mi minsûr rangpu hih a hong nâi zoi!” a tipe ngeia.

Jisua an sûr

(Mat 26:47-56; Luk 22:47-53; Joh 18:3-12)

⁴³Jisua a la chong lâitakin, a ruoisi sômleunik ngei lâia Judas hah a hongtung kelena. Ama leh ochaisingei, Balam minchupungei le upangei leh lokongei an hongtîr ngeia, khandaingei le molbongngei chôiin an hongtung.

⁴⁴A minsûr rangpu han, “A bieng ku tum tak hah nin rokpu hah ani, sûr unglâ male tuong kelen roi, enkol roi” tiin minsinna a lei ril ngei sai ani.

⁴⁵Judas a hongtung harengan, Jisua kôm ava se kelena, “Minchupu!” tiin a bieng a tum pea.

⁴⁶Masikin Jisua hah an sûra male an khitbel zoi.

⁴⁷Hataka inding ngei lâia mi inkhatin a khandai a kêlsuoâ male Ochai Inlaltak suok, a kuor a tukthâk pe zoi.

⁴⁸Hanchu Jisua'n anni ha a rokôka, an kôm “khandaingei le molbongngei chôiin balampalpu sûr rang angin mi sûr rangin nin hong mo hi?

⁴⁹Anîngtin Biekina nangni minchu rangin nin kôm ko om ngâia, hannirese mi sûr mak choia. Aniatachu Pathien Lekhabungei ahongtung adik ngêtna ranga ani hi,” a tia.

⁵⁰Hanchu a ruoisingei han ama an mâk raka, male an tân khiip zoi.

⁵¹Ruotharte inkhat, rosompunon leh vai invôn Jisua a jûia. Ama khom sûr sa rang an pûta,

⁵²hannirese a puon hah mâkrakin a korongin a tânpat zoi.

Jisua roijêkna makunga ânding

(Mat 26:57-68; Luk 22:54-55,63-71; Joh 18:13-14,19-24)

⁵³Hanchu Jisua hah Ochai Inlaltak ina an tuonga, mahan ochaisingei nâm le Balam minchupungei le upangei khom an hong intûp sa kelena.

⁵⁴Peter'n alazanna renga a jûia, Ochai Inlaltak khalâidung dênin a sea. Mahan a rungungei lâia mei ava uota.

⁵⁵Ochaisingei le roijêkpungei murdi han Jisua an that theina rangin a minchâina an man theina rang abi an mazama, aniatachu ite man mak ngei.

⁵⁶Rietpuipungei tamtakin Jisua doiin milakin an nôнна, hannirese, an nôнна thurchingei hah intok thei mak.

⁵⁷Mi senkhat an indinga male Jisua doiin milakin an nôнна:

⁵⁸“Hi mi hin, miriemin an lei sin ‘Biekin hih set ka ta, male sînthumbin adang inkhat kuta sin niloi in minding ki tih’ a ti kin riet” an tia.

⁵⁹Nikhomrese, ma an nôнна thurchingei hah khom intok uol maka.

⁶⁰Ochai Inlaltak hah an renga an moton han a vândinga, male Jisua kôm chong a rekela, “Nang an nôna roia hin ite thuonna no dôn loi rang mo?” a tia.

⁶¹Aniatachu Jisua chu a dâireka, male chongbâi khat luô ti maka. Avêlin Ochai Inlaltak han a kôm, “Nangma ha Satvura om Pathien Nâipasal, Messiah hah ni ni mo?” tiin a rekel nôka.

⁶²Jisua'n a kôm, “Ki ni,” male, “Miriem Nâipasal hih Râtinchung chang tieng insungin, invâna sômngêi lâia juong nin rêngin la mûng nin tih!” tiin a thuona.

⁶³Ochai Inlaltak han a puonsilngêi a potkhêra, male “Rietpuipu adang reng nâng khâi mak meh!

⁶⁴Pathien ânti le a rilsiet ti chu nin riet zoia. Imo nin roimasat?” a tia. An rêngin ama an doia: ama hih theiloina a dôna male that rang piel ani an ti paka.

⁶⁵Senkhat ngeiin a mâi an michil phuta, a mâi an hîp pea, male an jêma. A kôm, “Mi ril roh tumo nang a jêm!” an tia. Male rungungei han an tuonga male ama an bên zoi.

Peter'n Jisua a ipdel

(Mat 26:69-75; Luk 22:56-62; Joh 18:15-18,25-27)

⁶⁶Peter hah thangtienga khalâidunga a la om lâihan Ochai Inlaltak tîrlâm dôngmate inkhat a hongga.

⁶⁷Peter mei lei uot hah a mu lehan a enririna, a kôm, “Nangma, khom Nazareth Jisua leh munkhata om ngâi ni ni nah” a tipea.

⁶⁸Hannirese Peter'n a ipdela, “Riet mu-ung Khoimo ni ti reng rietthei mu-ung,” tiin a thuona, male mokot pên tieng ava jôka. Masuole han âr akhuong kelen zoi.

⁶⁹Tîrlâm dôngmate han ava mu nôka, a kôla indingngêi kôm han, “Hipa hih khom an lâia mi inkhat ani sa!” a ti nôka.

⁷⁰Aniatachu Peter'n a ipdel nôk rêka. Chomolte suole chu a kôla indingngêiin Peter kôm, “Galilee rama mi ni ni sa sikin nang khom an lâia mi ni ni ni khet,” tiin an deia.

⁷¹Hanchu Peter'n an kôm, “Chongtak rilin khomâk kên sâm ani! Adik nônchu Pathien'n dûk ni tho rese! Ma miriem nin ti chungroi hah riet reng riet tatak ngâi mu-ung!” a tia.

⁷²Masuole han âr voinikna ahong khuong nôk zoia, male Jisua'n Peter kôm han, “Âr voinik akhuong mân nangman voithum keima hi riet ngâi mu-ung ni ti rang,” a tipe chong hah a hong rietsuok nôka. Male a mulungakoi pea, a chap ngu-ngui zoi.

Mark 15

Jisua Pilat makunga ânding

(Mat 27:1-2,11-14; Luk 23:1-5; Joh 18:28-38)

¹Jînga inmânin innottakin, ochaisingei ha upangei le Balam minchupungei, le Roijêkpungei murdi leh an intônga male mintuonangei an sina. Jisua ha zingjirûi leh an khita an tuong paia, male Pilat kuta an bânga.

²Pilat'n chong a rekela, a kôm, "Judangei rêngpa ni ni mo?" a tia. Jisua'n, "Nangman ke mi ni ti duo" tiin a thuona.

³Ochaisingei han abi tamtakin Jisua an nôнна,

⁴masikin Pilat'n Jisua kôm chong a rekel nôka, "Nangman nu thunloi rang mo? nang an nônnangei nâm hih rangâi roh!" a tia.

⁵Avêlin Jisua'n chongbâi khat luo ti rang nuom maka, male Pilat'n a kamâm sabak zoia.

Jisua hih thi rangin a roijêkmasat ani

(Mat 27:15-26; Luk 23:13-25; Joh 18:39—19:16)

⁶Pilat'n chu Kalkân Kût zora zeta mi intang ina aom inkhat mingeiin an ngên tak ha a mojôk pe ngei ngâi a baisi ani.

⁷Ma zora han mi inkhat a riming Barabbas hah, mi ânhelngei pâla mi, le loko injêlna kêra mi that sika intang ina a oma.

⁸Lokongei an intûpa male anni ranga a lei tho pe ngei ngâi anghan tho rangin an ngên lâihan,

⁹Pilat'n an kôm, "Judangei rêngpa hih nangni mojôk pe inlang nin jôt mo?" tiin a rekel ngeia.

¹⁰Ochaisingei han an narsa sika Jisua hah a kut chung a hong bâng ani ti a riet minthâra.

¹¹Aninâkachu Ochaisingei han mipuingei hah Barabbas a mojôk pe ngei ranga ngên rangin an misiet ngeia.

¹²Hanchu Pilat'n an kôm, "Aninte, Judangei rêngpa nin tipu hih imo ko lo rang ani zoi?" tiin a rekel ngei nôka.

¹³Anni han, "Khrosa jêmdel roh!" tiin an iniek nôka.

¹⁴Hannirese Pilat'n an kôm, "Imo a tho minchâi?" tiin a rekel ngei nôka. Anni ngei han, "Khrosa jêmdel roh!" tiin ânring uolin an inieka.

¹⁵Pilat'n lokongei râiminsân a nuoma, masikin Barabbas hah a mojôk pe ngeia. Hanchu Jisua hah a vîka male Khrosa jêmdel rangin an kuta a bâng zoia.

Râlmingeiin Jisua an phengsan

(Mat 27:27-31; Joh 19:2-3)

16Râlmingei han Jisua hah Râiôt inmâi khalâidunga an tuong lûta, an champui ngei murdi an koi mintûpa.

17Jisua hah puon senduk an minsila, riling amachangngei hah tapor an phana, male a lua an minkhuma.

18Hanchu ama chibai an pêka: “Judangei Rêngpa, ringsôt roh!” an tia.

19A lua tôkmol leh an jêma, an michila, khûkinbilin chibai an mûka.

20Munuiinjanân an sin suole chu puon senduk hah an lîka, male a puonngei nanâk hah an minsil nôka. Hanchu khrosa jêmdel rangin an tuong zoi.

Jisua hih khrosa jêmdelin aom

(Mat 27:32-44; Luk 23:26-43; Joh 19:17-27)

21Hanchu lampuia mi inkhat ram renga khopuilien hongpan a riming Simon an intôngpuia, male râlmingeiin Jisua khros ruput rangin an dânderita. (Simon hah Cyrene Kurini mi, Alexander le Rufus ngei an pa ani.)

22Jisua hah Golgotha an ti muna han an tuonga maha aomtie chu “Luru Mun” tina ani.

23Ha muna han a pang ânhipna rangin uain murra loi leh ânpol pêk rangin an pûta, aninâkachu Jisua'n nêk jôt mâka.

24Hanchu khrosa an jêmdela, male a puonsilngei hah an insema, kho ahâr ha mo an chang rang chit rietna rangin taruo an sâna.

25Jisua an jêmdel zora hah jîng dâr kuo inringa ani.

26Ama doia an nôna minrietna chong hah “Judangei Rêngpa” tiin a lu chung a an târa.

27Jisua leh munkhatin mi inru inik a changtieng inkhat, male a voitieng inkhat an jêmdel sa.

28Ma angdên han, Pathien lekhabu'n, “Ama khom mi puoloingei lâia telsân aom zoi” ati hah ahong tung zoi ani.

29Hataka mingei ânloi murdi'n an lu an thuka Jisua an êroa, “Ohoi! Biekin set na ta, sûnthumin ni minding nôk rang na!

30Atûn juong chum inla, nethenin insan mojôk roh ba!” an tia.

31Ha angdênin ochaisingei le Balam minchupungei khomin Jisua an phengsana, “Midangngei chu a mojôk thei ngâia, hannirese ama le ama chu insan mojôk thei mak!

32Tho atûn chu Messiah, Israelngei rêngpa hih khros lêr renga a juong chum lei en rei u, male ama ei iem rang ani!” an tia. Ama leh an jêmdel sa mi inik ngei khomin Jisua an êro sa zoi.

Jisua thina roi

(Mat 27:45-56; Luk 23:44-49; Joh 19:28-30)

33Sûnchima konta inthum sùng chu rammuol ajîng khapa.

34Chonûk dâr inthum inring han chu Jisua rôl inringtakin ân-ieka, “*Eloi, Eloi, lama sabakthani?*” a tia, maha, “Ka Pathien, ka Pathien, Ithomo mi ni mâksana?” tina ani.

35Ha muna omngei senkhatin a he an rieta, male “Rangâi ta u, Elijah a koi ke!” an tia.

36An lâia mi inkhat a tânna, patjôn, uain thûra a michiejûta, tôkmol monga a târra. Hanchu Jisua ner a hong min tonna, male “La ôt rei u! Khros renga ama musum rangin Elijah mo a juong pe lei en rei u!” a tia.

37Jisua'n rôl inringtakin ân-ieka, a rângachat zoi.

38Hanchu, Biekina puondal dũaga om hah inikin achung renga among dênin akêr phata.

39Râlni ulien khros motona ândingpu hah Jisua a rangachat tie hah a mua “Hi mi hih Pathien Nâipasal ani khet!” a tia.

40Ha muna, nupang senkhat ngei khom alazanna renga thîrin an oma; ma ngei hah Mary Magdalene, Mary Jacob nâipang le Joseph ngei an nû, le Salome ngei an ni.

41Ma ngei hah Jisua Galilee rama aom lâihan an jûi ngâia, male an san ngâi ani. Nupang tamtak Jerusalema ama leh a se ngei khom hah an om sa.

Jisua an phûm

(Mat 27:57-61; Luk 23:50-56; Joh 19:38-42)

42-43Kholoi ahongnin chu Arimathea mi Joseph a hongtung. Ama hah Roijêkpungei lâia jâ omtak ania, Pathien Rêngram juong tung rang lei ngâkpu ani. Maha Incherêlni (maha, Sabbathni motona sùn hah ani), masikin Joseph'n hâitakin Pilat kôm a va sea Jisua ruok ha ava zonga.

44Pilat'n Jisua chu a thi zoi tiin a riet lehan a kamâm tataka, râlni ulien inkhat a koia, Jisua thina asôt zoi mo? tiin a rekela.

45Râlni ulien bâi renga chong ânthârin a riet suole chu a ruok hah Joseph chôi rangin a phal pe zoia.

46Joseph'n rosompuon a rochôka, ruok hah a musuma, rosompuon lehan a tuoma, lungpuia hel thânkhura han a min jâla. Hanchu thân kotbâi hah lung lienpa muluoiiin a hipa.

47Mary Magdalene le Joseph nû Mary han Jisua ruok an min jâlna hah an ena, an mu chien zoi ani.

Mark 16

Jisua inthoinôkna

(Mat 28:1-8; Luk 24:1-12; Joh 20:1-10)

- ¹Sabbathni avun suole chu Mary Magdalene, Jacob nû Mary, le Salome ngei han Jisua ruok sariiek va pol rangin mirimhoi an rochôka.
- ²Pathienni jînga nisa suok chakin tâna an va sea.
- ³Lampuia han, “Thân kotbâia lung hah tumo mi muluoi pai pe rang hi?” tiin annin kereng inlôma.
- ⁴Maha lunglienpa ani sikin. Hanchu an hong ena, lung hah lei muluoi saiin an mua.
- ⁵Masikin thân sûnga han an lûta, ruotharte inkhat puonchek insilin chang tienga insungin an mua, male an inlâiraka.
- ⁶Ama'n an kôm, “Inlâirak no roi,” Nazareth Jisua an jêmdelpu hah nin rok ani ti ki riet. Ama hah mahin om khâi maka, ânthoinôk zoi! En ta u, an min jâlna hi.
- ⁷Atûn, se unglâ, hi thurchi hih a ruoisingei le Peter kôm han: “Galilee rama nin motona se a ta; ‘nangni a lei ril sai anghan mason mu nin tih’ tiin va ril ngei roi” a tipe ngeia.
- ⁸Masikin an jôk paia, beidông le rathatâk pumin thân renga an tâna. An chi rai sikin, tute kôm ite ti mak ngei.

THURCHISA AMONGNA AMURUO

Mary Magdalene kôm Jisua ânlar

(Mat 28:9-10; Joh 20:11-18)

- ⁹Masuole chu Pathienni jînga thina renga ânthoinôka Mary Magdalene, a sùng renga ramkhoringei sari a rujûlpai pe nu kôm han amotontaka Jisua ânlarâ.
- ¹⁰Amanu hah a sea, a champuingei ava ril ngeia. Anni ngei hah ngâisie le chapin an lei oma;
- ¹¹male amanu han Jisua chu aring nôk zoia, male mu khom ku mu khet, a tipe ngei lâihan anni ngei han amanu hah iem mak ngei.

Nûkjûingei inik kôm Jisua ânlar

(Luk 24:13-35)

- ¹²Masuole han an lâia mi inik ram tieng panin an sea, lampuia mêl dang uolin an kôm ânlarâ.
- ¹³Anni hah an hongkîra, ruoisi dangngei an hong rila, aniatachu maha khom anni ngei han iem uol mak ngei.

Somleikhat ngei kôma Jisua ânlar

(Mat 28:16-20; Luk 24:36-40; Joh 20:19-23)

¹⁴Anûktaka chu, Jisua'n ruoisi somleikhat ngei bu an nêk lâitakin an kôm ânlar nôka. Ânthonôk suole amu ngei chong taksôn loiin an mulung angar sabak sika le iemna reng an dôn loi sikin a ngo ngeia.

¹⁵Ama'n an kôm, "Rammuol pumpuia se unгла, mi murdi kôm Thurchisa hih va misâr roi a tipe ngeia.

¹⁶Tukhom ama iema Baptisma chang ngei chu sanminjôkin om an ta; tukhom a iem loi ngei chu theilo intumin om an tih.

¹⁷Iempungei chu sininkhêl ngei sintheina ranak pêk nîng an ta: ki rimingin ramkhoringei rujûlpai an ta; chong tharin chong an tih;

¹⁸an kutngei leh murûl ngei an sâr khomin, aninônchu tûr an nêk khomin itên minna ngei thei no nia; mi damloi ngei chung a an kutngei minngam an ta, male dam kelen an tih" a tia.

Jisua invâna a kal

(Luk 24:50-53; Sin 1:9-11)

¹⁹Pumapa Jisua'n a chongpui ngei suole chu, invâna khin lâkpaian aoma, Pathien chang tieng a hong insung zoia.

²⁰Ruoisingei hah an sea male muntina thurchi an va misâr zoia, male Pumapa khomin anni ngei lehan sin a thopui ngeia, an thurchi misâr hah adik ti rietnân sininkhêl ngeiin a mindet tir zoi.]

AMONGNA MURUO ADANG

²¹ [Nuvengtengi hah Peter le a malngei kôm an sea, male rila an om murdi hah abongkikin an misâr pe ngeia.

²² Masuole han, Jisua nanâkin a ruoisingei ha kumtuong Sanminringna aringtit chongbe inthieng hah nisuo renga nitâk dênin misâr rangin a tûr ngei zoi.]

Luke

Luke 1

¹Moroitak Theophilus, ei lâia roi juong tung, mi tamtak ngeiin theidôr miziek rangin an pûta.

²Aphut renga ha neinunngai amu ngeiin kin lei ril le chong lei phuong anghan an miziek ani.

³Masikin nangma Mirittak, abul renga jâttin ânthârlaka sûiin adônin inthârlakin nata rangin miziek rong a ki ti ani.

⁴Tienna thurchi nang an lei ril hah adiktak ani iti na riet theina rangin.

Baptispu John suok rang leiril masâna

⁵Judea rama Herod rêngin an lallâiin, ochai a riming Zakariah a oma, ama hah ochai Abijah rûia mi ania, a lômnu riming chu Elizabeth ania, Aaron ochairûia mi ani.

⁶An ruonin Pathien mitmun mi diktakin an omma, demnaboiiin Pumapa balam le a chong jômin an om ani.

⁷Hannisenla Elizabeth aching sikin nâi nei maka, an ruonin an tar ok zoia.

⁸Hanchu súnkhat chu Zakariah hah nîngtina asin ngâi angin Biekina ochai sin a thoa.

⁹Ochaingei balam angin mirimhoi hâl rangin taruo sânin ama hah thangin a oma, masikin Pumapa Biekina a sea.

¹⁰Mirimhoi a hâl lâiin mipui ngeiin apêntieng chubai an lei thoa.

¹¹Mirimhoi hâlna mâichâm changtienga han, Pumapa vântîrton indingin a kôm a juong inlâra.

¹²Zakariah'n amu lehan rolo innîkin a chia.

¹³Hannisenla, vântîrton han a kôma, "Zakariah chi no roh, ne ngênna Pathien'n a rieta, no lômnu Elizabeth'n nâi nang nei pe a ta a riming John ni phuo rang ani.

¹⁴A suokin chu nangma le mi tamtak mulungrîl râisân atih.

¹⁵Pumapa mitmûn milien nîng a ta, uain le jûngei reng nêk no nia. A suokni renga Ratha Inthiengin sip a ta,

¹⁶Isreal mi tamtak Pumapa an Pathien tieng hong tuong nôk a tih.

¹⁷Dêipu Elijah anghan rât le hâitakin Pumapa motona sêng a tih. Pangei le nâingei minmun nôk a ta, chongjômloi mingei mindonna satna tieng min hei a ta, Pumapa mingei ata rangin min thokdiem a tih” a tia.

¹⁸Zakariah'n vântîrton kôma han, “mahah inmo ki riet rang? keima laka ka tar zoia, ko lômnu khom a tar zoia,” a tia.

¹⁹Vântîrton han, “Pathien makunga inding ngâi Gabriel ki nia, hi thurchi nang ril rang piela juongtîr ki ni.

²⁰Hi chong azora taka juong tung rang ni iemloi sikin, ajuong tung mâka chu chong theiloiin dâirekin om ni tih,” a tia.

²¹Mipui ngeiin kholâia an lei ngâka, Biekin sênga Zechariah a om sôt rai sikin an lei kamâma.

²²A hong jôk tena chu a chong thei khâiloi sikin Biekina inlârna ai mu iti an rieta, a kut leh vai a chong zoia.

²³Biekina a sin rang a zoi suole chu a in tieng a kêr zoia.

²⁴Môrkhat suoleh chu a lômnu Elizabeth nâi a vong zoia, tha rangnga tuol suok loiin a oma.

²⁵“Anûktaka Pumapa'n mi san nôk zoi, ki riming siet, sût minthelna rangin” a tia.

Jisua suok rang leiril masâna

²⁶Elizabeth nâivong, atha ruk nân chu Pathien'n a vântîrton Gabriel Galilee ram Nazareth khopuia a tîra.

²⁷Rêng David rûia mi Joseph lômnu biek dôngmate Mary kôma chong juong ichôiin.

²⁸Mary kôma a lûta, “Nu chung a ratha inngamna om rese! Pumapa nu chung a om, sat nang a vur ok” a tia.

²⁹Ha chong hah a rieta anîn chu imo ani zoi, tiin a mulung a minjîng oka.

³⁰Hanchu, vântîrton han, “Mary chi no roh, Pathien'n ai minlut tak mi nini.

³¹Nâivong na ta, nâipasal nei na ta, a riming Jisua ni phuo rang ani.

³²Mi lien nîng a ta, Ânchungtaka Pathien nâi tîng an tih. Pumapa Pathien'n David anghan Rêng minchang a tih.

³³Jakob richingei chung a rêngin om a ta, ânlalna ramin mong tik nei khâi no nih” a tia.

³⁴Hanchu Mary'n vântîrton kôma, “Mahah kho angin mo anithei ranga? dôngmate kêng ka lani hite” a tia.

35Vântîrton han a thuona, “Ratha Inthieng nu chung a juong a ta, Pathien Ratha nu chung a om a tih. Masikin kêng nâite inthieng khom Pathien Nâipasala be ani rang.

36Nu juorpuinu Elizabeth khom aching an iti hah, a tar ok khoma a nâivongna tha ruk ani zoi.

37Asikchu Pathien chu ite a tho theiloi omak”, a ti pea.

38Hanchu, Mary'n, “Pumapa tîrlâmnu ki ni, ni ti lam angtakin ku chung a tung rese,” a tia. Masuole chu vântîrton han ama amâk zoi.

Mary'n Elizabeth ava pan

39Masuole inrangin Mary ânthoka, Judea rama khopui inkhata a se zoia.

40Zakariah ina a lûta, Elizabeth chibai amûka.

41Elizabeth'n Mary chibaimûk a riet lehan a sûnga nâite hah singânsa, Elizabeth Ratha Inthiengin a sipa.

42Hanchu rôl inring takin ânieka, “Nang chu nupang lâia mi satvur tak ni nia, na nâivong rang khom hih satvur ani.

43Ka Pumapa nûn ni na hongpan hih i ang tak mo ai ni zoi hi?

44Nu chibaimûk ki riet lehan ku sûnga nâite râisânin ânchôm ani.

45Pumapa chongbê na chung a tung rang ni iem sikin mi satvur ni ni” a tia.

Mary minpâkna la

46Hanchu Mary'n “ka mulungin Pumapa a minpâka,

47ki ringnân khom Minringpu Pathien chung a râisân ok zoi.

48A tîrlâmnu intem tie a riettik sikin! Atûn renga chu mitinin satvur ni tûng an tih.

49Sinthei Pathien han ku chung a sin lientak a thoa, A riming khom ânthieng ani.

50Ruol athar renga ruol thoithar nôk idênin, Ama mirit ngei chu a moroi ngâia,

51A bân ranak an chung a jâra, Mi inpâk ngei chu an mintuona ngei leh chekaminchâi ngâia.

52An sukmun renga rêng alien ngei a kaisuma, Rangâichîn ngei chu a domsâng zoia.

53Vonchâmngei chu neinun sân a vâi minkhopa,

Ânchongngei chu kut korongin a min rot ngei zoia.

⁵⁴Ei richibulngei kôma a chonginkhâm anghan, A tîrlâm Isrealngei san rangin a juong zoi.

⁵⁵Abraham le a richingei kumkhuon a moroi tie riettitna rangin” a tia.

⁵⁶Mary hah Elizabeth kôm tha thum a oma, hanchu a in tieng a se nôk zoi.

Baptispu John suok roi

⁵⁷Elizabeth nâinei zora ahong chukin chu nâipasal a neia,

⁵⁸A bungmingei le a suongsuokngeiin, Pumapa'n lungkham a mu ok iti an rieta, an râisân puia.

⁵⁹Hanchu, sônriet anîn chu nâite sertan rangin an hong, a pa riming pêlin Zakariah nanâk phuo rang an tia,

⁶⁰Hannisenla, a nûn “nithei nonih, a riming chu John kêng” a tia.

⁶¹Annin, “Hi anga riming hih nin suongsuokngei lâia khom la om ngâi mak” an tipea.

⁶²Maleh a pa kôm han kut leh an chongpuia, nâite riming hah imo ai phuo nuom, tiin an rekela.

⁶³Zakariah'n a miziekna rang neinun a zonga, a riming chu John ani tiin a mizieka; an kamâm sabaka.

⁶⁴Harengan, Zakariah hah a hong chong thei zoia, Pathien a minpâk kelen zoi.

⁶⁵An kôl revêla om ngei murdi'n an chia, ha thurchi hah Judea tângam muntina ânhang zoia.

⁶⁶Ariet nâmin hi nâite hih i ang takin mo a hong ni rang na? Pumapa sinthotheina ranak laka a chung a oma, an tia.

Zakariah chongphuong

⁶⁷John a pa Zakariah hah Ratha Inthiengin a sipa, Pathien chong a phuonga.

⁶⁸“Pumapa, Isreal Pathien chu minpâk ei tih u, A mingei san rangin a juonga, a mojôk ngei zoi.

⁶⁹A tîrlâm David richi renga jôkna riki mi pêk zoi.

⁷⁰Zora sôt tak renga dêipungei kôma a lei khâm anga han,

⁷¹Ei râlungei le mi demngei renga mi mojôka,

⁷²A chongkhâm inthieng ei richibulngei kôma minlang rang ai ti riet titin.

⁷³⁻⁷⁴Ei richibul Abraham kôma a chongkhâm ei râlungei renga mi san minjôka, chi loia a sin ei tho theina rang le,

⁷⁵Ei damsûnga a mitmua inthieng le adika ei om theina rangin.

⁷⁶Nangma ka nâi, Ânchungtaka Dêipu nang tîng an ta, A lampui sin rangin, Pumapa motona sêng ni tih.

⁷⁷A mingei an sietna ngâidama omin, Sanminringna chong ril ni tih.

⁷⁸Ei Pathien chu mi lungkham thei le moroithei ania, Masikin ei rangin sanminringna khuovâr mi minsuok pe a ta;

⁷⁹Thina dâilîm ijîngna nuioa omngei, Invân renga êlminvâr a ta, Ei kalchôina rathangamna lampui tieng mi tuong a tih” a tia.

⁸⁰Hanchu, nâite hah taksa le ratha tieng a hong insôn tira, Isreal mingei lâia ânlar mâka chu ramchâra a om ani.

Luke 2

Jisua suok roi

(Mat 1:18-25)

¹Malâiahan, Rêng Caesar Augustus Rom sorkar ramop murdi riming miziek rangin chong a pêka.

²Hi intelnapui motontak hi syria rama Kuirinius governor chang lâitak ani.

³Mitinin anni khopui chita riming miziek rangin an sea.

⁴⁻⁵Joseph khom David inkuo le a richia mi ani sikin, a lômnu biek Mary inrâidîm lehan Galilee ram Nazareth khopui renga Judea ram, David suokna, Bethlehem khopuia riming miziek rangin an sea.

⁶Hanchu, Bethlehem'a an om lâitakin nâi nei zorân a hong de zoia.

⁷Nâilutîr pasal a neia, puon leh a thoma, khuol tung in an keng khâiloï sikin sa bukhênga a min jâl zoi.

Belrihôngei le vântîrtongei

⁸Ma rama han, belrihôngei jâna an belri ngâkin rajâia an oma.

⁹Pumapa vântîrton a juong inlâra, Pumapa roiinpuina vârin a êla, rolo innîkin an chia.

¹⁰Vântîrtonin, “chi no roi, Thurchisa râisân omtak ninta rang le mitin ta rang ku juong mintung kêng.

¹¹Avien hin David khopuia Minringpu, Pumapa Khrista a suok zoi.

¹²Sîn nin tho theina rang chu, nâitesen, puona thom sakhênga jâlin mûng nin tih”, a tia.

¹³Harengan, vântîrton kôma han, invân râlmingei tamtak an juong oma, Pathien an minpâka.

14“Invân Ânchung taka Pathien Roiinpui rese. Philchunga a râisâna ngei chung a inngêina lêng rese,” an tia.

15Hanchu, vântîrtongeiin an mâk ngei lechu, belrihôngei han, Pumapa'n mi ril, neinun juongtung a en rangin, Bethlehem'a se ei ti u, an tia.

16Hanchu, an se laia, Mary le Joseph le sakhênga jâl nâite hah an va mua.

17Vântîrtonin, nâite chungroi ai rilngei hah belrihôngeiin an ril ngeia,

18a riet ngei murdi'n kamâm a om tatak an tia.

19Mary'n ha chong ngei hah a mulungrîla mindonin a vong tita.

20Vântîrtonin a rilngei lam takin jâttinrêng an va mua, an riet sikin Pathien minpâk pumin an kîr nôk zoi.

Jisua riming an phuo

21 Hanchu sertan rang ni sîn riet a hong chukin chu, sûnga a om lâia vântîrtonin ai phuo sai, a riming, Jisua an phuo zoia.

Jisua Biekina an minlang

22Moses balam chongpêk angin minthieng rang ni ahong chukin chu, Joseph le Mary'n an nâite Pumapa kôma minlang rangin Jerusalem Biekina an hong puia.

23Balam lekhabua, “Nâilutîr pasal kai chu Pumapa ta rang ani,” itia ânziek anghan.

24Pumapa balam anghan vasu bop khat mo, pharvali bop khat mo, an pêk sa rang ani.

25Ma zora han Jerusalema a riming Simeon an ti a oma, ha mi hah mi sa, Pathien minlut mi tak ania, Isreal jôk rang ni ngâkin, a chung a Ratha Inthieng a oma.

26Pumapa chonginkhâm, Messiah a mu mâka thi no nih, itia inkhâm ani.

27Ratha ruoiin Simeon hah Biekina a sea. Balam anga achunga sin rangin a nû le a pa'n nâite Jisua, Biekina an hong puia.

28Simeon'n nâite a poma, Pathien kôm râisânchong a rila;

29“Pumapa, atûn chu no chongkhâm angin, Ni tîrlâm hih rathangamin ni na man se rang ani zoi.

30Ki mit lelên na sanminringna a mu zoi,

31Mitin mu ranga ni mintuo hah.

32Nu lungdo, Jentailngei kôma inlang rang vâr le Ni mi Isrealngei roiinpuina rang chu” a tia.

33Nâite chungroi Simeon'n ai misîr hah a nu le a pa'n an kamâm sabak ani.

³⁴Hanchu Simeon'n, sat a vura, a nu Mary kôma, “Hi nâite hih Pathien ithang, Isreal lâia mi tamtak inmangna rang le jôkna rang ani. Pathien sînthona mi tamtak ngei makhal rang nîng a tih.

³⁵Mi mindonna inthup minlang a ta, khandai angai angin ngâisietnân na mulung sunkhoi a tih,” a tipea.

³⁶⁻³⁷Mahan dêipu meithâi atar inkhat, a riming Anna an ti, Asher rûia mi, Phaniel nâinupang a oma. kum sari vai inneiin a oma, kum sômriet minli meithâiin a oma. Biekin mâk loiin a sùn a jânin bu ngêia Pathien Biekina, chubai thôn a om ngâia.

³⁸Ma zora taka han a hongtunga, Pathien kôm râisânchong a rila, Jerusalem jôkna ranga Pathien lei ngâk ngei kôma khom nâipang Jisua thurchi a misîr pe sa zoi.

Nazareth'a an kîr nôk

³⁹Pumapa balam chongpêka, an thotum an tho zoiin chu Joseph le Mary hah Galilee rama, an khuo Nazareth'a an kîr nôk zoi.

⁴⁰Hanchu, nâite hah a hong liena a hong rât tira, vârnân a sipa, Pathien satvurnangei a chung a oma.

Nâipang Jisua Biekina

⁴¹Kumtin, Jisua nû le pa Kalkân kût mang rangin Jerusalema an se ngâia.

⁴²Jisua hah kum sômleinik a hong nîn chu, kûta an hong se puia.

⁴³Kût aheka anîn chu an juongkîr pui nôka, ania Jisua chu Jerusalema ala châma, a nû le a pa lakin riet mak ngeia.

⁴⁴A lômngei lâia se nîng a tih, tiin an mindona, sînkhata lam an se suoleh, a ruolngei le an sîngsuokngei kâra an rok titira,

⁴⁵anitachu, mu mak ngeia, a rok rangin Jerusalema an kîr nôka.

⁴⁶A sînthum nin chu, Biekina Juda minchupungei kôma insungin, an chong rangai le chong rekelin an va mu zoia.

⁴⁷A vâ taka a chongthuon lam a riet murdi'n an kamâma,

⁴⁸A nû le a pan an va mûn chu an kamâma, a nûn a kôma, “Nâia khoithomo hi anga mi no tho, kângdoi takin na pa leh nang kin lei rok bang kêng ani zoi” a tipea.

⁴⁹“Ithomo minin rok,? Ka Pa ina ko om rang hih nin riet loi mini,”? tiin a thuona.

⁵⁰Hannisenla a thuonna hah a mindona chang riet mak ngeia.

⁵¹Hanchu, an kôm Nazareth'a a sea, an chong jômin a oma, a nûn chu neinun omtie ngei nâm a mulungrîla a vong tit ani.

⁵²Hanchu Jisua hah taksa tieng le vârna tieng a hong insôn tir tira, Pathien le miriem mitlûtin a hong om tir zoi.

Luke 3

Baptispu John tanghâi

(Mat 3:1-8; Mk 1:1-8; Joh 1:19-28)

¹Hanchu, Teberius Caesar Rêng chang a kum sômleirangana, Pontius Pilat Judea rama governor ania, Herod Galilee rama ânlal lâiin, A nâipa Philip, Iturea le Trachonitis rama ânlal lâiin, Abilene rama Lysanias ânlal lâia han,

²Annas le Caiaphas ngei hah Ochai Inlal annia. Ma zora lâia han ramchâra Zakaria nâipasal John kôma Pathien chong a juong tunga.

³Hanchu, John'n Jordan Tuidung pang revêl ramtina a se titira, "Nin sietnagei renga insîr unglâ baptisma chang roi, hanchu Pathien'n nin sietnagei nangni ngâidam a tih" tiin chong a rila.

⁴Dêipu Isaiah lekhabua miziek anghan: "Ramchâra mi inkhat iniek rôl han, Pumapa lampui sin unglâ, a lôna rang, A lampuingei mintûn roi.

⁵Vakuong tin minsip nîng ata, Muol, tang tin mincham nîng atih, Lampui akôi ngei mintûn nîng ata, Lampui anthir ngei minnâm nîng atih.

⁶Hanchu mitinin Pathien sanmingringna mûng an tih."

⁷Hanchu, John kôm baptis chang rangin mipuingei an hong, an kôm, "Murûngei o!, Pathien dûk juong mintung rang renga jôk rangin tumo nangni ril?

⁸Nin sietnagei nin insîr tatak iti nin nunchana minlang roi, Ei richibul Abraham kêng aninga ti khâi no roi, Pathien'n hi lungngei khom hih Abraham richisuonpârngei a minchang thei.

⁹Thingkung tin aruzung idêna phûr rangin reipui a om chit ani zoi. Thingkung tin mara sa ânra loi nâm chu phûrpaia meia pai nîng atih," a tia.

¹⁰Mipuingei han, "Hanchu, Imo kin tho rang ani zoi," an tia.

¹¹Ama'n a thuona, "Kâncholi abop a dônngiin a dônloingei sem unglâ, sâkruo a dônngiin a dônloingei sem ngei roi" a tia.

¹²Sum rusuonpungei senkhat baptisma chang rangin an hong, a kôma, "Minchupu, imo kin tho rang?" an tia.

¹³"Balam pêna chu rusuong no roi" a tia.

¹⁴Râlmingei khom an hong a kôm, “Keinite imo kin tho rang?” an tia. An kôma, “Tute sum rangrâtin lâk no unglâ, dikloiin mi nôn no unglâ, nin loa han nin mulung minchuk roi”, a tia.

¹⁵Mipuingeiin John chungroia sabeina neiin, Messiah ai ni duoi mini tiin an mindona.

¹⁶Hanchu, John'n, “Keiman chu tuiin nangni ka baptis ngâia, keima nêka roiinpui uol mi a juong ani. Keima chu a kekok sût rang luon inhoi mu-ung. Ama han Ratha Inthieng le meiin nangni baptis a tih,” a tipe ngeia.

¹⁷“A jâpna rang relei a chôia, jâp a ta, butak hah sapanga thun a ta, arishi kai chu mei thi ngâiloia hâl minmang a tih”, a tia.

¹⁸An om lam thûlna rang mohôknân lam tamtakin thurchi Sa a ril ngeia.

¹⁹Herod'n neinun tamtak saloi a tho pênah, a nâipa Philip lômnua Herodias lômnua a nei sikin John'n a ngoa.

²⁰Ma nêka saloi uol thôn, Herod'n, John hah intâng ina a khum zoi.

Jisua baptisma a changna

(Mat 3:13-17; Mk 1:9-11)

²¹Hanchu mipui murdi baptisma an chang zoiin, Jisua khom baptisma a changa. Chubai a tho lâitakin, invân ân onga.

²²Pharvali angin, Ratha Inthieng a chung a juongchuma, Invân renga chong ajuon ringa, “Ka nâipasal moroitak ni ni, na chung a ku mulung arâisân ok,” a tia.

Jisua richibulngei

²³Jisua'n a sin a phuta han kum sômthum a nia. Mi mindonin chu Joseph nâipasal ania. Ama hah Heli nâipasal ania,

²⁴Ama hah Mathat nâipasal ania, Ama hah Levi nâipasal ania, Ama hah Melchi nâipasal ania, Ama hah Janna nâipasal ania, Ama hah Joseph nâipasal ani.

²⁵Ama hah Mattathias nâipasal ania, Ama hah Amos nâipasal ania, Ama hah Nahum nâipasal ania, Ama hah Esli nâipasal ania, Ama hah Naggai nâipasal ania,

²⁶Ama hah Maath nâipasal ania, Ama hah Mattathias nâipasal ania, Ama hah Semein nâipasal ania, Ama hah Josech nâipasal ania, Ama hah Joda nâipasal ania,

²⁷Ama hah Joanan nâipasal ania, Ama hah Rhesa nâipasal ania, Ama hah Zerubbabel nâipasal ania, Ama hah Shealtiel nâipasal ania, Ama hah Neri nâipasal ani.

²⁸Ama hah Melchi nâipasal ania, Ama hah Addi nâipasal ania, Ama hah Cosam nâipasal ania, Ama hah Elmadam nâipasal ania, Ama hah Er nâipasal ani.

²⁹Ama hah Joshua nâipasal ania, Ama hah Eliezer nâipasal ania, Ama hah Jorim nâipasal ania, Ama hah Matthat nâipasal ania, Ama hah Levi nâipasal ania,

³⁰Ama hah Simeon nâipasal ania, Ama hah Judah nâipasal ania, Ama hah Joseph nâipasal ania, Ama hah Jonam nâipasal ania, Ama hah Eliakim nâipasal ani.

³¹Ama hah Melea nâipasal ania, Ama hah Menna nâipasal ania, Ama hah Mattatha nâipasal ania, Ama hah Nathan nâipasal ania, Ama hah David nâipasal ani.

³²Ama hah Jesse nâipasal ania, Ama hah Obed nâipasal ania, Ama hah Boaz nâipasal ania, Ama hah Salmon nâipasal ania, Ama hah Nahshon nâipasal ania,

³³Ama hah Aminadab nâipasal, Ama hah Admin nâipasal ania, Amah hah Arni nâipasal ania, Ama hah Hezron nâipasal ania, Ama hah Perez nâipasal ania, Ama hah Judah nâipasal ania,

³⁴Ama hah Jokob nâipasal ania, Ama hah Isaac nâipasal ania, Ama hah Abraham nâipasal ania, Ama hah Terah nâipasal ania, Ama hah Nahor nâipasal ania,

³⁵Ama hah Serug nâipasal ania, Ama hah Reu nâipasal ania, Ama hah Peleg nâipasal ania, Ama hah Eber nâipasal ania, Ama hah Shelah nâipasal ania,

³⁶Ama hah Cainan nâipasal ania, Ama hah Arphaxad nâipasal ania, Ama hah Shem nâipasal ania, Ama hah Noah nâipasal ania, Ama hah Lamech nâipasal ania,

³⁷Ama hah Methusela nâipasal ania, Ama hah Enoch nâipasal ania, Ama hah Jared nâipasal ania, Ama hah Mahalaleel nâipasal ania, Ama hah Kenan nâipasal ania,

³⁸Ama hah Enosh nâipasal ania, Ama hah Seth nâipasal ania, Ama hah Adam nâipasal ania, Ama hah Pathien nâipasal ani.

Luke 4

Jisua'n methêmna a tong roi

(Mat 4:1-11; Mk 1:12,13)

¹Ratha Inthienga sipin, Jisua hah Jordan dung renga a hongkîra, Ratha ruoiin ramchâra han a se zoia.

²Mahan Diabolin, sîn sômminli a methêma, ma zora han ite a sâk loi sikin a von achâm sabak zoia.

³Diabolin, a kôma, "Pathien Nâi ni nîn chu hi lung hih vâipôl manchang roh," a tia.

⁴Jisua'n a thuona, "Pathien lekhabu'n, vâipôl riemin miriem ring thei nonih ati," a tipea.

⁵Hanchu, Diabolin, muol insângpa taka a tuong nôka, rammuol pumpuia rêngramngei phûkhatin a min ena.

⁶A kôma, “Hi ngei chung a rachamneinangei le rochonngei hi nang pêk ki tih, ko kôma ipêk ani zoi, ku nunuom kôm ke pêk thei.

⁷Chubai ni mûk inla anrêngin nang pêk let ki tih,” a tia.

⁸Jisua'n, “Pumapa na Pathien mang chubai mûk inla, ama sin mang tho roh ati,” tiin a thuona.

⁹Hanchu, Diabolin Jerusalema a tuonga, Biekin sîp ânzumna taka a dara, “Pathien Nâi ni nîn chu inchôm roh,

¹⁰Lekhabu'n, Pathien'n a vântîrtonngei nang dom rangin juongtîr a ta,

¹¹an kutin nang dom an ta, ne ke khom lungin inde no tinih ati,” a tipea.

¹²Jisua'n, Lekhabua, “Pumapa na Pathien minsin no roh, ai ti kêng,” tiin a thuona.

¹³A methêmna rang murdia a methêm zoiin chu, Diabolin chuminrên danga rangin a mâk zoi.

Jisua'n Galilee rama sin a phut

(Mat 4:12-17; Mk 1:14,15)

¹⁴Hanchu, Jisua hah Ratha Inthieng sinthotheina neiin Galilee rama a kîr nôka, ha ram sûnga han a thurchi ânthang zoia.

¹⁵Inkhom inngeia mi a minchu ngeia, mi murdi minpâkin a oma.

Nazereth'a Jisua hengpaiin a om

(Mat 13:53-58; Mk 6:1-6)

¹⁶Hanchu, Jisua hah a seilienna khuo Nazereth'a a sea, Sabathnia a tho ngâi lamin Synagog taka a sea, Pathien lekhabu pore rangin ândinga.

¹⁷Dêipu Isaiah lekhabu an pêka, lekha zuot hah a phara, hi miziek omna hih a poreia.

¹⁸“Inriengngei kôma Thurchisa misîr rangin mi thangsuk sikin, Pumapa ratha ka chung a om, Suoka ântâng ngei kôma jôkna chong min phuong rangin ni tîr ani. Mitcho ngei mit vâv nôkna rang le mi nuomlo ngei jôkna rangin,

¹⁹Pumapa'n a mingei an jôkna rang zora a hongtung zoi iti phuonsa rangin,” iti hih.

²⁰Hanchu Jisua'n lekha hah a juota, adarpu a pêka, ânsunga, Inkhom ina mi murdi mit ama chung a korong an ena.

²¹Hanchu an kôma, “Hi lekhabu nin kôma poreia om hih avien hin adikin nin kôma a hongtung zoi,” a tipe ngeia.

²²A chongbâi suok lungkham chong misîrin, an mulungrîl a tôna, kamâm a om an tia, “Hi mi hih Joseph nâipasal nimak mo?” an tia.

²³Hanchu an kôm, nangnin hi chongmintêk, “Doctor, nethenin indam roh, Capernaum'a ni sinthongei, kin lei riet ngei khom hah hin na khuoa hin sin roh, ni la ti ngêt nin tih” a tia.

²⁴Jisua'n, “Adiktakin nangni ki ti, Dêipu, tutên anni khuoa modôm ngâi mak ngei,” a tipe ngeia.

²⁵“Rangâi ta u, hih adik ani, Elijah zora lâiin Isreal rama meithâi tamtak an oma, kumthum in-ang ruo juong loiin a oma, an ram pumpui mâitâm achula.

²⁶Isreal rama meithâi inkhat Sidon rama Zarephath khuomi kôma tiloi chu Elijah hah tute kôma itîr ni mak.

²⁷Dêipu Elisha zora lai khomin Isreal rama mi phâr tamtak an oma, hannisenla, tute dam loiin, Syria rama Naaman mang kêng mindamin a om,” a tia.

²⁸Synagog mipuingei han, a chong hah an rietin chu an ningthik oka,

²⁹an inthoia, an khopui rôlsora namthâk rangin khopui renga an mojôk paia.

³⁰Hannisenla, mipuingei lâi renga a relpaia, a rotpat zoi.

Ratha saloi nei mi

(Mk 1:21-28)

³¹Hanchu, Jisua Galilee rama Capernaum khopuia a sea, Sabathnin mingei a minchua.

³²Rachamnei taka a minchu sikin an kamâm oka.

³³Synagog taka han mi inkhat ramkhorî ratha dôn a oma, rôl inring takin ânieka.

³⁴“O! Nazereth Jisua, Imo lo rang mini ti?, mi minmang ranga hong mo nini? Nang ki riet, Pathien tîrton inthieng nini” a tia.

³⁵Jisua'n, “Dairek inla, a sêng renga hong jôk roh!” a tia. Ramkhorî han an makunga, a minjuon raka, min na loiin a sêng renga a hong jôk zoia.

³⁶An rêngin an kamâma, “Khoi chongbai tak mo ani zoi? roinei le rachamneia ramkhorîngêi chong a pêka an hongjôk hi,” an intia.

³⁷Hanchu ha rama han mun tina Jisua riming ânthang zoia.

Jisua'n Simon tarpi a mindamna

(Mat 8:14,15; Mk 1:29-31)

³⁸Hanchu, Jisua Synagog renga a jôka, Simon ina a sea. Simon tarpi ritun inrik taka nân a lei oma, ama rangin Jisua an ngên pea.

³⁹A kôla avan dinga, a ritun hah a ngoa, a natna, harengan a hong boia, ânthoia anni ngei sin a tho pe ngei zoi.

Jisua'n mi tamtak a mindam

(Mat 8:16-17; Mk 1:32-34)

⁴⁰Hanchu kholoi nisa tak nûkin, natna tin renga damloingei Jisua kôma an hong tuonga, an chung chita a kut a minngama a mindam ngei rieia.

⁴¹Hanchu "Pathien Nâipasal nini," itia iniekin ramkhoringei khom mingei sâng renga an jôkpai zoia, Messiah ani iti an riet sikin, Jisua'n ramkhoringei hah an chong rang phal ngei mak.

Synagog taka Jisua chongril

(Mk 1:35-39)

⁴²Hanchu khuo ahongvârin chu, khopui a mâka mun inthimna a sea, mipuingeiin an roka, an mûn chu, anni mâk loia la châm rangin an pûta.

⁴³Hannisenla, Jisua'n an kôma, "Pathien Rêngram Thurchisa hih khopui adadangei khoma misîr rang piela itîr kêng ki ni," a tipe ngeia.

⁴⁴Hanchu, Galilee rama Synagog tina thurchi a misîr zoi.

Luke 5

Jisua'n ruoisi masa ngei a koina

(Mat 4:18-22; Mk 1:16-20)

¹Sûnkhat chu, Jisua Genesaret dîl rakhama ândinga, mipuingeiin Pathien chong rangai rangin an neng ruruia.

²Tuipanga, ngasûrpungeiin an lèn an rusûk kêra an lei mâk rukuong inik a mua.

³Simon rukuong lelea han a chuonga, a kôm, tuipang renga intôl viet rangin a ngêna, hanchu, rukuonga ânsunga, mipuingei a minchu ngeia.

⁴A chong zoiin chu Simon kôma, "Tui inthûkna tieng rukuong min se inla, nga sûr rangin nin lènngai vôr roi," a tia.

⁵"Pumapa, jân sôt kin vôra ite man makme, nikhomrese, no chongpêkin lènngai vor nôk ki tih," a tia.

⁶Hanchu an vôra anin chu, nga tam sabak an khuma, an lènngai achet vavânga.

⁷Asân rangin rukuong danga an lômngai kutin an jâpa, an hong a rukuong inika a ngim vang dôr an thun minsip ruruoia.

⁸Hanchu, Simon Peter'n neinun omtie a mûn chu, Jisua rukuonga khûkinbilin ânboka, "Pumapa, mi mâksan roh, mi nunsie kêng kin ni," a tia.

⁹Ama le a malngaiin an nga sûr tamrai sikin, an kamâm oka.

¹⁰Simon champui, Zebedee nâingai, Jacob le John khomin kamâm a om an ti saa. Hanchu, Jisua'n Simon kôma, "Chi no roh, atûn renga chu miriem sûr ni tih zoi," a tipea

11An rukuongnei tuipanga an kaisuo, neinin murdi mâk riein Jisua an jûi zoi ani.

Jisua'n miphâr a mindam

(Mat 8:1-4; Mk 1:40-45)

12Voikhat chu, Jisua khopui khata a om lâiin, mi inkhat aphârin atuom a oma, Jisua a mûn chu, a mâiruotin ânboke, “O Pu, nu nuoma anin chu ni na manthieng thei,” tiin a ngêna.

13Jisua'n a kut le a tona, “Ku nuom hong inthieng ta roh,” a tia. Harengan aphâr hah a boipe riei zoia.

14Hanchu, Jisua'n a koma, “Tute ril no roh, ania ochaingei kôm van en inla, mi murdi'n na dam zoi iti an rietna rangin, Moses Balam anghan inbôlna pêk roh,” a tipea.

15Hannisenla, Jisua thurchi ânthang uol uola, a chongril rangai rang le an natnangei mindam rangin mipuingei Jisua koma an hong intûpa.

16Hannisenla mun inthimna a sea ava chubai ngâia.

Jisua'n phalkhatthi a mindam

(Mat 9:1-8; Mk 2:1-12)

17Sûnkhat chu Jisua'n mi a minchua, a kôla Phariseengei le Balam minchupungei an insunga, Galilee le Judea ram khopui renga le Jerusalem renga hong an nia. Mi mindam theina rangin Pumapa Ratha Jisua chung a oma,

18Phalkhatthi inkhat a jâlmun leh an hong rojona, in sunga Jisua makunga se rang an boka.

19Ania, mipui tam sikin lût thei mak ngeia. Masikin, in chung tieng an kal puia, inchung an mo-onga aridîn taka, Jisua makunga a jâlmun leh an juong musuma.

20Hanchu, Jisua'n an taksôn tie a mua, a koma, “Ni sietnangei ngâidam ani zoi,” a tipea.

21Hanchu Balam minchupungei le Phariseengei han, “Ma ang taka Pathien rilminsiet hih tumo ai ni! Pathien mang kêng nunsie ngâidam thei,” anin tia.

22Jisua'n an mindonna a rieta, “Ithomo ma anga nin mindon?”

23Ni sietna ngâidam ani zoi iti le, inthoi inla lôn roh iti hih khomo a ti abai uol?

24Miriam Nâipasal hin rammuola hin nunsie ngâidam theina ranak a dôn iti nangni minlang pe ki tih,” a tipe ngeia. Hanchu, phalkhatthipa koma han, “Inthoi inla nu puonpha lak inla, na ina se ta roh nang ki ti,” a tipea.

25Harengan, an motona ânding lita, a jâlna puonpha a lâka, Pathien minpâk pumin a in tieng a se zoi.

²⁶An rêngin kamâmin an chia, “Avien chu hi ang taka neinun inkhêl ei mu hih,” tiin, Pathien an minpâk zoi.

Jisua'n Levi a koina

(Mat 9:9-13; Mk 2:13-17)

²⁷Masuole chu, Jisua a sea, sumrusuong ngâi a riming Levi Office a insung a mua, Jisua'n a kôma, “Ni jûi roh,” a tipea.

²⁸Hanchu neinun murdi mâkin a jûi zoia.

²⁹Hanchu, Levi'n Jisua rang a ina bukhalai otna a thoa, sumrusuong ngâi mi tamtak le mipuingei a siela.

³⁰Hanchu pharisee senkhat le Balam minchupu senkhat ngeiin Jisua ruoisingei an makhal ngeia, “Ithomo sumrusuong ngâi ngei le nunsaloi ngei leh nin sâka, nin nêk ngâi” an tia.

³¹Jisua'n an kôm, “Mi adam ngeiin doctor nâng ngâi mak ngeia, damloi ngeiin kêng an nâng ngâi.

³²Midik ngei ralam ranga juong ni mu unga, mi nunsie ngei ralam ranga juong kêng ki ni,” tiin a thuon ngeia.

Bungêi chungroia rekeln

(Mat 9:14-17; Mk 2:18-22)

³³Mi senkhatin Jisua kôma, “John ruoisingeiin bungêiin an chubai ngâia, Pharisee ruoisingei khomin ha anga han an tho ngâia, hannisenla, na ruoisingeiin chu ngêi ngâi mak ngeia?” an tia.

³⁴Jisua'n an kôma, “Inneina khuolmingei hah moipumapa an kôm a om kêr chu bu nin min ngêi thei rang mini? Ni thei no nih.

³⁵Hannisenla, an kôm renga moipumapa an tuongpai nikhuo la tung a ta, ha tikin chu la ngêi an tih” tiin a thuona.

³⁶Jisua'n hi khom hih a misîra, “Tutên puon thar khêrin puon muruo chetpho ngâi mak ngei, pho ngân senla, athar han kaiset a ta, puon hâr thar le puon muruo hah imun no nih.

³⁷Tutên uain thar savun ûm muruo thun ngâi mak ngei, thun ngân ta senla, uain thar han savun ûm hah mûtKhoi a ta, inbuokpai a ta, savun ûm khom siet a tih.

³⁸Masikin, uain thar chu savun ûm thara thun an tih.

³⁹Tutên uain muruo nêk nûkin athar nuom ngâi mak, uain muruo asa uol sikin,” a tia.

Luke 6

Sabathni roia chongrekel

(Mat 12:1-8; Mk 2:23-28)

- ¹ Jisua'n Sabath nîn loilâi a pala, a ruoisingeiin buvûi an china, an kutin an muoi minsâia, an sâka.
- ² Pharisee senkhat ngeiin, "Ithomo, ei Balamin Sabathnia tho loi ranga ai ti hah, nin thoa?" tiin an rekela.
- ³ Jisua'n an kôma, "David le a mingeiin an vonchâm lâia an itho hah nin pore ngâi loi mini?"
- ⁴ Pathien Ina a sea, Pathien ranga ipêk, Ochaingei tiloiiin chu tûte sâk rang Balam niloi vâipôl a laka, a sâka, a mingei a minsâk hah?" tiin a thuona.
- ⁵ Hanchu Jisua'n, "Miriem Nâipasal hih Sabathni Pumapa ani" a tipe ngeia.

Miriem kut phalkhatthi

(Mat 12:9-14; Mk 3:1-6)

- ⁶ Hanchu, Sabathni danga chu Jisua Synagog taka a sea, a minchu ngeia, mahan mi inkhat kut changtienga phalkhatthi a oma.
- ⁷ Balam minchupungei senkhat le Pharisee senkhat ngeiin Jisua an nôn theina rang abi rokin Sabathnin a mindam le a mindam loi an enrichika.
- ⁸ Jisua'n an mindonna a rieta, damloi kôma, "Inding inla moton tieng hin hong roh," a tia, hanchu ânthoia ânding zoia.
- ⁹ Hanchu Jisua'n an kôma, "Ei Balamin Sabathnia, asa rangin mo, dûk mintong rangin mo? mi phal. Mi ringna min jôk rangin mo, minmang rangin mo?" a tia.
- ¹⁰ An rêngin a en titira, hanchu, a kôma, "Nu kut phar roh" a tia. A phara, a kut a dam pe zoia.
- ¹¹ Hanchu, an taksi oka, Jisua chung a tho thei rang lam an inkereng zoia.

Jisua'n ruoisi sômleinik a thangsuok

(Mat 10:1-4; Mk 3:13-19)

- ¹² Ma zora han Jisua chubai tho rangin muol chung a sea, mahan, Pathien kôm jânkhovârin chubai a thoa.
- ¹³ Hanchu khuo a hong vârin chu a ruoisingei a koibûma, an lâia mi sômleinik a thanga, Tîrton, ai be ngei chu,
- ¹⁴ Simon (Peter, ai phuo) le a nâipa Andrew; Jacob le John, Philip le Bartholomew,
- ¹⁵ Mathew le Thomas, Alpheaus nâipasal Jacob le Simon (zelot an ti)
- ¹⁶ Jacob nâipasal Judas le a minsûrpu, Judas Iscariot ngei anni.

Jisua a minchuna le a mindamna

(Mat 4:23-25)

17Hanchu, Jisua le tîrtonngei hah muol chung renga an juong chuma, a ruoisi tamtak ngei leh mun inchamna an indinga, ha muna han mipui tamtak Judea ram murdi renga, Jerusalem renga, tuikhanglien pang khopuilienggei, Tyre le Sidon renga mingei an oma.

18A chongril rangâi rang le an natna ngei mindam ranga hong anni. Ratha saloi ngeiin dûk an mintong ngei khom an hong a dama.

19A sinthotheina a jôk sikin, mipui murdi'n ama tôn rangin an bôka, an rêngin an dam pak zoi.

Satvurnangei le ngâisietna

(Mat 5:1-12)

20Jisua'n, a ruoisingei a ena, a tia, "Nangni ânriengngei chu satvur nin ni, Pathien Rêngam nin ta ani sikin.

21Nangni atûna vonchâmnggei, chu satvur nin ni, Nin la khop rang sikin. Nangni atûna a chapnggei, chu satvur nin ni, Nan lân nui rang sikin!"

22 "Miriem Nâipasal sika, mingeiin nangni an mumâka, nangni an henga, nangni an êroa, puoloinggei nangni an ti tena, chu satvur nin ni.

23Ma anghan a hong tungin chu râisânin lâm roi. Invâna, râisânman luttak nin rangin dara a om sikin. Asikchu an richibulnggei khomin dêipungei chung a ma angdên han an lei tho ngâi ani."

24"Ania, nangni atûna ânchongnggei, nin chung ântak, nunkhohoi nin mang zoi sikin!

25Nangni atûna akhopnggei, nin chung ântak, Nan la châm rang sikin! Nangni atûna ânnoi ngei nin chung ântak, Inngûia nan la chap rang sikin!"

26"Mi tinin nangni an minpâk tenan chu nin chung ântak, ha ang dêna han an richibulnggei khomin dêipu dikloinggei an lei manpâk ngâi ani."

Râlنگei lungkham rang roi

(Mat 5:38-48; 7:12)

27"Ke he ariet murdi'n, nan râlنگei lungkham unglâ, nangni mumâk ngei satna rang tho pe ngei roi.

28khomâk nangni sâm ngei satvur unglâ, dûk nangni tho ngei chubai tho pe roi.

29Mîn na mâi a bêna anîn chu, kângkhat tieng khom do pe sa roh, mîn na kâncholi chung a lâka anîn chu asûnga khom pêk sa roh.

30Mîn neinun nang an zonga anîn chu pêk roh, na ta an lâk khomin zong khâi no roh.

31 Nu chung a nuomlam an tho angin mi chung a tho roh.

32 Mi lungkham nangni mu ngei vai lungkham nin mun te, inmo satvarna nan man ranga? mi nunsiengeii luu anni lungkham amu ngei chu anni khomin an lungkham ngâi.

33 Nin chungsa sin sa tho ngei vai chungsa sin sa nin thoa aninte inmo satvarna nin man ranga? Mi nunsiengeiin luu ha anga han chu an tho ngâi.

34 Man nôk ranga na sabei ngei kôma vai ne pêka aninte, inmo satvarna na man ranga,? mi nunsiengeiin luu, abipui man nôkna rangin chu, mi nunsiengei kôma an pêk ngâi

35 Ni thei no nih!, na râl ngei lungkham inla, an satna rang sin pe ngei roh, ite man nôk rangin sabei loiin mintâng ngei roh. Hanchu, râisânman alien man nanta, Ânchungtak Pathien nâingei nîng nin tih. Ama chu râisânna chang riet loi ngei le mi nunsiengei a lungkham ngâi.

36 Nin pa'n mi a lungkham angin nangni khomin lungkham roi.”

Mi chungroi jêk

(Mat 7:1-5)

37 “Midang jêk no unglâ, Pathien'n nangni jêk no nih. Midang dem no unglâ, Pathien'n nangni dem no nih. Mi ngâidam unglâ, Pathien'n nangni ngâidam a tih.

38 Pêk unglâ, hanchu, Pathien'n nangni pêng a tih, mintena sa, namdên êt, le inîkin, min liemin, nin kuta akeng theidôrin nangni pêng a tih. Mi nin minte pena nanâka han Pathien'n nangni minte pênah a tih,” a tia.

39 Jisua'n hi chongmintêk hih a rila, “Mitcho inkhatin mitcho adang ruoi thei mak; a ruoia anîn chu an ruonin khursodopa tâk an tih.

40 Minchupu nêkin ânchûpu lien uol maka, han, ânchupu khom a zoi tikin chu minchupu ang a tih.

41 Ithomo, ni mita thingbong a om mindon bak loia, na lâibungpa mita ronok a om hah ne en?

42 Inmo ni mita thingbong mu loiin, na lâibungpa kôma, ni mita ronok nang lei kêl pe rong ni ti thei ranga? Asarotholngei, Ni mita thingbong kêl bak inla, hanchu, na lâibungpa mita ronok mu minthâr thei ni tih.”

Thingkung le amara

(Mat 7:16-20; 12:33-35)

43 “Thingkung adamin mara saloi inra maka, thingkung damloiin mara sa inra ngâi mak.

44 Thingkung tin an mara chita ei riet; riling rângâ theichang pot ngâi mak chea, riling ranga grape pot ngâi mak che.

⁴⁵Mi sân chu a mulung sũa neinun sa a kelsuo, mi nunsien chu a mulung sũa neinun saloi a kelsuo ngâi, mulung sũa asip hah kêng bâiin a misîrsuok ngâi.”

In sin inik ngei

(Mat 7:24-27)

⁴⁶“Ithomo ko chongbe jôm loa, Pumapa, Pumapa, mi nan ti?

⁴⁷Tukhom ko kôma hong, ko chong rangâia ko chongjôm chu imo ai ang nangni ril ki tih.

⁴⁸Ha mi hah chu a in sin lungpui chung a lungphôm inthûk taka phun ang hah ani. Tuilienin a suka, innîk maka, adet ngita sin ani sikin.

⁴⁹Ania, tutukhom ke he rieta, ko chong jôm loi chu, lungphôm loa in sina, tuilienin asuka, achim kelena, ânphôi chit ang hah ani,” a tia.

Luke 7

Jisua'n Rom râlmi ruoipu tîrlâm a mindam

(Mat 8:5-13)

¹Hanchu, Jisua'n mingei kôma chong a ril zoiin chu Capernaum'a khuoa a sea.

²Rom râlmi ruoipu tîrlâm midit tak dam maka, a thi vavânga.

³Hanchu, Jisua'n thurchi a rieta anin chu a juonga a tîrlâm mindam ranga ngên rangin Juda Upangei a tîra.

⁴Jisua kôma an hong, “Hi mi hih na san thei ruo ani.

⁵Kin mingei lung a min khama, kin synagog khom mi sin pe ani” tiin an ngên rîta.

⁶Hanchu Jisua'n, anni ngei hah a jûi zoia. In a tung rangtôn chu, râlmi ruoipu'n a malngei a tîra, “O pu, intak takin hong no roh, ki ina mini pan rangin inhoi mu-ung.

⁷Mapêna keima ngêt no kôma hong rang khomin inhoi mu-ung. Hê vai minchôi inla ki tîrlâm chu dam a tih.

⁸Keikhom kenêka ulien chong nuoia om ki ni. Ko chong nuoia râlmingei an oma, inkhat kôm, ‘Se roh’ ki tiin a sea, ‘Hong roh’, ki tiin a hong, Ki tîrlâm kôm, ‘Hih sin roh’ ki tiin a sin ngâi” a tia.

⁹Hanchu, Jisua'n a rieta anin chu kamâm aom a tia, mipui ama jûi ngei a en titira, an kôma, “Nangni ki ril, hi angtaka taksônna hi chu Isrealngei lâia lu la mu ngâi mu-ung” a tia.

¹⁰Thangthei ngeiin ruoipu in an hong kîrnôk inchu tîrlâm hah a damin an hong mu zoi.

Jisua'n meithâi nâipasal a kaithoi

- 11**Chomolte suole chu Jisua, Nain khopuia a se zoia, a ruoisingei le mipuingeiin an jûia.
- 12**Hanchu, khopui mokot an tungin chu, mithi an hong rojôna. Ma athipa hah meithâinu nâikhât ania, male A khopuia mi tamtak ngei khom a kôma an oma.
- 13**Hanchu, Pumapa'n ama amûn chu inrieng amu oka, a kôm, “Chap no roh” a tipea.
- 14**Hanchu ava nâia, a tolâi a tôna, a rojôn ngei an inngama, Jisua'n, “Ruotharte, inthoi roh nang ki ti,” a tia.
- 15**Hanchu, mithi hah ânsung lita, a chonga. Hanchu, Jisua'n a nû kôm a pêk nôk zoi.
- 16**An rêngin an chia, Pathien an minpâka, “Ei lâia dêipu roiinpui tak a juong inlanga, a mingei mi minjôk rangin Pathien a juong zoi,” an tia.
- 17**Hi Jisua thurchi hih Judea ram pumpuia le a kôlrevêla ânthang zit zoi.

Baptispu John ruoisingei

(Mat 11:2-19)

- 18**John ruoisingeiin Jisua thurchi John an rila, hanchu a ruoisingei mi inik a koia,
- 19**Pumapa kôm a tîr ngeia, “a juong rang Messiah hah mo ni ni, mo midang kin la tûng rang mo?” itia rekel rangin.
- 20**Hanchu, Jisua kôma an hong, “Baptispu John'n, a juong rangpu hah nini mo, midang kin la tûng rang mo? a ti” tiin an rekela.
- 21**Ma lâitaka han, Jisua'n, mi tamtak damloingei, an natnangei, ramkhori sûrngei a mindam ngeia, mitchongei mit a minvâr pea.
- 22**Hanchu, John ruoisingei kôma, “Se nôk unglâ, John kôma, nin mu ngei le nin riet ngei hah va ril roi, mitchongeiin an mu theia, kholrangei an lôn thei zoi, aphârngei an inthienga, kuorsetngei kuor avâra, mithingei aringin an inthoi nôka, inriengngei kôma Thurchi Sa misîr ani zoi.
- 23**Iem zoiloina nei loi ngei chu satvur anni,” a tipe ngeia.
- 24**John ruoisingei an se zoiin chu, Jisua'n John chungroi mipuingei kôma a misîra. “A kôma ramchâra nin se lâia han imo mu rangin nin sabeï? phâivuon ai sêm sûl innîk ngei mo?”
- 25**Imo a en ranga nin se? Puon innêm insil mi mo? Ha anga insil ngâi ngei le ningnuoma lêng ngei chu rêng inah kêng an om ngâi.
- 26**Ni ril ta u, imo a en ranga nin se? Dêipu na? O, ani, Dêipu nêka lien uol nin mu zoi.

²⁷John hih Pathien lekhabua, ‘Ki tîrton no motona na lampui sin rangin tîr ki tih’, ai ti chu ani.

²⁸Nangni ki ril John hih mi murdi lâia alientak chu ani. Ania, Pathien Rêngrama achîntak khom John nêkin chu a lien uol.”

²⁹ John chongril mipuingeiin an rangâia, aliekin sumrusuong ngâi ngeiin Pathien chong an jôma, a kôma baptisma an changa.

³⁰Ania Balam minchupungei le phariseengeiin chu anta ranga Pathien mintuo an henga, John baptisma khom chang mak ngei.

³¹Jisua'n, “Atûnlâi ruoltoitharngai hih imo an ang? Ilemo ki mintêk rang ani zoi?”

³²Nâipangngei bazar muna insunga, senkhatin inneina berlem nangni kin tum pea, lâm mak cheia, chûlna la kin tho khomin chap mak cheia, itia in hêt inlôm angha anni.

³³Baptispu John a juonga, bungêiin uain khom nêk maka, ramkhorî kêng nin tia.

³⁴Miriam Nâipasal a juonga, a sâkin a nêka, rolruokpa, sumrusuongpungei le mi nungsiengi malpa nin tia.

³⁵A modôm ngei rangin chu, Pathien vârna, chongdik minlangna ani” a tia.

Pharisee Simon ina Jisua

³⁶Pharisee inkhatin Jisua bu nêk rangin a siela, Jisua a sea, bu nêk rangin ânsunga.

³⁷Ma khopuia han nupang inkhat nunsie a oma. Jisua Pharisee ina bu a nêk iti a rietin chu, sariék mirimhoi alabastar bilôr a hongchôia.

³⁸Jisua nûktieng a ke bula ândinga, a chapa, a mitrithîn a kengei a mindûi pea. A samin a kengei a hûia, a ke a tuma, sariék mirimhoi a buoka.

³⁹Pharisee han a mulungrîlin, “Hi mi hih dêipu dik anîn chu, a tônnu, nupang saloi ani tie hih riet a tih” a tia.

⁴⁰Jisua'n a kôma, “Simon, nang ril rang ke nei” a tia. Simon'n, “O, Minchupu ni ril roh” a tia.

⁴¹Jisua'n a kôma, “Mi inikin lâkâi pêk ngâipu kôm sumdâr an intânga, inkhatin razaranga, inkhatin sômrangea.

⁴²An thvon theiloi sikin an ruonin a ngâidam ngeia, a tu han mo lungkham uol nih?” a tia.

⁴³Simon'n a thuona, “Ki iem lamin chu a ngâidam tam uolpu hah” a tia, Jisua'n, “Ni ti mindik” a tipea.

⁴⁴Male chu, nupangnu tieng mâi athaka, Simon kôma, “Hi nupangnu hih nu mu mo? Ni ina ko hong, ka ke rusûkna rang tui ni pêk mak chea, ama'n chu a mit rithîn ke kengei a rusûka, a samin a hûi minhula,

⁴⁵ni tumin ni lei don mak che, ama chu ko hong renga ka kengei a tum bâng mak.

⁴⁶Olive sariiek ku lua buok mak chea, ama'n chu ka kengei sariiek a pol minzo zita.

⁴⁷Masikin nang ki ril, lungkhamna lien a minlang han a nunsiena tamtak ngei hah ngâidam ani zoi, iti a minthâr. Masikin, tukhom ngâidamna chînin chu lungkhamna chîn a minlang” a tia.

⁴⁸Male, Jisua'n nupangnu kôma, “Ni sietnagei ngâidam ani zoi” a tipea.

⁴⁹A kôma insung ngeiin, Hi anga nunsie ngei tena ngâidam thei hih tumo ai ni? anin tia.

⁵⁰Ania, Jisua'n nupangnu kôma, “Na taksônnân nang a sanminjôk zoi, rathanngam takin se ta roh” a tipea.

Luke 8

Jisua jûi nupang senkhatngei

¹Hanchu, môrkhat suole chu, Jisua'n Galilee ram khopuingei le khuongei nâma Pathien Rêngram Thurchi Sa misîrin a chaia. Ruosisi sômleinik ngeiin an jûia.

²Nupang senkhat ramkhorî sûr renga an natnageia a dam, Mary Magdalene, a sûng renga ramkhorî sari a rujûlpai pe,

³Herod office'a sin milien Chuza lômnû Joanna ngei, Susanna ngei, le midang nupang tamtak ngeiin an jûi saa. Hi mingei hin an sumin Jisua le a ruoisingei an san ngei ngâi ani.

Sachi rethepu chongmintêk

(Mat 13:1-9; Mk 4:1-9)

⁴Khopui ankhat renga adanga mipuingei Jisua kôm an hong intûpkhôma, Jisua'n chongmintêkin a ril ngeia.

⁵Mi inkhat a bu rît rangin a loilâia a sea. Sachi a rethea, senkhat lampui kôla achula, vangeiin an sâk ripa.

⁶Senkhat lungpherpha pil chung a achula, a hong mônga, pil an zit loi sikin a rôp nôk ripa.

⁷Senkhat chu riling kêra achula, ahong thuora, rilingin adîp thata.

⁸Senkhat chu pil sana achula, a hong insôna, abâk raza chitin an hong inra zoi. Hanchu hi chongngei hih a rila, Jisua'n, Kuor nin dônin chu rangâi roi, a tipe ngeia.

Chongmintêk mangna abi

(Mat 13:10-17; Mk 4:10-12)

⁹A ruoisingeiin hi chongmintêk omtie, Jisua an rekela.

¹⁰Jisua'n, "Pathien Rêngam chong inthup riettheina nin kôma ipêk ani. Ania midangngei rangin chu, an ena an mu loina rang le an rangâia an rietminthâr loina rangin, chongmintêk vaiin misîr pe rang ani" tiin a thuon ngeia.

Jisua'n sachi rethepu chongmintêk a rilminthâr

(Mat 13:18-23; Mk 4:13-20)

¹¹"Chongmintêk omtie chu hi anghin ani; Sachi chu Pathien chong ani.

¹²Sachi lampui kôla chul chu, chong chu an rieta, ania, an iem loina rang le minringa an om loina rangin Soitanin an chong riet hah an mulungrîl renga a lâk pe ngâia.

¹³Lung chung pila chul chu, an chong riet râisân takin an poma, nikhomrese, an nia han rujung inthuk nei loiin, an chung minsinna a hongtung tena chu an inlet nôk ngâia.

¹⁴Riling kêra chul chu, chong an rieta, aniatachu, hi ringnun hoinhâina le inchongna ngei hin lungkâng a pêka, adîpa, amara reng min phâk ngâi mak.

¹⁵Pil sana chul chu, chong an riet hah mulungrîla asadimin an dara, an jôma, an inra mâka dier ngei hah anni" a tia.

Bêl nuoia châti

(Mk 4:21-25)

¹⁶Tutên châti mochokin bêl nuoia dar ngâi mak ngei, jâlmun nuoia khom dar ngâi mak ngei. A lût murdi'n an mu theina rangin a darna muna kêng an dar ngâi.

¹⁷Ânthup murdi khom tâng minsuok nîng a ta, ihîpa om murdi khom avâra la minlangsuok nîng atih.

¹⁸"Singthei roi, inmo nin rangâi, asikchu, a dônngiei chu bôkpe sa nîng a ta, a dônloi chu a dôn vieta ai mindon te ha khom la lâk pe rip an tih," a tia.

Jisua nû le lâibungngei

(Mat 12:46-50; Mk 3:31-35)

¹⁹Hanchu, a nû le a lâibungngei Jisua kôma an hong, ania mipui sikin a kôma tung thei mak ngeia.

²⁰Mi inkhatin, "Na nû le na lâibungngeiin nang mu nuomin pêntieng an inding" a tipea.

²¹Hanchu, Jisua'n an kôma, “Ka nû le ka lâibungngei chu Pathien chong rangâia a jômngai hih anni” a tia.

Jisua'n phâivuopui a ngôna

(Mat 8:23-27; Mk 4:35-41)

²²Sûnkhat chu Jisua le a ruoisingei rukuonga an chuonga, “Dîl râl tieng son lenkân rei u” a tia, hanchu an inphêta.

²³Hanchu an se lâiin, Jisua chu a ina. Inningloiin phâivuopui a hong thoa, an rukuong tuiin a sip vavânga, rolo innîkin an oma.

²⁴Hanchu, ruoisingei Jisua kôma an sea, an kaithoia, “Minchupu, Minchupu!, kin thi suo rang kêng ani zoi” an tia. Hanchu, Jisua ânthoia, Phâivuopui le tuidârinsok hah chong a pêka, an dâiruom zoia.

²⁵Hanchu, a ruoisingei kôma, “Khonmo, nan taksônna a om?” a tipe ngeia. Kamâmin an chia, Khoi anga miriem mo hi? Phâivuopui le tuidârinsokngai khom chong a pêka a chong an ijôm hi, anin tia.

Jisua'n ramkhori sûr a mindam

(Mat 8:28-34; Mk 5:1-20)

²⁶Hanchu Jisua le a ruoisingei hah Galilee dîl râl, Gerasa, ram an tunga.

²⁷Jisua'n tuiônga a lôn lehan, khopui renga mi inkhat, ramkhori sûr ân tongpuia. Ha mi hah zora sôtak renga, dierboiin, ina khom om ngâi loiin thâna lei om ngâi ania.

²⁸Jisua a mûn chu ânieka, a ke bula ânboika, ânring takin, Jisua Pathien Ânchungtak Nâipasal, imo ni lo rang ni ti? Dûk ni mintong no roh, tiin a ngêna.

²⁹Jisua'n ratha innim hah chong a pêk sika ma angtaika ai ti ani. Vêl tamtak an sûra, lung ina an khum ngâia, a kut le a ke zingjirûiin an khita chu a potsata, ramkhori han ramchâr tieng han a rujûl ngâi ani.

³⁰Jisua'n, “Imo ni riming?” tiin a rekela, “Ki riming chu, Mob” tiin a thuona, a sûnga ramkhori tamtak an lût sikin.

³¹Hanchu, ramkhoringei han, khurmongboia tîr loina rangin Jisua an ngêna.

³²Hanchu, ha muol panga han vok pâl sâk rokin an oma, ramkhoringeiin ha vokngai sûnga lût rangin Jisua an ngêna, a phalpe ngeia.

³³Mipa sûng renga an jôka, vokngai sûnga an lût zoia. Rôlsôr dîl rakhama an tâna, tuia an tâka an thi let zoi.

³⁴Hanchu, vok avâipungei han neinun omtie an rietin chu, an sea khopuia le loia mingai an va ril ngeia.

³⁵Hanchu, neinun omtie en rangin mingei an suoka, Jisua kôm an hongin chu, ramkhorî sÛrpu hah, puon silin, ruthuok kipin Jisua ke bula insungin an mua, an rêngin an chia.

³⁶Hanchu, amu nâmin a dam tie mingei kôma an rila,

³⁷Ha Gerasa rama mingei han an chi sikin Jisua hah an kôm renga rot rangin an ngêna, hanchu Jisua rukuonga a chuonga a mâk ngei zoi.

³⁸Ramkhorî a sÛng renga a jôka a dampu han, Jisua kôm nang jÛi ki tih, a tia.

³⁹Hanniresea, Jisua'n, "Ni ina senla, nu chungu Pathien sintho tie va misÛr roh" a tipea. Hanchu, a sea, khopui sÛng pumpuia a chungu Jisua sintho tie hah a misÛr zoi.

Jairus nâinupang le nupang hulloi a mindam

(Mat 9:18-26; Mk 5:21-43)

⁴⁰Hanchu, Jisua dÛl râl tieng a hongtung nôkin chu, mipuingei ama lei ngak sikin an lei modôma.

⁴¹Ha khuoa synagog ruoipu Jairus a hongu, Jisua ke bula ânboka, a ina se rangin a ngêna.

⁴²A nâikhât nâinupang, kum sômleinik mi, a thi vavâng sikin. Hanchu, Jisua a sên chu mipuingeiin an ûmhura.

⁴³Nupang inkhat kum sômleinik piel, hulloi inrik a oma, ai dôn murdi doctora a thâm let zoia, tute lakin mindam thei mak ngeia.

⁴⁴Mipuingei kêra Jisua nÛktieng a hongu, a puonmor a tôna, harengan a dam kelena.

⁴⁵Jisua'n, "Tumo ni tôn?" a tia. Kei chu ni mu-ung an ti chita. Hanchu Peter'n a kôma, "Minchupu, hi dôra mipuiin nang an uop hite" a tipea.

⁴⁶Ania, Jisua'n "tuminin chu min tôn, Keima renga sinthotheina ajôk" a tia.

⁴⁷Nupangnu ani ti rietsuok ani zoi, ti ânriet tena chu, innÛk pumin mipuingei makunga, Jisua ke bula inbokin, a tôna harengan a dam kelen roi hah misÛr zoi.

⁴⁸Hanchu, Jisua'n a kôma, "Ka nâinupang, na taksônnân nang a mindam zoi, rathanngam takin se ta roh" a tipea.

⁴⁹Jisua'n ha a ti lâitakin, ruoipu in renga thangthei a hongu, Jairus kôma, "Na nâinupang a thi zoi, Minchupu jêl khâi no roh" a tia.

⁵⁰Jisua'n a rieta, Jairus kôma, "Chino roh, iem ngit roh, dam a tih," a tipea.

⁵¹In ava tungin chu Peter, John, Jacob, nâite nÛ le pa pênâ chu tute dang a kôma lÛt phal maka.

⁵²Hataka om murdi nâite chûlin an chapa, Jisua'n, "Chap no roi, athi ni mak, a in kêng" a tia.

⁵³Hanchu, nâite hah a thi ani iti an riet sikin an munuisana.

⁵⁴Hanchu, Jisua'n a kut a sûra, "Ka nâite, hong inthoi roh" a tia.

⁵⁵Hanchu, a ringna a juong kîra, harengan a hon thoia, Jisua'n "sâk rang imokhat pêk roi" a tia.

⁵⁶A nû le a pa'n kamâm om an ti tataka; nikhomrese, Jisua'n chu a sintho hah tute ril loi rangin chong a pêka zoi.

Luke 9

Jisua'n ruoisi sômleinik ngei a tîrsuok

(Mat 10:5-15; Mk 6:7-13)

¹Jisua'n ruoisi sômleinik ngei hah a koibûma, an kôma, ramkhoru rujûlpai theina le natnangei mindam theinangei le rachamneina a pêk ngeia.

²Male chu, Pathien Rêngam thurchi misîr rang le damloingei mindam rangin a tîrsuok ngei zoia.

³Hanchu, an kôma, "Khuolchaina rangin ite chôi no roi, sunrol mo, cholate mo, sum mo, bu mo, kancholi insak mo," a tipe ngeia.

⁴"Nangni an lei modômna ina han, om tit unglâ, ma khopui nin mâk nôk mâka chu.

⁵Mi'n nangni an lei modôm nôncu, anni rilnân nin kea pildi hah khôngpai roi."

⁶Hanchu rouisingei an sea, muntina thurchisa misîrin khuotina an chaia, damloingei an mindam tir zoi.

Herod mulungjîngna roi

(Mat 14:1-12; Mk 6:14-29)

⁷Hanchu Galilee rama roijêkpu, Herod'n neinun omtie ngei a rieta anîn chu a mulung a jînga, senkhatin Baptispu John kêng a ring nôk an tipe sikin,

⁸Senkhatin Elijah kêng a juong inlâr nôk zoi, an ti, senkhatin tienlâia dêipu tumakhat kêng a ring nôk zoi an tia.

⁹Herod'n John lu laka ka tan zoia, hi ang taka thurchi ki riet hih tumo ai ni? tiin Jisua mu rangin a nuoma.

Jisua'n mi isâng rangnga a vâina

(Mat 14:13-21; Mk 6:30-44; Joh 6:1-14)

¹⁰Hanchu, tîrton sômleinik ngei an hongkîr nôkin chu an sin va tho Jisua an rila. Hanchu, a kôm a tuong ngeia, Bethsaida khopuia atheiin a sepui ngei zoi.

11Mipuiin an rietin chu an jûia. A modôm ngeia, Pathien Rêngram thurchi a misîr pe ngeia, mindam anâng ngei kai chu a mindam ngeia.

12Hanchu, kholoji ahong nîn chu, ruoisi sômleinik ngei an hongga, a kôma, “Mipui ngei hih min se ngei ta roh, khopui sûnga le akôlrevêla bu le riamun an man theina rangin, ei omna lak mun inthim kêng ani” an tia.

13Ania Jisua'n an kôma, “Nangnin sâkruo pêk ngei roi” a tipe ngeia. “Annin, vâipôl tâp rangnga le nga inik mang kêng kin nei.

14Hi dôra pasal isâng rangnga sâk rang hih a rochôk rangin kin se rang mini?” tiin an thuona. Hanchu, Jisua'n a ruoisingei kôma, “Mipui hi sômringa ngân abukin min sung ngei roi,” a tia.

15Hanchu, a ruoisingeiin a he bê angin mipui ngei hah an minsung ngeia.

16Hanchu, Jisua'n vâipôl rangnga le nga inik hah a lâka, invân tieng a tanga, Pathien kôm râisânchong a rila, a khoia, hanchu mipui ngei sem rangin a ruoisingei a pêka.

17Hanchu, anrêngin an khop dodôrin an sâk suonûkin, an sâk minieng, tâidôn sômleinik ruoisingeiin an rût minsip ani.

Peter'n Jisua chungroi a phuong

(Mat 16:13-19; Mk 8:27-29)

18Sûnkhat chu, Jisua'n atheiin chubai a thoa, a ruoisingei an hongga, an kôma, “Mipuingeiin tumo min ti ngâi?” tiin a rekela.

19“Senkhatin, ‘Baptispu John’ senkhatin ‘Elijah’, senkhatin tienlâia dêipu tumakhat, a juong nôk nang an ti ngâi,” tiin an thuona.

20Hanchu, “nangnin te tumo minin ti?” tiin a rekel ngeia. Peter'n, “Messiah Pathien na ni” tiin a thuona.

Jisua'n a tuong rang le a thi rang roi a ril

(Mat 16:21-28; Mk 8:30—9:1)

21Hanchu, Jisua'n hi chong hih tute kôma misîr tet loi rangin chong a be ngeia.

22An kôma, “Miriem Nâipasal hi upangei, Ochaisingei, Balam minchupungeiin hengpai an ta, dengmanthei ok an tih. That an ta, ania, sûnthum suole chu a ringin inthoi nôk a tih,” a tia.

23Hanchu an rênga kôma, “Tutu, ni jûi a nuoma anîn chu ama in mingilin, anîngtin a khros ruputin ni jûi rese.

24Tutu, a ringna minjôk a nuom kaiin chu machân a ta, ania, keima sika a ringna machân kaiin ring an tih.

25Mîn rammuol hih apumin nei senla, a theiin inmangin mo, machânin mo om ta senla ata rangin imo ânlap?.

26 Mîn keima le ka thurchi inzakpui chu, Miriem Nâipasal khomin, a roiipuina leh Pa roiipuina leh vântîrton inthieng ngei leh a juong tikin inzakpui a tih.

27 Hitaka senkhat ngei hin Pathien rêngram an mu mâka chu thi noni ngei iti riettit roi” a tia.

Mêl inthûlna

(Mat 17:1-8; Mk 9:2-8)

28 Hi chong a misîr zoia, hapta khat suole chu, Jisua'n Peter, John le Jacob ngei hah muol chung a chubai tho rangin a tuong ngeia.

29 Hanchu, chubai a tho lâitakin a mâi ânthûla, a mêl le a puonsilngei khom avâr intêrrakin a oma.

30 Harengan mi inik an juong oma, an chongpuia, Moses le Elijah an ni.

31 Invân roiinpuinân an juong inlâra, Pathien bôkna len ranga, Jerusalema Jisua thi rang tie an misîra.

32 Peter le a champui ngei chu an inphara, an inthoiiin chu Jisua roiipuina le a kôma mi inik inding ngei an mua.

33 Mingei han Jisua an mak rangtôn chu, Peter'n a kôma, “Hitaka om hi eita rangin asa, puon in inthum nata rang inkhat, Moses rang inkhat le Elijah rang inkhat sin kin tih” a tia. (ha a chong ti hah asadimin riet minthâr mak)

34 A la chong lâitakin sûmin a juong minlia, an chung a sûmin a juong mukhûn chu ruoisingeiin an chia.

35 Sûm renga rôlin, “Ama hih ka Nâipasal ka thangsuok chu ani, a chong rangâi roi” a tia.

36 Rôl amongin chu, Jisua vai a om zoia. ruoisingei han an neinum mu tute ril loiin an ip tita.

Jisua'n ramkhorî sûr nâipang a mindam

(Mat 17:14-18; Mk 9:14-27)

37 Anangtûka Jisua le ruoisi inthum ngei hah muol chung renga an juong chumin chu mipui tamtak ngeiin an lei dona.

38 Hanchu, mipuingei lâia mi inkhatin, “Minchupu, ka nâipasal, ke neisun hi en ta”, tia ngênin ân-ieka.

39 “Ramkhorin a sûra, a minleta, a cherhuon asuoka, a minna, inningloiin a min ieka, a vôr raka darnân a min se ngâia.

40 A rujûlpai rangin nu ruoisingei ke ngên ngei lakin thei mak ngeia” a tia.

41 Jisua'n, “Iemna neiloî le mi puoloingei o! Iten sôt mo nin kôma omin nangni ko donsûi ranga? Na nâipasal hah hin hong tuong roh” a tia.

⁴²Hanchu nâipang hah a hongin chu, ramkhorî han a nîka pila inngil rakin a vora. Jisua'n ramkhorî hah chong a pêka, nâipang hah a mindama, a pa kôma a pêk zoi.

⁴³Pathien sinthotheina roiinpui hah mipui ngei murdi'n an kamâm ok ani.

Jisua'n a thi rang roi a misîr nôkna

(Mat 17:22-23; Mk 9:30-32)

Mipui ngeiin Jisua sinthongei an kamâm lâiin, a ruoisingei kôma,

⁴⁴“Nangni ki ril rang hih mingil no roi, Miriem Nâipasal hih miriemngei kôma ipêk nîng a tih” a tia.

⁴⁵Ania, ruoisingei lakin ai ti omtie hah rietthei mak ngeia. An riet thei loina ranga chong inthup ania, ama laka an chi sikin rekel ngam mak ngeia.

Tumo a lientak?

(Mat 18:1-5; Mk 9:33-37)

⁴⁶ Hanchu, ruoisingei han ei lâia tumo a lien rang tak tiin inkhalna an neia.

⁴⁷Jisua'n an mindonna a rieta, nâipangte a kaia, a kôla a mindinga.

⁴⁸ An kôma, “Tutu, hi nâipangte ki riminga modôm chu, keima ni modôm ani; tutu keima ni modôm chu ni tîrpu modôm ani. Nin lâia a chintak hi a lientak ani”, a tipe ngeia.

Nangni chakal loi chu nan tienga kop ani

(Mk 9:38-40)

⁴⁹John'n, “Minchupu, mi inkhatin ni rimingin, ramkhorî a rujûlpaia, ei pâla mi ani loi sikin, kan khap” a tia.

⁵⁰Jisua'n a kôma le adangngei kôma, “Khap no roi nangni chakal loi chu nin tienga kop ani” a tipe ngeia.

Samari khopui inkhata Jisua an hengpai

⁵¹Jisua invâna a kal rang ni a hong nâia anîn chu, Jerusalema se rangin a mulungin a bôka, a se kelen zoi.

⁵²A motona thangthei a tîra, ata ranga neinuntin lei cherêl rangin Samari khuo inkhata an lûta.

⁵³Ania, Jerusalema se anni iti an rietminthâr sikin lei modôm mak ngeia.

⁵⁴ Hanchu, ruoisi Jacob le John'n an rietin chu a kôma, “Pumapa, anni ngei minmangna rangin Elijah angin invân renga mei koisumna rangin mini nuom mo?” an tia.

⁵⁵ Jisua an tieng ânheia, a ngo ngeia.

⁵⁶Male Jisua le a ruoisingei chu khuo danga an se zoi.

Jisua la jûi rang ngei

(Mat 9:18-22)

⁵⁷Hanchu, lampuia an lôn lâiin, mi inkhatin Jisua kôma, “Na sêna muntina nang jûi ki tih” a tia.

⁵⁸Jisua'n a kôma, “Sialngei'n kuo an dôna, vangeiin rubu an dôna, ania, Miriem Nâipasal chu a lu minngamna rang Luo mun dôn mak” a tipea.

⁵⁹Hanchu midang kôma, “Ni jûi roh” a tipea. Ania ha mi han, “Pumapa, sêng ka ta, ka pa la phûm bak ki tih”, a tia.

⁶⁰Jisua'n a kôma, “A thi ngeiin an mithi champui ngei phûm rese ngei, nang chu sênla, Pathien Rêngram thurchi va misîr roh” a tia.

⁶¹Mi dangin a kôma, “Pumapa, nang jûi ki tih, ania, ki inmingei chong hoiin ni manthân bak roh” a tia.

⁶²Hanchu Jisua'n a kôma, “Tutu, âl kaina taka kut banga, nûk tienga en chu, Pathien Rêngrama ranga mi nithei mak” a tipea.

Luke 10

Jisua'n sômsarileinik ngei a tîrna

¹Masuole chu, Pumapa'n, midang sômsarileinik a thanga, abop abopin an sena rang khopuitina le muntina, ama motona a tîra.

²An kôma, “Bu ât rang atama, ania a mintûp ranga sin rang mi an tôm, Masikin, a bu mintûp ranga sintho rang mi tîr rangin bu pumapa kôm ngên roi.”

³ “Se roi! Melang lâia belrite om anga han nangni ki tîr ani.

⁴Sumkok mo, cholate mo, kekok mo, chôî no roi; lampuia khom tute chibai no roi.

⁵In nin lûtna kipa, ‘Hi ina hin rathanngamna om rese’ ti bak roi.

⁶Rathanngamna midit mi an oma anîn chu nin rathanngamna chibai hah an chung a om a tih; an om nôn chu nin chibai hah lâk kîr nôk roi.

⁷Nin tungna ina han omtit ungla, nangni an pêk murdi sâk ungla, nêk roi, sinthopu chu lo pêk rang ani sikin. In tin lôrdul no roi.

⁸Khopui nin lûta nangni an modôma anîn chu, nangni an pêk kai chu sâk roi.

⁹Ma khuoa damloi ngei mindam ungla, an kôma, ‘Pathien Rêngram nin kôma ajuong nâi zoi’ tipe ngei roi.

¹⁰ Khopui nin lûtna nâm nangni an modôm nôn chu, lampuia jôkpai ungla,

¹¹nin khopuia pildi, kin kea kop tena khom nin chung a kin khôngthâk nôk vang ania, ‘Pathien Rêngram chu nin kôm ajuong nâi zoi!’ tipe ngei roi, a tia.

12 Nangni ki ril, Pathien Roijêk Nikhuo tika chu, ma khopuingei tuong rang nêkin chu, Sodom chu ajâi om uol atih!”

A lemloi khuongei

(Mat 11:20-24)

13 “Korazin, na chungroi arik bah na! Bethsaida, khom na chung roi arik bah na! Nangnia sininkhêl itho ngei hah Tyre le Sydon khuoa tho nisenla chu, thoila puon insilin, pildi inpolin an sietnangei insîr an tih.

14 Roijêk Nîn chu nin tuong rang nêkin Tyre le Sydon chu ajâi om uol an tih.

15 Nangma Capernaum khom, nethenin invân idênin nêp pâk rang mini? Dûkmuna kêng vôrpai na ni rang.”

16 Jisua'n a ruoisingei kôma, “Tutu nin chong rangâi chu ko chong rangâi ani, tutu nangni heng chu ni heng ani, tutu ni heng chu ni tîrpu heng ani,” a tia.

Sômsarileinik ngei hongkîr

17 Hanchu, sômsarileinik ngei hah râisân takin an hong kîra, “Pumapa, ni rimingin ramkhoringei tena kin chong an jôm” an tia.

18 Jisua'n a thvon ngeia, “Soitan, invân renga kôlinlek anga juong tâk ku mu,” a tia.

19 An kôma, “Rangâi roi, murûngei le âinuvet chungâ lôn theina le râlngei roineina chungâ rachamneina nangni ke pêk, itên nangni minna thei noni ngei,” a tia.

20 “Ania ramkhoringeiin nin chong an jôm sikin nan râiminsân no roia, Invâna nin riming mizieka a om sikin nan râiminsân roi” a tipe ngeia.

Jisua râisâna

(Mat 11:25-27; 13:16-17)

21 Ma zora han Jisua Ratha Inthiengin a sipa, “O Pa, invân le pilchung Pumapa, mivâr, mi theithiem ngei kôma ni ip, mi inmôlngei kôma nu phuong sikin nang ki minpâk. Ani, O Pa, maha nu lungdo le na nuomlam tak ani”, a tia.

22 Ka Pa'n neinun murdi ni pêk zoi. Tutên, Pa ti loiin chu Nâipasal riet mak. Tutên Nâipasal ti loiin chu Pa khom riet mak, Nâipasalin ânphuongna ngei tiloiiin chu.

23 Hanchu, Jisua ruoisingei tieng ân heia, inrûkten, “Hi ngei nin mu hih idôra mi satvur mo nin ni!

24 Dêipungei, rêngngei tamtakin nin mu ngei hih mu rang an nuoma chuh mu mak ngei, nin iriet ngei a riet an nuoma chuh riet mak ngei,” a tipe ngeia.

Samari misa Chongmintêk

25 Balam minchupu inkhat Jisua minvak rangin a hongá, a kôma, “Minchupu, Kumtuong ringna ka manna rangin imo ki sin rang?” a tia.

26Jisua'n a thuona, “Lekhabu'n imo ati,? Imo no pore ngâi,?” a tia.

27Hanchu ama'n, “Pumapa na Pathien chu, nu mulung murdi'n, ni ringna murdi'n, na râtna murdi'n ni mindonna murdi'n lungkham roh. Nangma lung nêh kham anghan nu bungmingei lungkham roh ati,” tiin a thuona.

28Jisua'n a kôma, “Ni ti mindik, ha angtak han thô inla, ring ni tih,” a tia.

29Hannisenla, Balam minchupu hah theiintum nuomin, Jisua kôma, “Tumo ku bungngei?” a tia.

30Hanchu, Jisua'n a thuona, “Hanchu voikhat, mi inkhat Jerusalem renga Jericho'a a sea, inru ngei a tonga, an jêmpola, an tôk bita, a thi vângin an mâk raka.

31Hanchu ha lampuia han ochai inkhat a juong sea, ha mi hah a mûn chu lam dang tieng a piela.

32Ma ang nanâk han, Levi mi a juonga, a ena, hanchu lamsîr tieng a piela.

33Hanchu, Samari mi inkhat han ha lampuia lônin a hongá, a mûn chu lungkham a mua.

34A kôm ava pana, a sâbengei sariék le uain a buoka, a thom pea, a sakuording chungá a minchuonga, khuol tung ina a tuonga, a donsûi zoia.

35A nangtûka chu, sum dârník a kelsuoá, khuol tung in enkolpu a pêka, ‘Lei donsûi inla,’ a chungá na thâm kai chu ko hong kîr nôk tika nang thun ki tih” a tia.

36Jisua'n, a kôma, “Inthum ngei lâia han atu tak ha mo inru ngei tongpu bungmi ani ranga ni iem?” a tia.

37Balam minchupu han a kôma, “inriengmupu tak hah” tiin a thuona. Jisua'n, “Sênla, nang khom ha ang tak han tho roh,” a tipea.

Jisua'n Martha le Mary a pan

38 Hanchu, Jisua le a ruoisingei an khuol se nân, khuo inkhata an lûta, nupang a riming Martha a ina a modôm ngeia.

39A juorpuinu riming chu Mary ani, ama han Pumapa ke bula insungin, a chongril a rangâia.

40Ania, Martha chu sinthôn ânpol oka, a hongá, “Pumapa, kênzirpui nûn ke theivaia sintho ranga ni mâkrak hih ni mindon pe mak che mo hi?” ni hong san rangin tipe roh! a tia.

⁴¹Pumapa'n amanu kôma, "Martha, Martha, neinun tamtak ni mindon sika nênjêl kêng.

⁴²Inkhat vai kêng ai nâng, Mary hin neinun dik a thanga, a kôm renga isut nôk rang ni khôi mak," a tipea.

Luke 11

Jisua'n chubai tho a minchûna

(Mat 6:9-13; 7:7-11)

¹Sûnkhat chu Jisua'n, mun inkhata chubai a thoa. A zoiin chu, a ruoisi inkhatin, "Pumapa, John'n a ruoisingei chubai tho a minchu ngei ngâi angin keini khom chubai tho mi minchu roh," a tia.

²Hanchu, Jisua'n an kôma, "Chubai nin thoa anîn chu hi ang hin ti roi: "Kin Pa: Ni riming inthieng mirit om rese; Ne Rêngram juong tung rese.

³Nîngtin kin sâk rang anâng ngei mi pêk roh.

⁴Kin sietnagei mi ngâidam roh, Keini khomin, kin chungsa saloi tho ngei kin ngâidam ngâi sikin, Minsinna intakna mi tuong no roh," a tipe ngeia.

⁵Hanchu, Jisua'n a ruoisingei kôma, "Tumakhatin, jânychima a malpa ina se senla, 'Mal, vâipôl tâpthum ni lei sem roh.

⁶Ka malpa khuola a hongsa, ite man sâk rang lak nei mu-unga!" ti senla.

⁷A malpan in sùng renga, "Ni hong jêl khôi no roh, inkhâr ka kal zoia, ka nâingei leh kin jâl kêng ani zoi. Inthoiin ite nang pêk thei khôi no nîng!" ti ta senla.

⁸Hanchu, a mal ni nia, inthoiin nang a hong pêk no nâka, inzak loia ne ngênrît sikin inthoiin nu nuom dôr nang hong pêk a tih, a tia.

⁹"Masikin nangni ki ti, zong roi, ipêk nîng nin tih, rok roi man nin tih, tôk roi inkhâr mo-ong pe nîng nin tih.

¹⁰Asikchu, tutu a zong kai chu ipêk nîng an ta, a rok kaiin chu man an ta, a tôk kai chu inkhâr mo-ong pe nîng an tih.

¹¹Nangni lâia pangei hin, nin nâingeiin ngâ nangni zong rese ngei, murûl pêk ung mo?

¹²Nôn chu, ârtui nangni zong rese ngei, âinuvet pêk ung mo?

¹³Nangni misaloi ngeiin luu, nin nâingei neinun sa pêkna chang nin rietin te, nin Pa invâna omin vângin chu a nâingei idôra mo Ratha Inthieng ai pêk ok rang na! a zongpu murdi chu" a tia.

Jisua le Beelzebul

(Mat 12:22-30; Mk 3:20-27)

¹⁴Hanchu, Jisua'n ramkhorî chong theiloi inkhat a rujûlpaia, a jôk suole chu miriem chong theiloi hah a chong thei zoia. Mipuingei han an kamâm sabaka.

¹⁵Ania, mi senkhatin chu, ramkhorî rêngpa, Beelzebul kêng, rujûlpai theina ranak a pêk ani, an tia.

¹⁶Senkhatin chu ama min ôkna rangin, Pathien renga sininkhel sin rangin an tia.

¹⁷Ania, Jisua'n an mindonna a rieta, masikin an kôma, "Kho ram khom insena anni le anni indoi kai chu ram an tih, insûngkuo khom anni le anni indoi kai chu inmang an tih.

¹⁸Soitan rêngram khom pâl sinin anni le anni an indoiin te, inmo ânding ranga? Inmo, Beelzebulin rachamneina a pêka ramkhorîngei a rujûlpai ngei ni nan ti thei," a tipe ngeia.

¹⁹Ma anga Beelzebul sika ku rujûlpai ngâi anin le, nin nûkjûi ngeiin tu sikin mo an rujûlpai ngâi? Anni han nin dikloi ani iti nangni an minthâr ani.

²⁰Hanchu, Pathien rachama ramkhorîngei ka rujûlpai ngâi anin chu, Pathien Rêngram nin kôma ajuongtung tatak ani zoi a minthâr ani.

²¹"Mi râtin râlrovo kipa, a in a ngâkin chu, a neinuntin mojôkin a om ngâi.

²²Ania ama nêka rât uolin a hong doia, a menên chu, ân tûngna râlrovo nâm a lâk pea, a neinun ai lâk pe khom a sem minzar ngâi.

²³Tutu keima tienga kop loi kai chu midoi ania, tutu ni mintûp pui loi kai chu a chekminchâi ani".

Ratha saloi hongkîrna roi

(Mat 12:43-45)

²⁴Ratha saloi hah, mi sûng renga a jôkpaia anîn chu, tui boina rama inngam mun rokin a chai titira, a man loi tena chu, "Ki ina kîrnôk ki tih" a tia.

²⁵A hongkîr nôkin chu, in phiet min saia cherêl diem a mua.

²⁶Hanchu a se nôka, ratha saloi dang sari, ama nêka puoloi uol a hong tuonga, an lûta, an om ngâi. Masikin ma miriem omdân anûka hah chu a motona nêkin a siet uol ngâi.

Râisâna dik

²⁷Jisua'n ha chong hah a misîr zoiin chu, mipui lâi renga nupang inkhat a hêta, "Nupang nang a vonga nang a donsûinu chu satvur ani," a tia.

²⁸Jisua'n a thuona, "Pathien chong rieta a jôm ngei chu satvur anni uol," a tipea.

Minsinna an zong

(Mat 12:38-42)

29 Mipuingeiin an ûmhur lâiin Jisua'n, atûnlai mingei hih idôra siet mo anni zoi? Sininkhêl an zonga, hannisenla, Jonah minsinna pênna chu ite minsinna dang ipêk ni no nih.

30 Nineveh, khuo mingei ranga dêipu Jonah minsinna ai ni anga han atûnlai mingei rangin chu, Miriem Nâipasal hih minsinna nîng a tih.

31 Roijêk Nîn chu Thang tienga Rêngnu Sheba lân ding a ta, atûnlai mingei theiloimintum a tih. Rêng Solomon vârna rangâi rang pielin ram latak renga a hong sikin. Nangni ki ril Rêng Solomon nêka lien uol hin a om.

32 Roijêk Nîn chu Nineveh mingei khom hong inding an ta, theilo nangni min tum an tih. Jonah chong a rila an sietna renga an insîr sikin. Nangni ki ril Jonah nêka lien uol hin a om, a tia.

Takpuma vâ
(Mat 5:15; 6:22-23)

33 Tutên, châti mockokin, thupin bêl nuoia dar ngâi mak, a darna muna kêng an dar ngâi, mi a lût murdi'n avâr an mu theina rangin.

34 Nin mitngei hi nin takpuma meivâr ang ani. Nin mit avârin chu, nin takpum khom a vâ iema, nin mit a sieta anîn chu nin takpum khom a jîngkhap ani.

35 Masikin, singthei roi, nin vâ ajîng loina rangin.

36 Hanchu, châtiin, nangni ai êlminvâr iem ngâi anga han nin takpum abâk ajîngna boi riekin, nin pumin vâ iem a tih.

Jisua'n Pharisee le Balam minchupungei a ngonna
(Mat 23:1-36; Mk 12:38-40)

37 Hanchu, Jisua a chong zoiin chu, Pharisee inkhatin ama leh bu nêk rangin a siela, male a sea, bu nêk rangin ânsunga.

38 Pharisee han, Jisua kut rusûk loia khalâi a ot a mûn chu a kamâm oka.

39 Hanchu, Pumapa'n a kôma, "Nangni Phariseengei, kilât le bukhêng apêntieng nin minsâia, ania, nin sûng tieng chu huongna le sietna sip ani.

40 Mo ngei, apêntienga sinpu, Pathien'n asûng tieng khom ai sin nimak mo?

41 Ni kilât le bukhênga om hah inriengngei pêk inla hanchu, neinuntin inthieng let a tih."

42 "Nangni Phariseengei nin chung ântak bah na! nin neinun manvâng, lêngmesêr, chimu murdi, sômakhat Pathien nin pêka, hannisenla, indikna le lungkhamna chu nin seleta, ha tak hah kêng nin sintum, adangngei khom selet uol loiin.

43 Nangni Phariseengei nin chung ântak bah na! Inkhom ina sukmun asa nin midita, bazar muna mingei nangni an jâ nin rangâi minluta.

⁴⁴Nin chung ântak bah na! Thân muruo sînholoi mîn riet loia a chung a an lôn ang hah nin ni,” a tia.

⁴⁵Hanchu, Balam minchupu lâia inkhatin, a kôma, “Minchupu, ma ni ti hah keini khom mi na êrona kêng” a tia.

⁴⁶Jisua'n a thuona, “Nangni, Balam minchupungei khom nin chung ântak, mi chung a pêl ântak, puok rik nan bâng a, a pêlpui rangin chu nin kutmitin le luotôn mak chei.

⁴⁷Nin chung ântak bah na!, nin richibul ngeiin an ithat dêipungei thân nin sinsiema.

⁴⁸Nin richibul ngeiin dêipungei an lei that hah nangnin khom nin pompui minennân an thânngei nin sinsiema.

⁴⁹Masikin, Pathien vârnân, Dêipungei le Thangtheingei tîr ka ta, senkhatngei that an ta, senkhatngei dûk mintong an tih,” a tia.

⁵⁰Masikin rammuol insieng renga dêipungei an lei that sîkin, atûnlâi mingei hih dûk mintong nîng an tih.

⁵¹Abel an that renga Zakariah dênin, ama vâng chu mâichâm le Muninthieng kêra that ani. Nangni ki ti, masak piela han atûnlâi mingei dûk mintong nîng an tih.

⁵²Balam minchupungei khom nin chung ântak bah na! Rietna inkhâr in onga chabi nin vonga, nangni lak lût no tunuia, a lût rang a nuomngei tena nin khapa.

⁵³Hanchu, Jisua'n ha mun a mâkin chu, Balam minchupungei le Phariseengeiin an dema chong rekel tamtak an rekela.

⁵⁴Thuonna minchâi a neia sîr theina rangin an muruong chien ani.

Luke 12

Asarotholngei renga intûngna

(Mat 10:26-27)

¹Mipui isâng tamtak, inkhat le inkhat insirpolin Jisua an bôma. Jisua'n a ruoisingei kôma, “Pharisee asarotholngei chol renga singthei roi.

²Jâtin ihîpa om la phong nîng a tih, a ipa om khom la phuongsuok nîng a tih.

³Masikin, ajînga nin ti ngei hah sîn khovâra lân phuong nîng a ta, khâtan sînga kuor kunga nin ti ngei hah inchunga chuongin tânghai la nîng a tih,” a tipe ngeia.

Tumo a chiruo

(Mat 10:28-31)

⁴Ka malngei nangni ki ril, ei takpum that suonûka, ite mi lo thei khâiloi chu chi no roi.

⁵Tumo nin chiruo nangni ril ki tih. Thi nûk khoma, dûkmuna nangni pai theina rachamnei ani sikin, Pathien chi roi, ani, nangni ki ti, Ama vai chi roi.

⁶Invate rangnga poisa nikin an juor ngâi ni mak mo? Ania, Pathien'n chu inkhat te lu hah mingil ngâi mak.

⁷Nin lu chungu nin samngei tena khom itelvar kêng. Masikin, chi no roi, invate tamtak nêkin nin lut uol.

Khrista phuongna le hengpaina

(Mat 10:32-33; 10:19-20)

⁸“Nangni ki ril, tutu lôko rieta ni thop kai chu, Miriem Nâipasal khomin Pathien vântîrtonngei makunga thop a tih.

⁹Tutu lôko rieta ni hengpai kaichu, Miriem Nâipasal khomin vântîrtonngei makunga hengpai a tih.

¹⁰Tutu Miriem Nâipasal rilsiet chu ngâidam nîng a ta, Ratha Inthieng rilsiet chu ngâidam nino nih.”

¹¹ “Hanchu, nin roi jêk rangin synagog mo, governor makunga mo, roijêkpungei makunga mo, nangni an tuong tikin, inmo ki thvon rang, imo ki ti rang, tiin nin mulung min jîng no roi.

¹²Nin ti rang chu a zora tika Ratha Inthiengin nangni ril a tih.”

Amo aneipa chongmintêk

¹³Mipui lâia mi inkhatin Jisua kôma, “Minchupu, Ka lâibungpa kôm, kin pa rochon mi mâk pe mi sem rangin tipe roh,” a tia.

¹⁴Jisua'n a thuona, “Mala, nangni inik chungroi jêk rang le nin rochon sem rangin tumo roineina mi pêk?” a tia.

¹⁵Hanchu, an rênga kôma, “Singthei roi, ôinangei murdi renga indîn thei roi, asikchu, rochon, neinangei hih miriem ringna abitak nimak, idôr khom nei resea”, a tipe ngei.

¹⁶Male, Jisua'n hi chongmintêk hih a ril ngeia, “Mi aneipa inkhat hin a loia chimu tamtak a minvânga,

¹⁷Inmo ko tho rang ani zoi, o, ka bu le bâl darna rang dôn khâi mu-ung hi,” tiin a mindona.

¹⁸Hi anghin tho ki tih, ka sasier set ka ta, anêka lien uol sin ki tih, mahan ke neinun murdi dar ki tih.

¹⁹Maleh, ka ratha kôma, “Ratha, kum tamtak rang neinun sa nu bûm zoi sikin, sâk inla nêk roh, ningbei riemin om roh tipe ki tih” a tia.

²⁰Ania, Pathien'n a kôma, “Amo, avien jân reng ni ringna aboi rang kêng ani zoi, hi neinun ni isuo ngei hih tuta rang tak mini?” a tipea.

²¹Hanchu Jisua'n, “Pathien tieng nei loa, eini ta rang vaia rochon a bûm chu ha anga han nîng a tih” a tia.

Pathien iem roh

(Mat 6:25-34)

²²Jisua'n a ruoisingei kôma, masikin nangni ki ti, nin taksa sâk nêk rang, nin sil nin bom rang nin kâng mindoi no roi.

²³Sâk nêk rang nêkin ringna alut uol, silbom rang nêkin takpum alut uol.

²⁴Invatengei en ta u, chimu khom tu mak ngei, bu khom ât mak ngei, sasier khom nei mak ngei, hankhoma Pathien'n a vâia, vangei nêkin nin lut uol ok.

²⁵Tumo a kângdoi sika a ringna a min sôt thei uola?

²⁶Ma ngeite luo nin tho thei loiin, imo neinun dang vângte nin kâng nin mindoi?

²⁷Ram pârngei en ta u, sin khom tho mak ngei, puon khom không mak ngei. Ania nangni ki ril, ma dôra anei, rêng Solomon luo han hi pârte hih phâk mak.

²⁸Pathien kêng loisûl puon minsil, sûl aviena oma nangtûka lungthua hâl rip rang. Nangni vâng chu, nangni minsil no ni mo? Nin taksônna achîn bah na!

²⁹Masikin nin sâk nin nêk rang mindonin nin kângmindoi no roi.

³⁰Jentailngeiin ma ang roi chu an mindon ngâi. Nin Pa'n nin inâng chu a riet let.

³¹Manêkin a Rêngram mindon bak unglâ hanchu ha neinunngei ha chu nangni pêng a tih.

Invâna neina

(Mat 6:19-21)

³²“Chi no roi, lôm achînte ngei, nin Pa'n a Rêngram nangni pêk rang a nuom.

³³Nin neinun murdi zuor unglâ, inrieng ngei pêk roi. Sumkok chettheiloia thun unglâ, invâna achiem thei khâiloina ranga, inrungeiin an murûk thei khâiloina, rengên a siet thei khâiloina ranga ninta rangin rochon bûm roi.

³⁴No rochonngei omna kipa nu mulungrîl khom om tit a tih.

Tîrlâm intûngchiena om

³⁵“Nin puon insilin, nin kong khitin, nin châti mochokin, tiklâi khomin intûng chienin om roi,

³⁶tîrlâm, an pu innei ruolhoi renga juong rang lei ngâk chien anghan. A juongleh, inkhâr a tôka mo-ong kelen rangin.,

37Tîrlâm, an pu juonga intûng chiena om ai juong mu chu mi satvur anni. Nang ki ril, a kong khita ta, insung a ta, ngâk a tih.

38Jânchima mo, arkhuona mo, a juonga intûng chiena ai mu ngei chu mi satvur anni.

39Mahih riettiti roi, in pumapa'n inru hong rang riet senla chu a in minset no nih.

40Masikin nangni khom intûng chienin om roi, nin tûng loi lâitakin Miriem Nâipasal juong a tih," a tia.

Tîrlâm iem om le iemomloi

(Mat 24:45-51)

41Peter'n, "Pumapa, hi chongmintêk hih keini rang vai mo ni ti, mi murdi rang mo?" a tia.

42Pumapa'n a thuona, "tîrlâm iem om avâr tak, a pûn a insûng a cherêla, tîrlâm dang ngei azora kipa, an sâk a sem pe ranga uliena ai be chu tumo nini?

43a pu a hong, ha anga lei tho tîrlâm ai mu chu mi satvur ani.

44Adiktakin nangni ki ril, ha tîrlâm tak hah a pun neinun enkolpun sin a tih.

45Hannisenla ha tîrlâm han a mulungin, ku pu la juong vak no nih, tiin a tîrlâmpa ngei, a tîrlâmnu ngei jêm senla, sâkin nêkin lênrûi senla,

46Ha tîrlâm hah ân ningloi, ân tûngloi kârin, a pu juong a ta, tuk nôinek a ta, a iemloi ngei rangtum minchang a tih.

47Tîrlâm a pu nuomlam riet chaka intûng loa, sin nuomloi chu na takin jêmpol nîng a tih.

48Hannirese, riet loi sika, tôkmol sâkna rak tho minchâi chu jâmin jêm nîng a tih. Tutu atam an pêk kôma atam zong an ta, atam uol an ipêk kôma chu atam uol rok an tih.

Jisua insenna abi

(Mat 10:34-36)

49"Pilchung mei leh hâl ranga juong kini, atûn khom kâng kelen tarse ku nuom.

50Baptisma ka chang ranga om hih, ânzoi mâka chu ki ning ânîp bah!

51Rammuola inngeina min lêng ranga juongin mo mi nin tûng? Inngêina min lêng ranga juong ni mu unga, insenna min lêng ranga juong kêng kini.

52Atûn renga insûngkuo inkhata mi rangnga insen an ta, inthum ngeiin inik ngei doi an ta, inik ngeiin inthum ngei doi an tih.

53Pangeiin an nângei, nângeiin an pangei, nungeiin an nâinupangngei, nâinupangngeiin an nungei, tarpingeeiin an moingeei, moingeeiin an tarpingeei doi an tih," a tia.

Zora riettheina

(Mat 16:2-3)

⁵⁴Jisua'n mipui ngei kôma khom, “Nitâk tieng sôm a jînga anîn chu ruo a juong rang kêng nin tia, juong khom a juong ngâi.

⁵⁵Hanchu thîn thi a hong sêma anîn chu alum rang kêng nin tia, alum khom alum ngâi.

⁵⁶Asarotholngei o! phil le invân nin ena, khuo om rang tie nin riet theia, ania, atûnlâi zora om tie ithomo nin riet thei loi?” a tia.

Indoipui leh inngêi rang

(Mat 5:25-26)

⁵⁷“Ithomo nin theiin neinun dik sin rang nin mindon loi?

⁵⁸Mîn roijêkmuna nang an kai rangin chu, ha mi lehhan roijêkmun tung mân inngêina sinpui roh, aninôn chu, roijêkpu makunga nang kai a ta, intâng ina nang khum an tih.

⁵⁹Nang ki ril, poisa apêkte luo ne pêk let mâka chu mahan om ni tih,” a tia.

Luke 13

Nunsiena renga nêi sîr nônchu thi ni tih

¹Ma lâiahan mi senkhatngei an oma, ha ngei han Galilee mingei Pathien kôma an inbôl lâia Pilat'n, mi a that thurchi Jisua an rila.

²Jisua'n a thuona, “Ha anga, ithata an om hah Galilee rama midang ngei nêkin a nunsie uolin nin mindon mo?”

³“Ni tet mak! Nangni ki ril, nangni khom nin sietna nin insîr nônchu, anni ngei angin nin thi var rang.

⁴Mi sômleiriet ngei Siloam in insâng achima athi ngei hah Jerusalema midang ngei murdi nêkin an saloi uolin nin be mo?

⁵Ni tet mak! Nangni ki ril nin sietna nin insîr nônchu anni ngei anghan thîng nin tih,” a tia.

Theichang kung inraloi chongmintêk

⁶Hanchu, Jisua'n hi chongmintêk hih a misîra, “Mi inkhatin a grape ruhuona theichang kung a linga. A mara a juong ena man maka.

⁷Hanchu, ruhuon enkolpu kôma, ‘En roh, kumthum piel hih hi theichang kunga hin amara ku juong roka, inkhat luo man mu-ung.’ Phûrpaï roh, ithomo mun ai luo tit ranga,” a tia.

⁸Ania ruhuon enkolpu han, “O pu, kumkhat mamang la om hi rese, a revêl tuk ka ta, a urna rangin vur ki tih.

⁹Nakuma ânran chu sa ok a ta, ânra nôn chu phûrpaï roh” tiin a thuona.

Sabathni nupang kholra a mindam

¹⁰Sabathni voikhat chu Jisua'n, synagog ina a minchua.

¹¹Ramkhorï sûr nupang inkhat kum sômleiriet damloi a oma, inkona injîk thei loi ani.

¹²Hanchu, Jisua'n a mûn chu a koia, “Nuvengtenu na natna renga no jôk zoi” a tipea.

¹³A chungu a kut a minngama, harengan ân jîkzata, Pathien a minpâk zoi.

¹⁴ Hanchu, Jisua'n Sabathnîn mi a mindam sikin synagog taka ulienpu a ning a thika, mipui ngei kôma, “Sûnruk sin ei thona rang a om, ha nia han hong unglâ dam roi, Sabathnîn chu ni no rese” a tia.

¹⁵Pumapa'n a thuona, “Nangni, asarotholngei, nin serâtchal mo, nin sakuording mo, Sabathnin sûtin tui min nêk rangin nin tuong ngâi ni mak mo?”

¹⁶Hi nupang, Abraham jâisuon, kum sômleiriet, satanin ai khith hih, Sabathnin min jôk rang ni mak mo?” a tia.

¹⁷A chongthuon han a râlngei mâimôk an tonga, mipui lakin a sininkhêl sin sikin an râisâna.

Ancham ru chongmintêk

(Mat 13:31-32; Mk 4:30-32)

¹⁸Jisua'n a rekela, “Pathien Rêngram hih imo ai ang? Ileh mo ki mintêk rang?”

¹⁹Ancham ru, mi inkhatin a lâka loilâia a tua. A kung ahonn insôna, thingkung ahong changa, a machangngeia han vangeiin rubu an phan anghan ani” a tia.

Chol chongmintêk

(Mat 13:33)

²⁰Jisua'n a rekel nôka, “Ileh mo Pathien Rêngram ki mintêk rang ani zoi?”

²¹Nupang inkhat chol a lâka, vâipôl, liter sômminli leh a minpola ahoi mâka tâidôna ai bil angha ani” a tia.

Inkot in-ep

(Mat 7:13-14; 14:21-23)

²²Jisua'n Jerusalema a se malamin, khopuingei le khuotengeia mi a minchu ngeia.

²³Tumakhatin, O pu, mi tômtê vai mo sanminjôka om rang? tiin a rekela.

²⁴Jisua'n a thuona, “Inkot in-epa lût rang ranak song roi, mi tamtakin bôk an ta chu lût thei no ni ngei.

²⁵A in pumapa ânthoia inkhâr akal suole chu, pêntieng indingin inkhâr tôk nin ta, 'A pumapa, inkhâr mi mo-ong pe roh' tîng nin ta, ama lakin, 'Khotienga mi mo nin ni, nangni riet mu-ung, ko kôm renga rotpai roi,' nangni tîng a tih.

²⁶Maleh, nangnin, munkhatin ei sâka, ei nêka, kin khopuia khom mi ni minchu ngâi duo! la tîng nin tih."

²⁷Nikhomrese, ama han, "Khotienga mi mo nin ni, nangni riet ngâi mu-ung, Ko kôm renga rotpai roi, mipuoloi ngei nangni ti nôk a tih."

²⁸"Ipaia nin om tikin chu chapin, hâ riel nin ta, Abraham ngei Isaac ngei, Jokob ngei le dêipungei murdi chu Pathien Rêngrama omin mûng nin tih.

²⁹Mingei sak le thang, sim le mâr renga hongin Pathien Rêngram ruolhoia insung an tih.

³⁰Hanchu atûna nûktak ânta ngei khom hih motontak la nîng an ta, motontak ngei khom nûktak la nîng an tih," a tia.

Jisua'n Jerusalem a châ

(Mat 23:37-39)

³¹Ha lâitaka han, Pharisee senkhat an hongga, Jisua kôma, "Jôk inla hi mun renga hih mun danga rot ta roh, Herod'n nang that rang ai ti kêng," an tipea.

³²Jisua'n, "Se unglâ ha sial hah varil roi, avien, nangtûk ramkhorî rujûlpai ka ta, a sûnthum nîn ki sin zoi ki tih."

³³Ikhomnisenla, avien, nangtûk, hatûk ke se tit rang ani, Jerusalem pêntieng dêipu that ngâi ni mak an tia.

³⁴"O, Jerusalem, Jerusalem! Dêipungei thatpu, no kôma Pathien'n a hongtîr ngei lung leh dêng thatpu, ârpuinûn a mantha nuoia ate ngei ai op ngâi anghan, voizet mo nang opbûm rang ko bôk zoi, ania nuom mak che.

³⁵Masikin, Pumapa rîminga hong chu 'Pathien'n satvur rese' nin ti mâka chu nin Biekin ram a ta, ni mu nôk khâi no tunui," a tia.

Luke 14

Jisua'n mi inthing a mindam

¹Sabathni voikhat chu, Pharisee ulien inkhat ina Jisua bu nêk rangin a siela, mîn an enrichika.

²Mi inkhat a ke, a bângei inthing, Jisua kôma a hongga.

³Jisua'n, Balam minchupungei le Phariseengei kôma, "Ei Balamîn Sabathni mi mindam a phal mo, phal mak mo?" tiin a rekel ngeia.

⁴Hanchu an dâireka, Jisua'n damloi hah a sûra, a mindama, a min se zoia.

⁵Hanchu, Jisua'n an kôma, tumakhatin a nâipasal mo, a seratchal mo, Sabathnin tuikhura tâk senla, Sabathni nikhomrese, kelsuo kelen no tunui mo? a tia.

⁶Hannisenla ha chong hah tutên thuon thei mak ngei.

Nunnêmna le midontheina

⁷An mi siel ngei mi senkhatin sukmun asa an thang, a mûn chu Jisua'n hi chongmintêk hih a ril ngeia.

⁸“Mîn inneina ruolhoia nangni an sielin, sukmun asana insung no roi.” nin nêka mi lien uol an sielin chu,

⁹in pumapa no kôma hongin, “Ama hi mun ot roh” tîng a ta mâimôk takin mun innuoina insung ni tih.

¹⁰Manêk han, nang an siela anîn chu mun innuoina insung inla, a pumapa hong a ta, no kôma, “Mala, mun asana hong insung roh tîng a ta, hanchu, khuolmingei makunga mirit lông ni tih.

¹¹Omlien ngei kai intem an ta, omchîn ngei chu minlutin om an tih,” a tia.

¹²Jisua'n a sielpu kôma khom, “Sûna mo, jâna mo, ruolhoi no tho tikin chu, na malngei mo, na lâibungngei mo, nu sîngsuokngei mo, nu bunga minei ngei mo, siel no roh, nônchu nang siel nôk an ta, nang thuon nôk an tih.

¹³Ruolhoi no thôn chu inriengngei, a ôingei, kholrangei, mitchongei siel roh,

¹⁴nang an thuon theiloï sikin sat nang vur sâng a tih, midikngei inthoi nôk tika Pathien'n nang thuon a tih,” a tipea.

Ruolhoi chongmintêk

(Mat 22:1-10)

¹⁵Hanchu, a khêng otpui inkhatin a chongril a rieta, a kôma, “Pathien Rêngrama ruolhoia insung rang ngei chu idôra râisân a om rang mo na!” a tia.

¹⁶Jisua'n a kôma, “Mi inkhatin ruolhoi roiinpui tak a minsûka, mi tamtak a siela,

¹⁷anêk zora tikin chu a mi siel ngei kôma, ‘Hong ta roi jâttin ânzoi zoi,’ iti rangin a tîrlâm a tîra.

¹⁸Hanchu an rêngin inlêmna an nei chita, A motontak han a kôma, ‘Loi ko rochôka, a en ke se rang, ni muduol roh,’ a tia.

¹⁹Mi dangin, seratchal bop rangnga ko rochôka, a enmindik rangin ke se rang ani, ni lei muduol roh,” a tia.

²⁰Mi dangin, “inkenei suobil kêng ania, masikin hong thei no ning,” a tia.

²¹Ma tîrlâm hah a se sirin chu a pu a rila. A pumapa hah a takasia, a tîrlâm kôm, “Se lalai inla, kotmâingei, lamliennegeia, inriengngei, a ôingei, mitchongei, kholrangei hongtuong ngei roh,” a tia.

22Tîrlâm han a kôma, “O, pu ni ti anghan ko thoa, ania, mun tamtak a la tong” a tia.

23Hanchu a pûn, a tîrlâm kôma han, “Sênla, lamliena, lamkêma mingei, ki in sipna rangin hongtuong lût roh.

24Nang ki ril, mi ki siel ngei han tutên ka ruolhoia sâk noni ngei a ti,” a tia.

Ruosi nina man

(Mat 10:37,38)

25Voikhat chu mipui tampa Jisua leh an inruoia, an tieng ânheia, an kôma,

26“Tutu a nû le a pa, a lômnu le a nâingei, a lâibungngiei le a sarnungei, le ama takpum nêka, lungkham mi mu uol nôncu, ko kôma hongin ku ruosi nithei no nih.

27Tukhom ama khros ruputa mi jûi loipu chu ka ruoisingei nithei no nih”, a tia.

28Tumakhatin in insâng sin rang bôk senla, insungin a sin zoina rang sum a dôn le dônloi mindon bak a tih.

29Lungphûm a phûm suole, zoi thei khâi tano senla, a mu nâmin munuisan an tih.

30A in sin a phut nâka chu, zoi thei khâi mak tîng an tih.

31Hanchu, tu rêng mo, a mi isângsôm leh rêng danga mi isângsômnik leh ama doi ranga juong, a ngam rang le ngamloi rang, insungin a mindon bak loi rang?

32A doi ngamloi rangin chu, alazana an la om lâiin, inngêina sin rangin thangthei tîr a tih.

33Ma anghan, tutu nangni khom a nei murdi a mâk riei nôncu ku ruosi ni thei no tunui.

Michi mangmunboi

(Mat 5:13; Mk 9:50)

34“Michi hi asa, ania, a alna boi ta senla chu, min al nôk thei ni khâi mak.

35Pil rang khomin, ur rang khom sa mak, vôrpai rang vai kêng. Kuor nin dônin chu rangâi roi,” a tia.

Luke 15

Belri in mang chongmintêk

(Mat 18:12-14)

1 Sûnkhat chu sumrusuonpungei mi tamtak le mi nungsiengi Jisua kôm chong rangâi rangin an hong.

²Phariseengei le Balam minchupungeiin, “Hi mi hin, mi nungsiengi a modôma, munkhatin sâk khom an sâkpui ngâi,” tiin an chiera.

³Masikin, Jisua'n hi chongmintêk hih a rila.

⁴Nin kêra inkhatlam hin belri razakhat nei unglâ, inkhat in mang senla imo a tho rang? Sômkuoleikuo hah sûla mâng a ta, ân mang hah aman mâka rok noni mo?

⁵A manin chu râisân takin a dâra hong ruputin a ina hongpui a tih.

⁶Hanchu a ruolngei, a bungmingei koitûp a ta, ke belri in mang ka man nôk zoia, ka râiasân. Masikin, râisâna mi tho pui roi tîng a tih.

⁷Ma anghan, nangni ki ril, mi sômkuoleikuo insîr nâng khâiloi ngei nêkin mi nunsie inkhat insîr sikin invâna râisâna a om uol ngâi.

Sumdâr minmang

⁸Nupang inkhatin sumdâr sôm nei senla, inkhat minmang senla, imo tho ni? Châti mochokin a in phiet a ta, a man nôk mâka takintâi takin rok a tih.

⁹A man nôkin chu a chamnungei le a bungmingei koitûp a ta, an kôma, ku sumdâr minmang ka man nôk zoi ka râiasân, râisâna mi thopui roi tîng a tih.

¹⁰Nangni ki ril, ma anghan mi nunsie inkhat insîr sikin Pathien vântîrtongei an râiasân ngâi.

Nâipasal rotpa

¹¹Jisua'n, “Mi inkhatin nâipasal inik a neia;

¹²nâipang uolin a pa kôma, ‘O, pa rochon ka chang rangtum chu atûn mi pêk ta roh,’ a tia. Hanchu, a rochon hah a nâingei an ruonin a sem pe ngeia.

¹³A nâipang uol han, sûtômte suole chu a changtum murdi a juora a lâk rieia. Hanchu a in mâkin ram lataka a sea, nuomninga omin a sum a hekpe zoia.

¹⁴Hanchu, a sum a hekpe suole chu, ha rama han mâitâm achula, ite sâk rang nei khâi maka.

¹⁵Hanchu, ha rama mi inkhat ava pana, ama han a vokngei enkol rangin a loa a tîra.

¹⁶Vokngei sâk ngâi bê hôkngai sâk rangin a ôi zoia, ania, tutên ama a sâk rang pêk mak ngeia.”

¹⁷“Nangkana, a honng inrietsuok le chu, ‘Ka pa ina inlo mingei bu nêk zoiloi pêna a nei intam tia laka, kei lakate hin vonchâmin ki thi rang na!

¹⁸Inthoi ka ta ka pa kôma se nôk ki tih, a kôma, O pa, Pathien chungâ le nangma chungâ ku nunsie zoi.

- ¹⁹Na nâia be rangin luo chuk khâi mu-ung, no kôma inlo mi inkhat angin mi be ta roh, 'tîng ki tih,' a tia.
- ²⁰"Hanchu ânthoia, a pa kôma a se zoia. Lâtaka a la om lâiin a pa'n a lei mua, lungkham amu oka, a tâna, a kola, a tuma.
- ²¹Hanchu, 'O pa, Pathien chung a le nangma chung a, ku nunsie zoi, na nâia be rangin chuk khâi mu-ung,' a tia.
- ²²Hannisenla a pa'n, a suokngei kôma, Innot takin rovo satak min hak roi, a kutruola kutsabi minbun unglâ, a kea kekok minbun roi.
- ²³Serat tuoi sa tak that unglâ, râisâna ruolhoi sâk ei tih.
- ²⁴Hi ka nâipasal hih, a thia ân thoinôk ani; ân manga man nôk ani," a tia. Hanchu râisâna ruolhoi an phut zoi.
- ²⁵Hanchu a nâi ulien uolpu chu loia a oma, in a hongtung rangin chu, berlem miring le lâm rahang a rieta,
- ²⁶Hanchu tîrlâm inkhat a koia, Imo ani zoi? tiin a rekela.
- ²⁷Hanchu, a kôma, "Na nâipa a hongkîr nôka, nin pa'n a ring a dama amu nôk sikin râisânnân serat tuoi thâitak a thata, ruolhoi a tho ani," a tipea.
- ²⁸Hanchu, a ulienpa chu a taksi sabaka, ina khom lût nuom khâi maka, hanchu a pa a hongsuoka, a methêma.
- ²⁹Ania a pa kôma, "En roh, hi ten kum hih nata rangin tîrlâm sinin ki sina, no chong khom jôm loiin om ngâi mu-ung. Ania imo mini pêk ngâia? Ka malngei leh ruolhoi thona rangin, kêlte luo mi pêk ngâi mak che.
- ³⁰Hannisenla, hi na nâi norchon notizurongi kôma ânchêk suole a hongkîr nôkin chu, serat tuoi thâitak na thatpui," a tia.
- ³¹A pân a kôma, "ka nâipasal ko kôma omtit kêng nini, ki nei murdi hih nata kêng.
- ³²Ania, râisâna ei mang rang kêng ani, na nâipa hih a thia a ring nôk kêng ani, ân manga ei man nôk ani sikin," a tipea.

Luke 16

Sum enkol iemomloi chongmintêk

- ¹Jisua'n a ruoisingei kôma, "Mineipa inkhatin a tîrlâm, a rochon enkolpu a neia, a pu sum ânchêk tiin a pu kôma an nôna.
- ²Masikin a pân a koia a kôma, Nu chung roi ki riet hih inmo ani? Nu sum enkol, a roi an rêngin miziekin mi pêk roh, atûn renga chu sum enkolpu chang thei khâi no tih," a tipea.

³Ha tîrlâm han, “ku pûn ki sinna ni minmâkin imo ki sin rang? pil tuk laka rât mu-unga, kutdo laka kên zaka,” a tia.

⁴Hanchu, ki sin hih ni minmâk tika, malngeiin an ina min man om theina rang chang ki riet zoi, a tia.

⁵Hanchu, a pu sum ântânggei nâm a koia, amotontakpa kôma, “idôrmo nêntâng?” a tia.

⁶Ama han, “Olive sariiek ûm razakhat” a tia. A kôma, “hi nêntângna lekha, thuo inla, sômrangngân miziek roh,” a tipea.

⁷Midang a rekel nôka, nangte idôr mo nêntâng? a tia. “Bu tumbu isângkhat” a tia. “Hi nêntângna lekha, razarietin miziek roh” a tipea.

⁸Hanchu, a pu sum enkolpu dikloi, a milak thei tie ânpâka, avâr nâingei nêkin rammuol nâingei hi atûnlai roia chu an vâr uol, a tia.

⁹Jisua'n, “Nangni ki ril, rammuol rochonin ruol sin no unglâ, aboi tikin kumtuong ina nin om theina rangin,” a tia.

¹⁰Tutu atômte chungâ iemom chu atam chungâ khom iem aom ngâi, tutu atômte chungâ iemomloi chu atam chungâ khom iemom ngâi mak.

¹¹Rammuol rochona luo iem nin om nônte, tumo rochon tak vâng hate nangni minrâk ranga?

¹²Midang ta chungâ luo iem nin om thei nônte, ninta hah tumo nangni pêk ranga?

¹³“Tîrlâm inkhatin pu inik sin tho pe thei no nih. Inkhat heng a ta inkhat midit a tih, nônchu, inkhat sûr a ta, inkhat mathân a tih. Pathien le sum sin minlop thei no tunui,” a tia.

Jisua chongril senkhat

(Mat 11:12-13; 5:31-32; Mk 10:11-12)

¹⁴Hanchu, Pharisee, sum rangâiminlut ngei han a chong murdi an rieta, an chiera.

¹⁵Jisua'n an kôma, “Mi mitmua a dikin nin inlanga, ania, Pathien'n nin mulung a riet. Miriemin neinun aliena ai be hih Pathien mitmûn chu akâmboi ani,” a tia.

¹⁶Moses Balam le dêipungei lekha ngei han Baptispu John tena hah a huoma, masuo renga chu Pathien Rêngram Thurchi Sa an misîra, mitinin rangrâta lût rangin an pût chita.

¹⁷Ania, Balam chong, miziek minhâng chînte boi nêkin invân le pil aboi abai uol.

¹⁸“Tutu a lômnû a mâka, midang a neiin chu a inrê ani, mi imâknu neipu khom a inrê ani.”

Mineipa le Lazarus

- ¹⁹Mineipa inkhat a oma, puon mantam ngei silin nîngtinin hoiinhâia lêngin a om ngâia.
- ²⁰Inrieng inkhat, a riming Lazarus a vun pânin a tuom, mineipa inkot bula an hongtuong ngâi, a oma.
- ²¹Mineipa dosâng nuoia bu ramal tâk nêk rang a nuoma, uingei lakin apân an miliek pe ngâia.
- ²²Inriengte hah a thia, invânram ruolhoia Abraham kôla insung rangin vântûrtonngeiin an tuonga. Mineipa khom a thia an phûma.
- ²³Ithi khuoa ana tuongin a oma, a hong tanga lâtaka Lazarus, Abraham kôla insung a hong mua.
- ²⁴Hanchu ân-ieka, “O pa, Abraham lungkham ni mu inla, Lazarus a kutpâra, tui mindui senla, ke melei mindâi rangin ni juongtîr pe roh, hi meia hin ana ki rietrai zoi sikin,” a tia.
- ²⁵“Ania, Abraham'n, Ka nâipasal, ni ring lâiin, neinunsa murdi na changa, Lazarus rêk chu asaloi murdi ai chang hah riet roh bah, ania atûn ama chu, hoi takin a oma, nang chu ana tuongin no om zoi ani.
- ²⁶Mapêna tutu anuom khomin, hi tieng renga ha tieng inkân thei lolina rang le ha tieng renga hi tieng kânga hôn kân thei lolina rangin ei kâra hin pil achat inthûk a om kêng,” a tia.
- ²⁷Hanchu mineipa han, “O pa, Abraham, Lazarus hah ka pa insûngkuoa ni tîr pe rangin nang ki ngên.
- ²⁸Lâibung rangnga ke neia, hi natna muna an hong lolina rangin ni juong ril pe rese,” a tia.
- ²⁹Abraham'n, “Na lâibungngei ril rang chu Moses le dêipungei an nei mo ka ta, ha ngei chong hah rangâi rese ngei,” a tia.
- ³⁰“Mineipa han, O, pa Abraham, mavai han chu chuk thei no nih, athi renga ânthoi ngei an kôma se vaiin kêng an sietna an insîr rang,” a tia.
- ³¹“Ania, Abraham'n, Moses le dêipungei hê an lâk nônchu, athi renga inthoinôkin se senla ngei khoma, taksôn uol noni ngei,” a tipe.

Luke 17

Inpalna

(Mat 18:6-7; 21:22; Mk 9:42)

- ¹Jisua'n a ruoisingei kôma, inpalna hih omloi thei nimak, ania inpalna min ompu chung chu ântak bah na!

²Hi mi chînte ngei lâia inkhatlam minpal chu, a minpalpu ringa han bunôilung minlîn tuikhangliena vôrpai ni senla, ata rangin sa uol a tih.

³Singthei roi, na lâibungin nunsie a thôn chu ngo roh, ânsîrin chu ngâidam roh.

⁴nu chung a sînkhatin voi sari saloi a thôn, voi sari kênstîr tiin, no kôm a hongin chu, na ngâidam ngêt rang ani.

Taksônna

⁵Ruoisingei han a kôma, “Pumapa, kin taksônna mi min detpe uol roh,” an tia.

⁶Hanchu, Pumapa han, “Ancham ru dôra hih taksônna nin neia anîn chu hi thingtheimu kung hih hong inphôi inla, tuikhangliena hong inphun roh, tîng nin ta nin he rangâi kelen atih,” tiin a thuona.

Tîrlâm sintum

⁷“Hanchu, nin lâia tumakhatin, tîrlâm pil tukin mo, belri hôlin mo, nei unglâ, chuon a hong tungin, ‘Bukhalâi hong ot kelen roh’ tumo a ti rang nin nia?

⁸Manêkin, ‘Ku bukhalâi ni do bak inla, rovo tho inla, ka sâk ke nêk suo mâka ni ngâk roh, masuole nêk ni tih,’ tumo a ti loi ranga?

⁹Suokin chong a jôm sikin tumo râisânchong a ril ngâi?

¹⁰Ma ang tak han, nin sintum nin sin suonûk khomin, tîrlâm papai kêng ei ni, ei sintum ei sin chak kêng nin ti rang ani.”

Jisua'n miphâr sôm a mindam

¹¹Hanchu, Jisua'n Jerusalem a se malamin, Samaria le Galilee kêra ramria a lônâ.

¹²Khuo inkhat a lûtin chu miphâr sômin an intongpuia. Lâtaka an indinga,

¹³an inieka, “Jisua Minchupu, inrieng mi mu roh!” an tia.

¹⁴Jisua'n a mu ngeia an kôma, “Se unglâ, ochangei kôma vân en roi” a tipe ngeia. Lampuia chu an dam zoia.

¹⁵Inkhatin chu a dam zoi iti a rietin chu, rôl inringtakin, Pathien minpâk pumin a hongkîr nôka.

¹⁶Jisua ke bula inbokin râisânchong a rila, ha mi hah Samaria mi ani.

¹⁷Jisua'n, “A damngei hah mi sôm nin nia, adang ikuo ngei hah khonmo an om?”

¹⁸Ithomo hi ramdangmi vai himo Pathien minpâk ranga hongkîr nôk?” a tia.

¹⁹Hanchu, a kôma, “Inthoi inla se ta roh, na taksônna hin nang a mindam ani,” a tipea.

Pathien Rêngam juongtung

(Mat 24:23-28,37-41)

- ²⁰Pharisee senkhat ngeiin Pathien Rêngam juongtung rang roi an rekela, Jisua'n, "Pathien Rêngam chu mu theiin juongtung no nih.
- ²¹Tutên 'En roh,' hin kêng a om, son kêng a om ti no nih. Pathien Rêngam chu nin lâia kêng a om," tiin a thuona.
- ²²Hanchu, a ruoisingei kôma, "Miriem Nâipasal ringlâi sîn hi sînkhata te luonin mu nuom ni, la om a tih; ania mu khâi no tunui."
- ²³Mîn nin kôma, " 'En roh sô soh!', En roh hi hih, tîng an tih, ania, a en rangin vase no roi.
- ²⁴Invâna kôl ânleka, kôlkung renga kôlmong dêna ai vârngâi anghan, Miriem Nâipasal juong ni lechu, nîng a tih.
- ²⁵Ania, ma mâna han tuong ok a ta, atûnlâi mingei hengpaiin om a tih."
- ²⁶Noah zora lâia anghan Miriem Nâipasal zora khom nîng a tih.
- ²⁷Noah, rukuonga a lûta, tuilienin a that riei mâka chu mitinin an sâkin an nêka, nupang pasal omsiet an tho ngâi.
- ²⁸Lot zora anghan mi tinin an sâkin an nêkin, an rochôka, an juora, an linga, in an sin ngâia.
- ²⁹Lot'n Sodom a mâk nin chu mei leh kât invân renga a juonga, a that riei ani.
- ³⁰Ma anghan, Miriem Nâipasal juong inlâr nîn chu juong om a tih.
- ³¹Ha nîn chu inchunga ompûn, a neinun lâk rangin chum no rese. Ha angdênin, loia om khomin a ina hongkîr no rese.
- ³²Lot lômnû riettît ngâi roi.
- ³³Tutu a ringna mojôk rang bôk kaiin machân an ta, a machân kaiin jôk an tih.
- ³⁴Nangni ki ril, ha ni jânin chu, jâlmun khata mi inik jâl an ta, inkhat tuong nîng a ta, inkhat mâk nîng a tih.
- ³⁵Nupang inikin sângsuk an ta, inkhat tuong nîng a ta, inkhat mâk nîng a tih.
- ³⁶Loia mi inik om an ta, inkhat tuong nîng a ta, inkhat mâk nîng a tih, a tia.
- ³⁷Hanchu, ruoisingeiin, "Pumapa khotieng mo?" an tia. Jisua'n, "Ithi ruok omna kipa sêlkurungei intûp an tih," a tia.

Luke 18

Meithâi le roijêkpu chongmintêk

- ¹Hanchu, sabeimindong loia chubai an tho tit rang ani iti rilna rangin hi chongmintêk hih Jisua'n a misîra.

²“Khopui inkhata hin roijêkpu, Pathien khom chiloï, mi lien khom chiloï inkhat a oma.

³Ha khou nanâka han meithâi inkhat a oma, ân dôipui chung a phuba lâk ranga ngênin a se bang ngâia.

⁴Zora sôtzan chu roijêkpu han nuom pe maka, ania nûka a mulungin, ‘Pathien le mi lien chi no khom inlang,

⁵hi meithâi hin chakal ni tho banga, hi anga hin a hong banga anîn chu nûka chu ni la minjêl chit a tih. Masikin a phuba lei luokpui rong,’ a tia.”

⁶Pumapa'n, a chongril ala zoma, “Rangâi ta u, imo ha roijêkpu saloi han ai ti.

⁷Masikin, Pathien'n a mingei sanna ngêna, sântin, jântina chapngai chungroi mindon noni mo? San minnu ni mo?

⁸Nangni ki ril, an nuomnan inrang takin mindon pe a tih. Ania, Miriem Nâipasal a juong tikin rammuola taksônna mu ni mo?” a tia.

Pharisee le sumrusuonpu chongmintêk

⁹Ama le ama ka sa intia, midang esêl ngâi ngei kôma hi chongmintêk hih a misîra.

¹⁰Voikhat chu mi inikin Biekina chubai tho rangin an sea. Inkhat chu Pharisee ania inkhat chu sumrusuonpu ani.

¹¹Pharisee chu athenin ândinga chubai a thoa, “Pathien, kei chu midang ngei angin mi ranghuol ngâi, dikloi, inrê mi khom kini loi sikin, râisânchong ki ril. So, sumrusuonpu anga khom ki niloi sikin râisânchong ki ril.

¹²Hapta tin sûnnik bu ke ngêi ngâia, ke nei murdi a sômakhat nang ke pêk ngâi,” a tia.

¹³Ania, sumrusuonpu chu lâtake indingin, invân tieng luô tang ngam loiin, a rôp ruchumin, “Pathien, mi nunsie ki ni, inrieng ni mu roh,” a tia.

¹⁴Jisua'n nangni ki ril, “Pharisee mi ni loiin, sumrusuonpu chu Pathien mita theiintumin, a in tieng a se zoi. Tutu omlien kaichu intem an ta, intem kaichu minlutin om an tih,” a tia.

Jisua'n nâipangte ngei sat a vut

(Mat 19:13-15; Mk 10:13-16)

¹⁵Mi senkhatin, an nâitengei Jisua kôma, an chung a kut minngam rangin an tuonga. Hanchu, ha anga tho rang hah ruoisingeiin an lei mûn chu an lei ngoa.

¹⁶Hannisenla, Jisua'n nâipangte ngei a kôma a koia, an kôma, “Nâipangte ngei ko kôma hong rese ngei, khap no roi, Pathien Rêngram chu hi anga nâipangte ngei ta kêng.

17Diktakin ki ti, tutu nâipangte'n Pathien Rênggram ai modôm anga modôm loiin chu asûnga lût tet no nih," a tia.

Mineipa

(Mat 19:16-30; Mk 10:17-31)

18Juda ruoipu'n Jisua a rekela, "Minchupu sa, kumtuong ringna ka manna rangin imo ko tho rang?" a tia

19Jisua'n a kôma, "Ithomo asa mini ti? Pathien pênna chu tute misa omak.

20 Chongpêk hah, ni riet duo, Inrê no roh, mi that no roh, inru no roh, dikloiin mi nôno no roh, na nû le na pa mirit roh," a tia.

21Ama han, "Ha chongpêkngai murdi hah chu ka nâipangte lâi renga ko jôm kêng ani" a tia.

22Mahah Jisua'n a riet lehan a kôma, "Neinun inkhat tho rang na la nâng, Ne nei murdi juor inla, asum hah inriengngai sem ngai roh, hanchu, invâna rochon nei ni tih, male chu hong inla ni jûi roh," a tipea.

23Mahah ama'n a riet lehan, ânngûi oka, miriem neipa ani sikin.

24Hanchu, Jisua'n ânngûi a mûn chu, "Minei ngai Pathien Rêngrama lût rang ântak bah na!

25Ut simphuoi kuora lût rang ântak nêkin mineingai invân rêngrama lût rang intak uol a tih," a tia.

26A chongril riet ngai nâmin, "Hanchu tumo sanminjôk nithei ranga?" tiin an rekela.

27Jisua'n, "Miriem ranga nitheilo hih Pathien rangin chu nithei ani," tiin a thuona.

28Male Peter'n a kôma, "En roh! kin inngai mâkin nang kin jûi hih," a tia.

29Jisua'n an kôma, "O, ani, adiktakin nangni ki ril, tutu Pathien Rênggram sika a in mo, a lômnû mo, a nu le pa mo, a lâibungngai mo, a sarnungai mo, a nâingai mo, mâk kai chu,

30anêka tam uolin atûna ringlâi le zora la hong ranga kumtuong ringna khom la man ngêt a tih," a tia.

Jisua'n a thi rang a misîr avoithumna

(Mat 20:17-19; Mk 10:32-34)

31Hanchu ruoisi sômleinik ngai hah Jisua'n atheiin a tuong ngeia an kôma, "Rangâi ta u, Jerusalema ei se rang ania mahan, Miriem Nâipasal chungroi dêipungei lei miziek hah tung a tih.

32Jentailngai kuta pêk an ta, esêl an ta, munuisan an ta, michilkhum an tih.

³³Jêm an ta, that an tih, ania, sûnthum suole aringin inthoi nôk a tih,” a tia.

³⁴Ania, ruoisingei han a chong reng rietthei mak ngeia, a chong ti hah anni rangin chu chong inthup ani sikin Jisua'n imo ai ti riet mak ngei.

Jisua'n kutdo mitcho a mindam

(Mat 20:29-34; Mk 10:46-52)

³⁵Hanchu, Jisua'n Jericho a tung rangin lampui kôla mitcho inkhat ânsunga, kut a doa.

³⁶Mipui rahang a rietin chu, “Imo hi? tiin a rekela.

³⁷“Nazereth Jisua a hongvun ani,” an tipea.

^{38A}nieka, “Jisua! David Nâipasal, inrieng ni mu roh” a tia.

³⁹Moton tienga om mipui ngeiin, “Dâirek roh” tiin an ngoa. Ania ama'n ânring uolin, “David Nâipasal! inrieng mi mu roh,” a tia.

⁴⁰Masikhan Jisua ân ngama, mitcho hah hongtuong rangin chong a pêka. A hongnâia anîn chu Jisua'n a rekela.

⁴¹“Imo nang ki tho pe ranga ni nuom?” a tia. “O pu, amu nôk ku nuom,” tiin a thuona.

⁴²Jisua'n a kôma, “Anîn chu muthei roh, na taksôn nân nang a mindam ani,” a tia.

⁴³Harengan a muthei kelen zoia, Pathien minpâk pumin Jisua a jûi zoia. Mipui ngeiin mahah an mûn chu an rêngin Pathien an minpâk zoi.

Luke 19

Jisua le Zacchaeus

¹Hanchu, Jisua'n Jericho lûtin apala.

²Mahan sumrusuonpungei ulientak a riming Zacchaeus an ti mineipa a oma.

³Jisua hah i-anga mi mini, mu rang a nuoma, ania miriem dungbong ania, mipui tamrai sikin mu thei maka.

⁴Hanchu Jisua'n ma lampui a hongvun rang sikin, mipui moton tieng Jisua mu rangin a tâna, Theichangpui kunga a kala.

⁵Jisua'n ha mun a hong phâka anîn chu a tanga a kôma, “Zacchaeus juong chum lai roh, avien chu ni ina kêng ku tung ngêt rang,” a tia.

⁶Zacchaeus hah innot takin a juong chuma, râisân takin a ina a mintung zoi.

⁷Mipui a mu ngei nâmin an chiera, “Mi nunsie ina kêng tung rangin a se rek zoi so,” an tia.

⁸Hanchu, Zacchaeus ândinga, Pumapa kôma, “Rangâi roh, O Pu! Ke neinun inang ânriengngei pêk ka ta, hanchu tutu, lei huong ta khom inlang, abâk minlîn thuon nôk ki tih,” a tia.

⁹Jisua'n a kôma, “Avien, hi ina hin sanminringna a tung zoi, hi mi khom hih Abraham richi ani sikin.

¹⁰Miriam Nâipasal hih ânmanngnei roka sanminring rang piela juong ani,” a tia.

Rângkachak sumdâr chongmintêk

(Mat 25:14-30)

¹¹Hanchu, ha a chongril an rangâi lâiin Jerusalem anâi zoi sik le Pathien Rêngam juong inlang kelen ranga an sabei sikin chongmintêk a misîra.

¹²Hi chong hih a rila, “Mi lien inkhatin rêng changna roi hong lâka hongkîr nôk rangin ram lâtaka a sea.

¹³A se rangtôn chu a suokngei sôm a koia, rângkachak sumdâr a pêk chita, ‘ko hong nôk mâka lei muphung roi’ a tia.

¹⁴Ania, a ram mingeiin an hengpaia, a nûka palâi an tîra, ‘Hi mi hih kin rêng rangin nuom makme an ti,’” a tia.

¹⁵Hanchu, rêng an minchang zoiin a hongkîr nôka, idodôr mo an lei muphung rekel rangin a suokngei hah a makunga a koitûpa.

¹⁶Amotontakpu a hongga, “O, Pu, mina pêk hah rângkachak sumdâr sômin ku muphung,” a tia.

¹⁷A kôma, “No tho min sa, tîrlâm sa ni ni, neinun tômte chungga iem no om sikin, kholien sôm ngei chungga ulienin nang min chang ki tih,” a tipea.

¹⁸A tîrlâm inikna a hongga a kôma, “O Pu, inkhat mina pêk hah rângkachak sumdâr ranggan ku muphung,” a tia.

¹⁹Hanchu, ama kôma han, “Nang khom khopuilien rangnga ngei chungga ulienin om roh,” a tipea.

²⁰Hanchu, adang a hongga, “O Pu, en ta, na rângkachak sumdâr mi na pêk hah mâihûinân ku sûna ka darchien.

²¹Mi inngar tak nini sikin nang ki chi ani. Na darloi khom na lâka, nu tuloi khom na ât ngâi” a tia.

²²A kôma, tîrlâm saloi ni ni, no chong nanâkin theiloi nang amintum. Mi inngar tak ki nia, ka darloi khom ka lâk ngâia, ku tuloi khom ka ât ngâi ni rieta,

²³anînte, ithomo ku sum hih a pungna ina ne lei dar loi, ko hong nôka hin apung leh ka man rang kêng ani, a tia.

²⁴Hanchu, a kôla inding ngei kôma han, “A rângkachak sumdâr lâk pe unglâ, sôm adônpu pêk roi,” a tia.

²⁵Hanchu, ama'n a kôma, “O Pu, anîn chu rângkachak sumdâr sôm a dôn mo ka ta,” an tia.

²⁶Ama han an kôma, “Nangni ki ril, tutu a nei viet kai chu pêk mintam uol nîng a ta, a nei loi kai chu ai dôn viete khom hah lâk pe rip nîng a tih,” a tia.

²⁷“Hi ka rângei, an rêng ranga minuom loi kai chu hong tuong unglâ ka makunga that roi a ti” a tia.

Jisua Inlal taka Jerusalema a lût

(Mat 21:1-11; Mk 11:1-11; Joh 12:12-19)

²⁸Ma chong hah a misîr zoiin chu Jerusalem panin moton ânsa.

²⁹Bethphage le Bethany khuo kôl Olive muol a tungin chu, an motona a ruoisi inik a tîra,

³⁰“nin motona khuoa son vase unglâ, nin lûtin, tute la chuongna ngâi loi sakuording te inthung mûng nin tih, sût unglâ hin hongkai roi.

³¹Tukhomin ithomo nin sût tiin an rekelin chu, Pumapa'n a nâng ani tipe roi,” a tia.

³²Hanchu, an sea Pumapa'n a ti lam ang takin an va mua,

³³Sakuordingte an sûtin chu a pumangeiin, “Ithomo nin sût?” an tia.

³⁴Hanchu an kôma, “Pumapa'n ai nâng ani,” an tia.

³⁵Sakuording te hah Jisua kôma an kaia, a chungâ an puonngei an dâpa, Jisua an min chuonga.

³⁶A sena rang lampuia khom an puonngei an dâp tira.

³⁷Hanchu, Jerusalem tung ranga Olive muol chum rangin chu a ruoisingeiin a sininkhêl sin an mu sikin rôl inring takin Pathien an minpâka.

³⁸“Pumapa rilinga hong rêngpa chu Pathien'n satvur rese, invâna inngêina lêngin Pathien roiinpui rese,” an tia.

³⁹Mipui lâia Pharisee senkhatin Jisua kôma, “Minchupu, nu ruoisingei dâirek rangin ril roh,” an tia.

⁴⁰Jisua'n an kôma, “Nangni ki ril, hi ngei hih an dâirekin chu, lungngei tena luo an iniek rang ani,” tiin a thuona.

Jisua'n Jerusalem a châna

⁴¹Hanchu, an tung rangtôn chu, khopui hah a mua a châa.

⁴²“Ratha'nngamna chong hih avienni tena luo hin ni riet nita senla chu O! Aniatate mu thei khâi mak chea.

⁴³Zora hongtung a tih, na râlngeiin nu rukul bula pil minpôngin nang huolvêl an ta, kil tina nang khap tit an tih.

⁴⁴Nu rukul sũaga ni mingei le nang minmang chit an tih, nu sũaga lung inchuon reng hôi no ni ngei; nang minring ranga Pathien juonglâi ni riet loi sikin,” a tia.

Jisua Biekina a se

(Mat 21:12-17; Mk 11:15-19; Joh 2:13-22)

⁴⁵Hanchu, Jisua'n Biekina ava lûta, neinun juorngei hah a rujûla.

⁴⁶An kôma, “Lekhabua miziekin Pathien'n, Ki in chu chubai thona in tîng an tih, a tia. Ania nangni rêkin chu inrungei khurin kêng nin sin hi,” a tipe ngeia.

⁴⁷Jisua'n anîngtin Biekina a ril ngei ngâia. Ochaisingei, Balam minchupungei le mipui ruoipungeiin that rang an bôka.

⁴⁸Hannisenla, mipui ngeiin ningsiet taka a chongril an rangâia bâikhat luo minsam rang an nuom ngâiloï sikin, a tho rang lam man mak ngei.

Luke 20

Jisua rachamneina an rekel

(Mat 21:23-27; Mk 11:27-33)

¹Sûnkhat chu Jisua'n Biekina mingei a minchua, Thurchi Sa a misîr pe ngei lâiin, Ochaisingei, Balam minchupungei le upangei an hongga,

²a kôma, “Tu rachamin mo hi sin ngei hih no tho, tumo rachamneina nang a pêk?” miril roh an tipea.

³Jisua'n an kôma, “Kei khom chong inkhat nangni rekel rong. Ni ril roi,

⁴John han, Pathien rachamin mo, miriem rachamin mo mi a Baptis ngâi?” a tia.

⁵An thenin an inkhala, “Imo ie ti rang? Pathien rachamin, ei ti lakin, itho mo John hah nin iem loi? mi tîng a ta.

⁶Miriam rachamin ei ti lakin, hi mipui ngei hin lungin mi dêng an tih, John hah dêipu ani itia an pom sikin, an tia.

⁷Masikin, riet mak meh” tiin an thuona.

⁸Hanchu, Jisua'n an kôma, “kei khomin tu rachamin mo hi sinngai hih ko tho nangni ril uol no ning,” a tia.

Grape ruhuon inlo mingei chongmintêk

(Mat 21:33-46; Mk 12:1-12)

⁹ Jisua'n hi chongmintêk hi mipui ngei a rila, "Mi inkhatin grape ruhuon a thoa, a donsûngei kôma a chuon inlo rangin a pêka, asôtzan va châm rangin ram danga a sea.

¹⁰ Hanchu grape ramal zora a hong nîn chu a changtum lâk rangin a enkolngei kôma a tîrlâm inkhat a tîra. A enkolngeiin, a tîrlâm hah an jêma, kut korongin an min se nôka.

¹¹ Hanchu, tîrlâm dang a tîr nôka, ama khom hah an lei jêma, mâimôk ânsak bita, kut korongin an tîr nôka.

¹² Tîrlâm dang, a inthumna a tîr nôka, ama khom hah an lei mophop nenga, an vôrpaia.

¹³ Masuole chu grape ruhuon pumapa han, 'Inmo ko tho rang ani zoi?' ka nâi moroitak tîr ka ta, ama chu lei jâ ngêt an tih, a tia.

¹⁴ Hannisenla, ruhuon enkolpungei han an lei mu lehan, 'Hi mi hih a pumapa nâi ani. That ei ti u, hanchu a rochon ei ta nîng a tih' tiin an inruola

¹⁵ Hanchu ruhuon pêngtieng an kelsuoa, an that zoia. Jisua'n, 'A pumapa han ruhuon enkolpungei hah imo lo ta nih?' a tia.

¹⁶ "Hong a ta, ha mingei hah that a ta, grape ruhuon hah a enkolpu dangngei pêk a tih," a tia. Ha chong hah an rieta anîn chu, "Madôrpa chu tho noni ngei nga" an tia.

¹⁷ Jisua'n a en ngeia, an kôma, "Lekhabu'n ai ti hih imo atina? In sin ngeiin an hengpai mangmunboia an ibe hah, a kila lung kâmomtak a chang zoi," iti hih.

¹⁸ "Tutu ha lung chung a inpal kai chu koichit an ta, ha lungin a dêng ngei vângchu innôi indichit an tih," a tia.

Chôiruol roia rekelnâ

¹⁹ Balam minchupungei le Ochaisingeiin ma mun renghan Jisua sîr kelen rang an bôka. Hi chongmintêk hih anni demna ani iti an riet sikin. Ania, mipui laka an chia.

²⁰ Masikin chuminrên an roka, isûra, racham le ranak dônpu Rom Governor kuta an pêk theina rangin mi senkhat misa anga inlêma, Jisua enrichik rangin mi an tîra.

²¹ Mangei han a kôma, "Minchupu, ni ti ngei le ni minchuna ngei hih adik. Tute zenuol nei loiin Pathien lungdo chongtak ni minchu ngâi iti kin riet.

²² Hanchu, Rom Rêng Caesar kôma chôiruol kin chôih hih ei balamin ani mo?, ni mak mo?, Mi ril roh" an tia.

²³ Hannisenla an boti hah a rieta.

²⁴An kôma, “Sumdâr hah ni min en ta u, tu rimil le tu riming mo a chuong?” a tia. Anni han, “Rom Rêng, Caesar,” an tia.

²⁵Mahah anîchu, “Caesar ta chu Caesar pêk ungla, Pathien ta chu Pathien pêk roi hana,” a tia.

²⁶Hanchu, mipui makunga ite chong achâina sâr mak ngeia, a chongthuon lam hah an kamâma, an dâirek zoi.

Inthoinôk roi rekeln

(Mat 22:23-33; Mk 12:18-27)

²⁷ Hanchu Saducees senkhat, inthoinôkna omak ti ngâi ngei an hong, Jisua kôma,

²⁸“Minchupu, Moses'n, tukhomin a lâibungpân lômnu nei senla, nâi nei loiin thi ta rese, a nâipa'n, ha nupang hah luô nôkin a ulienpa richi rang a min nei rang ani, tiin a mizieka.

²⁹Voikhat chu, urêng pasal sari an oma, a ulientakin lômnu a neia, nâi nei loiin a thia.

³⁰A innik nân ma nupang hah a luô nôka,

³¹a inthum nân a luô nôka, ha angdêna han a sarina dênin an luoa, nâi nei loiin an thi rieia.

³²Anûktaka nupangnu khom hah a thi zoia.

³³Inthoinôk tikin te atu lômnu tak mo ai ni rang ani zoi? An urêngin laka lômnu an nei chita,” tiin an rekela.

³⁴Jisua'n “Atûnlai mingei an innei ngâi,

³⁵Hannisenla, thina renga inthoinôk theiruo ngei le zora la hong ranga lêng theiruo ngei chu lômnu lômpa innei khâi noni ngei.

³⁶Vântîrtonngei angin om an ta, thi thei khâi noni ngei. Thina renga an inthoinôk zoi sikin, Pathien nâingei nîng an ti zoi.

³⁷Moses khomin ânthârlakin athia ânthoinôk rang roi chu chîmbuk akânga han Pumapa chu ‘Abraham Pathien, Isaac Pathien, le Jacob Pathien’ tiin a rila.

³⁸Ama chu aring ngei Pathien ania, athi ngei Pathien nimak, ma taka han chu mi murdi an ring let sikin,” a tia.

³⁹Balam minchupu senkhatin, “Minchupu, nu thuona adik” an tia.

⁴⁰Masuale chu ite rekel ngam khâi mak ngei.

Messiah roia rekeln

(Mat 22:41-46; Mk 12:35-37)

⁴¹Jisua'n, Messiah hih inmo David Nâipasal ani thei rangtie?

⁴²David lele han Lapuibua, “Pumapa han ku Pumapa kôm, Ka changtieng insung roh;

⁴³Na râlنگei ki sirphân Ka dar mâka chu” a tia.

⁴⁴“David lele khomin ‘Pumapa’ a ti rêka, hante inmo Messiah hah David suonpâr ani thei rangtie,” a tia.

Jisua'n Balam Minchupungei a rilna

(Mat 23:1-36; Mk 12:38-40)

⁴⁵Lokongei chong an rangâi lâiin, a ruoisingei kôma,

⁴⁶“Balam minchupungei renga singthei roi. Kâncholiinчуол inhaka lêng an nuom ngâia, bazar muna chubai inmûk, Synagog-a sukmun hoi, ruolhoi jôla sukmun asa ngên ngâi anni.

⁴⁷Meithâingei sum an sâka, mi huongnân sôt tatak an chubai ngâi; ha ngei han an tuong rang na uol a tih,” a tia.

Luke 21

Meithâinu chôiruol

(Mk 12:41-44)

¹Jisua'n a en titira, Biekina chôiruol dôngna, minei ngeiin an chôiruol thâk a mua.

²Meithâi inriengte'n sumdâr chînte inik a thâklâi khom a mu saa.

³“Mi dadanggei nêkin hi meithâi inriengte hin a thâk mintam uol.

⁴Mi danggei chu an nei minieng kêng an pêk, ania, ama'n chu ai dônsunte, kêng ai pêkrip,” a tia.

Biekin siet rang roi a misîrna

(Mat 24:1-2; Mk 13:1-2)

⁵Ruoisi senkhat ngeiin Biekin lung ânvo enhoi tie le Pathien kôma an neinunpêk an misîr lâiin, Jisua'n an kôma,

⁶“Nikhuo la hong tung a tih, nin mu ngei murdi amuna oma, lung inchuon reng om no nih,” a tipe ngeia.

Intakna le nuomlôna

(Mat 24:3-14; Mk 13:3-13)

⁷Anni han a kôma, “Minchupu, mahah tika mo ai ni rang? Ahongtung rang zora rietna minsinna imo a om rang?” tiin an rekela.

⁸Jisua'n, “Nangni an huong loina rangin singthei roi. Mi tamtakin Khrista ki ni, azora atung zoi kêng, keima riming pêlin hong an ta, ha mingei hah jûi no roi.

⁹Hanchu, indoi, insuol roi nin riet tikin chi no roi, mahah a tung masa ngêt rang ani, a zoinatak chu la tung kelen no nih,” a tia.

¹⁰Nam dang le nam dang, ram dang le ram dang indoi an ta;

¹¹Muntina ningnupui, mâitâm, ripui lêng a ta, invâna neinin kamâmruoi le ichiom ngei inlang a tih.

¹²Nikhomrese, ma ngei tungmân han nangni sôr an ta, an nuom nangni lông an ta, synagog taka nin roijêk rangin pêng an ta, lung ina nangni khum an tih. Keima sikin rêngngei, roijêkpungei makunga nangni tuong an tih.

¹³Mahah nin ranga Thurchi Sa rilna zora sa nîng a tih.

¹⁴Lei riet roi, inmo ênpiel rang, inmo ei thvon rangtie tiin nin kângmindoi no roi.

¹⁵Nin râlнгеиin an sôt theiloi rang dôrin chong theina le vârna nangni pêng ki tih.

¹⁶Nin nû, nin pa, nin lâibung, nin sîngsuok, nin ruolнгеиin nangni minsôr an ta, senkhat chu nangni that an tih.

¹⁷Keima sikin mitinin nangni mumâk an tih.

¹⁸Ania, nin sam sangkhat te luo inmang no nih,

¹⁹Adetin inding ungla insaninjôk nin tih.

Jisua'n Jerusalem siet rang roi a rilna

(Mat 24:15-21; Mk 13:14-19)

²⁰“Hanchu, râlmingeиin Jerusalem an huol nin mu tikin chu a siet rang ani zoi iti riet ta roi.

²¹Matikin chu Judea rama om ngei chu tânga rot rese ngei, asûnga om ngeиin chu suoksan rese ngei, rama om ngei chu khopuiliena lût no rese ngei.

²²Lekhabua ânziek atung indikna rangin ha nikhuongei chu, ‘Phuba luok ni nîng a tih.’

²³Nupang nâivongngei le nû nâi rununêk dônngei rangin chu nikhuo intak inthangtak nîng a tih, dûktongna inthang, hi rama hin a juong tung rang sik le Pathien taksina hi mingei chungga atung rang sikin.

²⁴Senkhat khandaiin thîng an ta, Adangngei ram tina suokin tuongin om an tih. Hanchu an zora achuk mâka Jerusalem chu Jentailngei sirdênin om a tih.”

Miriem Nâipasal juong rang roi

(Mat 24:29-31; Mk 13:24-27)

²⁵ “Hanchu, nisa, thâ, ârsi ngeia khin minsinna om a ta, tuikhanglien rahang le tui insôn sikin pilchunga khom jâtin dengthei, lungjîng mintung a tih.

²⁶Pilchung pumpuia ichi juong tung mindonin mingei jâmzalin inzal neng an ta, invân-lâijôla neinun bulpui ngei rujûlpai nîng a tih.

²⁷Male Miriem Nâipasal inlang a ta, roineina le roiinpui takin sôm lâia juong a tih.

²⁸Hanchu, ha ngei hah a juong tung phutin chu inding ungla, tang roi, nin jôkna rang anâi zoi sikin.”

Theichang kunga inrilna

(Mat 24:32-35; Mk 13:28-31)

²⁹Hanchu, hi chongmintêk hih Jisua'n a rila, “Theichang kung le thingkung dadang ngei mindon roi.

³⁰A hong incher innoi nin mûn chu, kholum anâi iti nin riet ngâi.

³¹Ha anghan, ha ngei hong tung nin mûn chu, Pathien Rêngram a juong tung rang ani zoi iti rieng nin tih.

³²Atûnlâi mingei an thi riei mân ngêtin hi neinunngai hih juongtung a tih, iti riet roi.

³³Pil le invân boi a ta, ko chong chu boi no nih.”

Intûng chien anâng

³⁴“Singthei roi, aninon chu, sâk akhoprai le ju inrûi le ringlâi nunkhohoi mindonnân nin mulung sip rai a ta, ha nikhuo hah juong tungrak a tih,

³⁵chânga inôk anghan. Ha anghan pilchung muntina mi murdi chung a tung a tih

³⁶Ha intakna juong tung rang adamriema nin pal theina rang, ranak nin dôn theina rang le Miriem Nâipasal makunga nin inding theina rangin indînin khotiklâi khomin chubai tho tit ngâi roi,” a tia.

³⁷Jisua'n ha sûnngai hah Biekina minchûn a minhek ngâia, kholoi a hong nin chu Olive muola a jân mang rangin a se ngâi.

³⁸Anîngtin, jînga a chongril rangâi rangin a kôma Biekina mi murdi an hong ngâi.

Luke 22

Jisua that rang lam an mintuo

(Mat 26:1-5; Mk 14:1-2; Joh 14:10-11)

¹Hanchu, cholboi vâipôl ruolhoi, Kalkânkût ruolhoi an iti hah anâi zoia.

²Ochaisingei le Balam minchupungeiin mipui an chi sikin inrûka Jisua that rang lam an roka.

Judas'n Jisua minsûr rang a masat

(Mat 26:14-16; Mk 14:10-11)

³Ruoisi sômleini ngei lâia Judas Iscariot an iti ngâi sũa Soitan a lũa.

⁴Hanchu Ochaisingei le Inkhomin uliengei kôm a sea, Jisua an sũa theina rang lam a vân kerengpuia.

⁵Anni han an râisân oka, sum pêk rangin an inkhâma.

⁶Hanchu, Judas a nuoma, mipui riet loi kâra minsũa rang chuminrên a rok zoi.

Jisua le a ruoisingei kalkân kût an kâk

(Mat 26:17-25; Mk 14:12-21; Joh 13:21-30)

⁷Hanchu, cholboivâipôl ruolhoi, Kalkân kût khalâiot, belrite that rang ni a hong tunga.

⁸Jisua'n hi chong minchôiin Peter le John a tũa. “Se unglâ eini sũa rang Kalkân kût va minsũa roi”, a tia

⁹Hanchu a kôm, “Khonmo kin minsũa rang?” an tia.

¹⁰An kôm, “khopuilien nin lût lehan, mi inkhat bêla tui chôi tong nin ta, a lũa ina jũipat roi.

¹¹Hanchu, in pumapa kôm, ‘Minchupu'n ku ruoisingei leh Kalkân kût kin sũana rang khâltan khonmo a ti?’ ti roi.

¹²Hanchu, chunginhuon khâltan inzar tak, neinun nâm omsai, nangni min mũa a ta, mahan minsũa roi,” a tipe ngeia.

¹³Hanchu an sea, Pumapa'n an kôm a ti lam angin jâtinrêng an mua, mahan kalkân kût an mintuo zoi ani.

Pumapa Jânbu

(Mat 26:26-30; Mk 14:22-26; 1 Kor 11:23-25)

¹⁴Hanchu, asũa zora ahong nîn chu a tũrtôn sômleini ngei leh khalâi a ota.

¹⁵An kôm, “Ku tuong mân, hi Kalkân kût hih nangni sũapu rang ku nuom sabak ani.

¹⁶Nangni ki ril, Pathien Rêngrama a tatakin ani mâka chu sũa khâi no ning,” a tia.

¹⁷Male, kilât a lâka, Pathien kôm râisânchong a ril zoiin chu an kôm, “Hihi lâk unglâ buong roi.

¹⁸Nangni ki ril, Pathien Rêngram a juong tung mâka chu hi uain hih buong khâi no ning,” a tipe ngeia.

¹⁹Male, vâipôl a lâka, Pathien kôm râisânchong a ril zoiin chu a khoa, a pêk ngeia an kôm, “Hihi ka taksa, ninta ranga ipêk ani. Mi nin riettina rangin tho ngâi roi” a tia.

²⁰Ha angin, an sâk zoiin chu, kilât a lâka, “Hi kilât hih Pathien chongtung thar ki thisena sînthona, ninta ranga bun suok ani,” a tipe ngeia.

²¹Hannisenla, en ta u, ni minsûr rangpu chu ka khalâi otpuipu hih ani.

²²Pathien mintuo anghan, Miriem Nâipasal chu thîng a tih, ania, a minsûrpu chung chu ântak bah na!

²³Hanchu an lâia tutakin mo, ma anga tho rang ai ni rang ani zoi? tiin an inrekel inlôma.

Alientak rang chungroia inkhalna

²⁴Hanchu, ruoisingei lâia a tutak mo alientaka be rang tiin inkhalna a oma.

²⁵Jisua'n an kôma, “Jentail rêngngei chu an mingei chung a racham an neia, racham a nei ngei chu ‘mipui ngei mal’ an ti ngâia.

²⁶Ania, nangni chu ha anghan nino tunui, nin lâia alientak chu nâipang uolin om senla, ruoipu rang chu tîrlâm angin om rese.

²⁷Tumo alien uol, bu nêk ranga insungpu mo, bukhalâi dôpu mo? Bu nêkpu nîng a tih. Ania, kei chu nin lâia tîrlâm angin ko oma.”

²⁸“Huong ranga methêmna ko tong kêra ni ompui ngei nin ni.

²⁹Ka Pa'n racham ni pêk anghan, racham nangni pêk ki tih.

³⁰Ke Rêngrama ko dosânga sâk nan ta, nêk nan ta, Rêngsukmuna insungin Isreal jât sômleinik ngei chung a roijêk nin tih.”

Peter'n a ipdel rang a rilmasâna

(Mat 26:31-35; Mk 14:27-31; Joh 13:36-38)

³¹“Simon, Simon, rangâi ta! Butak le arishi an jâp ngâi anga nangni minsîna asa le sie nangni kidik rangin Soitanin phalna a man zoi.

³²Hannisenla, na taksônna ânsam lolina rangin nangni ku chubai pe, ki tieng ni kîr tikin na lâibungngei ni mindet rang ani,” a tia.

³³Peter'n a thuona, “Pumapa, no kôma intâng ina intâng rang le athi rang khomin kê phal,” a tia.

³⁴Jisua'n, “Peter, nang ki ril, avienjân hin, voithum riet ngâi mu-ung ni ti mâka chu âr khuong no nih,” a tipea.

Sumkok, choli, le khandai

³⁵Hanchu, Jisua'n an kôma, “Sumkok, choli, kekok, boia nangni ki tîr lâia han imo nin insama?” tiin a rekela, “Ite insam mak me” an tia.

³⁶Jisua'n atûn chu, sumkok, choli, anei khomin chôi ta roi, khandai nei loi khomin a kâncholi zuor senla rochôk rese.

³⁷Nangni ki ril, Lekhabu'n, "Ama chu mi nungsiengi lâia telsa ani zoi" itia ku chung roi miziek hah, ku chung aitung indik rang ani.

³⁸Ruoisingeiin a kôma, "Pumapa, en ta, hin khandai inik a om" an tia. Ahun a tipe ngeia.

Olive muola Jisua chubai tho

(Mat 26:36-46; Mk 14:32-42)

³⁹Hanchu, a tho ngâi lam angin, khopuilien a mâka, Olive muola a sea, ruoisingei khomin an jûia.

⁴⁰Amun an tungin chu an kôma, "Huongna nin lût lolina rangin chubai roi" a tipe ngeia.

⁴¹Hanchu, an kôm renga lunga dêngphâkna tena a vân thîna, khûkinbilin chubai a thoa.

⁴²"O Pa, nu nuomin chu hi dengtheina kilât hih ko kôm renga khâi roh. Nikhomrese, keima racham ni loiin, na racham tak ni rese" a tia.

⁴³Hanchu, vântîrton invân renga a kôma a juong inlâra, râtna a juong pêka.

⁴⁴Ngâisiet inrikin, ningsiet uolin a chubaia, a rathan khom thisen angin pila a masara.

⁴⁵Hanchu, chubai thona renga inthoiin ruoisingei kôma a sea, sabeidonga a inin a va mu ngeia.

⁴⁶An kôma, "Ithomo nin in? Inthoi ungla, huongna nin tâk lolina rangin chubai roi," a tipe ngeia.

Jisua an sôr

(Mat 26:47-56; Mk 14:43-50; Joh 18:3-11)

⁴⁷Jisua a la chong lâiin ruoisi sômleinik ngei lâia Judas hong tuong mipui an hong tunga, Jisua tum rangin a kôma a hong.

⁴⁸Jisua'n a kôma, "Judas, Miriem Nâipasal hi atumin minsôr rang ni ti mo?" a tia.

⁴⁹Hanchu, a kôma ruoisi om ngei han, neinin omtie an mûn chu a kôma, "Pumapa, kin khandai mang ni ung mo?" tiin an rekela.

⁵⁰Hanchu an lâia inkhatin Ochai Inlaltak tîrlâm a chang tienga kuor a leng pea.

⁵¹Ania, Jisua'n "Ahun zoi" a tia. Ha mi kuor hah a tona a mindam pe zoi.

⁵²Hanchu, a kôma hong Ochaisingei, Biekin ulienngiei, upangei, a sôr ranga hong ngei kôma Jisua'n, "Khandaingei, tôkmolngiei ichôiin, puoloi sôr rang leh in-ang bangin nin hong na?"

⁵³Nîngtin Biekina nin kôm ko oma, ni sôr rang ti mak cheia. Ania, ijîng rachamneinân roi ajêk lâi hih nin sin tho zora ani," a tipe ngeia.

Peter'n Jisua a ipdel

(Mat 26:57-58,69-75; Mk 14:53-54,66-72; Joh 18:12-18,25-27)

- ⁵⁴Hanchu, Jisua an sôra, Ochai Inlaltak ina an tuonga, Peter'n alazanin a jûia.
- ⁵⁵In khalâidung alâitak han mei an thoa, mei rihila insungruma mei uot ngei lâia han Peter khom a vên sunga.
- ⁵⁶Nupang tîrlâm inkhatin mei kunga ânsung a mua, a mitjuoka, “Hi mi khom hih Jisua kôma om ngâi mi ani,” a tia
- ⁵⁷Peter'n, “Nupang, ama hah riet luo riet ngâi mu-ung” tiin a minlêma.
- ⁵⁸Anangkan uola chu mi inkhatin Peter kôma, “Nang khom an lâia mi ni ni” a tia. Peter'n, “Miriem, kei chu ni mu-ung” tiin a thuona.
- ⁵⁹Hanchu dârkârkhat suole chu midangin, “Ite okchâna boi riekin hi mi khom hih Jisua kôma om ngâi ani, Galilee mi ani sikin” ati ngita.
- ⁶⁰Ania Peter'n, “Miriempa, ni ti ngei hah riet mu-ung” tiin a thuona. Harengan a la chong lâi takin âr akhuong zoia.
- ⁶¹Hanchu Pumapa hah ânheia, Peter a en ngita. Hanchu, Peter'n Pumapa'n a kôma, “Avien jân âr akhuong mân voithum ni ipdel ni tih,” ai tipe hah a rietsuoka.
- ⁶²Hanchu, Peter a jôkpaia, a chap ngungui zoi.

Jisua an esêla an jêm

(Mat 26:67-68; Mk 14:65)

- ⁶³Hanchu, a surngei han Jisua tusiem thonân an manga, an jêma.
- ⁶⁴A mâi an hîp pea, “Ti roh, tumo nang a jêm?” tiin an rekela.
- ⁶⁵A chunga demna chong tamtak an thoa.

Rojêkna makunga an tuong

(Mat 26:59-66; Mk 14:55-64; Joh 18:19-24)

- ⁶⁶Hanchu, khuo avâr lehan, upangei, Ochaisingei, Balam minchupungei an intûpa, an rojêkna Jisua an hong tuonga,
- ⁶⁷a kôma, “Ni ril roh, Messiah nini mo?” an tia. Jisua'n, “Nangni ril khom inlang iem no tunui,” tiin a thuona.
- ⁶⁸“Chong nangni rekel khom inlang ni thvon no tunui.
- ⁶⁹Ania, atûn renga Miriem Nâipasal hih Râtinchung Pathien chang tieng insung a tih zoi” a tia.
- ⁷⁰An rêngin, “Nônte Pathien Nâipasal mo na ni,” an tia. An kôma, “Ani mi nin ti zoi hate” tiin a thuona.

⁷¹Hanchu, “Ite rietpuipu dang nâng khâi mak me, eini rengin a ti ei riet zoi,” an tia.

Luke 23

Pilat makunga Jisua an tuong

(Mat 27:1-2,11-14; Mk 15:1-5; Joh 18:28-38)

¹Hanchu, ântûngei murdi an inthoia, Pilat makunga Jisua an tuonga.

²“Hi mi hin, kin mingei anôk tieng a ruoia, Caesar kôma khom chôiruol chôî no roi,” a tipea. “Mapêna, ama reng Messiah rêng ki ni ântia, kin sôr ani,” tiin an nôna.

³Pilat'n, “Judangei rêng mo nani?” tiin a rekela. Hanchu, “Ani, mi ni ti zoi hate” tiin a thuona.

⁴Hanchu, Pilat'n, Ochaisingei le mipui ngei kôma, “Hi mi hih theiloi mintumna rang abi reng mu mu-ung” a tipe ngeia.

⁵Hannisenla, anni han, “Galilee ram renga phutin hi mun dên rakin Judea ram pumpuia, a minchua, a minjêla,” tiin an nôn uol uola.

Herod makunga Jisua ânding

⁶Hanchu, Pilat'n ha chong hah a riet lehan, “Galilee mi mo ni ni” tiin a rekela.

⁷Galilee rama mi ani iti a rietin chu, Herod kôma a tîra; Herod khom Jerusalema a om lâitak ani.

⁸Jisua a mûn chu a râisân oka, a thurchi a lei rieta, amu rang a nuomna a lei sôt zoi sikin. Jisua sininkhêl mu rang khom a sabeî sa ani.

⁹Masikin, Herod'n chong rekelnâ tamtak a neia, ania, Jisua'n thuan maka.

¹⁰Ochai Inlalngei le Balam minchupungei mântieng an hôn thîna, Jisua an nôn uol uola.

¹¹Herod le a râlmingeiin Jisua an phenênga, esêl takin tusiem thonân an manga; male kancholi inchuol an minhaka, Pilat kôm an tîr nôk zoi.

¹²Hâni lelea han Herod le Pilat hah mal an inchanga, ma mâna han chu râla lei om an ni.

Jisua a thi ranga an jêkmasatna

(Mat 27:15-26; Mk 15:6-15; Joh 18:39—19:16)

¹³Hanchu, Pilat'n Ochaisingei, ruoipungei, mipui ngei a koitûpa.

¹⁴An kôma, “Hi mi hin mipui ngei aletiang a ruoisiet, tiin ko kôm nin hong tuonga, ania, hin nin makung renga ke ena, nin nôn lam angin ite theiloina man mu-ung.

¹⁵Herod khomin a theiloina man maka, masikin ei kôma a hongtîr nôk ani. Athina rang dôrin hi mi hin ite tho minchâina nei mak.

¹⁶Masikin jêm ka ta mojôk ki tih” a tia.

¹⁷(Kalkân kût rachamin Pilat'n mi intâng inkhat an rangin a mojôk pe ngâi ani)

¹⁸Mipui ngeiin an hêta, “That roh, kin rangin Barabbas mi mojôk pe roh” an tia.

¹⁹Barabbas chu khopuia injêlna le mithat sika jêlina intâng ani.

²⁰Pilat'n chu Jisua mojôk rang a nuom sikin, mipui ngei kôma atharin a ti nôka.

²¹Hannisenla, an hêtkhuma, “Khrosa jêmdel roh, Khrosa jêmdel roh” an tia.

²²Pilat'n, avoithumnân, an kôma, “Imo a tho minchâina? Athina rangin a minchâina mu mu-ung! jêm ka ta, mojôk ki tih,” a tia.

²³Hannisenla, rôl inring theidôrin, Jisua chu khrosa jêmdel rangin an ti ngita. Hanchu an iniekin a mene zoia.

²⁴An ngên lam angin Pilat'n aroi a masata;

²⁵an nuom lam angin, injêlna sika mithata intângpu a mojôk pea, Jisua chu an ning an nuoma an lo rangin an kôma a pêk ngei zoi.

Jisua an jêmdel

(Mat 27:32-44; Mk 15:21-32; Joh 19:17-27)

²⁶Hanchu, râlmingeiin Jisua an tuonga, an se lâiin a riming Simon Cyrene mi khosûng renga khopuilien hong pan an tonga. An sûra, khros an min ruputa, Jisua nûka an min lôna.

²⁷Mipui tamtakin an jûia, an lâia nupang senkhat ngei chu an châa, an chapa.

²⁸Jisua'n an tieng ânheia, “Jerusalem nupangngei o, micha no roi, nangni le nin nâingei rangin chap roi.

²⁹Nikhuo a hong tung tir zoi, mingeiin, ‘nupang a chingngei, nâi vong ngâi loi ngei, nâi neiloingei chu an ralvân asa pe bah na!’ la tîng an tih.

³⁰Ha tikin chu mingeiin muolngei kôma, ‘Ni del roh’, la tîng an tih. Muolngei kôma, ‘Ni thup roh’ la tîng an tih.

³¹Thing aringa luo hi ang takin a thôn te, achâr vanga te i ang takin mo tho ta nih,” a tia.

³²Hanchu, midang inik, mipuoloi, ama leh that sa rangin an tuonga.

³³Hanchu, “Luru mun” an ti mun an tungin chu mahan Jisua khrosa an jêmdela, mipuoloi inik a voitieng inkhat a chang tieng inkhat.

³⁴Jisua'n, “O Pa, ngâidam ngei roh, imo an tho an riet loi kêng,” a tia. Hanchu taruo sânin a puon an insema.

³⁵Hanchu mipui indingin an thîra, Juda ruoipungeiin, “Mi dangngei chu a mojôk ngâia, Pathien ithang, ani tatakîn chu, a thenin jôk rese” tiin an êroa.

³⁶Râlmîngei khomin an khorâia; a kôma an hongâ ju thûr an pêka.

³⁷A chungâ, “Judangei rêng na nîn chu ne theiin jôk roh bah!” an tia.

³⁸A chungâ, “Hi mi hih Judangei Rêng ani” iti miziek a oma.

³⁹Mipuoloi inkhat an makhâi han êro chongin a kôma, “Messiah nimak che mo? jôk inla, keini khom mi mojôk sa roh” a tia.

⁴⁰Inkhatpa han a ngoa a kôma, “Pathien ni chi loi mo? Ama leh in-ang banga dûk min mintong hih.

⁴¹Eini chu ei sintho man ei man rangtum piel ei man ani, aniatachu, ama chu ite tho minchâina nei mak,” a tia.

⁴²Hanchu, Jisua kôma, “Jisua Rêngin nu juong tikin ni riettî roh,” a tia.

⁴³Hanchu, Jisua'n a kôma, “Chong kên khâm, avien ko kôma Paridise'a om ni tih,” a tipea.

Jisua thina roi

(Mat 27:45-56; Mk 15:33-41; Joh 19:28-30)

⁴⁴Hanchu, sûnlâi dâr sômleînik renga kholoji dârthum dênin, nisa avâr ân ngama, ram pumpui a jîngkhap zoi.

⁴⁵ Hanchu, Biekina puonjâr hah inikin a kêrphata.

⁴⁶ Jisua'n rôl inring takin ânieka, “O Pa, na kuta ka ratha ka bâng,” a tia. Mahah a ti zoiin chu a rang achat zoi.

⁴⁷Hanchu, râlmî ulienpu han neinun omtie a mûn chu, “Inkhel loiin midik ani khet” tiin Pathien a minpâk zoia.

⁴⁸Ha enhoi ithîra mipui intûpngei han neinun omtie an mûn chu, ngâisieta rôp ruchumin an in tieng an kîr nôk zoi.

⁴⁹ Jisua mêlrietngei le nupangngei murdi Galilee ram renga ama hong jûingeiin lâtaka indingin an thîra.

Jisua an phûm

(Mat 27:57-61; Mk 15:42-47; Joh 19:38-42)

⁵⁰⁻⁵¹Hanchu Judea ram, Arimathea khuo mi a riming Joseph a oma. Ama hah midik, mi mirit om, Pathien Rêngam juong tung rang lei ngâk mi ania. Roijêkpungei lâia mi inkhat nikhomrese an roi masat lam le an sintho lam nuom loi mi ani.

⁵²Pilat kôma a sea Jisua ruok a zonga.

⁵³Hanchu ruok hah a musuma, rosom puonin a thoma, thân, lungkuo ihel tute la minjâlna ngâi loaia a min jâla.

⁵⁴Hanchu, sùn rangnga ni ania, Sabath ni phut rang ani zoia.

⁵⁵Galilee ram renga nupang Jisua hong jûi ngei hah Joseph ngei leh an sea, thân le Jisua ruok an dar tie khom an mua.

⁵⁶Hanchu ina an sea, mirimhoi le sariekngei ruok pol rangin an sinsiema. Balam angin Sabathnin chu an ingam zoi.

Luke 24

Jisua inthoinôkna

(Mat 28:1-10; Mk 16:1-8; Joh 20:1-10)

¹Pathienni jîng, inmâna, nupangngeiin mirimhoi an sin hah chôiin thâna an sea.

²Thân kotbâia lung hah inluoipai sân an va mua.

³Hanchu, an lûta, ania, Pumapa Jisua ruok chu mu khâi mak ngei.

⁴Mahan mulungjîngin an indinga, harengan, mi inik puon chek insilin an kôla an juong indinga.

⁵Nupangngei han rolo innîkin nuoia an inbok raka, anni han an kôma, "Ithomo mi ring hah mithingei lâia nin irok?"

⁶Hin om khâi maka, ânthoinôk zoi. Galilee rama a om lâia nin kôma ai ti ngei hah riettiti roi.

⁷Miriam Nâipasal hih mi nunsie ngei kuta ipêk nîng a ta, jêmdel an ta, a sûnthum nîn a ringin inthoi nôk a tih" an tia.

⁸Hanchu, nupangngei han ai ti ngei hah an rietsuok nôka,

⁹thân renga an kîra, neinun omtie ngei chu ruoisi sômleikhat ngei le midangngei an rila.

¹⁰Nupangngei hah Mary Magdalene, Joanna, le Mary, Jacob nungei anni. Anni le nupang adang an kôma omngei han tîrtonngei hah an ril ani.

¹¹Ania nupangngei chongril hah, chongkâmboi an tia, taksôn mak ngei.

¹²Nikhomrese, Peter chu ân thoilita, thân tieng a tâna, ân kûna, rosom puon injuot tiloi chu ite dang mu maka. Hanchu, neinun omtie ngei kamâmin in tieng a kîr nôk zoi.

Emmau khuoa an se

(Mk 16:12-13)

¹³Ma ni nanâk han Jisua jûi ngâi mi inik Emmau khuoa an sea, Jerusalem renga kilometer sômleikhat dôra la ani.

- 14**An ruonin neinun omtie ngei hah an misîra.
- 15**Ha anga an chonga an misîr lâiin, Jisua lelên a hong nâia an kôma a lônâ.
- 16**An mua chu riet minthâr mak ngei.
- 17**Ama'n an kôma, "Lampuia nin misîr hah ithurchi mini?" a tia. Hanchu mâi inngûi riemin an indinga.
- 18**Hanchu, a riming Cleopas han a kôma, "Jerusalema sînkhât vai mo no om? Sûntômte lei vuna neinun omtie ngei hah ni riet loi mo?" tiin a rekela.
- 19**"I neinun mo?" a tia. "Nazareth Jisua chungâ neinun tungngei hah; ha mi hah Pathien le mitin mindon khoma jâttinrêng ai ti le ai sin, racham inei dêipu ania,
- 20**kin Ochaisingei le ruoipungeiin that rangin an pêka, an jêmdela.
- 21**Ama hah Isreal minjôk rang mi nîng a tih iti kin tûnga. Mapêna, ha anga neinun tungna hah avien hin a sînthumbni ani zoi.
- 22**Kin champui nupang senkhât, jînga thân va en ngeiin kin mulung an minjînga.
- 23**A ruok mu loiin an hongkîr nôka, vântîrton inlâr kin mua, a ring nôk zoi an ti, an hong tia.
- 24**Hanchu, kin champui senkhât ngeiin thâna an va sea, nupangngei ti lam anghan an va mua, ama chu mu khâi mak ngei" an tia.
- 25**Male, Jisua'n an kôma, "Amo ngei o, dêipungei neinuntin an lei rilngei hah idôra a iem innu mo nin ni?"
- 26**Messiah han ha ngei murdi tuongin a roiiinpuina ai lût rang nimak mo?" a tia
- 27**Hanchu, Jisua'n ama chungroi, Moses lekhabu renga dêipungei lei miziek lekhabungei a rilminthâr pe ngeia.
- 28**Hanchu, an sêna rang khuo an hong nâi zoia, Jisua hah la se bang rang angin a oma,
- 29**Nikhomrese bâiin an sûra, "Kin kôma om ta roh, sîn aheka ajîng rang kêng ani zoi" an tia. Hanchu an kôma om rangin a se zoi.
- 30**Hanchu, an kôma sâk rangin ânsung lâiin vâipôl a lâka, sat a vura, a khoia, a pêk ngeia.
- 31**Hanchu an mit a hong vâra, an rietminthâr zoia, hannirese, an mitmu renga ânmanng nôk kelena.
- 32**"Lampuia ei kôma, Mi chongpuia, lekhabungei mi rilminthâr pe lâia han mei a kâng angin om mak me mo?" tiin an inrekela.
- 33**Harengan, an inthoia, Jerusalema an kîr nôka, ruoisi sômleikhât ngei le Adangngei lei intûp an va mua.

³⁴“Pumapa chu ânthoinôk tatak; Simon kôma khom ânlar zoi” an lei tia.

³⁵Hanchu, ha inik ngei khom han, lampuia neinum omtie le vâipôl a khoia Pumapa an rietminthâr tie an rilminthâr ngei zoi.

Jisua'n a ruoisi sômleikhat ngei kôma ânlar

(Mat 28:16-20; Mk 16:14-18; Joh 20:19-23; Sin 1:6-8)

³⁶Hanchu, mi inik ngei han an la ril lâitakin, harengan Pumapa lele an lâia ândinga an kôma, “Nin chung a ratha'ngamna om rese” a tia.

³⁷An jâminzal sabaka, khori an mûn an mindona.

³⁸Hanniresea, an kôma, “Ithomo nin mulung nin minjînga? Ithomo nin mulunga iem zoiloina nin inei?”

³⁹Ka kut, ke kephangei en ta u, keima nanâk hah ki ni hih! Ni tôn unglâ, en roi, minin mu anghan khori'n taksa le ru nei mak” a tia.

⁴⁰Hanchu, mahah a ti zoiin chu, a kut le a kephangei a min en ngeia.

⁴¹An râisân rai sikin taksôn thei kelen mak ngeia, an kamâm sabak lâiin an kôma, “Asâk ruo imokhat mo nan nei?” tiin a rekel ngeia.

⁴²Nga suong sai tangkhat an pêka.

⁴³Alâka, an mu chungin a sâka.

⁴⁴Hanchu, an kôma, “Hi chongngei lele hih ani, nin kôma ko om lâia ku chungroi Moses Balam lekhabua miziek, Dêipungei miziek, Minpâkna labua miziek, a hongtung dik rang nangni ke lei ril ngâi hah,” a tia.

⁴⁵Hanchu, lekhabua ânziekngai an riet theina rangin an mulungrîlنگي a mong pe ngeia.

⁴⁶An kôma, “hi angin miziek ani, Messiah han dûk tuong a ta, sûnthum suole thina renga inthoi nôk a tih.

⁴⁷Ama rimingin insîrna le nunsie ngâidamna thurchi Jerusalem renga namtin kôma misîr nîng a tih.

⁴⁸Ha neinumngai murdi rietpuipu nin ni.

⁴⁹Hanchu, ka Pa ânkhâm hah keima rengin nin chung a juongtîr ki tih, hannirese, chungtieng renga sinthotheina nin chung a chum mâka chu khopuilien ha nin ngâk tit rang ani,” a tia.

Jisua invâna a kal

(Mat 16:19-20; Sin 1:9-11)

⁵⁰Hanchu, khopuilien renga Bethany dênin a ruoi ngeia, mahan a bân a phara, sat a vur ngeia.

⁵¹Ha anga sat a vur lâitakin, ânsempui ngeia, ama chu invâna tuongin a om zoi.

⁵²Hanchu chubai an mûka, râisân takin Jerusalema an kîrnôk zoi.

⁵³Hanchu, Biekina Pathien kôma râisânchong rilin an zorangei murdi an mang zoi.

John

John 1

Ringna chong

- ¹Aphutna taka han chong alei oma; ma chong ha Pathien kôm aoma, Chong ha ke Pathien ani.
- ²Aphutna tak renga han chong hah Pathien kôm ke aom ani.
- ³Neinunngai murdi Pathien sin riempet an nia, ama sin loi neinun inkhat luo omak.
- ⁴Ma Chong ha ke ringna bulpui ani, male ma ringna hah munisi ngei min vârpui ani.
- ⁵Ma vâh han ijîng a êlminvâra, ijîng han lei khap thei mak.
- ⁶Pathien'n a thangtheipu inkhat a juong tîra, a riming chu John ani,
- ⁷ha mi han vâh thurchi mingei min riet ranga juong ani, ama sikin mitinin an iem theina rangin.
- ⁸Ama hah vâh chu nimaka; vâh thurchi mingei min riet ranga juong ani.
- ⁹Mahi vâh diktak chu ani; rammuola a juonga mingei murdi min vârpui hi.
- ¹⁰Chong hah rammuola aoma, male Pathien'n Chong mangin rammuola ha sin khomsenla, rammuolin lei riet thei maka.
- ¹¹A mingei nanâk kôm a juonga, aniatachu a mingeiin lei modôm mak ngei.
- ¹²Hankhoma ama modôm ngei kai le ama iem ngei chu Pathien nâi nina a pêk ngei zoi.
- ¹³Ha mingei hah chu thisena inzir nimak ngeia, taksa nuomlama ânzir khom nimak ngeia, munisi ngei pa nuomlama ânzir khom ni uol mak ngei; Pathien ha kêng an Pa ani.
- ¹⁴Hanchu, Chong hah munisi juong changin, moroina le chongtaka sipin ei lâia a juong om zoi. A roiinpuina ei mua, Pathien Nâikhât roiinpuina a man hah.
- ¹⁵John'n a chungroi a misîra, ân ieka, Hi mi thurchi hih ki misîr ani, "Ku nûka juong rangpu hi keima nêka lien uol ani, kêh zir mâna a lei om sai ani sikin," a tia.
- ¹⁶A lungkham satvurna akipin ei rêngin ei changa, moroina chungu moroi nôkna.
- ¹⁷Pathien'n Balam chongpêk Moses a pêka, aniatachu moroina le chongtak chu Jisua Khrista sikin ahong om ani.

¹⁸Tutên Pathien la mu mak ngeia. A Nâikhât vai, Pathien ân angpui le Pa tienga om ngêt han, a thurchi a min riet zoi.

Baptispu John chongbê

(Mat 3:1-12; Mk 1:1-8; Luk 3:1-18)

¹⁹Jerusalema Juda rachamneipungei han, “John, hah tumo ani?” ti rekel rangin ochaingei le Levi richisuonpârngei an tîra.

²⁰John'n ânthârtakin, “Messiah chu ni mu-ung” a lei tipe ngeia.

²¹“Nônte, Tumo ni ni? Elijah mo ni ni?” tiin an rekela. “Ni mu-ung,” tiin a thuon ngeia. “Dêipu mo ni ni?” tiin an rekela. “Ni mu-ung,” tiin a thuona.

²²“Nônte tumo ni ni? mi hongtîr ngei chong kin mele theina rangin mi ril roh. Nu thurchi hi i angin mo ni ti?” an tia.

²³John'n dêipu Isaiah chong mangin a thuona: “Keima hi ramchâra mi inkhat tânghâipu ha ki ni: Pumapa lônna rang lampui mintûn roi!”

²⁴Ma thangtheipungei, Phariseengei hongtîr ngei han John an rekel nôka,

²⁵hanchu “Messiah ni ni noa, Elijah mo, Dêipu mo luo ni ni nônte ithomo mi na baptis ngâia?” an tia.

²⁶John'n a thuona, “Keiman chu tui leh ka baptis'a, hannirese nin lâia hin nin riet loi mi inkhat ânding chiena.

²⁷Ama hah ku nûka a juong rang ania, kei chu a kekokrûi sût rang luon inhoi mu-ung,” a tia.

²⁸Mangei hah Bethany khuo nisuo tieng Jordan tuidung râla, John'n a baptisna ngâi muna atung ani.

Pathien Belrite

²⁹Anangtûka chu John'n Jisua a kôm hongin a mua male, “En ta u, Pathien Belrite rammuol sietna pêl rangpu soh,” a tia.

³⁰Hi mi chungroi hih ani, “Mi ku nûka a juong a oma, aniatachu keima nêka lien uol ani, keima kên zir mâna a omsai ani sikin, ki ti hah.

³¹Tumo ani rang riet mu-ung, nikhomsenla, Israel mingei min riet rangin tuia baptis rangin ku juong ani.”

³²Male John'n hi thurchi hih a misîra: “Ratha hah invân renga juong chumin vasu angin a chung a juong chum ku mu.

³³Atûntena keiman chu la riet thei mu-ung, nikhomrese tuia mi baptis ranga mi tîrpu Pathien'n, Ratha hah invân renga juong chumin mi inkhat chung a chuongin mini mûng na ta; ama hih Ratha Inthienga leh mi baptis rangpu ha ani.”

³⁴John'n, "Ama hah ku mu zoi, Nangni ki ril, ama hah Pathien Nâipasal ani," a tia.

Jisua ruoisi masa ngei

³⁵Anangtûka chu mahan John ha a ruoisi inik ngei lehan ânding nôka,

³⁶Jisua lôn lâitak a mu lehan. "En ta u, Pathien Belrite soh!" a tia.

³⁷Ma ruoisi inik ngei han a thurchi misîr an rieta Jisua leh an se kelena.

³⁸Jisua ân heia, an hongjûi a mûn chu an kôm, "Khoimo nin rok?" a tipe ngeia. Anni han, "Rabbi, khonmo no om ngâi," tiin an thuona. (Rabbi ti chu "Minchupu" tina ani).

³⁹Ama han, "Hong unglâ en roi," tiin a thuona. (ma zora ha chonûktieng dâr minli inring dôr ani.) Masuole chu an jûia a omna an mua, male mani sûna zora kai chu ama leh an mang minhek zoi.

⁴⁰An lâia inkhat ha chu Andrew, Simon Peter lâibungpa ani.

⁴¹Ama han a upa Simon a mu kelena a kôm, "Messiah hah kin mu zoi," a tia. (hi chongbâi aomtie chu "Khrista" tina ani.)

⁴²Hanchu ama'n Simon hah Jisua kôm a tuonga. Jisua'n Simon hah a lei ena, "Ni riming chu Simon, John nâipasal ni ni, hannirese Kephâs, tiin nang koi an ti zoi," a tia. (Ma hih Peter tina leh munkhat ania, aomtie chu "lungpui" tina ani.)

Jisua'n Philip le Nathanael a koi ngei

⁴³Anangtûka chu Jisua Galileea se rangin a masata, Philip a mua, "Ni jûi roh a tipea!"

⁴⁴(Philip ha Andrew le Peter omna khopui Bethsaida mi ani.)

⁴⁵Philip han Nathanael a mua a kôm, "A thurchi Moses'n Balam lekhabua a lei miziek le dêipungei khomin an miziek Joseph nâipasal Nazareth Jisua hah kin mu zoi," tiin a rila.

⁴⁶Nathanael'n a kôm, "Nazareth taka neinun sa asuok thei mini?" tiin a rekela. Philip'n a kôm, "Hongin la, en roh," tiin a thuona.

⁴⁷Jisua'n Nathanael a kôma hong a mua, a chungroi a misîra, "Ama hi Israel mi diktak; dikloina reng dôn loi ani!" a tia.

⁴⁸Nathanael'n, "Kho angin mo mi ni riet?" tiin a rekela. Jisua'n a kôm, "Philip'n nang a koi mân theichang kung nuoia no om lâihan nang ku mu zoi," tiin a thuona.

⁴⁹Nathanael'n a kôm, "Minchupu," "Pathien Nâipasal ni ni! Israelngei Rêngpa ni ni!" tiin a thuona.

⁵⁰Jisua'n a tia, "Theichang kung nuoia no om lâia nang ku mu kêng ani zoi nang ki ti sikin ni iem mini? Hi nêka neinun roiinpui uol ok la mûng ni tih!" a tipea.

⁵¹Male Jisua'n an kôm, "Chongtak nangni ki ril: invân ajuon onga, Miriem Nâipasal chungã vântîrtongei an juong chum le an kal, la mûng nin tih," a tia.

John 2

Cana khopuia inneina

¹Sûnnik suole chu Galilee ram sũaga Cana khopuia inneina aoma. Jisua nũ khom mahan a oma,

²Jisua le a ruoisingei khom inneina han an siel ngei sa.

³Uain an hun khâiloi lehan, Jisua nũ han a kôm, "Uain an insam zoi kêng hi," a tia.

⁴"Khoimo ko tho rang mi ni ril rang nãng mak," Jisua'n, "Ko zora la tung mak." tiin a thuona.

⁵Jisua nũ han tîrlâmngei kôm han, "Nangni a bê murdi tho roi," tiin a ril ngeia.

⁶Judangei rusûk minsâi balam an dôn anghan lung tuibêl uruk mahan aoma, an sika liter razakhat keng theina chit an ni.

⁷Jisua'n tîrlâmngei kôm, "Tuibêl ngei han tui min sip roi," a tia, anni ngei han an min sipmata,

⁸male an kôm, "Atûn chu thâl unglã, moiruoipu kôm se pui roi," tiin a ril ngeia. Ama kôm han tui ha an chõia,

⁹maha uain ahong chang zoia, moiruoipu khom han a tem vika. Uain ha kho renga hong mini riet mak (aniatachu, tui thâla an mang, tîrlâmngeiin chu an rieta); masikin mâkpa hah a koia,

¹⁰male a kôm, "Mitinin uain sa an sem baka, nũk tieng khuolmingeiin an buong suo nũkin chu uain sa bâkloi an sem ngâia. Aniatachu, nangman chu atûn tena uain sa na la sem banga!" a tipea.

¹¹Hi sininkhêl hih Jisua'n Galilee rama Kana khopuia motontaka a sin ani; mahan a roiinpui tie ân phuonga a ruoisingeiin ama an iem zoia.

¹²Masuole chu, Jisua le a nũ, a lâibungngei, male a ruoisingei Capernaum tieng an sea, mahan môrkhat chu an om zoi.

Jisua Biekina a se

(Mat 21:12-13; Mk 11:15-17; Luk 19:45-46)

¹³Judangei Kalkân Kût anâi zoia, masikin Jisua Jerusalema a sea.

¹⁴Mahan Pathien Biekina serâtngei, kêl le belringei khom, male pharvali juorngei le sumthûngâingei an dosângngei kôla an insung a mua.

¹⁵Masikin rûiruol a jêmna rang a sina, kel, belringei le serâtngei an reng rêngin Pathien Biekin renga a mojôk ngei heta; sumthûngâingei an sumdârngei khom a cheknôineka, an dosângngei khom a nam melet pe ngeia,

¹⁶male pharvali juorngei kôm han chong a pêk ngeia, “Mangei hih hi mun renga hin chôipai roi! Ka Pa in hih sadâi munin sin khâi no roi!” a tia.

¹⁷“O Pathien, ni in ranga kêl pêkna hin, ku sûnga hin mei angin mi kâng ani,” tia ânziek ha a ruoisingei han an rietsuok nôk zoi.

¹⁸Juda rachamneipungei han chongrekel leh a kôm an hong kêr nôka, “Hima anga tho rangin racham no dôn tiin i sininkhêl thôn mo, mi ni min mu rang?” an tia.

¹⁹Jisua'n an kôm, “Hi Biekin hih set unglâ, male sûnthumin sin minding nôk ki tih,” tiin a thuona.

²⁰Hanchu Judangei han, “Hi Biekin sinna rangin kum sômminli leiruk anânga! Nangman sûnthumin ni sinminding nôk thei rang mo?” tiin an rekela.

²¹Aniatachu Jisua'n biekin a ti hah ama takpum ke a tina ani.

²²Masikin thina renga ân thoinôkin chu, a ruoisingeiin hi thurchi hih a lei misâr suozoi, ani ti an riet suoka, Pathien lekhabua chong le Jisua'n a lei ti sai ngei ha an iem zoi.

Jisua'n miriem nina a rietna

²³Jisua Kalkân Kûta Jerusalema aom lâiin mi tamtakin a sininkhêl tho hah an mu sikin ama an iem zoia.

²⁴Hannirese Jisua'n ha mi ngei hah a riet ngei let sikin an chungâ taksôn zoi maka.

²⁵Mangei mulungrîl ngeia han khoimo aom ama'n a riet var sikin tutên, mangei chungroi hah an ril rang nâng mak.

John 3

Jisua le Nicodemus

¹Hanchu Phariseengei pâl kêra mi inkhat a riming Nicodemus Judangei ruoipu aoma.

²Jân khat chu Jisua kôm a sea, a kôm, “Rabbi, Pathien juongtîr Minchupu ni ni ti kin riet. Pathien an chungâ aom nônchu tutên nangma angin sininkhêl ngei hih tho thei no ni ngei,” a tia.

- ³Jisua'n, "Chongdiktak nang ki ril: tutu khom a suok nôk nônchu Pathien Rêngam mu thei no ni ngei," tiin a thuona.
- ⁴Nicodemus'n a rekela, "Kho angin mo mi ulien a chang suo nûkin a suok nôk thei rang? A nû sînga lûtin voinik suok thei no nih!" a tia.
- ⁵Jisua'n, "Chongdiktak nang ki ril ani. Tukhom tui le Ratha'n a suok nôk nônchu Pathien Rêngam lût thei no nih.
- ⁶Taksân ânzir kai chu taksa mi an nia, Ratha'n ânzir kai chu ratha mi an ni.
- ⁷Nu suok nôk rang kêng ki ti hih kamâm aom ti no roh.
- ⁸Phâivuo hih anuomna ti-tieng asêma; arahang khom ni riet, aniatachu khotieng renga hong mo, khotieng mo ase rang riet mak che. Ma angdên hah ani, tukhom Ratha'n a suok nôk nônchu," a tipea.
- ⁹Nicodemus'n, "Kho angin mo anithei ranga?" tiin a thuona.
- ¹⁰Jisua'n a kôm, "Israelngei lâia minchupu lien ni nia, hima roi hih ni riet minthâr theiloi mini?
- ¹¹Chongdiktak nang ki ril: kin ti hih kin riet ania, kin mu hih kin ril ani; hannoma, kin thurchi misîr tutên pom nuom mak chei.
- ¹²Rammuola neinunngai chungroi ki misîr luu nin iem nônchu; i angin mo invân neinunngai chungroi ki misîr hin nin iem thei ranga?
- ¹³Invân renga juong chumpu, Miriem Nâipasal tiloiiin chu, tute invâna lei hong se sai la om mak ngei."
- ¹⁴Moses'n ramchâra sumdâr murûl a târ anghan Miriem Nâipasal khom târin a om ngêt rang ani,
- ¹⁵masika han tukhom ama iem kai chu kumtuong ringna an dôn theina rangin.
- ¹⁶Pathien'n rammuol a lungkham tatak sikin a Nâipasal khât a pêka, masika han tukhom ama iem kai chu thi loia kumtuong ringna an dôn theina rangin.
- ¹⁷Pathien'n rammuol theiloi mintum rangin a Nâipasal juongtîr maka, rammuol sanminring rangin kêng a juongtîr ani.
- ¹⁸Tukhom Nâipasal a iem kai chu theiloi intumin om no ni ngeia, tukhom a iem loi ngei chu atûn renga theiloi changin an om zoi, Pathien Nâikhât an iem loi sikin.
- ¹⁹Mahi theiloi intumna chu ani: vâh ha rammuola ajuonga, aniatachu, mingeiin avâr nêkin ajîng an midit uola, an sinthongi hah asaloi sikin.
- ²⁰Tukhom sin saloi tho ngei nâmin chu avâr an henga, avâra hong ngâi mak ngei; asaloi an thongi hah minlang an nuom loi sikin.

²¹Aniatachu, adik sinpu ngeiin chu Pathien chongjômna sintho an ni ti avârin a minlang theina rangin avâra an hong ngâi.

Jisua le John

²²Masuole chu, Jisua hah a ruoisingei leh Judea ramhuola an sea, mahan môrkhat an lâia omin baptis a thoa.

²³John khomin Aenon, Salim khuo kôla han mi a baptis ngâia, ma muna han tui atam sikin. Mingei a kôm an sea, male ama'n a lei baptis ngei ngâia.

²⁴(Ma zora han John ha intângna ina la khum mak ngei.)

²⁵Hanchu John ruoisi senkhatngei le Juda inkhat rusûk minsâina balam roia an inkhala.

²⁶Masikin John kôm an sea, “Minchupu, Jordan râl nisuo tienga no kôma om, a chungroi ni misîr ngâi hah na la riet mo? Asa, atûnhin, ama'n mi a baptis'a mi murdi ama tieng kêng an se suo zoi!” an tia.

²⁷John'n a thuona, “Miriemin ite dôn mak me, Pathien'n a pêk ani nônchu.

²⁸Keima hi Messiah ni mu-ung, aniatachu, a motona tîr ki ni' ti hih nangni ngei reng hi ki rietpuipu nin ni.

²⁹Moi puma chu mâkpa hah ani; hannirese mâkpa mal, a kôla ândinga a he a rangâichaka, a rôl a rietin chu a râisân tatak ngâi. Ma angdên han ka râisâna mikhipin aom ani.

³⁰Ama chu a hôn lal tetet ngêt rang ania, keima chu ko hôn tem tetet rang ani.”

Invân renga Juongpu

³¹Chung tieng renga juongpu chu mi murdi nêka ânchungtak ani. Pila inzir chu pilchung mi ani, pilchung roi a misîr ngâi, hannirese, invân renga juongpu chu mi murdi nêka an chungtak ani.

³²A mu le a riet ngei a misîra, hannoma, tutên a thurchi misîr pom mak ngei.

³³Aniatachu, a thurchi misîr a pom kai chu Pathien chu mi diktak ani ti a nammindet ani.

³⁴Pathien tîrpu'n chu Pathien chong a misîr ngâi, Pathien'n ama Ratha akipin a pêk sikin.

³⁵Pa'n a Nâipasal a lungkham ngâia, neinunngiei murdia a racham nuoi a dar let zoi.

³⁶Tukhom Nâipasal a iem kaiin chu kumtuong ringna an dôn zoi; tukhom Nâipasal chongjômloi chu ringna dôn no ni ngeia, Pathien dûkmintongna nuoa kêng an om rang.

John 4

Jisua le Samari nupangnu

- ¹Phariseengei han John nêkin Jisua ruoisi atam uol, ama'n tui leh mi a baptis a min tam uol ti an riet zoia.
- ²(Adikin, Jisua'n chu tute baptis maka; a ruoisingei vaiin ke mi an baptis ngâi ani.)
- ³Masikin Jisua'n ha anga an ti hah a rietin chu Judea ram a mâka Galilee tieng a kîr nôka;
- ⁴a se tieng Samaria ram palin a se rang anâng ani.
- ⁵Samaria ram sînga han khopui inkhat Sychar an ti han a hong tunga, Jacob'n a nâi Joseph mun a pêkna kôl hah ani.
- ⁶Jacob tuikuong khom mahan aoma, Jisua'n a lam lônna a sôl sikin ha tuikuong kôla han ânsung raka, ma hah sînchimripa ani.
- ⁷Samaria nupang inkhat tuithâl rangin a hongga, male Jisua'n a kôm, “Tui nêk rang mi pêk roh,” a tipea.
- ⁸(A ruoisingei chu sâkruo rochôk rangin khopui sînga an sea).
- ⁹ Nupangnu han a kôm, “Nangma Juda mi ni nia, keima Samaria nupang ki nia, kho-angin mo tui nêk rang mi ni zong hi?” (Judangei han khuri mo, khuriâi mo, Samaria mingeiin an mangna chu mang ngâi khâi mak ngei.)
- ¹⁰Hanchu Jisua'n a thuona, “Pathien neinunpêk le buong rang mi pêk roh tipu hi ni riet nisenla chu, nangman keng a kôm zong na ta; hanchu, ama'n ringna-tui nang a pêk rang ani,” a tia.
- ¹¹Nupangnu han a kôm, “Pu, tui thâlna laka ite dôn mak chea, tuikuong lak ânthûk zana. Khotieng mo ringna-tui na man rang?”
- ¹²Kin pu Jacob'n hi tuikuong hih mi pêka; ama le a nâingei le a sâ vâi ngei murdi khom ma renga hih an lei nêk ngâi ani. Kin pu Jacob nêkin no roiinpui uol mo?”
- ¹³Jisua'n a thuona, “Tutu khom hi tui nêk ngei chu an tui lân râl nôk a ta,
- ¹⁴Hannirese, tukhom an kôma tui ke pêk rang a nêk ngei kai chu an tui inrâl nôk tet khâi no nih. Keiman tui ke pêk rang chu, an sînga tuinâr hong chang a ta, tuinâr han ringna-tui le kumtuong ringna pêk atih,” a tia.
- ¹⁵Nupangnu han a kôm, “Pu, ma tui hah ni pêk roh! ku tui ân râl khâi loina rang le hi tena lâ tuithâl ko hong khâi loina rangin,” a tia.
- ¹⁶Jisua'n ha nu kôm han, “Sênla, no lômpa va koi inla, hong nôk roh,” a tipea.

- 17**Nupangnu'n a kôm, "Lômpa la dôn mu-ung," tiin amanu han a thuona. Jisua'n chong a melea, "Lômpa dôn mu-ung, ni ti hih, ni ti mindik ani.
- 18**Pasal rangnga in ne neipui zoia, male atûna no ompuipa khom hih no lômpa tatak nimak. Chongdiktak ni ni ril ani," a tia.
- 19**Nupangnu han a tia, "Pu, dêipu ni ni ti ki riet."
- 20**"Kin Samari richibulngeiin chu hi tânga hin Pathien chubai an mûk ngâi, aniatachu, nangni Judangeiin chu Jerusalema Pathien chubai kin mûk ngâi ani, nin ti ngâi."
- 21**Jisua'n, nupangnu kôm han a tipea, "Nupangnu, keima mi iem roh, hi tâng le Jerusalem ngêt ni loi khomin mingeiin Pa chubai an mûk zora la tung atih.
- 22**Nangni Samari mingeiin chu nin riet loi chubai nin mûk ngâi; aniatachu keini Judangeiin chu kin riet ke chubai kin mûk ngâi ani, sanminringna hih Judangei renga hong suok kêng ani sikin.
- 23**Hannirese azora atung rang ani zoi, male atûn khom atung tir ani zoi, ma tikin chu Pathien chubai mûk ngeiin Ratha le Chongtakin Pa chubai mûk an tih, Pa'n ma anga mingei ha ama chubaimûk rangin a nuom ngâi ani.
- 24**Pathien chu Ratha ania, ama chubai mûk ngeiin Ratha le chongtakin chubai an mûk rang ani," a tia.
- 25**Nupangnu han a kôm, "Messiah la juong atih, ti ki riet, a juong tikin chu neinunngai murdi mi ril atih," a tia.
- 26**Jisua'n a thuona, "Keima nang chongpuipa hih, ama hah ki ni," a tia.
- 27**Ma lâitak han a ruoisingei an hong kîr nôka, nupang leh an chong an mua an kamâm sabaka. Aniatachu, tutên ha nu kôm han, "Imo no zong?" aninônchu ama kôm, "Ithomo nupang no chongpuia?" tiin khom ite rekel mak ngei.
- 28**Hanchu nupangnu hah a tuibêl mâkrakin khopui sûnga a kîra, male mingei kôm,
- 29**"Ki sin lei tho ngei murdi a ril thei let mi inkhat a oma, hong en ta u, Messiah ni thei ni mo?" a tia.
- 30**Masikin khopui renga an hong a Jisua kôm an va se zoi.
- 31**Ma zoratak han ruoisingeiin, "Minchupu, sâk-sâk bak hi roh!" tiin an lei ngêna.
- 32**Nikhomsenla Jisua'n, "Nin riet loi bu nêk rang ko dôn," tiin a thuona.
- 33**Masikin ruoisingei han anni leh anni anin rekela, "Mîn bu an hong chôi pe mini?" an tia.

³⁴Jisua'n an kôm, “Mi tîrpu lungdo sin le a sin zoi rang hi ku bu tuitak ani, a tipe ngeia.

³⁵Nangnin chu, ‘Bu âtna rang tha minli ala om nin tia.’ Aniatachu nangni ki ril, loingei so en sabak ta u; atûn renga ât rangin bungei an min zoi!

³⁶A âtpu'n chu rathaman a man ngâia, kumtuong ringna dêna om rangin amara a mintûp ngâi; masikin a lingpu le a âtpu an râisân ânruol theina rangin.

³⁷‘Mi inkhatin a linga, mi dangin a ât ngâi,’ ti hi adik ani.

³⁸Nin sin loina muna nangni ki tîr; mi dangin an sina, an sin sai hah nin ât ani,” a tia.

³⁹Nupangnu han, “Ki sin lei tho ngei murdi ni ril let,” tiin a thurchi a misîr pe ngei sikin Samari khopui mingei, mi tamtakin Jisua an iem zoi.

⁴⁰Masikin, Samari mingei ha Jisua kôm an hongga, an kôm om rangin an ngêna, male Jisua'n ha khopui han sûnnik a châm zoi.

⁴¹Midang tamtakin khom a thurchi misîr sikin an iem sa zoia,

⁴²male anni ngei han nupangnu kôm, “Atûn chu mi ni misîr pe sika ni loiin keini lelên a thurchi misîr kin rieta, hi mi hih rammuol sanminringpu ani khet ti kin riet zoi,” an tia.

Jisua'n sorkâr ulien nâipasal a mindam

⁴³Ma khopui han sûnnik a châm suole chu a mâka Galilee rama a se zoi.

⁴⁴Ama rang nanâk ân tia, “Dêipungei chu an ram nanâka chu miritin om ngâi mak ngei,” tiin.

⁴⁵Galilee rama a tungin chu mipuingeiin an lei phâm tataka, Jerusalema Kalkân Kût han inchelin Jisua sintho ngei murdi ha an mu sikin.

⁴⁶Hanchu, Jisua ha Galilee rama Cana khuoa tui uain a min changna han a hong nôka, sorkâr ulien inkhat a oma, a nâipasal Capernaum khuoa dam loiin a om ani.

⁴⁷Jisua Judea ram renga Galilee rama a hong ti a riet lehan a kôm a sea, Capernaum khuoa sea, a nâipasal juong mindam rangin Jisua a ngêna, a nâipasal hah a thi vang zoi ani.

⁴⁸Jisua'n an kôm, “Sininkhêl ngei le neinun kamâmomngei nin mu nônchu tutên iem no tu nui,” a tipe ngeia.

⁴⁹Sorkâr ulien han, “Pu, ka nâipasal a thi mân ni juong pe roh,” tiin a thuona.

⁵⁰Jisua'n a kôm, “Se nôk ta roh, na nâipasal a dam zoi!” a tipea. Ha mi han Jisua chongngei ha iem pumin a se zoi.

⁵¹Hanchu a in a pan lâiin lampuia a tîrlâmngêi leh annin tonga, “Na nâipasal a dam zoi!” an tipea.

⁵²Ama'n an kôm, a nâipasal lei dam zora tak hah a rekel ngeia, annin a kôm, “Mazan chonûktieng dârkhat inring han a mintun a lei mathân zoi,” an tipea.

⁵³Hanchu, a pa han Jisua'n a kôm, “Na nâipasal a dam zoi,” a tipe zora tak hah ani ti a riet zoi. Masikin ama le a inmingei anrêngin an iem zoi ani.

⁵⁴Ma hah Jisua'n Judea ram renga Galilee rama a hong suo nûka a sininkhêl sin avoinikna ani.

John 5

Jisua'n dîla mi a mindamna

¹Masuole chu, Jisua Jerusalema sakhuo tienga khohoi aom sikin a sea.

²Jerusalem Belri Mokot kôla han dîl inkhat aoma, Hebrew chongin Bethzatha an ti ngâi; ma dîl han bokrop rangnga aoma.

³Ma bokropngei han damloi ngei loko tamtak an jâla mitcho ngei, kholra ngei le phalkhatthi ngei, tui singânsa zora an ngâka,

⁴a kakâra dîl han vântîrton, a juonga, tui ha a juong chek ngâi. Ma tui singânsa zora han dîla a lût masatak chu i-anga natna khomnirese an dam ngêt ngâi.

⁵Mi inkhat kum sômthum leiriet damloi a oma.

⁶Jisua'n a jâlin ava mua, male zora sôt tak renga damloia om ani ti a rieta; masikin a kôm, “Dam rang no jôt mo?” tiin a rekela.

⁷Hanchu damloipu han, “Pu, tui singânsa zora dîla mi juong thak rang lak dôn mu-ung; ke se khomin mîn, min khêl nôk ngâi,” tiin a thuona.

⁸Jisua'n a kôm, “Inthoi inla, na jâmpher louk inla, lôn ta roh,” a tipea.

⁹Ha mi han voikhatrengin a hong dam kelena; a jâmpher chôiin a lôn phut kelen zoi. Ma nikhuo hah sabbathni ania,

¹⁰masikin Juda rachamneipungeiin a dampu kôm han, “Avien hin sabbathni kêng ani, jâmpher chôia lôn hi ei balam nimak,” an tipea.

¹¹Ama han an kôm, “Ni mindampu'n, ‘Na jâmpher louk inla, lôn ta roh’ mi ti kêng,” tiin a thuona.

¹²Anni ngei han, “Hi anga tho ranga nang rilpu hah tumo ani?” tiin an rekela.

¹³Hannirese, ha a dampu han Jisua hah tumo ani riet mak, ha muna han mipui an tam sikin Jisua chu a rotpat zoi.

¹⁴Chomol suole chu, Jisua'n ama hah Biekina a mua male a kôm, “Rangâi roh, na dam zoi ani; masikin nunsie tho nôk khâi no roh, nu chung a natna saloi uol hong tung nih,” a tia.

¹⁵Masuole chu ha mi han Juda rachamneipungei kôm a mindampu chu Jisua ani ti ava ril ngeia.

¹⁶Masikin sabbathni mi a mindam an ti sikin Jisua hah dük an mintong zoi.

¹⁷Jisua'n an kôm, “Ka Pa'n sin a tho tit ngâia, male kei khom sin ko tho ngêt rang ani,” tiin a thvon ngeia.

¹⁸Ma anghan a ti sikin Juda rachamneipungeiin that rang an bôk uol nôk zoi; Sabbathni balam a siet ti vai niloiin, Pathien hah a Pa angin a bêa, ama khom Pathien leh ân-angin ân bê ti sika khom ani.

Nâipasal rachamneina

¹⁹Masikin Jisua'n a thvon ngeia, “Chongdik tak nangni ki ril: Nâipasal athenin ite tho thei maka; a Pa sintho a mu ngei kai vai ke a tho ngâi. Pa'n sin a tho kai ke Nâipasal khomin a tho ngâi ani.

²⁰Pa'n Nâipasal a lungkhama male a tho murdi a min mu ngâi ani. Hi nêka neinun roiinpui a tho rang khom la min mûng atih, male nin rêngin nin la kamâm rang ani.

²¹Pa'n mithi a kaithoia ringna a pêk ngei anghan, Nâipasal khomin a nuom kai chu a min ring ngâi.

²²Pa'n tute roijêk pe ngâi maka. Roijêk rangin Nâipasal kôm kêng rachamneina akipin a pêk zoia,

²³masikin mi murdi'n Pa mirit an tho anghan Nâipasal khom mirit an tho theina rangin. Tukhom Nâipasal mirit tho loi kai chu Pa a tîrpu mirit tho loi ani.

²⁴“Chongdik tak nangni ki ril: Tukhom ko chong rieta mi tîrpu iem kaiin chu kumtuong ringna an dôn zoi. Theiloi changin om mak ngeia, thina renga an jôka ringna han an lût zoi ani.

²⁵Chongdik tak nangni ki ril: azora atung rang ani zoi, atûn khom atung tir zoi, male mithi ngeiin Pathien Nâipasal rôl riet an ta, a riet ngei kai chu hong ring an tih.

²⁶Pa ha ringna nâr ani anghan, Nâipasal khom ringna nârin a sin ani.

²⁷Male Miriem Nâipasal ani sikin a kôm roijêk rangin rachamneina a pêk ani.

²⁸Ma hi kamâm no roi; azora atung rang ani zoi, ma tikin chu mithi ngeiin a rôl riet an ta,

²⁹male an thânngêi renga hôn thoi an ta: sin sa tho ngei chu ringna changin inthoi nôk an ta, sin saloi tho ngei chu theiloi changin inthoi nôk an tih.

Jisua rietpuipungei

³⁰“Ke thena rachamneinân ite tho thei mu unga; Pathien'n ni ril lam anghan roi ke jêk ani, masikin ko roijêk chu adik ani. Keima ku nuom hi sin rangin bôk mu unga, mi tîrpu lungdo kêng sin rang ko bôk ani.

³¹“Ku thurchi nanâk misîr rong, ku thurchi misîr ha adik tiin pom thei ni no ni.

³²Aniatachu ku thurchi mi aminrietpu chu mi dang ania, male ama'n ku thurchi a misîr hah adik ti ki riet.

³³Nangnin John kôm thangtheipungei nin tîra, ama han chongtak ruthûlin chong nangni a lei rila.

³⁴Munisi rietpuipu ko dôn ngêt rang ki ti nimaka; mahi sanminringa nin om theina ranga ki ti ani.

³⁵John hah châti vârtak le ân-ângtak angin ani, male zora bongkit vai mang rang nin nuom ani anghan.

³⁶Hannirese, rietpuipu ko dôn hi chu John minrietna chong nêkin a roiinpui uol: Khoimo ko tho, ma hah, Pa'n sintho ranga mi pêk ani, ki sintho ngêt hin Pa mi tîr ani ti ku thurchi a minriet ani.

³⁷Male Pa mi tîrpu khom han a minriet zoi, nangnin chu khotik lâi khomin a rôl la riet ngâi mak chei, a mêl khom la mu mak chei,

³⁸male a chong khom nin mulungrîlgeia vong ngâi mak chei, a tîrpu hi nin iem loi sikin.

³⁹Asûnga kumtuong ringna aom ti nin sabei sikin, Pathien Lekhabungei ha nin pore ngâi. Male Pathien Lekhabungei han ku thurchi an misîr ani!

⁴⁰Hankhoma, ringna nin dôna rangin ko kôm hong jôt ngâi mak chei.

⁴¹“Munisi minpâkna rok mu-ung.

⁴²Aniatachu kho anga miriem mo nin ni nangni ki riet, male nin mulungrîlgei han Pathien lungkhamna dôn mak chei ti ki riet.

⁴³Ka pa rachamneina leh ku juong ani, hannirese mi modôm mak choia; nikhomrese, tumakhatin ama rachamin hong rese chu lei modôm nin tih.

⁴⁴Pathien inkhat vai renga minpâkna man rang nuom mak choia, inkhat le inkhat inpâk inlôm kêng nin min luta; nônte, kho angin mo mi nin iem rang?

⁴⁵Nikhomrese, keiman Pa makunga nangni doi ki tih tiin mindon no roi. Nangni doi rang chu mi inkhat aom, nin sabeipu Moses ha.

⁴⁶Moses nin iem tatak chu, kei khom mi nin iem rang ani; ama han ku chungroi kêng a miziek sikin.

⁴⁷Aniatachu a miziek nin iem nônchu, kho angin mo ko chong nin iem thei ranga?" a tia.

John 6

Jisua'n mi isâng rangnga a vâina roi

(Mat 14:13-21; Mk 6:30-44; Luk 9:10-17)

¹Masuole chu, Jisua Galilee dîl râl inkânin a se zoi. (Tiberias dîl khom an ti sa ngâi).

²Damloi ngei chung a sininkhêl ngei an mu sikin loko tamtakin an jûia.

³Jisua hah muola a kala male a ruoisingei leh an insunga.

⁴Kalkân kût zora ha anâi zoia.

⁵Jisua'n akôl akieng a hong ena, loko tamtakin ama tieng an hong pan a mua, masikin Philip kôm han, "Hi mingei sâk rang vâipôl khonmo ei rochôk rang?" a tia.

⁶(Hi chong hi Philip minsina ranga a ti ani, adiktakin chu imo a tho rang lam ama'n a riet sai ani.)

⁷Philip'n a kôm, "Mitinin achîn tete min chang ngei rang khomin sumdâr duli razannik man vâipôlin luo hun no ni ngei," tiin a thuona.

⁸A ruoisingei adang inkhat, Simon Peter lâibungpa Andrew'n a tia,

⁹"Barli vâipôl pêk rangnga le nga inik a dôn pasalte inkhat hi hin aom. Aniatachu hi dôra mingei sâk rangin chu hun no ni ngei," a tia.

¹⁰Jisua'n, "Mipuingei hah minsung roi," tiin a ril ngeia. (Ma mun han durba tamtak aom.) Mipuingei ha an insung zoia; mi isâng rangnga dôr an ni.

¹¹Jisua'n vâipôl hah a lâka, Pathien kôm râisânchong a rila, male mipui ânsungngai hah a sem pe ngeia; ma angdên han nga khom a sem nôka, an nuom do-dôr a sem pe ngeia.

¹²An khoptang suo nûkin a ruoisingei kôm, "Ite inpai riek loi rangin an sâk minieng; khom rûtvar roi," a tipe ngeia.

¹³Masikin barli vâipôl rangnga sâk ngei, an sâk minieng ha tabong sômleunik an la rût min sipa.

¹⁴Ha mingei han Jisua sininkhêl sin hah an mûn chu, "Hi mi hih dêipu tatak, rammuola juong rangpu ha ani khet!" an tia.

¹⁵Anni ngei hah hongin, ama hah rangrâta sûrin rêng minchang rang an bôk ti Jisua'n a rieta; masikin athenin muola a se nôk zoi.

Jisua tui chung a lôn

(Mat 14:22-33; Mk 6:45-52)

¹⁶Kholoi ahong nin chu, Jisua ruoisingei hah dîla an juong sea,

¹⁷rukuonga an chuonga, dîl râl Capernaum tieng an pana. Jân ahong ni tena khom Jisua hah an kôm la hong tung maka.

¹⁸Hanchu pháivopui hong rângin ahong sêma male tuidâr ahôn soka.

¹⁹Hanchu ruoisingei han kilometer rangnga mini, uruk mini an hong jâpin chu Jisua hah tui chung a lônin rukuong tieng a hong panin an mua, an lei chia.

²⁰Jisua'n an kôm, “Chi no roi, keima kêng ki ni!” a tipe ngeia.

²¹Hanchu râisântakin rukuonga han an min chuonga, male rukuong leh an va pana, tângkôl hah harengan an tung kelen zoi.

Mingeiin Jisua an rok

²²Anangtûka chu dîl râl kângkhat tienga mipui a omngei han rukuong inkhat vai mahan aom ti an rieta. Jisua chu a ruoisingei leh rukuonga chuong loiin, anni ngei ha makin anthenin an se ti an riet zoia.

²³Pumapa'n râisânchong a ril suole lokongeiin vâipôl an sâkna mun kôla han rukuong dang ngei Tiberias renga an hong tunga.

²⁴Mipuingeiin Jisua le a ruoisingei chu ha muna han om khâi mak ngei ti an rietin chu anni khom rukuonga chuongin Capernauma, Jisua rok rangin an se zoi.

Jisua ringna vâipôl

²⁵Mipuingei han Jisua dîl râl an hong mûn chu a kôm, “Minchupu, khotik han mo hi tieng râl no hong tung?” an tia.

²⁶Jisua'n an kôm, “Chongdiktak nangni ki ril: sininkhêl ngei nin riet sika mi nin rok ni loiin, vâipôl nin sâk man sika mi nin rok kêng, tiin a thuona.

²⁷Vâipôl asiet nôk thei ngâi rangin sin no unglâ; manêkin chu kumtuong ringna vâipôl adier rangin sin roi. Hi vâipôl hih Miriem Nâipasalin nangni a pêk rang ani, Pathien, Pa, han ama sînthona a chung a adar zoi sikin.”

²⁸Masikin anni ngei han a kôm, “Pathien lungdo kin sin theina rangin imo kin tho rang?” tiin an rekela.

²⁹Jisua'n a thon ngeia, “Pathien'n khoimo sin ranga nangni a nuom chu a tîrpu iem hih ani,” a tia.

- 30** Anni ngei han a kôm, “I sininkhêl mo ni sin rang, kin mua nang kin iem theina rangin? Imo no tho rang?”
- 31** Kin richibulngei chu ramchâra han manna an sâk ngâia, Pathien lekhabu'n ati anghan, ‘Invân renga vâipôl sâk rang a pêk ngei,’ tiin chong an thuona.
- 32** Jisua'n an kôm, “Chongdiktak nangni ki ril,” “Moses'n vâipôl nangni a pêk hah invân renga nimaka; Ka Pa'n kêng invân renga vâipôl diktak nangni a pêk.
- 33** Pathien'n vâipôl nangni a pêk chu invân renga a juong chuma rammuol ranga a ringna pêkpu hih ani.”
- 34** Anni ngeiin, “Pu, ma vâipôl hah mi pêk bang roh,” an tia.
- 35** Jisua'n an kôm, “Keima hih ringna vâipôl ki ni.” “Tukhom ko kôma hong ngei chu an vonchâm no nia; tukhom keima mi iem ngei chu an tui inrâl khâi no ni.
- 36** Atûn hin, nangni ki ril, mi nin mua aniatachu mi iem mak chei.
- 37** Pa'n mi pêk ngei kai chu ko kôm hong an tih. Ko kôma hong kai chu tute rujûl tet noning,
- 38** ku lungdo sin ranga invân renga juong ni mu unga, mi tîrpu lungdo sin ranga juong kêng ki ni.
- 39** Ma hih mi tîrpu lungdo chu ani, mi pêk ngei murdi tute minmang loiin nikhuo nûktaka chu aringin kaithoi inlang, ti hih.
- 40** Ka Pa'n a nuom tak chu tukhom Nâipasal mua a iem ngei murdi'n chu kumtuong ringna dôn senla ngei, keiman nikhuo nûktaka, mangei hah kaithoi ngei inlang ti hi ani,” a tia.
- 41** “Invân renga vâipôl juong chum ki ni,” a ti sikin mipuingei hah an chierlul zoi.
- 42** Masikin anni ngei han, “Hi mi hih Joseph nâipasal Jisua hah nimak mo? A nû le a pa khom ei rieta. Nônte, kho angin mo, invân renga juong chum ki ni a ti thei hi?” an tia.
- 43** Jisua'n an kôm, “Nin thenin chier kekêng no roi.
- 44** Pa mi tîrpu'n a kaikuo'i nônchu tute ko kôm hong thei no ni ngei; male keiman nikhuo nûktaka chu kaithoi ngei ki tih.
- 45** Dêipungei lekhabua, ‘Pathien'n mitin la minchu ngei atih,’ tiin an miziek ani. Mitin Pa chong rieta ânchu ngei kai chu ko kôm an hong ngâi.
- 46** Mahi tutên Pa an mu zoi ki tina nimaka; Pa kôm renga juongpu vaiin kêng Pa ha a mu ani.
- 47** Chongdiktak nangni ki ril: tukhom a iem kai chu kumtuong ringna an dôn zoi.
- 48** Keima hih ringna vâipôl ki ni.

- ⁴⁹Nin richibulngeiin ramchâra manna hah an sâka chu an thi dên ani.
- ⁵⁰Aniatachu, invân renga vâipôl juong chum hi chu tukhomin an sâka anîn chu thi khâi no ni ngei.
- ⁵¹Keima hi vâipôl aring invân renga juong chum ki ni. Tukhomin hi vâipôl hih a sâkin chu kumtuongin ring tit atih. Vâipôl ke pêk rang chu ka taksa hi ani, rammuol ringna ranga ke pêk chu” a tia.
- ⁵²Masikin Judangei ha taksîn an inkhal phut zoia. “Kho angin mo hi miriempa hin a taksa ei sâk rangin mi pêk thei ranga?” tiin an rekela.
- ⁵³Jisua'n an kôm, “Chongdiktak nangni ki ril: Miriem Nâipasal taksa hih nin sâk noa, a thisen khom nin buong nônchu nin thethenin ring thei no tunui.
- ⁵⁴Tukhom ka taksa a sâka, ki thisen a buong kai chu kumtuong ringna an dôn zoi, male anni ngei ha keiman nikhuo nûktaka kaithoi ngei ki tih.
- ⁵⁵Ka taksa hi bu diktak a nia; ki thisen hi buong ruo tak ani.
- ⁵⁶Tukhom ka taksa sâka, ki thisen buong ngei kai chu keima ko kôm an om banga, male kei khom an kôm ko om bang ngâi.
- ⁵⁷Pa aring han mi tîra, male Pa jâra ring ki ni sa. Ma angdên han ka taksa sâk ngei kai chu keima jârin ring an tih.
- ⁵⁸Ma hih invân renga vâipôl juong chum chu ani; nin pilepungeiin vâipôl an sâka an thi nôk angha nimak. Tukhom hi vâipôl sâk ngei kai chu kumtuongin ringtit an ti.”
- ⁵⁹Hi chong hih Jisua'n Capernaum synagog taka a minchu lâia a ti ani.

Kumtuong ringna chonggei

- ⁶⁰A nûkjûi tamtak ngeiin hi Chong hih an rietin chu, “Hi minchuna hih chong ngartak kêng ani. Tumo a rangâi thei ranga?” an tia.
- ⁶¹Tutên ril loiin, ha roia an chier ani ti Jisua'n a mulungrîlin a rieta, an kôm, “Hi roi sika hin nin mulung amin hoiloi mini?”
- ⁶²Nônte, chongkhatin, Miriem Nâipasal hih motona a omna ngâia a kîr nôk nin mu tika kho angin mo nin tho rang?
- ⁶³Ringna pêkpu chu Pathien Ratha ania; munisi ranak chu ite a mangna omak. Nin kôma ki misîr chonggei hih ringna pêkpu Pathien Ratha ani.
- ⁶⁴Hannoma senkhat chu iem mak chei,” a tia. (Jisua'n aphut renga tu ngei mo a iem loi rang le tu lelên mo a minsûr rang a riet chien sai ani.)
- ⁶⁵Male a bôksa nôka, “Hi sika hin kêng, Pa'n a thop nônchu tute ko kôm hong thei no ni ngei ki ti ani.”

⁶⁶Masika han Jisua nûkjûi ngei mi tamtakin nûkkîr an thoa, ama jûi khâi mak ngei.

⁶⁷Masikin Jisua'n ruoisi sômleinik ngei kôm, “Nangni khom rot rang nin jôt mo?” tiin a rekel ngeia.

⁶⁸Simon Peter'n a kôm, “Pumapa, tu kôm mo kin rot ranga? Kumtuong ringna chongnei laka nangman no dôna.

⁶⁹Male atûn chu kin iema, Pathien renga juong Mi Inthieng ni ni ti kin riet zoi,” a tia.

⁷⁰Jisua'n a kôm, “Nangni sômleinik ngei hih keiman nangni ka thang nimak mo? Hannoma nin lâia mi inkhat hih diabol kêng ani!” tiin chong a mele.

⁷¹Ama han Judas, Simon Iscariot nâipasal chungroi a misîr ani. Judas hah ruoisi sômleinik ngei lâia mi nikhomsenla, ama a minsûr rang ani sikin.

John 7

Jisua le a lâibungnei

¹Masuole chu, Jisua'n Galilee rama a chaia; Juda rachamneipungeiin that rang an bôk sikin Judea rama chu chai nuom khâi mak.

²Judangei Kâirêng khohoi zora anâi zoia,

³masikin Jisua lâibungnei han a kôm, “Hi mun hih mâk inla, Judea rama se roh, masika han nu nûkjûi ngeiin ni sintho an mu theina rangin, an tia.

⁴Ama riming inthang rang nuompu chu tutên a sintho thup ngâi mak. Hi neinunnei hih ni sin anînchu rammuol pumpuiin nu chungroi riet rese bah!” an tia.

⁵(A lâibungnei luon ama iem mak ngei.)

⁶Jisua'n an kôm, “Keima rangin chu azora diktak la tung mak. Zora pai hih nangni rangin chu adik ani.

⁷Rammuolin nangni mumâk maka, aniatachu keima chu mi mumâk ngâi, a sintho ngei ha sa mak tiin ki ril ngâi sikin.

⁸Khohoia nangni lei se roi, kei chu khohoia la se thei no ning, ko zora diktak ala tung loi sikin,” a tia.

⁹Ma chong hah a ti suole khom ama chu Galilee rama a la om bang.

Jisua Kâirêng Khohoia ân chel

¹⁰A lâibungnei khohoia an se suole chu Jisua khom a se sa; ânlangin chu se maka, inrûkin a se zoi.

- 11Juda rachamneipungeiin khohoia han ama an roka, “Khonmo aom?” tiin an rekel titira.
- 12Mipuingeiin a chungroia an inkereng chichiena; senkhatin, “Miriem sa kêng,” an tia. Adang ngeiin, “Nimak, ama kêng mingei lamnôk tieng a tuong ngâi,” an tia.
- 13Hannirese Juda rachamneipungei an chi sikin tutên ânlangin chu a chungroi misîr ngam mak ngei.
- 14Khohoi ha inang dôr an mang tena chu Jisua Biekina a sea mingei a minchu phut zoi.
- 15Juda rachamneipungei han an kamâm sabaka, “Hi mi hi ânchuna boi tetin kho angin mo madôr a riet thei hi!” an tia.
- 16Jisua'n a thuona, “Ki minchuna chong hih keima kata nimaka, aniatachu Pathien mi tîrpu renga juong kêng ani.
- 17Tutu khom Pathien lungdo a sin nuom kai chu hi minchuna chong hih Pathien renga juong mo, aninônchu ka rachama ko chong mo riet an tih.
- 18Tukhom ama rachama chongpu chu ama roiinpuina man rang a pût ani. Hannirese, a tîrpu roiminpui rang a nuompu'n chu dikna a dôna, male ama sênga han dikloina reng omak.
- 19Moses'n Balam nangni a pêk nimak mo? Hannirese Balam hah tutên jôm mak chei. Ithomo ni that rang nin bôk hi?” a tia.
- 20Mipuingei han, “Ramkhorî nang a sîr nghihi! Tumo nang that rang a bôk?” tiin lokongeiin an thuona.
- 21Jisua'n an kôm, “Sininkhêl inkhat ko thoa, nin rêngin nin kamâm sabaka.
- 22Moses'n nin nâipasalngei sertan rangin chong nangni a pêka (Moses'n a phut nimaka, nin richibulngeiin kêng an phut ani), masikin Sabbathnin pasalte ser nin tan ngâi ani.
- 23Moses Balam asiet loina rangin Sabbathni khom pasalte sertan nin tho ngâi anînte, keiman Sabbathnia mi ki mindam phar sikin ithomo ku chungu nin takasi?
- 24Pêntienga ânlang rang vaiin roijêk mong unglâ, male adiktakin roijêk roi,” a tia.

Ama hih Messiah ani mo?

- 25Jerusalema mi senkhatin an tia, “Hi mi hih rachamneipungeiin that ranga an pût ha nimak mo?”

²⁶En ta u! Mipui rietin thurchi a misîra, male tutên rokôk mak ngei! Ama hih Messiah ani ti an riet tatak zoi mini?

²⁷Aniatachu Messiah a juong tika chu kho renga mo a juong tutên riet no ni ngei. Hi mi hi chu a hongna ei rêngin ei riet-iem ani,” an tia.

²⁸Jisua'n Biekina a minchu lâihan rôl inringtakin a tia, “Tumo ki ni le kho renga hong mo ki ni nin riet tatak mo zoi? Ka rachama juong ni mu-ung. Mi tîrpu chu mi diktak ani. Nangnin chu ama ha riet mak choia,

²⁹aniatachu keiman chu ama ha ki rieta, a kôm renga juong le ama mi tîr ki ni sikin,” a tia.

³⁰Hanchu ama hah sîr rang an pût zoia, aniatachu, azora ala tung loi sikin tutên an kut musum mak ngei.

³¹Hannirese mipui lâia mi tamtakin chu ama an iem zoi, “Messiah a juong tika hi mi hin a sin nêka tam sininkhêl ngei sin thei ni mo?” an tia.

Jisua sîr rangin rungungei an tîr

³²Phariseengeiin Jisua chungroia mipuingei an inkereng chichiena chong an rieta, masikin ochaisingei le Phariseengeiin Jisua sîr rangin rungungei an tîra.

³³Jisua'n an kôm, “Chomolte nin kôm la om ka ta, masuole chu mi tîrpu kôm sêng ki tih, a tia.

³⁴Nangnin mi rok nin ta, mi mu no tunui, ke sena ranga nin se thei loi sikin.”

³⁵Juda rachamneipungei han anni nanâkin, “Ei mu thei lina rangin khotieng mo se rang a ti? Ei mingei omna Greek khopuilienngeia sea, male Greekngei juong minchu rang a ti mini? an tia.

³⁶Nangnin mi rok nin ta mi mu no tunui, ke sêna ranga hong thei no tunui, a ti hih khoimo a tina?” an tia.

Ringna-pêk tuidungnei

³⁷Khohoi chîn rang ni le nikhuo lupuitak ni han Jisua ândinga, rôl inringtakin, “Tukhom a tui ân râk kai chu ko kôm hong senla ngeia, nêk rese ngei, male

³⁸Pathien lekhabu'n ati anghan, tukhom mi iem kai chu a sîng renga ‘Ringna-pêk’ tuinâr ngei luong suok atih,” a tipe ngeia.

³⁹Mahi Jisua'n ama iem ngeiin Ratha an chang rang chungroi a misîrna ani. Ma zora han Ratha pêk la nimaka; Jisua ha roinpuia kaithoi ala ni loi sikin.

Mingei lâia insenna

⁴⁰Mingei lâia senkhatin ha chong hah an rietin chu, “Hi mi hih Dêipu tatak kêng ani ngihi!” an tia.

⁴¹Adangngeiin chu, “Ama hih Messiah kêng ani!” an tia. Hannirese adangngeiin chu, “Messiah chu Galilee ram renga hong suok no nih! an tia.

⁴²Pathien lekhabu'n ati anghan Messiah chu Rêng David jáisuon renga nîng a ta, David omna khopui Bethlehema a suok rang ani,” an tia.

⁴³Masikin Jisua sikin mipuingei lâia insenna aom zoia.

⁴⁴Mi senkhatin sôr rang an bôka, aniatachu tutên a chung a kut musum mak ngei.

Juda Rachamneipungei iemloina

⁴⁵Mi rungpingei ha an hong kîr nôka, Ochaisingei le Phariseengei han an kôm, “Ithomo nin hong tuong loi?” tiin an rekel ngeia.

⁴⁶Mi rungpingei han an thuona, “Hipa anga thurchi misôr reng la om ngâi mak ngei!” tiin an thuona.

⁴⁷Phariseengeiin an kôm, “Nangni khom huongin nin om sa mo ni zoi?” tiin an rekel ngeia.

⁴⁸“Rachamneipungei le Phariseengei lâia mi inkhat luon ama an iem zoi ti nin riet mo?

⁴⁹Hi mipuingei hih Moses Balam riet mak ngei, masikin Pathien khomâksâmna nuoia om kêng an ni!”

⁵⁰Phariseengei lâia mi inkhat Nicodemus, motona Jisua intongpui ranga sêpu ha a oma. Ama'n midangngei kôm,

⁵¹“Ei Balam dungjûiin chu tukhom a chongbâi suok ei riet mân le a sintho ei mu mân chu theilo minchang thei ngâi mak me,” a tia.

⁵²“Asa,” anni ngei han a kôm, “Nang khom Galilee ram renga hong mo ni ni? Pathien Lekhabungei pore inla dêipu Galilee ram renga hong suok ngâi mak ti riet ni tih,” tiin an thuona.

John 8

Nupang inrê an sôr

[¹Hanchu mitinin an ina an sea, aniatachu, Jisua chu Olive tânga a sea.

²Anangtûk jînga ânmanin Biekina a se nôka. Mipuingei murdi a kôm an hôn tûpa; ânsunga anni ngei ha a minchu ngei phut zoia.

³Balam minchupungei le Phariseengei han nupangnu ânre lâitaka an sôrnu hah an hong tuonga, male an rênga an moton han amanu hah an mindinga.

⁴Jisua kôm, “Minchupu, hi nupangnu hih ânre lâitaka kin sôr ani.

⁵Ei Balamin Moses chongpêk angin chu hi nupangu hih lung leh dêng that ngêt rang ani. Atûn hin, nangman kho angin mo ni ti?" an tia.

⁶Ma hah ama min ôkna ranga an ti ani, demna an man theina rangin. Aniatachu Jisua ân kûna, a kutruol leh pil a miziêka.

⁷Ma anga indingin chong an rekel anghan ânthoi lita, male an kôm, "Nin lâia nunsie tho loitakin motontaka lung leh amanu hah dêng bak roi," a tia.

⁸Hanchu ân kûn nôka, a kutruol leh pil a miziek nôka.

⁹A chong hah an rietin chu, a ulien dônin inkhat inkhatin, an rot riei zoia. Jisua hah athenin an mâk raka, nupangnu hah ma muna a lân ding chien lehan.

¹⁰Jisua hah a hôn dinga, nupangnu kôm han, "Khonmo an om suo zoi? Tutên theiloi nang mintum rang om khâi mak ngei na?" a tia.

¹¹Amanu han a thuona, "Pu, tutên theiloi mi mintum mak ngei," a tia. Jisua'n a kôm, "Asa, nôncu, kei khom theiloi nang mintum uol mu-ung. Se roh, hannirese nunsie tho nôk khâi no roh,]" a tia.

Jisua rammuol vâ

¹²Jisua'n Phariseengei kôm a chong nôka. "Keima hi rammuol vâ ki ni," a tia. "Tukhom mi jûi murdi chu ringna vâ dôn an ta, ijînga lôn tet no ni ngei."

¹³Phariseengeiin a kôm, "Atûn hin nu thurchi nanâk kêng ni misîr; nu thurchi misîr dik mak," an tia.

¹⁴"Nimak," Jisua'n an kôm, "Ku thurchi nanâk misîr khom ronga, ki misîr hih adik kêng. Keima chu kho renga mo ku juong le kho tieng mo ke se rang khom ki riet. Nangni chu kho renga mo ku juong aninôncu, kho tieng mo ke se rang riet mak chei.

¹⁵Nangnin chu taksa balam angtakin roi nin tan ngâia; keiman chu tu roi te tan ngâi mu-ung.

¹⁶Ke lei tanna khom om senla, ko roi tanna chu dik atih; asikchu ke theivaia om ni mu unga; Pa mi tîrpu ko kôm a om sikan.

¹⁷Nin Balam lekhabua khom rietpuipu inik an inruola, imo an ti tak chu adik, tiin miziekin aom ani.

¹⁸Keiman ku thurchi nanâk ki misîra, male Pa mi tîrpu khomin ku thurchi a misîr sa ngâi," a tia.

¹⁹Anni ngei han, "Khome na Pa?" tiin ama an rekela., "Nangnin mi riet mak choia, ka Pa khom riet uol mak chei. Mi nin riet nisenla chu ka Pa khom riet nin ti zoi," tiin Jisua'n a thun ngeia.

²⁰Jisua'n hi ngei murdi hih Biekina chôiruol dôngna an darna mun khâltan sũaga a minchu lâia a ti ani. Tutên ama hah sũa mak ngei azora ala tung loi sikin.

Ke sena ranga se thei no tunui

²¹Jisua'n an kôm, “Ke sepat rang kêng ani zoi; nangnin mi rok nin ta chu, nin sietnagei han thâng nin tih. Ke sena ranga se thei no tunui,” a tia.

²²Masikin Juda rachamneipungeiin, “Ke sena ranga se thei no tunui a ti hih amanânkin inthat rang a tina mini?” an tia.

²³Jisua'n a thuon ngeia, “Nangni chu hi rammuola mi nin ni. Kei chu chung tieng renga juong ki ni. Nangni chu hi rammuol renga nin ni, hannirese kei chu hi ramuol renga ni mu-ung.

²⁴Masika han nin sietnagei han thâng nin tih, tiin nangni ki ril ani. Male ‘Keima hih tumo Ki ni’ mi nin iem nônchu nin sietnagei han thi lelê nin tih,” a tia.

²⁵Anni ngei han, “Tumo ni ni?” tiin an rekela. Jisua'n, “Aphut renga nangni ki ril ani.

²⁶Nin chungroia hin misũa rang tamtak, nangni demna rang tamtak ko dôn. I-ih khomnirese, mi tũapu chu mi diktak ani, ama renga ki riet kai ke rammuola ki ril ngâi ani.”

²⁷Jisua'n an kôm Pa chungroi kêng a misũa ani ti riet thei mak ngeia.

²⁸Masikin an kôm, “Miriem Nâipasal hih nin makhâi tika ‘Ama hah Keima ki ni’; ti le keima ka rachamin ite tho mu unga, Pa'n mi minchu kai ke ki misũa ani tiin riet sa nin tih.

²⁹Male mi tũapu chu ko kôm a oma; ke thenin mi mâkrak maka, a lungdo ki sin bang ngâi sikin,” a tia.

³⁰Jisua'n thurchi a misũa ngei hah mi tamtakin an rieta, ama an iem zoi.

Chongtakin nangni min mojôk atih

³¹Masikin Jisua'n ama iem ngei kôm han, “Ki minchuna nin jômîn chu ku ruoisi diktak ngei nin ni rang;

³²chongtak riet nin ta, chongtak han nangni mojôk atih,” a tia.

³³Anni ngei han, “Abraham richisuonpârngei kêng kin ni, tute suoka la om mak me. ‘Suok renga nangni mojôk atih,’ ni ti hih khoi tina mini?” tiin an thuona.

³⁴Jisua'n an kôm, “Chongdiktak nangni ki ril: tukhom nunsie tho chu nunsie suok ani.

³⁵Suok chu insũangmi ni tit ngâi mak, aniatachu Nâipasal chu kumtuongin a om ngâi.

- ³⁶Nâipasalin suok nangni a mojôk vaiin kêng nin jôk tatak rang.
- ³⁷Abraham richisuonpârngei nin ni ti ki riet. Hannoma nangnin ma that rangin nin pût ani, ki minchuna chong nin pom loi sikin.
- ³⁸Keiman ki misîr hih ka Pa mi min mu ani, nangni khom nin pa ngei nangni an ril anghan nin misîr ngâi.”
- ³⁹Anni ngei han, “Kin pa chu Abraham ani,” tiin an thuona. Jisua'n an kôm, “Abraham nâi diktak ngei nin ni nisenla chu a lei tho ngâi anghan nin tho rang ani,” tiin chong a mele ngeia.
- ⁴⁰“Ki sin lei tho ngei murdi chu Pathien renga chongdik ki riet ngei nangni ril hih ani, aniatachu atûn hin ma that rangin nin pût chien ani. Abraham'n chu ma anghin tho ngâi mak!
- ⁴¹Nangni chu nin pa ngei lei tho ngâi anghan nin tho ani,” a tia. Anni ngei han, “Pathien vai kêng kin Pa dôn chu, keini hih a nâi diktak ngei kin ni,” tiin an thuona.
- ⁴²Jisua'n an kôm, “Pathien nin Pa ani tatakini chu, mi nin lungkham rang ania; Pathien renga juong ki ni sikin atûn hin nin lâia ko om ani. Keima rachama juong ni mu unga, ama tîr kêng ki ni, a tipe ngeia.
- ⁴³Ithomo ki misîr hih nin riet thei tet loi? Ku thurchi misîr hih nin mulungrîla nin mindon loi sika ani.
- ⁴⁴Nin pa Diabol nâingei nin ni, male nin pa lungdo jûi nin nuom ani. Ama chu aphut renga mi that ngâi ani, male chongdik tieng khom inchel ngâi mak, dikna reng a dôn loi sikin. Milak a tho tikin ama lungdoa a tho ani ngâi, milakpa ani sikin, milak ngei murdi pa khom ani sa.
- ⁴⁵Hannirese keima chu chongtak kêng ki misîr ngâi, masika han nin iem ngâi loi ani.
- ⁴⁶Nin lâia tumo sietna tienga theiloi mi min chang thei rang? Chongtak ki misîr khomin ithomo nin iem loi?
- ⁴⁷Tukhom Pathien renga juong chu Pathien chong a pom ngâia. Nikhomrese nangni chu Pathien renga nin ni loi sikin, a chong khom nin rangâi loi ani.”

Jisua le Abraham

- ⁴⁸Anni ngei han a kôm, “Nangma hih Samari mi male ramkhorî no dôn kin ti hah dik mak mo?” tiin an rekela.
- ⁴⁹Jisua'n an kôm, “Ramkhorî dôn mu-ung. Ka Pa ki mirita, aniatachu, nangnin mi nin êsêl ani hi.
- ⁵⁰Keima rang nanâk miritna rok ni mu unga. Aniatachu, a rokpu le ku ruthûla a jêkpu mi inkhat a om kêng.

⁵¹Chongtak nangni ki ril ani: tukhom ko chong jômpu chu thi tet no nih.”

⁵²Anni ngei han a kôm, “Ramkhorî no dôn khek tiin kin riet minthâr zoi! Abraham a thi zoia, dêipungei khom an thi suozoi, hannoma nangman chu ‘Ko chong jômpu chu thi tet no ni,’ ni tia, an tipe.

⁵³Kin Pa Abraham nêkin ni lien uol mo? Ama khom a thi zoi; dêipungei khom an thi suozoi. A tutak hamo ani angin nên bê?” an tia.

⁵⁴Jisua'n an kôm, “Keima nanâkin miritna a rok ninlang, ha miritna hah chu ite ni no ni. Kin Pathien nin ti, ka Pa hah mirita mi min ompu chu ani, tiin a thuona.

⁵⁵Nangnin chu ama hah riet tet mak chei, keiman chu ki riet ani. Ama riet mu-ung ki tiin chu nangni angin milak ki ni rang ani. Hannirese, ama ki rieta a chong khom ko jôm ngâi.

⁵⁶Nin pa Abraham'n ku juong a mu rang sikin a râiasân oka, ma anghan a mu tataka, a râiasân sabak ani.”

⁵⁷Anni ngei han a kôm, “Kum sômrangnga luo la kêi mak che ngah, Abraham nu mu na?” an tia.

⁵⁸Jisua'n an kôm, “Chongdik kêng nangni ki ril,” tiin a thvon ngeia, “Abraham ân zir mân khom, ‘Keima’ chu ko om zoi.”

⁵⁹Hanchu a dêngna rang lung an rûta, hannirese Jisua ân thupa, Biekin renga a jôkpai zoi.

John 9

Jisua'n a suok renga mitcho pasal inkhat a mindam

¹Jisua a lôn lâitakin, asuok renga mitcho pasal inkhat a mua.

²A ruoisingeiin a kôm, “Minchupu, hi mi hih tu sietna sika mitchoa ânzir mo? Ama sietna sika mo, a nulepangei sietnangei sika mo?” tiin an rekela.

³Jisua'n an kôm, “Hi pa mitchona hih a sietnangei sika aninônchu a nulepangei sietnangei sika khom ni uol mak. Pathien sinthotheina ranakrât a chungu mu theia aomna ranga ani.

⁴Sûn ani lâi hin, mi tîrpu sin ei tho rang ania; jân ajîng rang kêng ani zoi, ma tikin chu tutên sin tho thei kêi no ni ngei.

⁵Rammuola ko om kêr chu rammuol min vârpû ki ni,” a tia.

⁶Ma hah a ti suole chu, Jisua'n pil a michila, a michil leh han dielnâng a sinna; dielnâng hah a mit ngeia a pol pea,

⁷male a kôm, “Sênla, Siloam dîla na mâi vaphia roh,” a tia. (Siloam riming aomtie chu “Tîr” tina ani.) Ma anghan ha mi hah a sea, a mâi a vaphia, a mit avârin a hong kêr nôk zoi ani.

⁸Hanchu a bungmingei le a kutdo lâi a lei mu ngâi ngei han, “Hi mi hih ânsunga a kutdo ngâipu ha nimak mo?” an tia.

⁹Mi senkhatin chu, “Hi mi hih ani,” an tia, aniatachu adangngeiin chu, “Hi mi hih nimak; ânphuopui kêng ani,” an tia. Masikin amananâkin, “Ha mi hah ki ni,” a tia.

¹⁰Anni ngei han, “Kho angin mo ni mit ahong vâv nôk?” tiin an rekela.

¹¹Ama han, “Mi inkhat Jisua an ti pu han dielnâng a sina, ki mita a pola, male Siloam dîla sênla, na mâi vaphia roh a tia. Ma anghan ke sea, ka mâi ka vaphia suo renghan chu ku mu thei kelen ani,” tiin a thvon ngeia.

¹²“Ama hah khonmo aom?” tiin an rekela. Ama han, “Riet mu-ung” tiin a thvon ngeia.

Phariseengei mitchopa damna roi an sùi

¹³Hanchu mitcho lei ni pu ha Phariseengei kôm an tuonga.

¹⁴Jisua'n dielnâng a sina a mit jîng a mindam pe ni ha Sabbathni ani.

¹⁵Phariseengeiin a mit hong vâv pe nôk chang ha an rekel nôka. Ama han, “Ki mita dielnâng a pola, ka mâi ka vaphia male atûn chu ko hong mu thei zoi ani,” tiin a ril ngeia.

¹⁶Pharisee senkhatin chu, “Hi sin thopu hih Pathien renga juong ni thei no ni, Sabbathni Balam a jôm loi sikin,” an tia. Senkhat nôkin chu, “Kho angin mo mi nunsien, hi anga sininkhêl ngei hih a sin thei ranga?” an tia. Male an lâia insenna aom zoi.

¹⁷Masikin Phariseengeiin ha mi hah vêlkhat an rekel nôka, “Ki mitcho mi minvâv pe, ni tia, asa, nangman te kho angin mo ama chungroi hih ani ni ti?” Ama han, “Dêipu ani,” tiin a thvon ngeia.

¹⁸I-ih khomnirese Juda rachamneipungei han ha mi hah mitchôn ân zira, atûn chu a mu thei zoi ani ti iem thei mak ngei sikin a nulepangei an koia,

¹⁹male an kôm, “Hi mi hih nin nâipasal mo? Asuok renga a mitcho nin ti pu ha mo ani hi; kho angin mo atûn hin a hong mu thei nôk hi?” tiin an rekel ngeia.

²⁰A nulepangei han, “Hi mi hih kin nâipasal ani, asuok renga a mitcho ani ti khom kin riet.

²¹Aniatachu kho angin mo a mit ahong vâv pe, le tumo a mindam pe chu riet mak me. Ama rekel roi; ulien kêng ani zoi, male amananâkin thvon rese!”

²²A nulepangei han Juda rachamneipungei an chi sikin ma anghan an ti ani. Tukhomin Jisua ha Messiah ani tiin an iema anîn chu Synagog renga notpai rang tiin an lei inruol sai ani.

²³Masika han kêng a nulepangei, “Ulien ke ani zoi, ama rekel roi!” an tina ani.

²⁴Mitchopa hah a voiniknân an koi nôka, male a kôm, “Pathien makunga chongdik ril rangin chonginkhâm roh! Nang mindampu hah mi nunsie ani tiin kin riet zoi,” an tia.

²⁵Ama han an kôm, “Mi nunsie ani mo niloi mo ite riet mu unga. Ki riet chu mitcho ki nia, atûn chu ku mu thei zoi,” tiin a thvon ngeia.

²⁶Anni ngei han, “Khoimo nang a tho pe? Kho angin mo ni mitcho a mindam?” tiin an rekela.

²⁷Ama han an kôm, “Michin khom nangni ki ril zoi. Ithomo a riet nin nuom nôka? Nangni khom a ruoisingei chang nin nuom mini?” tiin a thvon ngeia.

²⁸Anni ngei han khomâk an sâma, “Nangma hih ama ruoisi ni ni, keini chu Moses ruoisingei kêng kin ni, an tia.

²⁹Moses kôm Pathien a lei chong ti kin riet; i-ih khomnirse hi mi rang hih chu kho renga hong mo ani khom riet mak me!” an tia.

³⁰Ha mi han, “Ma tak hah neinun kamâm aomna! Nangni chu kho renga mo ani khom riet mak chei, aniatachu ki mitjîng mi minvâr pe ani! tiin a thuona.

³¹Pathien'n mi nunsiengei chong rangâi ngâi mak ti ei rieta; ama jâ ngei le a lungdo sin ngei chong chu a rangâi ngâi.

³²Rammuol insieng phut renga tutên mitcho saia suok a mit a minvâr pe ti la riet ngâi mak me.

³³Hi mi hih Pathien renga juong ni no rese chu hi anga sin hih tho thei no nih.”

³⁴Anni ngei han, “Nangma nunsie'a ânzir le hong lien hin mi minchu rang no bôk mo?” tiin an thuona. Male ama hah Synagog renga an notpai zoi.

Rathatienga mitchona

³⁵Jisua'n ha mi hah notpai ani zoi, ti a rietin chu ava roka, a kôm, “Miriem Nâipasal hih ni iem mo?” tiin a rekela.

³⁶Ama han, “Pu, tumo ani ni ril roh, ki iem theina rangin!” tiin a thuona.

³⁷Jisua'n a kôm, “Ama hah nu mu sai kêng, male atûna nang chongpuipa hih ama hah ani,” a tipea.

³⁸Ha mi han, “Pumapa, ki iem!” a tia, male Jisua kebula khûk ân bila.

³⁹Jisua'n, "Hi rammuola hin roijêk ranga juong ki ni, masikin mitcho ngei an mit a vârna rang le mitvâr ngei an mitchona rangin," a tia.

⁴⁰Phariseengi senkhat a kôla om ngei han ma chong hah an rieta male a kôm, "Adiktakin keini khom hi mitcho kin ni sa ni tina nimak mo?" tiin an rekela.

⁴¹Jisua'n an kôm, "Mitcho nin ni nisenla chu theiloina dôn no tu nui; hannirese kin mu thei nin ti sikin nin theiloina ala om bang ani." tiin a thvon ngei.

John 10

Belrihôlpu chongmintêk

¹Jisua'n a tia, "Chongdik tak nangni ki ril: mi tukhom belrirukul kotbâia lût loia lam dang tienga kala lût chu inru le râtlâksong ani.

²Mi tukhom kotbâi tieng renga lût chu belrihôlpu ani.

³Kotbâi ngâkpu han kotbâi a mo-ong pea; belringeiin a rôl an rieta, a belringei chu an riming chitin a koia, a ruoi ngei ngâi.

⁴A kaisuo ngei suole chu ama moton ânsa pe ngeia, male a rôl an riet sikin, belringeiin a nûk an jûi ngâi.

⁵Midang chu tute jûi no ni ngei; a rôl an riet loi sikin, jûi nêkin tân pe pat an tih," a tia.

⁶Jisua'n hi chongmintêk hi a misâr pe ngeia, hannirese imo a tina riet mak ngei.

Jisua Belrihôlpu sa

⁷Masikin Jisua'n a ti nôka, "Chongdiktak nangni ki ril: Keima hi belringei ranga kotbâi ki ni.

⁸Ko motona lei juong ngei murdi chu inru ngei le râtlâksong ngei an nia, belringei khomin an chong rangâi ngâi mak ngei.

⁹Keima hih kotbâi ki ni. Tukhom keima taka lût chu saminringin om an tih; asûnga lût an ta, jôk an ta, sûlring man sâng an tih.

¹⁰Inru chu muruk rang, that rang le sietminmang rang vaiin kêng an hong ngâi. Kei chu ringna nin dôna ranga ringna akipdira nin dôna ranga juong ki ni.

¹¹"Keima hi belrihôlpu sa, a belringei ta ranga a ringna phal nuom ki ni.

¹²Inlo mi, belrihôlpu dikloi le belringei khom ata aniloi sikin, melang hong a mûn chu belringei a mâkraka male a tân pata; masikin melangin belringei a peta, chek a minchâinek ngâi.

¹³Inlo mi han a tân pata asikchu ama hah inlo mi le belringei rangin lunghâng a dôn loi sikin.

14-15 Keima hi belrihòlpu sa ki ni. Pa'n mi riet anghan kei khom Pa ki rieta, mangdên han ke belringei chu ki rieta anni ngei khomin min riet ani. An ta ranga thi khom hih ku nuom ani.

16 Hi belrirukula la om loi belri dang khom ka la dôn sa. Mangei ha khom la hongtuong sa ka ta, anni ngei han ke he rangâi an ta, male belri pâlkhat la hongni an tih, belrihòlpu inkhat lehan.

17 “Man nôk ranga ki ringna pêk rang ku nuom sikin, Pa'n mi lungkham ngâi ani.

18 Tutên ki ringna hi mi lâk pe thei noni ngei. Keima rachamin kêng ke pêk rang ani. A pêk thei ki nia, male a lâk nôk thei khom ki ni. Mahi kêng tho rangin ka Pa'n chong mi pêk ani.”

19 Hi chongngei sika hin mipuingei lâia insenna aom nôk zoi.

20 Mi tamtakin, “Ramkhorî sôr! Achâng kêng! Ithomo a chong nin rangâi pea?” an tia.

21 Aniatachu adangngeiin chu, “Ramkhorî sôr chu ma anghin chong thei no nih! Kho angin mo ramkhorin mi mitcho amin vâp pe thei ranga?” an tia.

Jisua hih hengpaiin aom zoi

22 Ma zora hah phalbi lâi ania, Biekin ranga Inpêklet khohoi Jerusalema an mang lâitak ani.

23 Jisua chu Solomon bokropa han a vâp lôi a hôn lôia,

24 mingei ha a kôla an hôn tûpa, “Idôr sôt mo mulung okchân mi ni dar rang? Ânthârtakin mi ril roh: Messiah mo ni ni?” an tia.

25 Jisua'n a thuona, “Nangni ki ril zoi duo, aniatachu mi iem mak chei. Ka Pa rachamneinân a sin ko tho hin ku ruthûlin nangni a min riet ania;

26 hannirese iem no tunui, ke belringei nin ni loi sikin.

27 Ke belringeiin chu ko rôl an riet ngâi; kei khomin ki riet ngei, male annin min jûi ngâi.

28 An kôm kumtuong ringna ke pêk ngeia, male anni ngei hah thi tet khâi no ni ngei. Tutên keima renga mi sut thei no ni ngei.

29 Anni ngei ni pêkpu ka Pa hah neinunngiei murdi nêkin ân lal uol ani, male tutên Pa donsûina renga mi sut thei no ni ngei.

30 Pa le keima chu inkhat kin ni.”

31 Hanchu mingeiin ama dêngna rang lung an rût nôka.

32 Jisua'n an kôm, “Pa'n sin ranga mi pêk sin sa tamtak nin mitmua ki sin zoia, akhotak sika ha mo lung leh ni dêng rang nin bôkna reng hi?” a tia.

- ³³Anni ngei han, “Sin sa sikin lung leh nang dêng rang nuom mak mea, aniatachu Pathien riming ni rilminsiet! sikin le miriem ni ni ngonga Pathien'n nêb bê sikin ani,” tiin an thuona.
- ³⁴Jisua'n a thuona, “Nin Balam lekhabua Pathien'n a tia, ‘pathienngei nin ni,’ tiin ânziek nimak mo.
- ³⁵Ei riet anghan Pathien lekhabua ati kai chu tuonsôtin adik ngâi ania; male Pathien'n a chong a min tungna ngeia khom han pathienngei a ti ani.
- ³⁶Keima rang chu Pa'n mi thanga rammuola mi juongtîr ani. Nôte, kho angin mo Pathien Nâipasal ki ni ki ti sika hin Pathien ni rilminsiet mi nin ti hi?
- ³⁷Ka Pa'n sin ranga mi nuom neinunngei ha ki sin ani nôncu mi iem no roi.
- ³⁸Hannirese ki sin anîn chu keima mi nin iem no khomin, ki sinthongei luo hi iem roi bah, Pa keima kôm a om male keima Pa kôm ko om ti nin riet minthâr theina rangin,” a tia.
- ³⁹Jisua sâr rang an pût nôkrêka, aniatachu an kut renga a jôkpai pe ngeia.
- ⁴⁰Hanchu Jisua hah Jordan Tuidung râla motona John'n mi a baptisna ngâi mun tieng han a sea, male mahan a om zoi.
- ⁴¹Mi tamtak a kôm an hongâ. “John'n ite sininkhêlungei sin mak,” aniatachu, “Hipa chungroi a lei misâr murdi chu adik ani,” an tia.
- ⁴²Male mahan mi tamtakin ama an iem zoi.

John 11

Lazarus thi thurchi

- ¹Mi inkhat a riming Lazarus, Bethany khopuia om hah damloiin a oma. Bethany hah Mary le a zuorpuinu Martha ngei omna khopui ani.
- ²(Hi Mary hih Pumapa kea mirimhoi buoka male a sam leh a ke hûi pe nu hah ani, damloia om Lazarus hah a nuchapa ani.)
- ³A sarnungeiin Jisua kôm, “Pumapa, na malpa lungkham hih dam mak,” tiin chong an muthuona.
- ⁴Jisua'n maha a riet lehan, “Hi Lazarus natna hih thina rang nimaka; Pathien roiinpuina ranga ania, hi sika hin Pathien Nâipasal khom roiinpuuin ala om rang ani,” a tia.
- ⁵Jisua'n Martha le a zuorpuinu le Lazarus ngei hah a lungkham ngei tataka.
- ⁶Hannoma damloi thurchi hah a riet suo nûkin a omna mun han sûnnik ala om nôka.
- ⁷Hanchu a ruoisingei kôm, “Judea rama se nôk ei ti u zoi,” a tia.

⁸A ruoisingeiin a kôm, “Minchupu, nikhatni rengan mingeiin lung leh nang deng rang an tia, hannoma la se nôk rêk rang ni mintuo mini?” tiin an thuona.

⁹Jisua'n a tia, “Sûnkhatin konta sômleini aom nimak mo?” Masikin tukhomin sôn khovâra an lônin chu invâi ngâi mak ngeia, hi rammuol vâh hih an mu sikin.

¹⁰Aniatachu, jân jîngamin an lônin chu an invâi ngâi, vâh an dôn loi sikin.

¹¹Jisua'n hi chong hih a tia, hanchu a bôksa nôka, “Ei malpa Lazarus chu a in zoi, hannirese ama kaithoi rangin ke se rang ani,” a tia.

¹²Ruoisingeiin, “Pumapa, a in anînchu, hong dam nôk atih zoi,” tiin an thuona.

¹³Jisua'n chu Lazarus a thi zoi a tina ani. aniatachu, annîn chu in ngâi balama a in mini tiin an bôka.

¹⁴Masikin Jisua'n ânthârin a ril ngeia, “Lazarus a thi zoi,

¹⁵hannirese a kôm ko om loi ha nangni rang sikin ka râiasân ani, nin iem theina rangin. Tho a kôm se ei tih u zoi.”

¹⁶Thomas (Ânphîr an ti) han a champui ruoisingei kôm, “Tho Minchupu kôm ei rêngin se sa ei ta, ama leh ei thi theina rangin!” a tia.

Jisua Inthoinôkna le Ringna

¹⁷Jisua a hongtungin chu, Lazarus ha sôn minli moton han an phûm zoi ti a rieta.

¹⁸Bethany hah Jerusalem renga kilometer inthum nêka nâi uol ani,

¹⁹male Judangei mi tamtakin Mary le Martha ngei an nuchapa thi chungroia mathâi rangin an hong.

²⁰Martha'n Jisua a hong ti a rietin chu ama intongpui rangin a jôka, aniatachu Mary chu insûnga a lei oma.

²¹Martha'n Jisua kôm, “Pumapa, hin no om nisenla chu ku nuchapa hi thi no nih!

²²Aniatachu atûn khom Pathien kôm no zong kai chu nang pêk a tih, ti ki riet,” a tia.

²³Jisua'n a kôm, “Nu nuchapa inthoinôk atih,” tiin a rila.

²⁴Amanu han, “Sûn nûktaka chu inthoi a tih, ti ki riet,” tiin a thuona.

²⁵Jisua'n amanu kôm han, “Keima hi inthoinôkna le ringna ki ni. Tukhom mi iem kai chu thi khomsenla ngei ring an tih;

²⁶male tukhom a ringa keima mi iem chu thi tet no ni ngei. Ma hih ni iem mo?” a tia.

²⁷Amanu han a kôm, “Ani, Pumapa!” ki iem. “Nangma hih Messiah, Pathien Nâipasal, rammuola juong rangpu ha ni ni ti ki iem tatak,” tiin a thuona.

Jisua a chap

28Martha'n hi chong hih a ti suole chu a zuorpuinu Mary a theia om hah inrûktên ava koia. “Minchupu hin a oma, nang a koi,” tiin a rila.

29Hi chong hih Mary a rietin chu innottakin ânthoia, ama leh intong rangin a sea.

30(Jisua ha khuo sũaga la hongtung maka. Martha leh an intongna muna han a la om.)

31Insũaga Mary mathâi ranga ompui mipuingei han Mary innotin ânthoia, a jôk an mûn chu thâna chap rangin a se mini tiin an mindona, an jûi zoi.

32Mary hah Jisua omna a hongtunga, ava mu reghan a ke bula an bokraka. “Pumapa,” hin, “no om nisenla chu ku nuchapa hi thi no nih!” a tia.

33Jisua'n Mary chap le a hong jûi mipuingei chap ha a mun chu asân a mulung a jûrpuia, a rîl tieng ân nûkka.

34“Ama hah khonmo nin phûm?” tiin a rekel ngeia. “Pumapa, hong inla hong en roh,” tiin an thuona.

35Jisua a chap zoi.

36Mipuingei han, “En ta u, idôrtaka a lungkham mini na!” an tia.

37Aniatachu senkhatin, “Mitchopa ha mitvârna a pêk nimak mo? Lazarus khom hi thi loiin a dar thei loi mini?” an tia.

Lazarus hih minringin aom

38Jisua ha arîl tieng ânuk nôka, thâna a sea, thân khur ha ânpuêk, lung leh alûtna hah an hîp ani.

39Jisua'n, “Lung hi thînpai roi!” tiin a dânde ngeia. Martha, a thipa sarnu han, “Pumapa, a mirim asie rang kêng ani zoi, an phûmna sùn minli piel ani zoi!” tiin a thuona.

40Jisua'n amanu kôm han, “Ni iemin chu Pathien roiinpuina mu ni tih, nang ki ti nimak mo?” a tia.

41Lung hah an thînpai zoia. Jisua a tanga, “Pa, ko chong na rangâi sikin ka râiasân.

42Ko chong na rangâi bang ngâi ti ki riet, hannirese mahi chu hi taka om mipuingei hin nangma mi ni tîr ki ni, ti an iem theina rangin nang ki ti ani.”

43Ma ha a ti suole chu, rôl inringtakin a koisama, “Lazarus hong jôk roh!” a tia.

⁴⁴Ama hah a kutngei le kengei thân puonngeiin intuomchienin, a mâi khom puon leh intuomchienin a hong jôk zoia. Jisua'n an kôm, “Sût unglâ, male min se roi,” a tia.

Jisua that rangtie an mintuo

(Mat 26:1-5; Mk 14:1,2; Luk 22:1,2)

⁴⁵Mi tamtak Mary hong pan ngei han, Jisua sintho hah an mua, male ama an iem kelen zoi.

⁴⁶Aniatachu, mi senkhatin chu an kîr nôka, Phariseengei kôm Jisua sintho hah an va misîr pe ngeia.

⁴⁷Masikin Phariseengei le ochaisingei, roijêkpungei leh an intonga, “Imo ei tho rang ani zoi? Hipa hin sininkhêl a sin ngei hih en ta u!

⁴⁸Hima anghin ei min se bangin laka mitinin hong iem an ta, hanchu Roman rachamneipungei juong an ta, ei Biekin le ei jât le nam min juong sietminmang pe rang kêng!” an tia.

⁴⁹An lâia mi inkhat, a riming Caiaphas hah, ma kuma Ochai Inlaltak han an kôm, “Nin mo babâka!

⁵⁰Mi murdi thia, jât le nam pumpui ânmanng nêkin chu mi inkhat thi hah asa uol ti nin riet loi mini?” a tia.

⁵¹Adikin, chu ama thena mulungbôka a ti nimaka; ha kuma Ochai Inlaltak ani sikin Jisua hah Juda mipuingei ruthûla a thi rang hah a lei ril masa ani.

⁵²male anni rang vai niloiin, Pathien mi chekinchâia om ngei pâl khata a molom theina rangin khom ani sa.

⁵³Hani renga chu Juda rachamneipungeiin Jisua an that rang chang an mintuo bang ani.

⁵⁴Masikin Jisua khom ânlangin chu Judea rama lêng khâi maka, ramchâr kôla khopui inkhat a riming Ephraim an tia han a sea, a ruoisingei leh an va om zoi.

⁵⁵Kalkân Kût anâi zoi sikin mi tamtakin ram sâng pumpui renga inthieng-inthâr rangin khohoi phâk mân Jerusalema an sea.

⁵⁶Jisua an rok titira, Biekina an intûp lâiin inkhat le khat annin rekela, “Imo nin mindon? Khohoia hong tatak no ni mo, a hong rang mo?”

⁵⁷Ochaisingei le Phariseengeiin ama an sûr theina rangin tukhomin a omna an rietin chu an misîr ngêt rang ani tiin chong an pêk ngei zoi ani.

John 12

Bethany taka Jisua sariiek polin aom

(Mat 26:6-13; Mk 14:3-9)

¹Kalkân kût rang sônruk motona Jisua chu thina renga a kaithoi Lazarus omna Bethany khuoa a sea.

²Ama rangin kholoibu nêk rang an mintuo pea, Martha hah bu-an, semin a san ngeia, Lazarus chu dosânga Jisua bukhalâi otpui ngei lâia inkhat ani.

³Hanchu Mary'n nard sariiek mirimhoi man luttak liter in-ang a hong chôia, Jisua ke a buoka, a sam leh a ke a hûi pea. Ha sariiek mirimhoi han insûng pumpui asip zit zoi.

⁴Jisua ruoisingei lâia inkhat Judas Iscariot—ama a minsûr rangpu han,

⁵“Hi sariiek mirimhoi hih ithomo duli razanthumin juorin male inrieng ngei kôm a pêk loi?” a tia.

⁶Hi chong hih inrieng ngei rang lunghâng ân shak sika a ti nimaka, inru ani sika ani. Ha mi han sumkok a chôia asûnga sum hah ama rangin a lâk ngâi sikin ani.

⁷Aniatachu, Jisua'n a kôm, “Rokôk no roh! a dôn hih phûma ko om nia rangin rê rese.

⁸Inrieng ngei chu nin kôma om tit rang an ni, kei chu nin kôm om bang no ning,” a tia.

Lazarus that tangtie an mintuo

⁹Mi tamtakin Bethany khuoa Jisua a om ti an rietin chu Jisua mu rangin le Lazarus Jisua'n thina renga a kaithoi nôkpu mu sa rangin an sea.

¹⁰Hanchu Ochaisingei han Lazarus khom that sa rangin an bôka,

¹¹ama sika Juda tamtakin anni ngei hengin Jisua an iem zoi sikin.

Jisua inlaltakin Jerusalema a lût

(Mat 21:1-11; Mk 11:1-11; Luk 19:28-40)

¹²Anangtûka chu Kalkân kût khohoia hong loko tamtakin Jisua Jerusalema a hong ti an rieta.

¹³Masikin letûmbuonengi an chôia ama lamdon rangin an sea, “Hosana! Pumapa rilinga juongpu chu Pathien'n satvur rese! Pathien'n Israel Rêngpa satvur rese!” tiin an inieka.

¹⁴Jisua'n sakuording inkhat a mua, a chung a chuonga, Pathien Lekhabu'n ati anghan,

¹⁵“Chi no roh, Zion khopuilien! Ne Rêng hah sakuordingte, chung a chuongin a hong ani.”

¹⁶Ha chong hah aphut han chu a ruoisingeiin riet thei mak ngeia; aniatachu Jisua inlaltakin inthoiiin a om suo tena chu Pathien Lekhabu'n ama chungroi a lei miziek ani ti le a chung a ha anga han an lei tho ti an riet zoi.

¹⁷Jisua'n Lazarus thân renga a koi suoka, thina renga a kaithoi lâia mipui om ngei han a thurchi an misîr tir zoia.

¹⁸Ha sininkhêl hah an riet sikin mipui ngeiin an lei don ani.

¹⁹Hanchu Phariseengi han, “En ta u, ite chang khôi mak me! En roi, rammuol pumpuini ama kêng an jûi zoi hi!” an tia.

Greekngai senkhatin Jisua an rok

²⁰Khohoia Pathien chubaimûk ranga Jerusalema hong se ngei lâia han Greekngai senkhat an oma.

²¹Anni ngei han Philip (Galilee rama Bethsaida khuo mi) kôm an sea, “Pu, Jisua mu kin nuom,” an tia.

²²Philip a sea male Andrew ava rila, male anruonin an sea, Jisua an va rila.

²³Jisua'n an kôm, “Miriem Nâipasal inlaltaka a om zora atung zoi.

²⁴Chongdiktak nangni ki ril: buhûm pila a tâka athi nôncu aramalin aom chien ngâi, athin vai kêng tamtakin ânra ngâi.

²⁵Tukhom an ringna moroi kaiin machân an ta, tukhom rammuola an ringna min pâm loi kaiin kumtuong ringna dôn tit an tih.

²⁶Tukhom ki sintho nuom kaiin chu mi jûi ngêt rese ngei, masikin ki sinthopu ngei chu ko omna an om sa theina rangin. Tukhom ki sintho ngâi kai chu ka Pa'n mirit tho ngei atih.

Jisua'n a thi rang roi a misîr

²⁷“Atûn hin ku mulung akâng male imo ki ti rang ani zoi? ‘Pa, hi zora hih ku chungu mi mintung pe no roh ki ti rang mini’? Aniatachu, hi dûktuong rang piela juong ki ni, masika han hi dûktuongna zora hih palin ke se rang ani.

²⁸Pa, ni riming roiinpuina juong mintung roh!” a tia. Hanchu invân renga rôl ajuon ringa, “Ko roiinpuina ku juong mintung zoi, la juong mintung nôk ki tih,” a tia.

²⁹Lokongei a kôla ânding ngei han ma rôl hah an rieta, male an lâia senkhatin, khuonri kêng ani an tia, adangngeiin chu, “Vântîrtonin a chongpui kêng!” an tia.

³⁰Aniatachu Jisua'n an kôm, “Ma rôl ha keima ranga ajuon ring nimaka, nangni ngei rang kêng ani.

³¹Atûn hin hi rammuol roijêkin aom rang zora ani zoi; hi rammuol roijêkpu khom hi atûn, pai nîng atih.

³²Pilchung renga makhâiin ko om tikin chu mi murdi ki tieng kaikuoi ki tih,” a tia.

³³(Hi chong hih thina a tuong rangtie riet theina ranga a ti ani.)

³⁴Mipuingeiin a kôm, “Kin Balam lekhabu'n Messiah chu tuonsôtin ring tit atih” tiin mi ril ngâi. Hanchu, kho angin mo nangman, “Miriem Nâipasal hi târin om atih, ni ti thei? Hi Miriem Nâipasal hih tumo ani?” tiin an thuona.

³⁵Jisua'n a thuona, “Vâr hi chomolte chu nin lâia la om nîng atih. Vâr nin dôn lâiin lêng roi, masika han ijîngin nangni adê lolina rangin; tukhom ijînga a lônin chu a sena riet ngâi mak.

³⁶Vâr nin dôn lâihin vâr hi iem ta roi, avâr mingei nin ni theina rangin,” a tia.

Mingei iemlolina

Hi chong hih a ti suole chu a thengpata, an mu thei lolina ranga a vânthup zoi.

³⁷An mitmua sininkhêlنگei tamtak a sin suonûk khomin anni ngei han ama iem mak ngeia,

³⁸masikin dêipu Isaiah lei ti hah ahong tung adik theina rangin: “Pumapa, kin thurchi misîr tumo a iema? Tu chung a mo Pumapa'n arnak a minlang?”

³⁹Male masika hi an iem thei loi ani, Isaiah nanâkin a tia:

⁴⁰“Pathien'n an mit a mincho pe ngeia male an mulungbôkنگei khom a min môl pe ngei sa, masikin an mitin an mu lolina rang, le an mulungbôkنگei khomin an rietthei lolina rangin, male ko kôm an hônhei nôk duoia, ke lei mindam ngei theina rangin, Pathien'n a tia.”

⁴¹Isaiah han Jisua roiinpuina a mu le a thurchi a misîr sikin hi chong hih a ti ani.

⁴²Nikhomsenla Juda rachamneipu tamtak ngeiin Jisua an iem zoia; hannirese Phariseengei sikin misîr minlang ngam mak ngeia, ma anghan ani nônchu synagog renga khâipaiin an om rang ani.

⁴³Pathien pomna nêkin munisi pomna an min lut uol ani.

Jisua chongbâingei roijêkna

⁴⁴Jisua'n rôl inringtakin a tia, “Tukhom mi iempu chu keima mi iem vai niloiin mi târpu khom a iem sa ani.

⁴⁵Tukhom keima mi mu chu mi târpu khom a mu sa ani.

⁴⁶Rammuola hin vâr angin ku juong ani, masikin tukhom mi iem ngei murdi chu ijînga an om lolina rangin.

⁴⁷Tukhom ku thurchi misîr a rieta a jôm loi khom nisenla, keiman an roijêk no ning. Rammuol roijêk ranga juong ni mu unga, rammuol sanminring ranga juong kêng ki ni.

⁴⁸Tukhom keima me henga, ku thurchi misîr pomloi ngei chu anni ngei roijêk rangin mi inkhat aom. Ku thurchi misîr ha sîn nûktaka chu anni ngei roijêkpu la ning atih!

⁴⁹Mahi adik ani, asikchu Keima ka rachamin ite misîr ngâi mu unga, ka Pa mi tîrpu'n kêng ki ti rang le ki misîr rang chong mi pêk ngâi ani.

⁵⁰Male a chongpêk ngei chu kumtuong ringna ani ti ki riet. Masikin ki ti ngei hi Pa'n mi ril lam angtakan ki misîr ani," a tia.

John 13

Jisua'n a ruoisingei kengei a rusûk

¹Kalkân kût khohoi rang ni motontet ahong ni zoia. Jisua'n hi rammuol hih mâkin Pa kôm a se rang zora atung zoi ti a rieta. Ama ta ngei lelê, hi rammuola om, a lungkham ngâi ngei hah among ni dênin a lungkham ngei tita.

²Jisua le a ruoisingei jânbu an nêk han. Diabol'n Simon Iscariot nâipasal Judas mulungrîla Jisua minsûr rangin mindonna a lei dar chien zoia.

³Jisua hah, Pa'n rachamneina murdi a pêk, ti le Pathien renga juong ania, Pathien kôm se nôk rang ani ti a rieta.

⁴Masikin bukhalâi otna dosâng kung renga ânthoia, a chunghak kâncholi a kheka, male inhûinapuon a lâka, a kong a khita.

⁵Hanchu dabora tui a sunga, ruoisingei kengei a rusûk phut zoia, a kong a puon lehan a hûi pe ngeia.

⁶Simon Peter kôm a hong a, ama han, "Pumapa nangman ke kengei nursûk rang mo?" a tia.

⁷Jisua'n a kôm, "Ki sintho hi atûn chu la riet mak che, hannirese nangkana chu la riet ni tih," tiin a thuona.

⁸Peter'n a kôm, "Nangman chu khotiklâi khom ka kengei rusûk tet no ti nih!" a tia. Jisua'n a kôm, "Ne kengei kursûk nônchu ku ruoisi ni khâi no tinih," a tia.

⁹Simon Peter'n a kôm, "Pumapa, nônchu ke kengei vai rusûk nôla, ku kutngei le ku lu khom rusûk sa roh!" tiin a thuona.

¹⁰Jisua'n a tia, "Tukhom tui ânbuol sai chu asâi zoi ani, a kengei tilloiin chu adang arsûk rang nâng khâi maka. Nin lâia mi inkhat tiloiin chu nin rêngin nin sâivar zoi."

¹¹(Jisua'n a minsûr rangpu ha a riet chien sai ani; sikin, "Nin lâia mi inkhat, tiloiin chu, nin rêngin nin sâivar zoi," a ti ani)

¹²Jisua'n an kengei arsûk suole chu a chunghak kâncholi a haka male a mun nanâka dosâng tieng a kîr nôka. “Nin chung a ki sintho hih nin riet thei mo?” tiin a rekel ngeia.

¹³“Nangnin Minchupu le Pumapa mi nin tia, nin ti mindik ani, asikchu ni khom ki ni tatak ani.

¹⁴Keima, nin Pumapa le Minchupu'n luo nin kengei kursûr ani, Ma anghan, nangni khom nin kengei nin rusûk inlôm rang ani.

¹⁵Nin chung a ko tho anghin nangni khomin nin tho theina rangin nangni ki min mu ani.

¹⁶Chongdiktak nangni ki ril: suokngei hih an pu nêkin lien mak ngeia, thangtheipungei khom a tîrpu nêkin lien mak ngei.

¹⁷Atûn chu ma chongdik hah nin riet zoi, nin jômîn chu nin râisân tatak atih!

¹⁸“Nin renga nin thurchi misîr mu-ung, ka thang ngei chu keiman ki riet. Hannirese Pathien Lekhabu'n, ‘Ku bu nêkpu han mi doi zoi,’ a ti ha ahong dik ngêt anâng ani.

¹⁹Masikin mahi atûn ahongtung mân nangni ke lei ril ani, ahongtung tika khom ‘Ama ha Keima hi Ki Ni,’ tiin mi nin iem theina rangin.

²⁰Chongdiktak nangni ki ril: tukhom ki mi tîr lei pom chu keima khom mi pom sa ania; male tukhom mi pom chu mi tîrpu khom a pom ani,” a tia.

Jisua'n minsûra aom rang a leiphuong

(Mat 26:20-25; Mk 14:17-21; Luk 22:21-23)

²¹Jisua'n ma chong hah a ti suole chu a mulung dûk a min tonga, “Chongdiktak nangni ki ril: nin lâia mi inkhatin mi minsûr atih,” tiin ânlangiemîn a phuonga.

²²Ruoisingei han tu lelê mo a tina tak an riet loi sikin jâminzal takin annîn en inlôma.

²³Ruoisingei lâia mi inkhat Jisua'n a lungkham ngâipu hah Jisua kôla ânsunga.

²⁴Hapa kôm han Simon Peter'n, “Tutak mo a ti, rekel ta,” tiin kut leh tînîn a chongpuia.

²⁵Masikin ama ha Jisua tieng ân thîna, “Pumapa, tu lelê mo ani?” tiin a rekela.

²⁶Jisua'n a kôm, “Vâipôl hârte michie ka ta, ke pêk tak hah ning atih,” tiin a thuona. Masikin vâipôl hârte a lâka, a michie-a, Simon Iscariot nâipasal Judas kôm a pêk zoi.

²⁷Judas'n vâipôl hârte ha a lâk suo, harengan a sûnga han Soitan alût kelen zoi. Jisua'n a kôm, “No tho rang tak hih tholai roh!” a tipea.

²⁸Dosâng rihîla om adangngei han tutên ithomo ma anghan Jisua'n a tipe riet mak ngei.

²⁹Ruoisingei senkhatin chu Judas han sum a kol sikin, Jisua'n khohoia mang rang neinun ânsam rochôk roh a tipe mini, aninôn chu inrieng ngei iminîh pêk roh a tipe mini tiin an bôka.

³⁰Judas han vâipôl hâr hah a lâka, a rotpat kelen zoi, ma zora hah jân ani.

Chongpêk athar

³¹Judas a rotpat suole chu Jisua'n an kôm a tia, “Atûn chu Miriem Nâipasal roiinpuina ânlang zoia, ama sikin Pathien roiinpuina khom ânlang zoi ani.

³²Male ama renga Pathien roiinpuina ânlangin chu, Pathien khomin ama renga han Miriem Nâipasal roiipuina minlang atih, male ama'n voikhat rengin tho kelen atih.

³³Ka nâingei, nin lâia zora sôt om khâi no ning. Mi en nin ta; aniatachu Juda rachamneipungei ki tipe ngei anghan nangni ki tipe ani, ‘Ke sena ranga se thei no tunui.’

³⁴Male atûn hin chongpêk athar nangni ke pêk ani: inkhat le inkhat inlungkham inlôm roi. Nangni ku lungkham anghan nin inlungkham ngêt rang ani.

³⁵Inkhat le inkhat nin inlungkham inlômin chu ku ruoisingei nin ni tiin mi murdi'n riet an tih,” a tia.

Jisua'n, Peter a ipdel rang a leiphuong

(Mat 26:31-35; Mk 14:27-31; Luk 22:31-34)

³⁶Simon Peter'n, “Pumapa, khotieng mo ne se rang?” tiin a rekela. “Ke sena ranga atûn chu mi la jûi thei no tunui,” aniatachu, “nakana chu mi la jûi nin tih,” tiin a thuona.

³⁷Peter'n, “Pumapa, ithomo atûn hin chu nang ku jûi thei loi rang?” tiin a rekela, “Nangma rang sikin chu ki ringna khom pêk ki tih!” a tia.

³⁸Jisua'n a kôm, “Keima rang sikin ni ringna ne pêk tatak rang na? Chongdiktak nang ki ril: ârkhuong mân voithum, ama hih riet ngâi mu-ung, ni ti rang ani,” tiin a thuona.

John 14

Jisua Pa kôm sena lampui

¹Jisua'n, “Nin kângmindoi no unglâ male nin jâminzal no roi, Pathien iem roi male kei khom mi iem sa roi.

²Ka Pa ina omna khâltan tamtak aom, ninta rangin mun sin ke se rang ani. Om no senla chu nangni ki ril loi rang ani.

³Male ninta rang mun ko hong sin suole chu juongkîr nôk ka ta, ko kôm nangni tuong ki tih, ko omna nangni khom nin om sa theina rangin.

⁴Ke sena rang lampui khom nin riet.”

⁵Thomas'n a kôm, “Pumapa, ne sena rang riet mak me; masikin kho angin mo mataka sena rang lampui ha kin riet ranga?” a tia.

⁶Jisua'n a thuona, “Keima hi lampui, chongtak le ringna ki ni; keima taka se loi chu tute Pa kôm tung ngâi mak ngei.

⁷Atûn chu mi nin riet zoi,” a tipe ngeia, “Ka Pa khom nin riet sa rang ani zoi, male atûn renga chu ama nin riet zoia male mu khom nin mu sa zoi ani.”

⁸Philip'n a kôm, “Pumapa, Pa hah keini mi min mu ta; kinta rangin chu hun atih,” a tia.

⁹Jisua'n a thuona, “Philip, hi dôr sôt hih nin kôm ko oma; hannoma mi la riet mak che mo? Tukhom mi mu chu Pa a mu ani. Hanchu, ithomo, ‘Pa hah keini mi min mu ta ni tia’?”

¹⁰Keima Pa kôm ko oma male Pa khom ko kôm aom hih ni iem loi mini? Nin kôma chong ki ti ngei hah keima renga hong suok nimak,” Pa, ko kôma omtit ngâipu han a sin a tho kêng ani. Jisua'n a ruoisingei kôm a tipe ngeia.

¹¹Keima Pa kôm ko oma, Pa ko kôm aom ki ti hin mi iem roi. Ani nônchu, ki sintho ngei sik luo hin mi iem roi.

¹²Chongdiktak nangni ki ril: tukhom mi iem ngei chu ki sintho anghin la sin an tih; ani, hima nêka neinun roiinpui uol ngei khom la sin an tih, Pa kôm ke se rang ani sikin.

¹³Male khokhoi khom ki rilinga nin zong kai chu sin ki tih, Nâipasal sika Pa roiinpuina ânlang theina rangin.

¹⁴Nangnin ki rilingin i-ikhom mi nin zong kai chu tho ki tih.

Ratha Inthieng inkhâm

¹⁵Nangnin mi nin lungkhamin chu ko chongpêkngai jôm nin tih.

¹⁶Pa kôm zong ka ta, ama'n Sanpu dang nangni pêk atih; tuonsôta nin kôma om rangin.

¹⁷Ama ha Ratha diktak, Pathien chongtak minlang ngâipu ani. Rammuolin chu modôm thei maka, ama an mu thei loi sik le an riet thei loi sikin. Aniatachu nangni ngeiin chu nin riet, nin kôm a om bang sik le nangnia aom bang ngâi sikin.

¹⁸“Ke se khomin nin theivaiin nangni mâk no ninga; nin kôm juong kîr nôk ki tih.

- ¹⁹Chomolte suole chu rammuolin mi mu khâi no ni; hannirese nangnin chu mi mu nin ta, keima ki ring sikin nangni khom ring sa nin tih.
- ²⁰Ma nikhuo hah ahong tungin chu, nangni nin kôm ko om anghan keima ka Pa kôm ko oma, nangni ko kôm nin om tiin riet nin tih zoi.
- ²¹“Tukhom ko chongpêkngai a poma jôm chu mi lungkham ani. Tukhom mi lungkham kai chu ka Pa khomin lungkham atih; kei khomin lungkham ngei ka ta, an kôm inlâr bang ngâi ki tih,” a tia.
- ²²Judas (Judas Iscariot niloi) han a kôm, “Pumapa, kin kôm chu inlâr na ta, ithomo rammuol kôm chu nên lâi rang?” a tia.
- ²³Jisua'n a kôm, “Tukhom mi lungkham ngeiin chu ki minchuna jôm an tih. Ka Pa khomin lungkham ngei a ta, male ka Pa leh an kôm juong kin ta, an kôm om kin tih.
- ²⁴Tukhom mi lungkham loi ngei chu ki minchuna khom jôm ngâi mak ngei. Male minchuna chong nin riet hi keima kata nimaka, Pa, mi tîrpu renga kêng ani.”
- ²⁵“Nin kôm ka la om lâihin hi chong hih nangni ki tipe ani.
- ²⁶Sanpu, Ratha Inthieng, Pa'n ki rilinga a juongtîr rang han neinunngai murdi nangni minchu a ta, male nangni ki misîr pe sai ngei murdi hah riettit rangin nangni sin a tih.”
- ²⁷“Nangni ka mâkpe chu Rathânngamna hi ania; keima rathânngamna kêng nangni ke pêk ani. Rammuolin a pêk anghan chu nangni pêk mu-ung. Nin kângmindoi no ungla, male nin jâmminzal no roi; chi khom chi no roi.
- ²⁸“Nangni mâksan rang ki ni, ti nin rieta, aniatachu nin kôm juong kîr nôk ki tih,’ mi nin lungkhama anîn chu Pa kôm ke se hih nin râisân atih; ama chu keima nêkin a roiinpui uol sikin.
- ²⁹Hi chong hih ahongtung mân nangni ke lei ril ani, ahongtung tika nin iem theina rangin.
- ³⁰Zora sôt chu nangni chongpui thei khâi no ning, hi rammuola roijêkpu hih a hong zoi sikin. Ku chung a racham dôn maka,
- ³¹hannirese Pa ku lungkham ti hih rammuolin a riet ngêt anâng ani; masikin ama chongpêkngai anghan neinuntin ki sin ngâi.” “Hong roi, hi mun renga hin jôk ta rei u.”

John 15

Jisua graprâng diktak

- ¹“Keima graprâng diktak ki ni, male ka Pa chu ruhuon donsûipu ani.

²Keima taka kop loi amachang ânra loi chu a khiekpaia, ânra kai chu a rithiel minsâi ngâi; masikin ânthienga amara atam uolna rangin.

³Minchuna chong nangni ke pêk saia hin nin inthiengvar zoi ani.

⁴Ko kôm omtit ungla, male kei khom nin kôm omtit ki tih. Amachang hah graprânga akop tit nôncu athenin inra thei maka; graperânga akop tit vaiin kêng ânra thei ngâi. Ma anghan nangni khom ko kôm nin omtit nôncu nin thenin inra thei no tunui.”

⁵“Keima graprâng ki nia, nangni ngei ha amachangngei nin ni. Tukhom keima taka aomtita, male kei khom ama taka ko omtitna chu tamtakin an inra ngâi; keima boiin ite nin sin thei loi sikin.

⁶Tukhom keima taka om loi chu amachang angin paiin aoma, male achâr ngâi; ma anga amachangngei hah chu an rokhôma meia an paia, akâng ngâi.

⁷Ko kôm nin omtita, ko chong nin kôm aomtitin chu nin nunuom zong roi man bang nin tih.

⁸Tamtaka nin inra hin ka Pa roiinpuina inlangin aom ngâi ani; ma anghan ku ruoisingei nin hong ni ani.

⁹Pa'n mi lungkham anghan kei khom nangni ku lungkham ani; ku lungkhamna hin omtit roi.

¹⁰Ko chongpêkngai nin jômîn chu ku lungkhamna ombang nin tih, ka Pa chongpêkngai ko jôma a lungkhamnân ko ombang anghin.

¹¹“Ka râisâna nangnia han aom theina rang le nin râisâna akip theina rangin mahi nin kôm ki misâr ani.

¹²Ko chongpêk chu mahi ani: inkhat le inkhat inlungkham inlôm roi, keiman nangni ku lungkham anghin.

¹³Miriemin a malngei ranga lungkhamna lientak a dôn thei chu an ta ranga a ringna pêk hi ani.

¹⁴Male ko chongpêk nin jômîn chu ka malngei nin ni.

¹⁵Tîrlâmngai nangni ti khâi no ning, asikchu tîrlâmngai chu an pu sintho riet ngâi mak ngei ani. Manêkin chu malngei nangni ti ki tih, Pa renga ki riet ngei murdi nangni ki misâr pe zoi sikin.

¹⁶Nangnin ni thang mak choia; keiman kêng nangni ka thang ania; sea mara tamtak va dôna, nin mara aom bang rangin nangni ku phun sa ani. Masikin ki rilinga Pa kôm nin zong kai chu nangni a pêk theina rangin.

¹⁷Hanchu, mahi ko chongpêk chu ani: inkhat le inkhat inlungkham inlôm roi.

Rammuol mumâkna

- ¹⁸“Rammuolin nangni mumâkin chu, keima mi lei mumâk bak ani ti riettit roi.
- ¹⁹Rammuol ta ni unglâ chu rammuolin ama ta angin nangni lungkham rang ani. Aniatachu rammuol renga nangni ka thangsuok ania, rammuol mi nin ni khâi loi sikin rammuolin nangni a mumâk ani.
- ²⁰“Suokngei chu an pu nêkin lien uol mak ngei’ ti chong nangni ki ril hah riettit roi. Mingeiin keima an nuom minlôn chu nangni khom an nunuom nangni lô sa an tih; ki minchuna chong an donin chu nin minchuna chong khom don an tih.
- ²¹Hannirese hima ngei murdi hah kata nin ni sika kêng nin chungâ an tho rang; tumo mi tîrpu hah an riet loi sikin.
- ²²Keima juongin an kôm thurchi misîr no rong chu sietnân theiloi an chang loi rang piel ani; atûn chu an sietna muduolna rang dôn khâi mak ngei.
- ²³Tukhom mi mumâkpu chu ka Pa khom a mumâk ani.
- ²⁴Mi dangin an la tho ngâiloi neinunngai hah an lâia tho no rongâ chu sietna sikin theiloi an chang loi rang piel ania; atûn chu ki sintho ngei an mua, male keima le ka Pa kin ruonin min mumâk zoi ani.
- ²⁵Nikhomrese, mahi, an Balam lekhabua anni ngei han, ‘Ite abi boiin min mumâk,’ tia ânziek hah inzomin ahongtung adik theina ranga an tho ani.
- ²⁶“Sanpu hah juong a ta—Ratha diktak Pathien chungroia chongtak minlangpu hah Pa kôm renga juong atih. Pa kôm renga nin kôm juongtîr ka ta, male ama'n ku chungroi misîr atih.
- ²⁷Male nangni, khomin ku chungroi misîr sâng nin tih, aphut renga keima leh nin om sikin.

John 16

- ¹“Nin taksônna nin mâk loina rangin mahi nangni ki misîr pe ani.
- ²Synagogngei renga nangni la khâipai an ta, nangni that ranga bôk ngei han Pathien sin an tho anga an inbe zora la tung atih.
- ³Mingeiin nin chungâ hima anghan la thông an tih, Pa le keima min riet loi sikin.
- ⁴Hannirese mahi nin kôm ke lei misîr ani, masikin ma neinunngai tho ranga an zora ahong tung tikin, nangni ke lei misîr pe zoi ti nin riettit theina rangin.

Ratha Inthieng sintho

- “Hi neinunngai hih aphut renga nangni ka la ril loi ani, nin kôma ka la om sikin.
- ⁵Aniatachu, atûn chu mi tîrpu kôm ke se rang kêng ani zoi, hannoma nin lâia tutên ke sena rang merkel mak chei.

- ⁶Male atûn nangni ki misîr pe lechu nin mulungngei dûkin asip zoi ani.
- ⁷Aniatachu chongdiktak nangni ki ril: ke se hah nangni rangin chu asa uol ani, ke se nôncu Sanpu hah nin kôm juong no nih. Hannirese ke sên chu ama hah nin kôm juongtîr ki tih.
- ⁸Male a juong tung tika chu sietna tieng mo, chong dika mo, Pathien roijêkna tieng mo theiloi an chang tie hah rammuol mingei kôm min mûng atih.
- ⁹Sietna tieng theiloi an chang ani, keima min iem loi sikin;
- ¹⁰chong dika khom theiloi an chang ani, Pa kôm ke se rang sik le mi nin mu khâi loi rang sikin;
- ¹¹male roijêkna tieng khom adikloi an chang ani, hi rammuol roijêkpu khom jêkin aom zoi sikin.
- ¹²“Nangni misîr pe rang tamtak ka la dôn, aniatachu atûna rangin chu ariet nangni lântak pe rai atih.
- ¹³Nikhomrese, Ratha, Pathien chongtak minlang ngâipu hah a juong tika chu chongtak ngei murdia nangni ruoi min lût atih. Ama rachamin ite misîr no nia, a riet ha kêng a misîr rang male ahong tung rang neinunngiei ha nangni ril atih.
- ¹⁴Ama han roiinpuina mi pêk atih, ko chong ti ngei hah lâk a ta, nangni a ril rang sikin.
- ¹⁵Ka Pa'n a dôn ngei murdi chu kata ani; masika han kêng Ratha han ke pêk hah lâk a ta male nangni ril atih, ki ti ani.

Inngûina le tâina

- ¹⁶“Chomoltên chu mi mu khâi no tunuia, male chomolte suole chu mi mu nôk nin tih,” a tia.
- ¹⁷A ruoisingei senkhatin anninanâkin annin rekela, “Ei kôma a thurchi misîr hi imo a tina? Chomolte chu mi mu no tunuia, chomolte suole chu mi mu nôk nin tih; a tia male, ‘Pa kôm ke se rang sikin’ khom a ti hi, an tia.
- ¹⁸‘Chomolte’ a ti hih imo a tina? A misîr hih ei riet thei loi kêng!” an tia.
- ¹⁹Jisua'n ama chong rekel rang an jôt ti a rieta, an kôm, “Chomolte chu mi mu no tunuia, chomolte suole chu mi mu nôk nin tih,” ki ti ha mo nangni nanâkin ni nin rekel inlôm?
- ²⁰Chong diktak nangni ki ril: nangni chu chap le inrûmin om nin ta, hannirese, rammuol chu tâi atih; inngûiin om nin ta, aniatachu nin inngûina hah tâinân ânthûl rang ani.

²¹Nupangin nâiha a tuong lâitak chu ân ngûikhak ngâi, a dûktongna zora ahong tung pe sikin; aniatachu nâi a nei suole chu a dûktong hah a mingil nôk ngâi, nâite rammuola juong suok hah a râisânpui sikin.

²²Nangni khom ma anghan nin ni: atûn chu inngûiin nin oma, aniatachu nangni mu nôk ki tih, nin mulungrîl râisânnân la sip atih. Ma râisâna ha chu tutên nangni sut thei khâi no ni ngei.

²³“Ma nikhuo hah ahong tungin chu ite mi rekel khâi no tunui. Chongdiktak nangni ki ril: ki rilinga nin zong kai chu Pa'n nangni pêk atih.

²⁴Atûn tena chu ite ki rilingin la zong mak choia; zong unglâ man nin tih, nin râisâna akip theina rangin.

Rammuol menena

²⁵“Ha neinunngai hah mintêknangei chongin nin kôm ki misîr ani. Aniatachu, mintêknangei chong mang loiin ânlangiemîn Pa chungroi ha nin kôm ki misîr zora ala hong tung rang.

²⁶Ma nikhuo hah ahong tungin chu, ki rilingin Pa kôm zong nin ta; male keiman Pa kôm nin ruthûlin nangni zong pe ki tih ki tina nimaka,

²⁷Pa lelê han nangni a lungkham ngâi. Keima mi nin lungkham sik le Pathien renga juong ki ni, ti mi nin iem sikin nangni a lungkham ngâi ani.

²⁸Pa kôm renga ku juonga, male rammuola ku juong ani; male atûn chu rammuol mâkin Pa kôm ke se nôk rang ani zoi,” a tia.

²⁹Hanchu a ruoisingei han a kôm, “Atûn chu ânlangiemîn ni misîra, mintêknangei chong reng mang khâi mak chea.

³⁰Atûn chu neinuntin ni riet let tiin kin riet zoi; tute kôm ite ne rekel ngei rang nâng mak che. Hima sika hin Pathien renga juong ni ni tiin kin iem zoi ani,” an tia.

³¹Jisua'n an kôm, “Atûn chu nin iem mo zoi?

³²Azora ahong tungtir zoi, anâikik zoi, matikin chu chekinchâi var nin ta, nin in, nin ina se nin ta, ke theivaiin mi mâkrak nin tih. Hannirese Pa hah ko kôm aom sikin ke theivaiin chu ni no ning.

³³Masikin keima leh inpumkhata omin rathânngamna nin dôn theina rangin hi chong hih nangni ki misîr pe ani. Rammuolin intak nangni min tuong atih. Hannirese hâitakin om roi! Keiman rammuol ke mene zoi ani,” a tia.

John 17

Jisua'n a ruoisingei rang a chubai ngâi

- ¹Jisua'n ma chong hih a ti suole chu invân tieng a tanga, "Pa, azora atung zoi. Na nâipasal kôm roiinpuina pêk ta roh. Nâipasal khomin roiinpuina nang a pêk theina rangin.
- ²Mingei murdi chung a rachamneina ama ne pêka, masikin ama khomin ne pêk ngei kôm kumtuong ringna a pêk ngei theina rangin.
- ³Male kumtuong ringna tichu, nangma Pathien diktak vai nang riet, le ni tîrpu, Jisua Khrista riet hih ani.
- ⁴No roiinpuina pilchung a ki minlanga; sintum mi ni pêk khom ki sin suozoi ani.
- ⁵Pa! atûn no kôm ngêt han roiinpuina ni pêk roh, rammuol insiêng mâna no kôma roiinpuina ko dôn ngâi dên ha.
- ⁶"Rammuol renga mi ni pêk ngei kôm ni riming ku phuong minzar zoi. Anni ngei hah nata an nia, male nangman kêng anni ngei ha mi ni pêka, no chong an don zoia,
- ⁷male atûn chu neinun mi ni pêk ngei murdi hih nangma renga ani ti an riet zoi.
- ⁸Nangman chong mi ni pêk ngei khom ke pêk ngeia an pom zoia; no kôm renga juong ki ni khom an riet minthâr zoi, male mi ni tîr ani ti khom an iem zoi ani.
- ⁹"Anni rang piela chubaitho ki ni. Rammuol rangin chubaitho mu unga, nangma nata, keima mi ni pêk ngei ta ranga ani.
- ¹⁰Ko dôn ngei murdi nata an nia; no dôn ngei murdi khom kata an nia, male ko roiinpuina khom anni renga ânlang ngâi ani.
- ¹¹Atûn chu no kôm ko hong rang ani zoia; rammuola om khâi noning, aniatachu anni ngei chu rammuola la om an tih. Pa Inthieng! anni ngei hi ni riming sinthotheidân sanmojôk ngei roh, riming mi ni pêk lehan, masikin keima le nangma pumkhat eini anghan anni ngei khom pumkhat anni theina rangin.
- ¹²An kôm ko om sêngin chu ni riming sinthotheidân ka sanmojôk ngei ngâi, riming mi ni pêk lehan. Ku rung ngeia, inkhat luo inmang mak ngei, ânman rang piela ompu tiloiiin chu Pathien lehabua ânziek ahong tung adik theina rang sikin.
- ¹³Atûn chu no kôm ko hong rang ani zoia, male rammuola hi neinunngai hih ki misîr pe ngeia ka râisâna an mulung sêngngeia akipdira aom theina rangin.
- ¹⁴No chongbê ke pêk ngeia, male rammuolin a mumâk ngei zoia, rammuol mi an ni khâiloï sikin, keima rammuol mi ki ni loi anghan.
- ¹⁵Rammuol renga lâk pai ngei rangin nang zong mu unga, Asaloi Inkhat renga sanmojôk ngei rangin nang ke ngên ani.
- ¹⁶Keima rammuol mi ki ni loi anghin anni khom rammuol mi nimak ngei.

- ¹⁷Anni ngei hih chongtakin minthâr ngei roh; no chong chu chongtak ani.
- ¹⁸Rammuola mi ni tîr anghan, kei khomin anni ngei hih rammuola ki tîr ngei ani.
- ¹⁹Anni sikin no kôm kêr thâra, anni ngei khom no kôm, adiktaka an inthâr theina rangin.
- ²⁰“Hi ngei rang vaiin nang ngên mu unga, an thurchi misîr sika mi a iem ngei ta rang khomin nang ke ngên sa ani.
- ²¹An rêngin pumkhat anni theina rangin nang ke ngên ani. Pa! Anni ngei hih ei kôm om rese ngei, nangma ko kôm no oma, keima khom no kôm ko om anghan. Pumkhatin om rese ngei, rammuolin mi ni tîr, ti an iem theina rangin.
- ²²Roiinpuina mi ni pêk dên hah anni khom ke pêk ngei ani, nangma le keima pumkhat ei ni anghan pumkhat an ni theina rangin.
- ²³Keima, an kôma, nangma ko kôma omin an nin pumkhat tatakna rangin, hanchu mi ni tîr ani ti hih rammuolin riet an ta, male mi ni lungkham anghan anni ngei khom nu lungkham ngei tiin riet an tih.
- ²⁴“Pa! anni ngei hih mi ni pêka, male ko omna an om sa theina rangin ku nuom ani, mi ni lungkham sika rammuol insiêng mâna mi ni pêk roiinpuina hah an mu theina rangin.
- ²⁵Pa Diktak! rammuolin nang riet maka, hannirese keiman chu nang ki riet, male hi ngei khomin mi ni tîr ani tiin an riet.
- ²⁶An kôm nang ki min riet ngeia, min riet ngei bang ki tih, mi ni lungkhamna hah an kôm aom theina rangin, male kei khom an kôm ko om sa theina rangin,” a tia.

John 18

Jisua an sôr

(Mat 26:47-56; Mk 14:43-50; Luk 22:47-53)

- ¹Jisua'n hi chubaithona hih a ti suole chu, a ruoisingei le Kidron Tuitdung rakânin an sea. Ma muna han ruhuon aoma, male Jisua le a ruoisingei asûnga an lûta.
- ²A minsôrpu Judas han hima mun hah a rieta, vêl tamtak Jisua le a ruoisingei, ha muna han an intûp ngâi sikin.
- ³Masikin Judas han Roman râlmingei pâl leh, male Ochaisingei le Phariseengeiin an tîr, Temple rungpungei senkhat tuongin ma ruhuona han râlrovongei, châtingei le meiserngei chôiin an sea.

⁴A chung a hong tung rang neinunngai murdi hah Jisua'n a lei riet sai piel ani sikin moton tieng a hong nâia, "Tumo nin rok?" tiin a rekel ngeia.

⁵"Nazareth Jisua," tiin an thuona. "Keima hih ki ni," a tia. A minsûr rangpu Judas, khom an kôla ândinga.

⁶Jisua'n, "Keima hih ki ni," a ti lehan an nûk tieng an intôla, nuoia an inlet raka.

⁷Avêlin Jisua'n an kôm, "Tumo nin rôk?" tiin a rekel ngei nôka, "Nazareth Jisua" an tia.

⁸Jisua'n an kôm, "Keima ki ni, nangni ki tipe zoi ngah. Ma anghan keima mi nin rok anîn chu adangngei chu se ta rese ngei," a tipe ngeia.

⁹(Jisua'n hima anga a tina tak chu, "Pa, mi ni pêk ngei lâia inkhat luo minmang mu-ung, a lei ti hah ahong tung adikna ranga ani.")

¹⁰Simon Peter'n, a khandai pêl hah a kaidûka, Ochai Inlaltak suokpa kuor a changtienga a lengthâk pea. Ha suokpa riming hah Malchus ani.

¹¹Jisua'n Peter kôm, "Ne khandai hah akoka thun nôk ta roh! ka Pa'n tuongna kilât mi pêk hih ke nêk loi rangin ni mindon mo?" a tia.

Annas makunga Jisua ânding

¹²Hanchu Roman râlmingei pâla an ulien inchungtak leh Juda mi rungpungeiin Jisua an sûra, an khita,

¹³male Annas kôm an tuong baka. Ama hah Caiaphas tarpu ania, Caiaphas hah ma kum han Ochai Inlaltak ani.

¹⁴Mi murdi ruthûlin mi inkhat thi hah asa uol, tia Juda rachamneipungei kôma rilpu hah Caiaphas hih ani.

Peter'n Jisua a ipdelna

(Mat 26:69-70; Mk 14:66-68; Luk 22:55-57)

¹⁵Simon Peter le ruoisi dang han Jisua an jûia. Ha ruoisi dang hah Ochai Inlaltak mêlriet ani sikin Ochai Inlaltak khalâidung dênin Jisua a se puia.

¹⁶Peter chu mokot pêntieng a lei oma. Hanchu ruoisi dang han pêntieng a jôk nôka, mokota om dôngmate hah a chongpuia, male Peter sâng tieng a hong minlûta.

¹⁷Mokota om dôngmate han, "Nangma khom hima miriempa ruoisingei lâia mi inkhat nimak che mo?" tiin a rekela. "Nimak, keima chu ni mu-ung," tiin Peter'n a thuona.

¹⁸Adâi sikin tîrlâmngai le rungpungei han rohol leh mei an thoa, inding chungin an uota. Hanchu Peter khom a sea, an kôla vân dingin mei ava uota.

Ochai Inlaltakin Jisua chong a rekelnangei

(Mat 26:59-66; Mk 14:55-64; Luk 22:66-71)

¹⁹Ochai Inlaltak han Jisua kôm a ruoisingei thurchi le a minchu ngâi chungroi a rekela.

²⁰Jisua'n a thuona, "Zoratin mi murdi rietin thurchi ki misîr ngâia; Synagogneia le Biekina, mipui intûpna ki minchu ngâia. Inrûkin ite reng misîr ngâi mu-ung.

²¹Masikin, ithomo keima mi ni rekela? Ku thurchi misîr a riet ngei rekel roh ba. Imo ki misîr pe ngei ngâi an riet ngah," a tia.

²²Hima anga a chong lâitakin ha taka om mi rungngâi inkhatin a bêna, a kôm, "Kho angngân mo Ochai Inlaltak hih hima anghan no chongpui ngama?" a tia.

²³Jisua'n a kôm, "Ki ti minchâina aom duoiin chu, maha imo ani hi muna mipuingei hih ril roh. Aniatachu ki ti mindikin chu, ithomo ni ni bêna?" tiin a thvon ngeia.

²⁴Male Annas han khit pumin ama hah Ochai Inlaltak Caiaphas kôm a tîr zoia.

Peter'n Jisua a ipdel nôkna

(Mat 26:71-75; Mk 14:69-72; Luk 22:58-62)

²⁵Peter chu mei uotin a lân ding banga. Hanchu midangngeiin a kôm, "Nangma khom a ruoisingei lâia inkhatlam hah nimak che mo?" an tia. Hannirese, Peter'n a ipdela, "Kei chu ni mu-ung," a tia.

²⁶Ochai Inlaltak suok Peter'n a kuor a lengthâk pe sungsuokpa han Peter kôm, "Ruhvon sînga han a kôm nang ku mu nimak mo?" tiin a rekela.

²⁷Avêlin Peter'n, "Ni mu-ung" a ti nôka, male chu âr akhuong kelen zoi.

Jisua Pilat makunga ânding

(Mat 27:1-2,11-14; Mk 15:1-5; Luk 23:1-5)

²⁸Jînga inmânin Jisua hah Caiaphas in renga Rom râiôt ina an tuonga. Juda rachamneipungei chu balam angin ânthiengin Kalkân kût ruolhoia sâk, sâk rang an nuom sikin râiôt ina lût mak ngei.

²⁹Masikin Pilat tuol pêntieng ava jôka an kôm, "Hi mi hih imo nin nôna?" tiin a rekel ngeia.

³⁰Annin an thvon chu, "Hi mi hin ite tho minchâina dôn no senla chu no kôm hong tuong no ni ung."

³¹Pilat'n an kôm, "Nônchu nangnin tuong ungla nin balam angin a chungroi jêk roi," a tipe ngeia. Anni ngei han, "Kin balamin tute that rangin mi phal mak," tiin an thuona.

³²(Jisua'n a thi rang thurchi a lei misîr hah ahong tung dikna rangin ha ngei hah ahong om ani.)

33Pilat hah a in sũaga a lût nôka male Jisua a koia, “Judangei Rêngpa mo ni ni?” tiin a rekela.

34Jisua'n, “Hi chong hih nangma nu mulung suoka mi ni rekel mo, mîn ku thurchi nang an misîr pe sika mo?” tiin a thuona.

35Pilat'n a thuona, “Juda mi ani tiin mi ni mindon mo? Ni mingei nananâk le ochai inlal ngei kêng ku kut chungga nang hong pêk an ni, imo no tho pe ngei?”

36Jisua'n a kôm, “Ke Rênggram chu hi rammuol hih nimaka; hi rammuol hih ke Rênggram nisenla chu, ku nûkjûingeiin doi an ta, Juda rachamneipungei kuta pêkin om no ning. Ke Rênggram chu mahin nimak!” a tia.

37Hanchu Pilat'n, “Rêngpa mo ni ni?” tiin a rekela, Jisua'n, “Nangman kêng rêngpa ni ni, ni na ti ngah. Kên zira male hi rammuola ku juongna abitak chu, chongtak misîr rang piel hih ani. Tukhom chongtaka om ngei kai chu ko chong an rangâi ngâi,” tiin a thuona.

38“Male Pilat'n, chongtak hih imo?” tiin arkela.

Jisua hih thi rangin a roijêkmasat ani

(Mat 27:15-31; Mk 15:6-20; Luk 23:13-25)

Hanchu Pilat han tuol pêntieng a jôk nôka, mingei kôm han, “Theiloi mintumna rangin ite abi man mu-ung.

39Hannirese nin balam anghan, Kalkân kût zorân mi ântâng inkhat nangni ko mojôk pe ngâia. Judangei rêngpa hih nangni mojôk pe rongga nin jôt mo?” a tia.

40Anni ngei han iniek pumin a kôm, “Nuom mak meh, ama chu ni no rese! Barabbas ke kin nuom!” tiin an thuona. (Barabbas chu inru, mi khuolse ngei chungga kut lek ngâi ani.)

John 19

1Hanchu Pilat'n Jisua a tuonga, a jêma.

2Râlmingeiin riling amachangngei hah lukhum an phana, male a lua an min khuma; hanchu kâcholiin chuol senduk an min haka,

3male a kôm an hongga, “Judangei Rêngpa ring sôt roh!” an tia, male an sea an bên zoi.

4Pilat han pêntieng vêlkhat ava jôk nôka, mipuingei kôm, “En ta u, theiloi mintumna rangin ite a sietna abi man mu-ung, ti nangni min riet rangin nin kôm ka la hong tuong rang ani,” a tia.

5Masikin riling lukhum inkhum, kâcholiin chuol senduk hakin Jisua a hong jôka. Pilat'n an kôm, “En roi! Hi miriem hi!” a tia.

⁶Ochaisingei le Biekin rungungei an hong mu lehan an hêtsana, “Khrosa jêmdel roh, khrosa jêmdel roh,” an tia. Pilat'n an kôm, “Nônchu tuong unglâ nangnin khrosa jêmdel roi. Theiloi mintumna rangin ite a sietna bi man mu-ung,” a tia.

⁷Mipuingei han, “Pathien Nâipasalin ân bê sikin a thi rang ani, ti balam kin dôn ani,” tiin an thvon nôka.

⁸Ma chong hah Pilat'n a rietin chu a chi uol nôk zoia.

⁹In sûnga a lût nôka, Jisua kôm, “Kho renga hong mo ni ni?” tiin a rekela. Aniatachu Jisua'n thvon maka.

¹⁰Pilat'n a kôm, “Ni na thvon loi rang mo? Nang mojôk theina le nang jêmdel theina rachamneina ko dôn ti hi riettit roh,” a tipea.

¹¹Jisua'n a kôm, “Pathien'n nang a pêk sika vaiin kêng ku chungâ rachamneina no dôn ani. Masikin nu kuta mi hong bangpu chu a sietna arik uol ok ani,” tiin a thuona.

¹²Pilat'n ma chong hah a rietin chu Jisua a mojôk theina rang lam a mindonna. Aniatachu mipuingeiin an hêtsana, “No mojôkin chu Rêng mal nimak che! Tutu khom rênga ân bê kai chu Rêng doia ân hel an ni!” an tia.

¹³Ma chonggei hah Pilat'n a rietin chu Jisua pêntieng a tuonga male roijêkpu sukmana “Lungdâp” (Hebrew chongin “Gabbatha”) an tia han ânsunga.

¹⁴Hima nikhuo hah Kalkân kût ranga incherêlni ania, sûnchimrip dôr ani. Pilat'n mingei kôm han, “Mahin nin rêngpa aom!” a tia.

¹⁵An hêtsan nôka, “That roh! That roh! khrosa jêmdel roh!” an tia. Pilat'n an kôm, “Nin rêngpa khrosa jêmdel rangin mi nin nuom mo?” tiin a rekel ngeia. Ochaisingei han, “Caesar vai kêng rêng kin dôn!” tiin an thuona.

¹⁶Hanchu Pilat'n Jisua hah khrosa jêmdel rangin an kut chungâ a bâng zoi ani.

Jisua jêmdelin aom

(Mat 27:32-44; Mk 15:21-32; Luk 23:26-43)

Masikin Jisua ha an tuong zoia.

¹⁷Jisua a khros ruputin “Luru Mun” (Hebrew chongin “Golgotha”) an ti dênin a sea.

¹⁸Ma mun han khrosa an jêmdela; male midang inik an jêmdel sa, voi le changa, alâitaka Jisua.

¹⁹Pilat'n minrietna a mizieka, “Nazareth Jisua, Judangei Rêngpa,” tiin khros lera a târa.

²⁰Jisua an jêmdelna mun hah khopuilien renga ala loi sikin mi tamtakin an porea. Minrietna hah Hebrew chong, Latin chong le Greek chongin miziek ani.

²¹Ochaisingei han Pilat kôm, “Judangei Rêngpa” tiin miziek no roh, ama'n kêng, “Judangei Rêngpa ki ni a ti,” an tipea.

²²Pilat'n, “Ki miziek sai chu miziekin aom ani zoi.” tiin a thuona.

²³Râlmingei han Jisua an jêmdel suole chu a puonngai an lâka tum minlin an sema, an taka tum khat an changa. A kâcholiinчуол khom an lâka, maha sûiloi kâcholia không ani.

²⁴Râlmingei han, “Khêr no u; tho, tumo a chang rang taruosân ei ti u.” inkhat le inkhat annin tia. Pathien lekhabua ânziek hah ahongtung adik theina rangin ha ngei hah ahong om ani: “Anni ngei han ku puon ki dier annin sema male ka kâcholiinчуол rangin taruo an sâna.” Male ma anghin râlmingei han an tho zoi ani.

²⁵Jisua khros kôla ânding ngei chu a nû, a nû zuorpuinu, Clopas lômnu Mary, le Mary Magdalene ngei an ni.

²⁶Jisua'n a nû le a lungkham ngâipu a ruoisi hah a kôla an inding a mua; masikin a nû kôm han, “Ama hih na nâipasal ani,” a tipea.

²⁷Hanchu a ruoisi kôm han khom, “Amanu hih nu nû ani,” a tipea. Ma zora renga ha chu a ruoisi han hanu hah a ina om rangin a tuong zoi ani.

Jisua Thina

(Mat 27:45-56; Mk 15:33-41; Luk 23:44-49)

²⁸Jisua'n atûn chu neinunngai murdi ânzoi suo zoi ti a rieta; male Pathien lekhabua ânziek ahong tung adik theina rangin, “Ku tui ân râl,” a tia.

²⁹Ma muna han uain thûra sip khuriâi inkhat aoma, sponge uaina an michie, hyssop khiengrol le an târra, a mûr an hong min tôna.

³⁰Jisua'n uain thûr ha a nêk suole chu, “Ahek zoi!” a tia. Hanchu a lu a juon kûna a rangachat zoi.

Jisua kangrâm an sun

³¹Hanchu ma nikhuo hah Sûnrangngani ania, Juda rachamneipungeiin Sabbathnia khros lêra ruok aom tit rang hah an nuom loi sikin mi an jêmdel ngei kengei hah khiek rangin, le an ruokngei khrosngei renga musum rangin Pilat kôm phalna an ngêna, ahong tung rang Sabbathni ha aliekin ân thieng ani sikin.

³²Masikin râlmingei hah an sea, Jisua leh munkhata an jêmdel tong masapu le midang inkhatpu kengei hah an khieka.

³³Aniatachu Jisua kôla an hongin chu athi saiin an hong mua, masikin a kengei chu khiek mak ngei.

³⁴Râlni inkhatin Jisua kangrâm isei leh a hong sunna, harengan thisen le tui a juong suok zoia.

³⁵(Masikin hi neinun a mupu hin nangni khom nin iemna rangin a misîr ani. A misîr hih adika, male chongtak ani ti khom a riet ani.)

³⁶Pathien lekhabua, “A rungei inkhat luo khiek ni no nih.” tia ânziek hah ahong tung adik theina rangin hima hah ahong om ani.

³⁷Pathien lekhabu mun danga, “Mingei han an sunna hah la en an tih,” a ti sa.

Jisua an phûm

(Mat 27:57-61; Mk 15:42-47; Luk 23:50-56)

³⁸Masuole chu, Arimathea khuoa mi Joseph han Pilat kôm Jisua ruok hah lâk rangin a ngêna. (Joseph hah Juda rachamneipungei chi sika inrûka Jisua nûkjûipu ani.) Pilat'n ruok hah chôî thei rangin a phal pea, masikin Joseph'n a chôia a se pui zoi ani.

³⁹Nicodemus, motona jâna Jisua kôma lei hongpu han mirimhoi myrrh le aloe ânpol kilogram sômthum dôr chôiin Joseph a jûi sa.

⁴⁰Ha pasal inik ngei han Jisua ruok ha an chôia, Judangei inphûm ngâi balam angin mirimhoi le puoninnêm leh an tuoma.

⁴¹Jisua an thatna muna han ruhuon inkhat aoma, ma ruhuon sêng han tute an lân phûmna ngâiloi thân thar inkhat aoma.

⁴²Sabbathni rang motona sên ani sika le thân ha anâi sikin, mahan Jisua ruok hah an phûm zoi ani.

John 20

Thân akorong

(Mat 28:1-8; Mk 16:1-8; Luk 24:1-12)

¹Pathienni jînga, ala jîng mumuokin, Mary Magdalene thâna a sea, thân kotbâia lung hah muluoipai saiin ava mua.

²Simon Peter le ruoisi dang Jisua'n a lungkham ngâipu, kôm han a tâna, male an kôm, “Thân renga Pumapa hah an lâk paia, male an darna riet khâi mak me,” a tia.

³Hanchu Peter le ruoisi dang hah thâna an sea.

⁴Anruonin an tâna, aniatachu ruoisi dang hah Peter a khêl pita thâna a tung masa ani.

⁵Ân kûna male puoninnêm зуот a mua, hannirese asûnga chu lût mak.

⁶Anûka Simon Peter a juonga male thân sûnga a lût pata. Puoninnêm зуот chu a mua

⁷male Jisua lu tuomna puon ha chu puoninnêm zuot leh munkhatin om loiin atheia an zuotin ava mua.

⁸Hanchu ruoisi dang, thâna tung masapu khom hah ava lûta; a mua male a iem zoi.

⁹(Pathien lekhabu'n thina renga lân thoinôk atih, ti hah la riet thei uol mak ngei ani.)

¹⁰Hanchu ruoisingei hah an ina an kîr nôk zoi.

Mary magdalene kôm Jisua ânlar

(Mat 28:9-10; Mk 16:9-11)

¹¹Mary chu chap pumin thân pêngtieng ândinga, chap chungin ân kûna, thân sùng a vênga

¹²male vântûrton inik angôia invôn Jisua ruok an min jâlna luthun tieng inkhat kethuon tieng inkhat an insung a mua.

¹³Ha ngei han, “Nupangnu, ithomo na chapa?” tiin an rekela. Amanu han, “Ku Pumapa an lâk paia, khonmo an darna riet khâi mu-ung!” tiin a thuon ngeia.

¹⁴Hanchu amanu ha a hônheiin chu mahan Jisua ânding a mua; hannirese amanu ha Jisua ani tiin riet mak.

¹⁵Jisua'n a kôm, “Nupangnu, ithomo na chapa? Tumo no rok?” tiin a rekela. “Amanu han ruhuon donsûipu mini tiin a bôka, a kôm, pu, ama hah na lâkin chu khonmo na dar mi ril roh, sêng ka ta, ama ka va lâk theina rangin,” amanu han tia.

¹⁶Jisua'n amanu kôm han, “Mary!” a tia. Amanu han a tieng mâi a thaka, Hebrew chongin, “Rabboni!” amanu han a tia. (Maha “Minchupu” tina ani.)

¹⁷Jisua'n amanu kôm han, “Mi mutu sôt no roh, asikchu ka Pa kôm la se nôk mu-ung. Hannirese ka lâibungngei kôm sênla, ka Pa an Pa, ka Pathien an Pathien kôm ki kîr nôk rang ani zoi tiin va ril ngei roh,” a tia.

¹⁸Masikin Mary Magdalene hah a sea, male Pumapa a mu tie le an inkaina a ril ngei hah ruoisingei ava misâr pe ngei zoi.

Jisua a Ruoisingei kôm ânlar

(Mat 28:16-20; Mk 16:14-18; Luk 24:36-49)

¹⁹Ha Pathienni kholoia han, Juda rachamneipungei an chi sikin ruoisingei hah insûnga inkhâr kalin an intûpa. Hanchu Jisua a hong a an lâia ândinga, “Nin lâia rathânngamna om rese!” a tia.

²⁰Mahi a ti suole chu a kutngei le a kângrâm a min mu ngeia. Pumapa an mua, ruoisingei ha râisânân an sip zoia.

²¹Avêlin Jisua'n an kôm, "Nin chungã rathânngamna om rese. Pa'n mi tîr anghan kei khomin nangni ki tîr ani," a tipea.

²²Hanchu ratha a mûtkhum ngeia male an kôm, "Ratha Inthieng man roi.

²³Mingei sietnagei khom nin ngâidam kai chu ngâidamin om an ta; nin ngâidam loi kai chu ngâidamin om no ni ngei," a tia.

Jisua le Thomas

²⁴Jisua a hong lâihan ruoisi sômleinik ngei lâia Thomas (Ânphîr an ti) ha chu an lâia omaka.

²⁵Masikin ruoisi dangngei han, "Pumapa kin mu zoi!" an tipea. Thomas'n an kôm, "A kuta peret sâbenûkngai ku mu noa male a sâbenûkngai ha ku kutruol leh ki khîk noa, a kângrâma sâbenûkngai khom ko tôn nônchu iem no ning," a tia.

²⁶Hapta khat suole chu ruoisingei hah insûnga an intûp nôka, Thomas khom an kôm a om sa. Inkharngai hah an kala, aniatachu Jisua a hongã, an lâia ândinga, an kôm, "Nin chungã rathânngamna om rese," a tia.

²⁷Hanchu Thomas kôm, "Nu kutruol leh mahin khîk inla, male ku kutngai hi en roh; hanchu ka kângrâm khom nu kut sônin pûr inla tôn roh. Iemzoiloim om khâi nôla, male iem ta roh!" a tipea.

²⁸Thomas'n a kôm, "Ku Pumapa le ka Pathien ni ni!" tiin a thuona.

²⁹Jisua'n a kôm, "Mi ni mu sika ni iem mini? Mi mu loa mi iem ngei chu satvur ani bak na!" a tipea.

Hi lekhabu'n akhîn

³⁰A ruoisingei mitmu chungã sininkhêl dang tamtak ngei a thoa, mangei hah hi lekhabu sûng hin miziek nimak.

³¹Hannirese Jisua hih Messiah, Pathien Nâipasal ani ti nin iem theina rang le ama nin iemna sika ringna nin dôn theina ranga hengei hi chu miziek ani.

John 21

Ruoisingei sari kôma Jisua ânlar

¹Masuole chu, Tiberias dîla a ruoisingei kôm Jisua ânlar nôka. Hi anghin neinun ahongtunga.

²Simon Peter, Thomas (Ânphîr an ti) Nathanael (Galilee ram Cana mi), Zebedee nâipasalngai le Jisua ruoisi dang inik ngei anrêngin an intûpa.

³Simon Peter'n adangngei kôm, "Nga sûr rangin se ki tih," a tia. Anni han a kôm, "Keini khom juong sa kin tih," an tipea. Masikin rukuonga an se zoia, aniatachu hani jâna han chu ite man mak ngei.

⁴Nisa ahong suokin chu Jisua tuipanga ândinga, aniatachu ruoisingei han Jisua ani ti riet mak ngeia.

⁵Hanchu Jisua'n an kôm, “Ruothartengei, ite man mak chei mo?” tiin a rekel ngeia. “Ite man mak me” tiin an thuona.

⁶Ama'n an kôm, “Rukuong changtieng han nin lên ha vôr unglâ male man nin tih,” a tipe ngeia. Masikin an lên hah an vôra nga an man tam rai sikin rukuong sũaga kai nôk thei khâi mak ngeia.

⁷Jisua'n a lungkham ngâipu ruoisi han Peter kôm, “Pumapa kêng ani ngaso!” a tipea. Peter'n Pumapa ke ani ti a rietin chu a puon a bomduopa (korongin aom ani sikin) male tuia ânchôm zoia.

⁸Ruoisi dangngei chu rukuong leh tuirakham tieng an hong, lêna nga sipmatin an kaisuo, tâng renga hah la bâk maka meter razakhat dôr ani.

⁹Tuirakham an hong suokin chu rohol leh mei tho, le achunga nga le vâipôl alekti aom an hong mua.

¹⁰Hanchu Jisua'n an kôm, “Atûn renga nin nga sữr senkhat hah hin hong chôi ta u,” a tipe ngeia.

¹¹Simon Peter'n rukuonga chuongin nga lienpapa lên sipmatin a kaisuo, anrêngin razakhat sômrangnga inthum ani; madôra nga tam khom nisenla lên chu chet mak.

¹²Jisua'n an kôm, “Hong unglâ, sâk roi” a tipe ngeia. Ruoisingei lâia tutên “Tumo ni ni?” ti luu rekel ngam mak ngei Pumapa ani tiin an riet minthâr sikin.

¹³Hanchu Jisua a sea, vaipôl a lâka a sem pe ngeia, ma angdên han nga khom a sem pe ngei nôka.

¹⁴Ma hah Jisua'n thina renga ânthoinôk suole a ruoisingei kôma ânlar avoithumna ani.

Jisua le Peter

¹⁵An sâk suole chu Jisua'n Simon Peter kôm, “Simon John nâipasal, hi adangngei nu lungkham nêkin mi ni lungkham uol mo?” a tia. Ama'n a kôm, “O, Pumapa, nang ku lungkham tiin ni riet,” tiin a thuona. Jisua'n a kôm, “Ke belringei donsũi roh,” a tipea.

¹⁶Avoiniknân Jisua'n a kôm, “Simon John nâipasal, mi ni lungkham mo?” a tia. “O, Pumapa, nang ku lungkham ti ni riet,” tiin a thuona. Jisua'n a kôm, “Ke belringei donsũi roh,” a tipea.

¹⁷Avoithumnân Jisua'n a kôm, “Simon John nâipasal, mi ni lungkham mo?” a tipea. Jisua'n vêlthum, “Mi ni lungkham mo?” tiin a rekel sikin Peter ahong

innguikhak zoia, masikin, “Pumapa neinuntin ni riet leta; nang ku lungkham ti khom ni riet!” a tia.

¹⁸“Chongdiktak nang ki ril: na nâipang lâihan chu nêh thoka nu nuomna titieng ne se thei ngâia; aniatachu ulien ni ni tikin chu nu kutngei mazar na ta, tûn mini nang khit pe an ta nu nuom loina titieng nang tuong an tih,” a tipea.

¹⁹(Hi chong hih Jisua'n a ti pena chu Pathien roiinpuina rangin Peter thi rang tie rietna ranga ani.) Hanchu Jisua'n a kôm, “Mi jûi roh!” a tipea.

Jisua le Ruoisi dang

²⁰Peter a hônheiin chu ruoisi dang, Jisua'n a lungkham ngâipu, jânbu an nêk lâia Jisua tieng hôn ôna, “Pumapa, tumo nang a minsûr rang?” tia rekelpu hah a nûk a jûi a mua.

²¹Peter'n ama hah a mûn chu Jisua kôm, “Pumapa hipa hi rêkte imo a tho rang?” tiin a rekela.

²²Jisua'n a kôm, “Ku juong nôk mâka lei ring tit rangin nuom ngân inlang imo no lo rang? Mi jûi roh!” tiin a thuona.

²³Masikin ha ruoisi hah thi no nih tiin, Jisua nûkjûingei lâia ânthang zoi. Aniatachu Jisua'n thi no nih a tina nimaka; “Ku juong nôk mâka lei ring tit rangin nuom ngân inlang imo no lo rang?” kêng a ti ani.

²⁴Ama hih ruoisi, hi neinunngai a tîpu le a miziekpu khom ania; male a ti ngei khom hih adik ani tiin ei riet.

Chongkhârna

²⁵Atûn, Jisua sintho neinun dang tamtak aoma. Mangei murdi hah miziek var rang nisenla chu, mizieka om lekhabungei chu rammuol pumpui khom keng rangin minhoi mu-ung.

Sinthongi

Sinthongi 1

¹Moroitak, Theophilus: Ke lekhabu motontaka han, Jisua'n sintho aphut lâia a sintho le a minchuna chonggei hah ki miziaka

²invân tienga tuongin aom ni tena rilnangei hah. Tuongin a om mân han, a tîrton ranga a thang miriemngei kôm han Ratha Inthieng ranakin chongpêk a pêk zoi.

³Ati suole a ring nôk ti an riet minthâr theina rangin sîn sômminli sîng hah chu vêl tamtak an kôm ânlarâ, a chongpui ngeia, Pathien Rêngam thurchi a ril ngâia.

⁴Male munkhatin an intûp lehan, ma chongkhâm hih a pêk ngei ani: "Jerusalem mâk no roi, nangni ki misîr pe ngâi neinum manboipêk hah lei ngâk roi, ka Pa'n ânkhâm hah.

⁵John han tuiin a Baptis ngâia, aniatachu sîn tômte suole nangni chu Ratha Inthiengin baptis chang nin tih," a tia.

Jisua invâna tuongin aom

⁶Hanchu an intûpkhôm nôka, "Pumapa atûn hin mo Israelngei Rêngam ni minding nôk rang?" tiin tîrtonngeiin an rekela.

⁷Hanchu, Jisua'n an kôm, "Azorangei le anikhuo chu ka Pa'n ama rachama om ranga a dar ani, anni ngei hah nin lei riet rang nimak.

⁸Hannirese, Ratha Inthieng nin chung ajuong tika chu sinthotheina la dôn nin tih, hanchu jerusalema, Judea le Samari ram pumpui ngeia, kôlkung dênin ko chong rietpuiungei nîng nin tih," a tia.

⁹Hanchu ma chong hah a ril suole chu an mu chungchakin invân tieng tuongin a oma, an muphâk khâi loina sûmin a tuongpai zoia.

¹⁰Ha anga invâna a se an thîr lâitakin mi inik puonchek insilin an kôm inningloiin an juon dinga.

¹¹"Galilee mingei, ithomo invân tieng tanga nin inding chien? Hi Jisua nin kôm renga invâna tuonga ompu hih invâna ranga lâka aom nin mu angtakin la juong kîr nôk ngêt a tih," an tia.

Juda Iscariot ruthûl an thang

¹²Hanchu, tîrtonngei hah Olive Muol renga jerusalema an kîr nôk zoia, ma muol hah Jerusalem renga kilometer inkhat dôra ala ani.

¹³Hanchu Khopuilien hah an lûta an omna ngâi khâltan chunginta han an kala: anni ngei hah Peter, John, Jakob, Andrew, Phillip, Thomas, Bartholomew, Matthew, Alfai nâipasal Jakob, Zelot Simon le Jakob nâipasal Judas an ni.

¹⁴Anrêngin nupangngei hah, Jisua nû Mary le Jisua urêngngei le mulung inruol takin chubaitho rangin an intûp bang ngâi ani.

¹⁵Sûn tômte suole chu iempungei an intûpkhôma razakhat sômnik an nia, ha ngei lâia han Peter chong rangin ândinga.

¹⁶“Ka champuingei, Ratha Inthiengin Jisua sûrpu ranga aruoipu Judas roi David bâia alei ril chong hah atung rang piel ani.

¹⁷Ama hah ei kôma kop ngâi mi ania, hi ei sinthona hin khom rangtum dôn ranga alei thang ani,” a tia.

¹⁸(Ama han saloi thona sum a man lehan mun inkhat a rochôka, ha muna han a thia a von apuok khoia arîl ngei aterhet ani.

¹⁹Ha roi hah jerusalema om murdi'n an rieta, masikin ma mun hah an chongin, Akeldama an tia ma mun hah “Thisen mun,” tina ani.)

²⁰ “Lapuibua hi anghin ânziêka,

‘A omna in lei ram senla; asûnga tute omno rese ngei’ ti le.

‘A sina mun midangin chang rese ngei.’ Ti hih miziekin alei om.

²¹⁻²² “Masikin, a ruthûl rang thang ngêt rang anânga, ei lâia tumakhat Pumapa Jisua sintho le sêna-hongna a rietpuipu ei lâia mi, John Baptis tholâi renga Jisua invâna a kal ni tena ama hah eini leh munkhata inthoinôkna rietpuipu ni rangin,” a tia.

²³Masikin mi inik: Joseph, Barsabbas an ti (Justus khom an ti sa ngâi) le Matthias an zena.

²⁴Masuole chu chubai an thoa, “Pumapa, nangman miriem mulungrîl murdi rietpu hi ngei inik hih tutak hi mo na thang mi min riet roh.

²⁵Judas ama muna a se theina ranga hi tîrton sin a mâkrak mun thûl rangin,” an tia.

²⁶Hanchu taruo an sâna, an taruosân hah Matthias chung a achula, ha anghan Matthias hah tîrton sômleikhat ngei lâia telsa ani zoi.

Sinthongei 2

Ratha Inthieng juong tung

¹ Penticos ni ahong tungin chu iempungei hah anrêngin mun khata an intûpkhôma.

²Inningloi rengen invân renga phâivuopui angati rahang ajuong tung zuta, an insungna in hah ajuong sip zita.

³Melei anga om meidon insem inzarin an mua, an chung a achuong chita.

- ⁴Anrêngin Ratha Inthiengin an sip zita, Ratha'n a min chong ngei angtaken chong dangin an chong zoia.
- ⁵Hanchu muntin renga hong Juda sakhuo mingei jerusalema an châma.
- ⁶Ma rahang hah an rietin chu, mi tamtak an hong intûpa, mitinin iempungei chong hah anni an chong chit angin an riet sikin an mulung sûnga an kamâma.
- ⁷an mulung ajînga, kamâmruoi khom an ti oka, “En ta, hi a chongnei murdi hih Galilee rama mi nimak ngei mo!
- ⁸I angin mo ei rêngin ei inzirpui chong ang chita ei riet thei hih?
- ⁹Senkhat Parthia mi, Media mi, Elam mingei ei nia, senkhat Mesopotamia rama om, Judea rama om, Cappadocia ram, Pontus le Asia rama om,
- ¹⁰Phrygia le Pamphylia ram, Egypt le Libya rama Cyrene khuo kôl revêla omngei ei nia, senkhat Rom khuo renga hong,
- ¹¹Judangei le Jentail Juda lei minchang ngei ei nia, male senkhat Crete tuihuol mi le Arabia rama mi ei nia; Hankhoma, Pathien sintho roiinpui ngei an misîr, ei inzirpui chong ang chita ei riet hih!” an tia.
- ¹²Anrêngin a mindona chang riet loiin kamâm aruoi an tia, “Hi ngei hih inmo anni rang?” tiin anni le anni an inrekela.
- ¹³Hannirese senkhatin chu iempungei hah, innuinân an manga, “Hi mingei hih uain inrûi kêng an ni!” an tia.

Pentecos nia Peter chongril

- ¹⁴Hanchu sômleikhat ngei leh Peter hah an indinga, mipui lâia han inringtaken chongril aphuta, “Nangni Judea rama mingei le jerusalema ompu murdi ngei, ko chongril hih rangâi unglâ male mahi imo aomzie nangni lei ril rong.
- ¹⁵Hi ngei hih nin iem lam angin inrûi mak ngei, atûn hin jîng dâr kuo vaikêng ala ni.
- ¹⁶Hi roi hih Dêipu Joel'n a lei ril hah ani.
- ¹⁷ ‘Pathien'n sîn nûka chu hi anghin la tho ki tih; mi murdi chungka ka Ratha la bun ka ta nin nâipasal le nin nâinupangngeiin ko chong la misîr an ta; nin ruotharte ngeiin inlârna mûng an ta, male nin tarnggeiin ramangin phan an tih.
- ¹⁸Ani, ma nikhuo ngeia hanchu ki tîrlâmngiei nupangngei, pasalngei chungka ka Ratha bun ka ta ko chong la misîr an tih.
- ¹⁹Chungtieng invâna sininkhêlnegei male nuoi tieng pilchungka kamâmruoingei min mu ngei ki tih. Mahan thisen, mei, meikhu bit ngei om a ta;
- ²⁰Nisa jîng a ta male tha thisen anghan sen atih; Pumapa Nikhuo inlal le roiinpuetak hah ajuong tung mân.

- 21** Hanchu, tukhomin Pumapa riming ralam murdi chu sanminringin om an tih.'
- 22** "Nangni Israel mingei hi chongngoi hih lei rangâi roi! Nangni rengin nin riet anghan, Nazereth Jisua hah Pathien'n nin lâia sininkhêl, kamâmruoi le sinthona ngei nangni a min riet ani.
- 23** Jisua hah Pathien jêklam le mintuo lam angtakan an sûra, nangnin mi nunsie ngei kuta bângin khrosa jêmdelin nin thata.
- 24** Aniatachu Pathien'n thina sinthotheina renga mojôkin, ama hah thinân asûr chien thei loi sikin a kaithoi zoi.
- 25** David reng khomin a chungroi hi anghin a rila,
'Ka makunga Pumapa ku mu tit ngâia; kên nîk lolina rangin ka changtieng aom tita.
- 26** Masikin râisânnân ki sipa, ko chong khom râisâna asip. ka taksa khomin a sabei ngit ani, ka sabeina khom râisânnân asipa.
- 27** Masikin ka ratha hi mithi khuoa mâksan no ti nia, Ni mi inthieng ruok mon rang phal no ti ni.
- 28** Nangman ringna lampuingei mi ni min mua; male mi ni ompui sikin râisânnân sip ki tih zoi.'
- 29** "Ka champuingei, ei richibul Rêng David roi hah hâitakin nangni ki ril. Ama hah a thi zoia, male an phûma, a thân khom atûnten ei kôla ala om tit.
- 30** Ama hah Dêipu ania, a ruthûl rangin tumakhat Pathien'n David richisuonpârngoi lâia rêngin la phun rangin ânkhâm ngit ti a rieta.
- 31** Pathien'n sûnmotona sin a tho rang tie David'n a lei riet piel sikin Khrista inthoinôk rang chong misîrin,
'Ama hah mithi khuoa mâkrakin om maka; a ruok khom thâna mon mak,' ai ti ani.
- 32** Hima Jisua hih Pathien'n thina renga a kaithoinôk zoi ti chong hih keini reng hi rietpuipungei kin ni.
- 33** Pathien changtieng chôiminsâng ani zoia, a Pa kôm renga Ratha Inthieng leikhâm hah a changa, atûna nin mu le nin riet hi ei chung ajuong vur ani hih.
- 34** David hah ama lelên invâna kal maka,
'Pumapa han ku Pumapa kôm: ka changtieng insung tit roh.
- 35** Keima'n na râlngoi murdi ne kepha sirna nuoia ka dar mâka a ti, a tina kêng ani.'

³⁶“Hanchu, Jisua nin jêmdelpu hah Pathien'n Pumapa le Khrista aminchang ngêt tih Israel mi murdi riet ngêt rese ngei a tia.”

³⁷An chong riet han an mulungrîl atôka, Peter le tîrton dangngei kôm han, “Lâibungngei, imo kin tho rang ani zoi?” an tia.

³⁸Peter'n an kôm, “Nin sietnangei ngâidam anina rangin insîr unglâ, Jisua Khrista rimingin Baptis chang pak roi, hanchu, Pathien manboiapêk Ratha Inthieng hih chang nin tih.

³⁹A khâm hih nangni le nin nâingei le ram lataka mi murdi ngei rang le Pumapa Pathien'n a kôma a koi ngei rangin ani,” a tia.

⁴⁰Peter'n Chong dang tamtakin a ril minthâra; male atûnlâi ruolthar saloi ngei renga hih jôk roi, tiin a ngêna.

⁴¹A chong a pom ngei murdi baptis an changa, ma nikhuo han mi isâng thum an inbôk sa zoi.

⁴²Tîrtonngei kôm inchûn, inlopkhômna inchelin bu khalâi ot inlopkhômna inchelin le chubaitho ningsiet takin an oma.

Iempungei lâia ringnun

⁴³Tîrtonngei han sininkhêl kamâmruoi tamtak an tho sikin mitinin an rin ngei zoia.

⁴⁴A iempungei murdi chu inlopkhômmin an neinunngiei murdi an minchun zoi.

⁴⁵An rochonngiei an neinunngiei murdi juorin an nâng dungjûiin inmang inlômmin an insem ngâia.

⁴⁶Anîngtin mulung munkhatin Biekina an inkhôm ngâia an in tieng khom râisântak le mulungchuktakin bu khalâi an ôt ngâi.

⁴⁷Pathien an minpâka, mi murdi râisân lamin an oma. Hanchu, Pumapa minringa hong om tîr ngei chu anîngtin an lôm rangin a hong bôk pe bang ngâi ani.

Sinthongei 3

Kholra kutdo mindamin aom zoi

¹Sûnkhat chu Peter le John hah chonûk dâr thumin chubaitho rangin Biekina an sea.

²Pasal inkhat a suok renga kholra rojônin Biekina se ngei kôm kutdo rangin mokot, “Enhoi” an ti kôla han anîngtin an dar ngâia.

³Ama han Peter le John Biekina an lût rang hah a mua, a kut a lei doa,

⁴Peter le John han an en ngita, Peter'n, “Keini mi hong en ta!” a tia.

- ⁵Masikin, ama han anni renga imakhat man rang sabein a en ngeia.
- ⁶Hannirese Peter'n, "Sum le rângkachak dôn mu ung, aniatachu ko dôn nang ke pêk thei chu Nazareth Jisua Khrista rimingin inthoi inla ne ke le lôn roh!" a tia.
- ⁷A kut changtieng a sûra, a kaithoia, voikhat rengin a kengei le a ke artui rungei ahong rât kelena.
- ⁸Ânchômma a ke leh ândinga a lôn phut zoia, Pathien manpâk pumin Biekina han an lût kelen zoia.
- ⁹Kea a lôn le Pathien a minpâk hah mingeiin an mua,
- ¹⁰Biekin mokot, "Mokot Enhoi" bula kutdoa lei insung ngâi hah ani ti an rieta, a chunganeinun tung hah kamâmruoi ok an tia, a mindonna chang riet mak ngei.

Biekina Peter chongril

- ¹¹A dampu han Peter le John hah a la kol tita, hanchu mi murdi'n kamâmruoi tatakin an rieta, Solomon Bokrop an tia han mi tamtak an hong intûpkhôma.
- ¹²Mipui intûp ngei lâia han Peter'n, Nangni Israel mingei, ithomo hi hih kamâmruoi nin ti? Pathien kin iem mindik sika kin sinthotheinân hi mi hih kin minlôn anga ithomo ni nan en ngit?
- ¹³Abraham, Isaac le Jakob Pathien, ei richibulngei Pathien han a Tîrlâm inthieng le roiinputak, Jisua hah rachamneipungei kuta nin banga, male nin min sûra, Pilat'n mojôk rang a masat suonûk khomin a makunga nin lei heng ani.
- ¹⁴Mi inthiengtak le diktak hah nin henga, mi thatpa hah mojôk rangin Pilat kôm nin ngêna.
- ¹⁵Ringna pêkpu hah nin thata, hannirese Pathien'n ama hah mithingei lâi renga a kaithoi zoia, keini hih a rietpuipungei kin ni.
- ¹⁶A riming sinthotheina han hih kholrapa hih râtna a pêk ani. Nin mu le nin riet hih a riming taksônna sika sin ani; nin rêngin nin mu angin Jisua taksônna sika hong om hin amindamriem zoi ani.
- ¹⁷Male, "Atûn hin ka champuingei, nangni le nin ruoipungei khomin Jisua chunganein sintho hah nin riet loi tatak ani ti ki riet zoi ani.
- ¹⁸Pathien'n dêipungei murdi manga Khrista han a tuong rang ani tia a lei ril hah a juongtung ani zoi.
- ¹⁹Masikin nin sietnangei nangni ngâidam theina rangin insîr ungla, Pathien tieng hong kîrnôk ta roi, hanchu nin sietnangei ngâidamin om nin ta.
- ²⁰Male Pumapa kôm renga rathatienga râtna zora juong tung a ta, nin ranga Messiah a lei thang Jisua hah, juongtîr a tih.

²¹Pathien'n tienlâia a dêipu inthiengngei bâia a lei phuong sai anghan neinunngai murdi sin minthar zora atung mâka chu invâna la om rang ani.

²²Moses khom han, 'Pumapa nin Pathien'n keima ni tîr anga nin sungsuokngei lâia mi dêipu inkhat nangni minding pe a ta; nin kôma a ril murdi chu nin jôm rang ani.

²³Tukhom ha dêipu chongjôm loi murdi chu, Pathien mingei renga sensâiin that minmang pai nîng a tih,' a ti ani.

²⁴Male Samuel le a nûka dêipungei murdi chu atûnlâi thurchi hih an lei misîr ngâi ani.

²⁵Pathien'n a dêipungei manga chong a lei khâm hah nangni ngei rang ania, nin richibulngei kôma chongkhâm a lei pêk hah khom nin mansa zoia, Pathien'n Abraham kôm, 'Ni richisuonpârngei sikin pilchunga mi murdi satvur ki tih, a lei ti anghan.'

²⁶Masikin Pathien'n a Tîrlâm hah a thanga, nin puoloina lampuingei nûksong zit rang le mi murdi sat nangni vur rangin nin kôm a juongtîr masa ani hi," a tia.

Sinthongei 4

Rojêkpungei makunga Peter le John

¹Hanchu Peter le John'n mipuingei kôm chong an ril lâihan ochangei kôm, Biekin enkol ulienngai, Saduceengei hah an kôm an juong tung zuta.

²Jisua thina renga ânthoinôk sikin miriemngai khom inthoinôk an tih, ti thurchi mingei an ril ngei sikin asân an taksia.

³Masikin, an sîr ngeia, kholoi ani sikin anangtûk tena rangin intâng ina an khum ngeia.

⁴Hannirese, an chongril rangâipungei lâia mi tamtakin an iem zoia, an tamlam chu pasal ulien korong khom isâng rangnga dôr an ni.

⁵Anangtûka chu Juda ruoipungei, Upangei, Balam minchupungei Jerusalema an intûp zoia.

⁶Ochai Inlaltak Annas, Caiaphas, John, Alexander ngei le Ochai Inlaltak ruia mingei murdi lehan.

⁷Peter le John hah an makunga an minding ngeia, "I angin mo mahi nin tho? I ranakin mo, tu riming mo nin mang tiin an rekel ngeia?"

⁸Peter hah Ratha Inthiengin a sipa, an kôm, mipui Ruoipungei le Upangei:

⁹Avien hin kholrapa chungsa sin sa roia le a hong damna roia, i anga mindam mo tiin mi nin rekela anînchu,

¹⁰Nin rêngin riet roi, Israelngei murdi khomin riet rese ngei, Nazareth Jisua Khrista khrosa nin jêmdela, Pathien'n thina renga a kaithoinôk rimingin hi kholrapa nin makunga dam vangin ânding ani hi.

¹¹Jisua hih ani, Pathien lekhabua ati,

'Nangni in sinpungeiin nin hengpai lung hah, akila lung kâmnâng tak ahong chang zoi.'

¹²Sanminringna hih Jisua kôm mangke aom, rammuol pumpuia tute kôm mi min ringtheina rang riming dang Pathien'n pêk mak," a tia.

¹³Peter le John ngei an hâi tie an mua, lekha theiloi minmôl papai anni an rieta, asân kamâm aom an tia, Jisua kôm om ngâi an ni tiin an riet sikin.

¹⁴Hannirese, an mi mindam hah an kôm Peter le John inding an enin ite dem rang lak om maka.

¹⁵Masikin roijêkna in renga an mojôk ngei zoia, an se nûkin chu an thenin anin kerenga.

¹⁶"Hi mingei hih inmo ei tho rang ani zoi? an sininkhêl tho hih jerusalema om murdi khomin an riet zoia, eini khomin ite ei dem theiloi hih.

¹⁷Aniatachu mîn an riet minzar uol lolina rangin tute kôm Jisua rilinga chongril nôk khâiloi rangin lei misi ngei rei u," an tia.

¹⁸Masikin, anni hah an koi ngei nôka Jisua rilingin chongril tet khâiloi rangin le minchu ngei khâiloi rangin chong an pêk ngeia.

¹⁹Hannirese, Peter le John'n an kôm, "Pathien mitmua, Pathien chongjôm nêkin nangni chong jôm mo adik uol mindon ta u.

²⁰Keini chu kin mu le kin riet hi misîr loiin om thei no ni-ung" an tia.

²¹Hanchu roijêkpungei han an masî ngei nôk uola an mojôk ngei zoi, Peter le John sintho sika han mi murdi'n Pathien an minpâk sikin dûkmintong ngei thei khâimak ngei.

²²Kamâmontaka an mindampu hah kum sômminli nêka ulien ani.

Iempungeiin hâina an zong

²³Peter le John hah an mojôk ngei suole han, an champungei kôm an kîr nôka, ochai inlangei le upangeiin an kôma an ti ngei hah an ril leta.

²⁴Iempungei maha an riet lehan anrêngin Pathien kôm chubaithôn, "Pumapa Ânchungtak nangma, invân, pilchung, tuikhanglien le asûnga neinun om murdi ngei sinpu ni ni.

²⁵ Nangman Ratha inthiengin kin richibulngei ni târlâm David bâiin hi chong hi ni min rila, “Jentailngei ithomo an ning a thika; mipuingeiin ithomo neinun kâmnângloi an mintuo?”

²⁶ Pilchung rêngngeiin an insiema, roijêkpungei khom an intûpkhôma Pumapa le a Messiah doi rangin tiin.

²⁷ Ma ang han Herod le Pontius Pilat'n, hi khopuilien hin Jentailngei le Israelngei leh an intûpkhôma, Jisua ni Târlâm inthieng Messiah doi rangin.

²⁸ Ni sinthotheina le nu lungdo mintung ranga ne jêk masat sai anghan neinuntin tho rangin an intûp zoi.

²⁹ Misinangei hih en ta ni târlâmngei hih hâina murdi leh nu thurchi misâr phalna pêk roh.

³⁰ Mingei mindamna rangin nu kut phar inla, male târlâm inthieng Jisua riming jârin kamâmruoingei le sininkhêlungei sin theina rangin ni pêk roh” an tia.

³¹ Chubai an tho suole chu an om khômna mun hah ahong innîka, anrêngin Ratha Inthiengin an sipa, hâitakin Pathien chong an ril phut zoi.

Iempungei neinuntin an insem

³² Iempungei pâl hah mulung munkhat le mulungbôk mulungrîl munkhat ruputin an oma, an lâia tukhomin an neinun dôn ngei hah keima kata kêng ti loiin, neinuntin insem an inlopkhôm ngâi.

³³ Tîrtonngei han asân sinthona dônin Pumapa Jisua inthoinôkna, rietpuipu nina rangin chong an ril ngâia, male anrêngin Pathien satvurna lientak an chang pak zoi.

³⁴ An pâla tute ânsam khom om mak ngei, loingei mini, inngei mini an juora, aman hah an hong chôia,

³⁵ male tîrtonngei kuta an pêka; an nâng lam angta kin sum hah an sem ngâia.

³⁶ Masikin, Joseph, tîrtonngeiin Barnabas an ti (Aomtie chu “mohôk ngâipu” tina ani), Levi jâisuon Cyprus tuihuola mi ania,

³⁷ loimun a dôn hah a juora, aman hah hong chôiin tîrtonngei kuta a hong pêk zoi.

Sinthongei 5

Ananias le Sapphira

¹ Hannisenla mi inkhat a riming Ananias a dôngma Sapphira leh an oma, an neinun senkhat a juora.

²Hannirese ma sum hah a dongma inrietpuiin in-ang a thupa, adang aminieng kai hah tîrtonngei kuta an hong pêka.

³Hanchu Peter'n, "Ananias Ratha Inthieng huongin ram man in-angrip thup rangin ithomo Soitan'n nu mulungrîla racham ni min nei?"

⁴Nu juor mâna han khom nata ania; nu juor suo nûkin khom aman chu nata ania, ithomo ma anga neinun tho rangin nu mulunga na masata? Miriemngei huong nimak chea, Pathien huong kêng ni ni," a tipea.

⁵Ananias'n ma chong hah a riet lehan, ha renghan an leta a thi kelena; hanchu ha thurchi a riet murdi'n chu asân an chi zoia.

⁶Ruothartengei an hongga, a ruok hah an thoma, an rojôna, male an phûm zoi.

⁷Dâr inthum vêl suole a dongma khom ite roi riet loiin a hong lûta.

⁸Peter'n amanu kôm, "Na pasal le neinun man nin man hah hi dôr veihi mo ani, ni ril roh?" tiin a rekela, "O, ma dôr vai hih ani," tiin amanu han a thuona.

⁹Masikin Peter'n amanu kôm han, "Ithomo Pumapa Ratha minsinna rangin no lômpa le nin inruol? En ta atûn hin na lômpa phûm ngei khom mokota an hong tung nôk zoi so, male nangma khom nang rojôn nôk an tih," a tia.

¹⁰Hanchu voikhat rengin Peter ke kunga han ân leta a thi kelena. Ruothartengei hah an hong lûta, amanu hah a thîn an hong mua, masikin an rojôn paia, a pasal kôla han an phûmsa zoi.

¹¹Koiindang mi murdi ngei le midangngei ha roi a riet murdi'n chu asân an chi sabak zoi.

Sininkhêl le kamâmruoingei

¹²Tîrtonngei chu mipui lâia kamâmruoingei le sininkhêl tamtak an tho tira. Iempungei anrêngin Solomon Bokropa an intûpkhôm ngâia.

¹³An pâl pêntieng mingei hah tute an kôma kop ngam khâimak ngeia, nikhomsenla mingeiin anni ngei hah an minpâk ngâi.

¹⁴Hannirese Pumapa iempungei pasal le nupang tamtakin an pâla kopin an hong pung bang ani.

¹⁵Tîrtonngei sintho sika han, damloingei khom khalâidung lamlienngεια an hong rojôna, jâlmunngεια, puonphângeia an min jâl ngeia, Peter hong inlôi zoran a rilîm tete luon mi minli thei duoi mo, an tia.

¹⁶Jerusalem kôl revêla khopuingei renga mipuingei an hongga, damloingei, ramkhorî sûrngêi an hong tuonga; anrêngin an dam let zoi.

Tîrtonngei dûk an mintong

- 17 Hanchu ochai Inlaltak le a champui Saduceengei murdi an hong, tîrtongei hah an narsa ngei tataka, dûkmintong ngei rang an masata.
- 18 Tîrtongei hah an sâr ngeia intâng ina an khum ngei zoi.
- 19 Hannirese, jâna Pumapa vântîrton inkhatin intâng in mokot hah ajuong monga, pêntieng a tuong ngeia male an kôm,
- 20 “Se unglâ Biekina vân ding unglâ, male mipuingei kôm hi ringna thar roi hih varil roi,” a tia.
- 21 Ma chong hah an jôma, male an sea, khuovârchak dôrin Pathien Biekina an lûta, mi an minchu phut zoi. Hanchu Ochai Inlaltak le a champuingei hah an hong, Juda uliengei murdi hah roijêkna lientak nei rangin an koi bûma; an makunga rangin tîrtongei varuoi rangin intâng ina mi an tîra.
- 22 Aniatachu, uliengei hah an vatungin chu intâng ina han tîrtongei hah tute va mu khâi mak ngeia, masikin an hong kîr nôka,
- 23 “Intâng in ha asadimin inkhârin a rungpungei mokotngeia indingin kin va mua; hannirese kin mo onga asûnga tute mu mak me,” tiin an hong rila.
- 24 Biekina ochaisi le ruoipu ulien han ha chong hah an rietin chu, “Tîrtongei chungâ imo atung ani zoi hih,” tiin an kamâm sabak zoia.
- 25 Hanchu mi inkhat a hong, an kôm, “Rangâita u! Intâng ina mi nin khum ngei han Biekina mi an minchu ngei bang so,” tiin a hong rila.
- 26 Hanchu ruoipu ulien hah a champuingei le an hong tîrtongei hah rangrât song loiin an hong ruoi ngeia, rangrât an songin chu mipuingeiin lungin me deng ni ngei ti an chi sikin.
- 27 Tîrtongei asûnga an hong tuonga male roijêkna muna an inding ngeia, male Ochai Inlaltak han chong a rakel ngeia.
- 28 “Hi mi rilinga hin minchu tet khai loi rangin chong inngartak nangni kin pêka, aniatachu en ta u nin chongrilin Jerusalem nin min sipzit zoi hi! hi mi thina hih keini ngei mi minpêl rang nin bôk ani hih!” tiin a ti pe ngeia.
- 29 Peter le tîrton danggei han, “Miriemngei chong nêkin Pathien chong kin jôm ngêt rang ani.
- 30 Nangnin Khrosa peret leh nin jêmdela nin that Jisua hah ei richibulngei Pathien'n a kaithoi nôk zoi.
- 31 Israelngei nunsie minsâr ngeia ngâidam an chang theina rangin Ama ngêt hah Pathien'n Ruoipu le Sanminringpu ni rangin a changtienga rangin a kaithoi zoia.
- 32 Keini hih ha roi rietpuipungei kin nia, Keini le Ratha Inthieng, Pathien'n chong jôm ngei kai kôma a pêk ngâi hah kin ni sa,” tiin an thuona.

³³Hanchu roijêkpungei han ma chong ha an rietin chu asân an ning athika, tîrtonngei hah thatpai rang an bôka.

³⁴Hannirese an lâia Pharisee inkhat a riming Gamaliel, Balam minchupu le mitinin mirit an tho ngâi hah Roijêkna han ândinga. Tîrtonngei hah pên-tieng chomolte mojôk rangin chong a pêka,

³⁵hanchu roijêkpungei makunga han, ki Israel champuingei, hi mingei chung a tho ranga nin bôk chung a hin indîn roi.

³⁶Moton han khom Theudas, “Milien ki ni” tiin a hong oma, mi raza minli dôr an jûi ti nin la riet, nikhomrese ama hah thatin a oma, a nûk jûipungei khom anrêngin chekaninchâi zita ite ni khâimâk ngei.

³⁷Ma suonûk khom han, intelna zora lâiin Galilee rama om Judas hah a hong om nôka; a tieng mi tamtak an kop nôka, aniatachu, ama khom thatin a om nôka a nûk jûipungei murdi khom chekaninchâi zit nôka.

³⁸Masikin ma roia hin nangni ki ti, hi mingei hih tôn ngei no roi, omchien rese ngei! tho ranga an bôk le an sintho ngei hih miriem renga ânzir anînchu mong nôk kelen atih,

³⁹hannirese Pathien renga an tho anînchu mene no tunui, Pathien doi kêng nin hong changna rang!” a tia. Roijêkna han Gamaliel chong hah an poma.

⁴⁰Tîrtonngei hah asûnga an koi ngeia, an vîk ngeia, Jisua rimingin thurchi misîr tet khâiloi rangin chong an pêk ngeia, male an mojôk ngei zoi.

⁴¹Hanchu, roijêkpungei lâi renga an jôka Jisua riming sika tuong thei rangin intelin an om sikin asân an râiasâna.

⁴²Male anîngtin Biekin le insûng ngeia thurchisa misîrin, Jisua chu Messiah ani tiin an misîr bang ngâi.

Sinthongei 6

Sanpu sari ngei

¹Ma zora han, ruoisingei an hong pung bang lâia han, anîngtin an neinun sema han meithâingei rang lunghâng an tho ngâiloi sikin Greek chong mang Judangei hah, Juda Hebrew ngei chung a chiera.

²Masikin, tîrton somleinik ngei han iempungei murdi an koibum zita, “Pathien chongril mâksanin anîngtin sum puon jêk kin changin chu dik noni.

³Masikin, champuingei nin lâia mi Ratha Inthienga asip le vârna dôn pasal sari inthang unglâ, an kôm hi sin hih minkol kin tih,

⁴Keini chu chubaitho le chongrillin om kin tih,” an tia.

⁵Tîrtongei chong han mipuingei murdi an râiasâna, masikin Stephan taksôn dettak le Ratha Inthienga sip le Philip, Prochoras, Nicanor, Timon, Parmenas le Nikolas Jential Juda lei chang Antioch mi an thang suok ngeia.

⁶Ma mi sari ngei hah tîrtongei makunga an minding ngeia, tîrtongei han an lu chungu kut min ngamin chubai an thoa.

⁷Masikin Pathien thurchi inzarin a oma, Jerusalema ruoisingei asân an hong pungu, ochai lâia mi tamtak khomin taksônna hah an pomsa zoi.

Stephan an sâr

⁸Stephan chu Pathien satvurna tamtak changin le sinthotheinân a sipa, mipui lâia kamâmruoi le sininkhêl roiinputak a tho ngena.

⁹Hannirese Cyrene khuo le Alexandria khuo renga Juda senkhat (suok renga jôk) Synagog an tia kop sa ngâi ngei le Cilicia ram le Asia rama Judangei an hongu, Stephan an hôn khalpuia.

¹⁰Aniatachu Ratha han ma anga vârna a pêka han a hong chongin chu makhal mindok thei ngâi mak ngei.

¹¹Hanchu, “Moses le Pathien a rilminsiet kin riet,” min ti rangin mi senkhat sum le an methêmin an lei dara.

¹²Ma anghan, mipuingei, Upangei le Balam minchupungei an misieta. Stephan hah an minsûra, Judangei roijêkna an tuonga.

¹³Mi senkhat a chungroia milak tho rangin an hong tuonga anni han, “Hi mi, hin kin Biekin Inthieng le Moses Balam a rilminsiet bang ngâi.

¹⁴Nazereth Jisua'n, hi Biekin hih set a ta, Moses'n balam mi pêk ngei hah thûl atih, tiin a misâr kin riet!” an tia.

¹⁵Roijêkna muna om murdi'n Stephan hah an enruma, a mâi hah vântîrton mêl angin an mu zoi.

Sinthongei 7

Stephan chongril

¹Ochai Inlaltak han Stephan kôm, “hi chong hi adik mo?” a tia.

²Stephan'n, “Ka lâibungngei ka pangei rangâi roi, ei richibul Abraham hah Haran khuoa ava om mân, Mesopotamia rama aom lâihan, roiinpuina Pathien hah a kôm ânâra.

³Na ram le ni insûngmingei mâksan inla, ram nang ka la min mûna rang tieng se roh,” a tipea.

- ⁴Masikin, a ram renga ânphêta, Harana om rangin a sea. Abraham a pa thi suole, ha mun renga atûna nin omna rama hin Pathien'n nangni a min thon ani.
- ⁵Pathien'n ite mun luorang, a ke sirna rang dôr luo pêk maka, aniatachu ama le anûka a richisuonpârngei tenna pêk rangin ânkhâm ani. Pathien'n ha chong ânkhâm lâihan Abraham chu nâi la dôn mak.
- ⁶Pathien'n hi anghin a tia, 'Nin richisuonpârngei chu mi rama khuolmi la nîng an ta, kum raza minli mi suoka omin asân dûkmintong la nîng an tih.
- ⁷Hannirese suoka tuong rang mingei chu keiman jêk ka ta; masuole jôk an tih, hi muna hin ni la biek an tih,' a tia.
- ⁸Pathien'n Abraham kôm chonginkhitin an sertan rangin chong a pêk zoi. Masikin Abraham han a nâipasal Isaac hah sùn sari suoleh a ser a tanpea; Isaac'n a nâi Jakob a tanpe nôka, Jakob'n a nâi sômleinik ei richibulngei inthang ngei a tanpe nôka.
- ⁹“Jakob nâipasalngeiin an lâibungpa Joseph hah an narsa zoia, Egypt rama suok rangin an juora, hannirese, Pathien'n a ompuia.
- ¹⁰Intak a tuongna murdia a san minjôka, Egypt rama Rêng Pharoah mitmua mi vârtak le midit omtak a min nia; Pharaoh han Egypt ram le a ina mi murdi chung a râiôt ni rangin a min changa.
- ¹¹Hanchu Egypt le Canaan ram pumpuia mâitâm achula, asân intak an tuonga, ei richibulngei han sâk le nêk rang reng man khâimak ngeia.
- ¹²Jakob'n Egypt rama bu aom ti a rietin chu a nâingei a tîra, ma hah an se phutna tak alei ni.
- ¹³Avoinikna an se han Joseph han a lâibungngei le inrietna a lei thopui ngeia, Egypt Rêng han khom Joseph insungmingei a lei riet zoia.
- ¹⁴Hanchu, Joseph han a pa Jakob le a insungmingei murdi Egypt rama om rangin a koia, an rêngin sômsari-leirangnga anni.
- ¹⁵Hanchu Jakob hah Egypt rama a va sea ha muna han ama le a nâipasalngei chu an thi zoia.
- ¹⁶A ruok hah Shechem khuo an hong chôia, Hamor rûingei renga Abraham'n suma a rochôk tâna han an phûm zoi.
- ¹⁷Abraham kôma Pathien chongkhâm ahongtung rang zora ahong nâi tena ha mingei hah Egypt rama an hong pung zoia.
- ¹⁸Anûktaka Egypt rama han rêng dang Joseph riet loi ahong inlal zoia.
- ¹⁹Ama han ei richibulngei hah a huong ngeia, dûk amintong ngeia, nâitesenngai ring loina rangin an suok suo pên-tieng pai rangin rangrâtin chong a pêka.

- 20**Ma zora tak han Moses ajuon zira nâitesen mêl satak a nia. A pa ina thân thum an donsuia,
- 21** an in renga an pai suo nûkin, Pharaoh nâinupangin a lâka a nâipasal rangin a vâia.
- 22**Moses hah Egypt rama vârna murdi an minchua, hanchu chongril theitak le sinthothei tak a hongni zoi.
- 23** “Kum sômminli a hong nînchu, a mulung sûnga a sungsuok Israel champuingei kho angin mo an om mu rang nuomin ava pana.
- 24**A va sên chu mi inkhat Egypt min dûk amintong lâi ava mua, masikin a sanna, dûktongpu chung a han phuba a laka Egypt mipa hah a thata.
- 25**(Moses han, ama mangin Pathien'n a mingei mojôk atih ti a sungsuok ngeiin an riet mini tiin a bôka hannirese riet mak ngei.)
- 26**Anangtûka chu Isreal mi inik insuol lâitak ava tonga ava sel ngeia, ‘Rangâita u sungsuokngei,’ lâibungrêng kêng nin ni, ithomo hima anga nin insuola? tiin min sûk ngei rang a bôka.
- 27**Atheiloï uolpu han Moses hah a nampaia, ‘Kin chung a ruoipu le roijêkpu rangin tumo nang phun?’ a tia.
- 28**‘Majâna Egypt mi na that angdên han ni that nôk rang no bôk mo?’ a tia.
- 29**Ma chong hah a riet lehan, Moses a rota, Midian rama ava oma, mahan nâipasal inik a neia.
- 30** “Kum sômminli avun suole chu, Sinai Muol ramchâr kôla chîmbuk akângna han vântîrton a kôm ânlarâ.
- 31**Moses'n a neinun mu hah a kamâm tataka, minthâr rang bôkin a va nâia, Pumapa rôl a rieta:
- 32**‘Keima hih ni richibulngei Pathien, Abraham Pathien Isaac Pathien, Jakob Pathien hah ki ni,’ a lei tia, Moses hah ichîn ânrika en ngam khâi maka.
- 33**Pumapa'n, a kôm, ‘Ne kekokngei ha khek roh, nên dingna mun hah mun inthieng kêng.
- 34**Egypt rama ki mi omngei dengthei tie ku mua, an inrûmnangei khom ki rieta anni ngei minjôk rangin ku juong ani. Hong ta; Egypt rama nang lei tîr rong,’ a tia.
- 35** “Ha Moses kôma ruoipu le roijêkpu rangin tumo nang phun? tia an makhal hah chîmbuk kângna taka vântîrton a kôma inlar han a sanna, Pathien'n ama lele hah ruoipu le sanminjôkpu ni rangin ai tîr ani.

³⁶Ama han anni hah a ruoisuoka Egypt rama, tuipui sena, ramchâra kum sômmînli sâng han Kamânruoi le sininkhêl tamtak thôn a ruoi ngeia.

³⁷Moses hah Israel mingei kôm, 'Pathien'n keima, mi tîr angin nin sungsuokngei lâia om dêipu nangni la minchang pe atih,' tipu hah ani.

³⁸Ama hah ani ramchâra Israel mi intûp ngei lâia oma; ei richibulngei kôma le Sinai muola a chongpuipu vântîrton kôma, eini mi pêk ranga Pathien chong ring lâkpu hah ani.

³⁹"Hannirese ei richibulngei han a chong jôm nuom mak ngeia; ama hah an nampaia male Egypt ram tieng kîr nôk an nuoma.

⁴⁰Masikin Aaron kôm, 'Kin moton ruoipu rangin pathienngei mi sin pe roh. Moses Egypt ram renga mi ruoipu laka a thurchi reng riet khâi mak meh,' an tia.

⁴¹Masuale chu, ma ngei han serat chalte rimil an sina, a rimil hah sa thatin an bieka, male an kut suoka han mirit thonân ruolhoi an thoa an râi an minsâna.

⁴²Hanchu, Pathien'n anni hah nûk a song ngeia, invâna ârsingei an biek theina rangin a rotsan ngeia, dêipu lekhabua:

'Israel insung mingei! kum sômmînli sângin ramchâra han inbôlna sa thatin nin pêk ngâi hah keima ni mu ung.

⁴³Molech pathien puonin nin chôia nin pathien le Rephan nin ârsi pathien; rimilngei hah chubaimûk rangin nin sin ngei hah an ni. Masikin Babylon khêl tieng nangni min tâng ki tih, tia ânziek anghan.'

⁴⁴"Ramchâra han ei richibulngeiin Pathien omna Puonin an neia, ma in hah Pathien'n Moses kôm sin rangin a bea, a rimil a min mu lam taka sin ani.

⁴⁵Ha ngei hah ei richibulngei khomin an hong dôn banga, Pathien'n ei richibulngei motona ai not pai nâmngiei rama an luo lâihan Joshua lût zoran an lûtptui ani. David a zora tena a oma.

⁴⁶Ha David hah Pathien mitmua miditin a hong oma, Jacob Pathien ta ranga omna rang sin pe rangin a zonga.

⁴⁷Hannirese, in hah chu Solomon'n kêng a sin pe zoi.

⁴⁸"Nikhomrese, Ânchungtak Pathien chu kuta sin in ngeia om ngâi mak; Dêipu'n,

⁴⁹'Pumapa'n, invân ke Rêngsukmun ania pilchung ke ke sirna ani. I anga in mo mi ni sin pe rang? Khotieng mo kêng ngamna rang mun khom aom?

⁵⁰Hi neinun murdi hih keima ki sin nimak mo?'

⁵¹"Khodôra mulung ngar mo nin ni!" mulungrîl le kuor in-ongloi sertanloingei anga, nin richibulngei tho ngâi lam angin Ratha Inthieng nin dem tita!

⁵²Nin richibulngeiin, dêipungei lâia tumo dûkmintong loia an dar? midik tak juong rang lei juong ril Pathien tîrtonngei hah an thata, atûn nangni hih mi min sûrpu le a thatpu nin ni hi.

⁵³Nangni hi Pathien balam, vântîrtonngeiin an juong thak muchaka jômloi ngei nin ni!" a tia.

Stephan lung leh an dêngthatna

⁵⁴Roijêkpungei han Stephan chong hah an rietin chu an takasia, a chunga an rakam an tâta.

⁵⁵Hannirese, Stephan hah Ratha Inthienga sip ania, invân tieng a en ngita, Pathien roiinpuina le a changtienga Jisua inding a mua.

⁵⁶"En ta u!" invân in-ong ku mua, Pathien changtienga Miriem Nâipasal inding ku mu!" a tia.

⁵⁷Hanchu, roijêkpungei han inringtakin an inieka, an kutngei leh an kuorngei an hîpa. Hanchu ha rengan a tieng an tâna.

⁵⁸Khoppuilen sùng renga an mojôk paia, lungin an dênga rietpuipungei han ruotharte inkhat a riming Sual an tih kôm han an puon an mâka.

⁵⁹Lungin an dêng lâiin Stephan'n Pumapa a koia, "Pumapa Jisua ka Ratha lâk ta roh," a tia.

⁶⁰Khûk ânbila, rôl inringtakin ânieka, "Pumapa! hi an sietna hih riet pe ngei khâi no roh!" a tia. Ha chongbâi hah a ti suole chu a thi zoi.

Sinthongei 8

¹Male Saul khomin Stephan thi hah apompui sa.

Saul'n koiindangngei dûk a mintong

Ma nikhuo renga han Jerusalema koiindangngei hah dûk an mintong ngei kelen zoia. Hanchu tîrtonngei telloi iempu adang nâm chu Judea le Samaria ram khuotina chek an inchâi zita.

²Pathien sabei senkhatin Stephan ruok hah an phûma, mulungna takin an châ zoi.

³Sual chu koiindang minboipai rang bôkin in tinna a lûta, iempungei nupang, pasal a kaisuo ngeia intâng ina a khum ngei zoi.

Samaria rama thurchisa rila aom

⁴Iempu khuotina chekinchâi ngei hah muntina an sea, thurchisa an ril tira.

⁵Philip chu Samari khoppuilen a lûta, an kôm Khrista thurchi a rila.

- ⁶Mipuingeiin Philip chongril an rieta, sininkhêl a tho ngei an mûn chu a chongril ngei hah asân an rangâia.
- ⁷Ramkhoringei hah inringtakin iniekin mi tamtak sùng renga an hong jôka, phalkhatthi le kholra tamtak khom a mindam ngeia.
- ⁸Ha khuo mingei hah an râisân tataka.
- ⁹Ma khopui han mi inkhat a riming Simon, dôithei a oma, mi inlal takin an bea, Samari mingei han a dôl hah an kamâm tataka.
- ¹⁰Khopuiliên sùnga mi murdi, achîn alienin a chong asân an rangâia, “Hi mi hih Pathien sinthotheina roiinpui an ti hah ani,” an tia.
- ¹¹A mitphildôi hah zora sôtak kamâm tataka an lei ti zoi sikin a chong kamâm omtak hah an rangâi ngâia.
- ¹²Aniatachu Pathien Rêngram thurchisa le Jisua Khrista riming Philip'n a ril hah an iem le chu nupang, pasalin baptisma an changa.
- ¹³Simon khomin a iema; baptisma a chang zoia, Philip kôm han aom bang ngâia, sininkhêl kamâmruoi a sinngiei hah a mua kamâm aom sabak a tia.
- ¹⁴Jerusalema tîrton omngiei han Samari khuoa omngiei chu Pathien chong an pom zoi tih an rieta Peter le John an kôm an tîra.
- ¹⁵Anni hah an tungin chu a iempu thar ngeiin Ratha Inthieng an chang theina rangin chubai an thope ngeia.
- ¹⁶An lâia tute chungâ khom Ratha Inthieng la chum mak; Pumapa Jisua riminga baptisma an chang vai kêng ala ni.
- ¹⁷Hanchu Peter le John'n an lu chungâ kut an minngama, male Ratha Inthieng an chang zoi.
- ¹⁸Tîrtonngiei han iempungei chungâ kut an min ngamin Ratha Inthieng pêk an ni ti, Simon han amûn chu, Peter le John hah sum a pêk ngeia,
- ¹⁹“Hi angâ sinthotheina hi mi pêk roi, tu chungâ khom ku kut ki minngamna chita Ratha Inthieng an chang theina rangin,” a tia.
- ²⁰Hannisenla, Peter'n a kôm han, Nangma le nu sum hih meidila se rese, Pathien manboipêk suma rochôk rang no bôk sikin!
- ²¹Kin sinna hin kopna le rangtum dôn mak che, nu mulungrîl Pathien mitmûn adikloi sikin.
- ²²Masikin, hih no bôkna saloi renga hi insîr inla Pumapa kôm invûi roh, ni mindon hih nang ala ngâidam theina rangin.
- ²³Mulungrîl bôkna khâtak ne pêla, sietnân nang a khitrap iti nang ki riet,” a tia.

²⁴Simon'n Peter le John kôm, “Nin ti ngei hi inkhat luo ku chung a atung lona rangin nangnin rangâihoitak Pumapa kôm chubai mi thope roi,” a tia.

²⁵Peter le John'n an thurchi le Pumapa thurchi an misâr zoiin chu Jerusalema an kîr nôka, lampuia Samari rama khuo tamtaka Thurchi Sa an misâra.

Philip le Ethopia milien

²⁶Pumapa tîr vântûrtonin Philip hah a chongpuia, “Inthok inla, Jerusalem renga Gaza panna lampuia saktieng ramchâr pielnâ han se roh,” a tia. (Atûn hin chu hi lampui hih mang nikhâi mak.)

²⁷⁻²⁸Masikin Philip ânthoka a sea. Ethopia rama mi inkhat an Rêngnu nuoia sînpêl milien inlaltak a sum murdi enkolpu, Jerusalema Pathien chubaimûk rangin a sea. A kîr nôk tieng chu tali chung a chuongin dêipu Isaiâh lekhabu a pore a.

²⁹Ratha'n Philip kôm, “Tali so va pan inla vanâi roh,” a tia.

³⁰Hanchu Philip a tâna, dêipu Isaiâh lekhabu a pore hah a rieta, no pore hah ni rietthei mo? tiin a rekela.

³¹“Ama'n tutên mi rilminthâr pe loiin i angin mo ki riet thei ranga?” tiin a thuona. Hanchu Philip ha tali chung a kala a kôla insungpui rangin a koia.

³²Pathien lekhabu a pore hah ma hi ani: “Belri that rang angin belri angin ama hah an tuonga, Belrite a mul eplâitak khomin a dâirek angin, Chongbai khat luo ti maka.

³³Antem lâiin a roijêkna hah lâkpe'n a oma. A richisuonpârngei thurchi tun mo ril ta nih, Rammuol renga a ringna ahek zoi sikin,” ti hi.

³⁴Milien han Philip kôm han, “Ni ril ta, dêipu hin tu thurchi mo a misâr? Ama thurchi mo, midang thurchi mo?” tiin a rekela.

³⁵Hanchu Philip'n, hi Pathien lekhabua phutin Jisua Khrista Thurchi sa a rila.

³⁶An sea suk an chumin chu, tui omna an tunga, milien han “mahin tui aom, baptis ka chang lona rangin imo mikhap?” a tia.

³⁷Philip'n a kôm, “Nu mulungrîl murdi'n ni iemin chu na chang thei,” a tia. Ama han, “Ki iem,” Jisua Khrista chu Pathien nâi ani ti ki iem, tiin a thuona.

³⁸Hanchu, tali ha an min ngama, an chuma Philip le milien hah tuia an juong sea. Philip'n Ethopia milien hah baptis a min changa.

³⁹Tui renga an hong jôka, Pumapa Ratha Inthiengin Philip hah a lâk min manga, ama hah mu khâi maka, hankhom râisântakin a in tieng a sea.

⁴⁰Philip chu mingeiin Azotus khuoa an mu nôka, hanchu a sea, Caesarea khuo a tung mâka chu khopui murdia Thurchi Sa a misâr tira.

Sinthongi 9

Saul inthûna

(Sin 22:6-16; 26:12-18)

- ¹Saul han Pumapa jûipungei hah en nuom ngei maka, anrêngin that let rang aphuta. Hanchu Ochai Inlalngei kôm a sea.
- ²Damascusa Khuoa Synagog mingei kôma pêk rang lekha a min miziêka, ma khuo han a nuom lam takin sin a thothei tiin an lei rietna rang ani, tukhom Pumapa jûi mi amûn chu nupang mo, pasal mo, a sûra Jerusalema a hongtuong theina rangin.
- ³Hanchu, Saul hah Damascusa a tung rangtôn, inningloi rengin invân renga vârin ajuong êla.
- ⁴pila ânlet paia, rôl miring a rieta, “Saul, Saul! ithomo ma angta dük mini tho hih?” a tia.
- ⁵Hanchu, Saul han, “Pumapa tumo ni ni?” tiin a rekela. Hanchu, rôl miring han, “Keima Jisua, dük ni mintong bangpu hah ki ni.”
- ⁶“Nikhomrese, inthoi inla khopuilen sînga va senla, mahan ni sintho rang nang lei ril an tih,” a tia.
- ⁷Saul leh munkhata se ngei chu, chong theiloi le a mindona chang riet loiin, an inding chiena, rôl miring hah chu an rieta, aniatachu tute mu mak ngeia.
- ⁸Saul hah nuoi renga ânthoia male a mitngei ahong menga, hannirese, tute muthei khâi maka, a kuta an kaia Damascusa khuo tieng an sepua.
- ⁹Sûnthum dôr chu khoite muthei loi le sâk nêk khom sâk thei loiin a oma.
- ¹⁰Ma zora han Damascusa khuoa Khristien iempu mi inkhat a riming Ananias a oma. Inlârân Pumapa a mua, “Ananias!” a tia, Ananias'n, “Pumapa hin ko om,” tiin a thuona.
- ¹¹Pumapa han a kôm, “Ananias insiem inla, Lamlien Tûn son va sênla, Judas ina Tarsus mi a riming Sual an ti hah va rok roh, ama'n chubai a tho tit.
- ¹²Male inlârân mi inkhat a riming Ananias a sea, a mitngei minvâr pe rangin a lu chung a kutngei minngamin chubaitho pe rangin nang a lei mu zoi,” a tia.
- ¹³Ananias'n, “Pumapa ma miriem han Jerusalema khuo mingei dük amintong lam mi tamtak ngeiin min rila.
- ¹⁴Male atûnhin khom Damascusa khuoa nang jûipungei, sûrna rang phalna lekha ochaisingei kôm renga a dôn,” a tia.
- ¹⁵Pumapa han, “va se roh, ama hah ki sinthopu rangin ka thang zoi, hi Jentailngei, Rêngngei le Israel mingei ki riming min riet ranga ki tîr rang ani.

¹⁶Keima sikin idôrmo dûk a la tong rang nang la ril ki tih,” a tia.

¹⁷Masikin Ananias hah a sea, Saul omna ina a lûta, male Saul chung a kutngei a minngama “Sungsuok Saul ni mit vâv nôkna rang le Ratha Inthieng sipa no om theina rangin no hongna lampuia na kôma inlârpu Pumapa Jisua'n ni hongtîr ani,” a tia.

¹⁸Harengan, a mitngei renga ngalip angati ajuong tâka, a mitngei ahong vâvpe nôka. Hanchu ânthoia baptis a changa;

¹⁹Male bu, an, a nêka a hong har nôk zoi.

Damascus taka Saul chongril

Saulin sîn tomte Damascusa iempungei kôm oma.

²⁰Synagog taka a lût pata Khrista thurchi a rila, Jisua chu Pathien nâipasal ani tiin a ril phut kelen zoia.

²¹A chongril riet ngei murdi'n asân an kamâm tataka, “Hi mi hih Jerusalema Jisua riming ralam ngei dûk lei mintong ngâipu hah nimak mo? Ha mingei hah khita ochaisingei kôma tuong ranga mahin khom a hong nimak mo?” an tia.

²²Hannirese Saul chongril hah ranak a dôn teteta, male Jisua chu Khrista ani tiin a ril minthâr han mi a mene thei oka, Damascus taka aom Judangei khomin makhal thei khâi mak ngei.

²³ Sîn tamtak suole chu Saul that rangin Judangeiin lungvâr an thoa,

²⁴hannirese ama'n an lungvâr tho hah a rieta, that rang bôkin rukul mokot tina sîn le jân an muruonga.

²⁵Hannirese a nûkjûingeiin Saul an tuonga, jâna rukul kotvêng renga kok leh makhâiin an musum zoi.

Jerusalema Saul chongril

²⁶Hanchu Saul hah Jerusalema a sea, ruoisingei inloppui rang a bôka, hannirese anni han ruoisi ani sa ti iem mak ngeia, anrêngin achiin an chia.

²⁷Hanchu Barnabas a tuonga tîrtonngei kôm a sepuia. Lampuia Pumapa a mu tie ngei, Pumapa'n a kôma a ti pe ngei, Damascusa taka Jisua rilinga hâitaka chong a ril tie ngei an kôm a misîr pe ngeia.

²⁸Male Saul hah an kôm a om zoia, Jerusalem pumpuia hâitakin Pumapa rimingin chong a rila.

²⁹Greek chong mangin Judangei lâia chong a rila, a makhala, anni rêkin chu that rangin an pûta.

³⁰Ha chong hah koiindang mingeiin an rietin chu Saul hah Caesarea khuo an tuonga, Tarsus khuoa an tîr pat zoi.

³¹Male Judea ram, Galilee ram le Samari ram pumpuia koiindang hah dengtheina an jôk zoia. Pumapa mân thôn an oma, Ratha Inthieng ompuinân an rât uola, an mijôn ahong pung tetet zoia.

Ludda le Joppa khuoa Peter sintho

³²Peter'n muntina a chaia, súnkhat chu Ludda khuo Pathien mingei omna a juong sea.

³³Mahan mi inkhat a riming Aeneas an ti kum riet phalkhathi sika jâlmuna jâl a mua.

³⁴Peter'n a kôm han, "Aeneas, Jisua Khrista'n nang a mindam zoi inthoi inla na jâlmun luok roh," a tia, hanchu harengan ânthoia.

³⁵Ludda le Sharona mi murdi'n ama an mua Pumapa tieng an hong inhei zoi.

³⁶Joppa khuoa han Jisua lei iem nuvengte inkhat a riming Tabitha a oma. (Greek riming Dorcas, mahi, "sakhi," tina ani.) Amanu han azora dôn murdi sin sa le inriengngei sannân a lei mang ngâi ani.

³⁷Ma zora han dam maka, a thi zoia, tui an min buola inchunginhuon khâltana an min jâla.

³⁸Ludda khuo hah Joppa khuo kôl ani sikin, iempungeiin Peter Ludda khuoa aom ti an rieta, "Rangâihoitakin inrangralin mi hong pe roh," tia koi rangin mi inik an tîra.

³⁹Masikin Peter inthoiin anni ngei lehan an sea. A tung leh an inchunginhuon khâltan sûnga an tuonga. Dorcas kôla indingin meithâingei tamtakin an chapa, an kôm aom lâia kâncholingei le puonngiei hah a sui ngei hah Peter an min mua.

⁴⁰Peter'n anrêngin pênthieng a mojôk ngeia, male Khûkinbilin chubai a thoa, hanchu ruok tieng ânheia, "Tabitha inthoi roh," a tia. Tabitha hah a hong menga Peter hah a mua, a hong insunga.

⁴¹Peter'n a kut a pêka a kaithoia, hanchu iempungei le meithâingei a koia, Tabitha hah aringin a pêk ngei zoi.

⁴²Ma roi hah Joppa khuoa ânthang zita, mi tamtakin Pumapa an hong iem zoi.

⁴³Peter chu sôn tamtak Joppa khuo savun sinngâipu Simon ina ala châma.

Sinthongei 10

Peter le Cornelius

¹Caesarea khuo mi inkhat a riming Cornelius an ti, "Rom sipai pâl raza-ruoipu a oma" maha Itali sipai an ti ngâi.

²Ama hah Pathien biek mi ania, ama leh a insûng mingei nâm anrêngin Pathien lei biek ngâi an ni. Judangei lâia inriengngei sanin asân ranak a song ngâia, Pathien kôma khom chubai a tho bang ngâia.

³Sûnkhat chu chonûk dâr thumin inlârna inthârlak a mua, Pathien vântîrton inkhat a kôm ahong lûta, “Cornelius!” a hong tia.

⁴Cornelius'n ama hah a en ngita, a chia, “Pu mahi imo?” a tia. Vântîrtonin a thuona nu chubaithona le nu lungkhamna sinngai hah Pathien'n a râisâna nang a thuan rang ke ani zoi.

⁵Atûn Joppa khuoa mi tîr inla, mi inkhat a riming Simon Peter an ti hah hong min koi roh.

⁶Savun sin ngâipu Simon ina a tunga, a in chu tuikhanglien panga aom a tia.

⁷Hanchu vântîrton hah a rot suole, Cornelius'n a tîrlâmngai mi inik le râmi inkhat, Pathien biek ngâi a tîrlâma a mang ngâi a koia.

⁸A mu le a riet murdi a ril zoiin chu Joppa khuoa se rangin a tîra.

⁹Anangtûka an sea, Joppa khuo kôl an tungin chu, Peter hah chubaitho rangin sûna inchunga a kala.

¹⁰A von a châm sabaka, bunêk rang a nuoma hannisenla nêk rang a mintuo lâitakin inlârna a mua.

¹¹Invân in-ongin puon lienpa arikil minlia inthung invân renga nuoia juong chum a mua.

¹²Ha sûng han sa ake minli jât tamtakngai le rama vângai an omna, a rôpa intolngâi ngai.

¹³A kôm han rôlin, Peter, “Inthoi roh; that inla sâk roh!” a tia.

¹⁴Hannisenla Peter'n “Pumapa nimak! ânthiengloi le porinche ite sâk ngâi mu ung” a tia.

¹⁵Rôl han avêlin a kôma, “Pathien'n ânthieng zoi a ti hih nangman ite ânthiengloiin mindon no roh,” a ti nôka.

¹⁶Ha anghan, voithum ajuong oma, ma suale chu invân tieng lâk paiin a om nôk zoi.

¹⁷Hanchu, Peter'n inlârna a mu hah a mindonna chang riet loiin a om lâitak han, Cornelius mi tîr ngai hah Simon in rekelin mokot kôla an lên dinga.

¹⁸Mahin Simon Peter a tung mo? tiin an rekela.

¹⁹Peter'n inlârna ai mu hah a mindon lâitakin, Ratha'n a kôma, “Rangâi roh! Mi inthumin nang an rok.

20 Masikin inthok inla chum roh, ite kamâm loiin jûi ngei roh, anni hah ko hongtîr ngei ke” a tia.

21 Masikin Peter hah a chuma, an kôm han, nin rokpu hah “Keima ki ni, imo nin hongna abi?” a tia.

22 Anni han, “Sipai raza ruoipu Cornelius mi hongtîr ani. Ama hah mi sa Pathien biek ngâi mi le Juda mi murdi'n mirit an tho ngâi mi ania. Pathien vântîrtonin nangma hah a ina koi rangin a tipea, no chongril rangâi rangin” an tia.

23 Ha mingei hah a koi lût ngeia, a min riek ngeia. Anangtûka ânthoka anni ngei leh, Joppa khuo iempu senkhat ngei le munkhatin an sea.

24 Anangtûk nôka chu Caesarea khuo an tung zoia, Cornelius han a sungsuokngei le a ruolngei a koibûma, Peter ngei an lei ngâk chiena.

25 Hanchu Peter ava lût rangtôn Cornelius'n a lei dôna, a ke bula khûkinbilin chubai a mûka.

26 Aniatachu Peter'n ama hah a kaithoia, “Inding roh, kei khom miriem dên ke ki ni,” a tia.

27 A kôm chong pumin insûnga a lûta, mi tamtak intûp ngei hah ava mua.

28 An kôm han, “Juda mîn, Juda mi niloi pan rang le inloppui rangin Juda balamin phal mak ti nangni rengin nin riet. Hannirese, tute inthiengloi le annima ke be loina rangin Pathien'n mi min mu ani.

29 Masika han mi nin hong min koia han, ite makhal viet loiin ko hong kelen ani. Masik han nangni ki rekel imo mi nin hong koina bi?” a tia.

30 Cornelius'n a kôma, “Atûn zora tena hin sînthum ani zoi. Chonûk dâr thum vêlin ki ina chubai ko thoa; harengan mi inkhat puon cheka invo ka makunga a juong indinga.

31 ‘Cornelius! Pathien'n nu chubaithona a riet zoi, nu lungkhamna sin ngei khom a riettit.

32 Masikin Joppa khuoa mi tîr inla Simon Peter hong min koi roh, ama hah tuikhanglien panga savun sin ngâipu Simon ina a tung ani’ a tia.

33 Male han no kôm mi ko hongtîr kelena; no hong hih râisân aom sabak. Pumapa'n chongril ranga nang a pêk riet rangin atûn hin Pathien mitmu'n kin rêngin kin om ani hi,” a tia.

Peter chongril

34 Peter a hong chonga hi anghin a tia: “Pathien'n jâtin le namtin in-angsara a en ti ki riet minthâr zoi.

³⁵Namtin lâia tukhom ama iema sin asa thopu murdi chu ama khôk thei mi anni ngâi.

³⁶Ama'n, mi murdi Pumapa, Jisua Khrista han Israel mingei kôma rangin inchamna râisâna Thurchi Sa chu a juong mintunga.

³⁷John'n Baptis roi a ril zoia Galilee ram renga a phuta, Judea ram pumpuia a roi a chongril hah nin lei rieta.

³⁸Nazareth Jisua chu Pathien'n Ratha Inthieng le sinthotheinân min silin, Pathien han a ompui tita, sin sa thoa muntina a chai lâihan Diabol dûkmintong murdi ngei a mindama.

³⁹Judea ram le Jerusalema a sintho murdi rietpuipungei kin ni, ama hah Khrosa jêmdelin an that ani.

⁴⁰Hanniresea, Pathien'n sînthum suole a kaithoia mu theiin ânlarâ,

⁴¹mitin mitmua chu inlâr maka, Pathien'n a rietpuipu ranga a lei thang keini ngei vai hin kin mu, ânthoinôk suole han Ama lehan kin sâkin kin nêk suom ngâi ani.

⁴²Male hah thurchisa ril rang le Ama hah mi ring le mithi chung a roijêkpu'n Pathien'n a phun ti mi murdi min riet rangin chong mi pêk ani.

⁴³Dêipungei murdi khomin ama iem murdi'n a riming sikin an sietnagei ngâidam nîng an tih," tiin an lei ril ngâi a tia.

Jentailngeiin Ratha Inthieng an chang

⁴⁴Peter chong a la ril bang lâiin, a chongril rangâi murdi chung a Ratha Inthieng ajuong chuma.

⁴⁵Juda iempungei Joppa khuo renga Peter hong jûipungei han Ratha Inthieng neinun pêk Jentailngei chung a khom ivur ani ti an rieta an kamâm oka.

⁴⁶Chong rietloia chongrilin le Pathien roiinpuina minpâkin an rieta, Peter'n a thuona,

⁴⁷"Hi mingei hi kin chang ang a Ratha Inthieng an chang ania, tuia baptis chang rangin tumo khap thei ngei ranga?" a tia.

⁴⁸Masikin Jisua Khrista rilinga baptis chang rang chong a pêk ngeia. Hanchu anni kôm han sîn tômta la châm rangin an ngêna.

Sinthongei 11

Peter'n Jerusalem koiindangngei kôma a sintho a misîr

¹Judea ram pumpuia tîrtonngei le iempungei hah Jentailngei khom Pathien chong an rieta an lei modôm zoi.

- ²Peter hah Jerusalema a sea, hanchu sertan ngei han ama an lei dema, a kôm,
- ³“Sertanloi Jentailngei ina nu tunga an kôma sâk khom na sâk ngâi!” an tia.
- ⁴Masikin Peter'n abul renga anrêngin aroi omtie murdi a misîrpe ngaeia.
- ⁵“Joppa khopuiliena chubai ko tho lâiin, inlârna ku mua. Puon chêk lientak anghan arikil minlia inthung invân renga juong musum ko kôla juong om ku mua.
- ⁶Mahan anâikikin ke enna insûng sa le ram sa, rôpa intol ngâi le vângei ku mua.
- ⁷Masuale chong mirîng ki rieta ko kôm, ‘Inthoi roh Peter; that inla sâk roh,’ a tia.
- ⁸Hannirese keiman ‘Nimak Pumapa! ânthieng loi le annim ite ka bâia lût ngâi mak’ ki tia.
- ⁹Invân renga rôl han avoiniknân, ‘Pathien'n ânthieng a ti sai hi nangman inthieng mak tino roh!’ a ti nôka.
- ¹⁰Ma anghan voithum ajuong oma masuale azoinataka chu invân tieng lâk pâiin a oma.
- ¹¹Ma zora tak han Caesarea renga mi inthum hongtîra om ngei hah ko omna in an hong tunga.
- ¹²Ratha'n mulung inlakloia anni ngei jûi ngei rangin mi rila. Hi iempu uruk Joppa renga Caesarea hong ngei khom min jûisa kin rêngin Cornelius ina kin lûta.
- ¹³Ama han a ina vântîrton inding a mua, vântîrton han a kôma, joppa khuoa mi tîr inla mi inkhat a riming Simon Peter an ti hah hong minkoi roh.
- ¹⁴Ama han chong nang misîrpe a ta, ama chong han nangma le ni insûngmingei sânminjôkin om nin tih, tiin khom mi ril sa.
- ¹⁵Chongril ko hong phut lehan motona ei chung ajuongtung anghan Ratha Inthieng an chung ajuongtung.
- ¹⁶Male Pumapa'n a ti ‘John'n tui le mi a baptis ania, nangni chu Ratha Inthiengin baptist la chang nin tih,’ a ti hah ki rietsuok nôka.
- ¹⁷Pumapa Jisua Khrista ei iema ama chongpêk nanâk hah Jentailngei khom a pêk ani ti ânthâr ani. Kei hih tumo ki ni, Pathien khap rang bôkpu hi!” a tia.
- ¹⁸Ma chong hah an riet lechu dem khâi mak ngei, Pathien an minpâka, “Pathien'n Jentailngei khom insîra ring rangin zora inchum a pêk ani hi!” an tia.

Antioch koiindanga

¹⁹ Hanchu Stephan an that zora dûkmintongna sika chekinchâi ngei hah Phoenicia Ram, Cyprus tuikul le Antioch khuo dênin an sea Judangei kôm vei thurchi an rila.

²⁰ Hannirese, iempu senkhat: Cyprus tuihuol le Cyrenea mingei hah Antioch'a an sea, Jentailngei kôm khom Thurchi Sa an misîra, Pumapa Jisua Thurchi Sa an rila.

²¹ Pumapa ranakin a san ngeia, mi tamtakin an iema, Pumapa tieng an inhei zoia.

²² Ma thurchi hah Jerusalema koiindang ngeiin an lei rieta, masikin Barnabas hah Antioch taka an tîra.

²³ Ama hah a tungin chu mataka mingei Pathien'n satavur tie hah a mûn chu a râisân tataka, an mulungngei murdia Pathien taksônna om mindet rangin anrêngin a mohôk ngeia.

²⁴ Barnabas hah mi satak, Ratha Inthieng le iemna sip ania, masikin mi tamtak Pumapa tieng a tuong zoia.

²⁵ Hanchu Barnabas hah Saul rokin Tarsus khuoa a sea.

²⁶ A mu lehan Antioch tieng a hong tuonga, kum khat piel koiindangngei inkhômna an inchel ngâia, mi tamtak an minchu sa ngâi. Antioch'a han kêng iempungei hah Khristien an ti masatak.

²⁷ Ma zora han Dêipu senkhat ngei Jerusalem renga Antioch an sea.

²⁸ An lâia mi inkhat a riming Agabus ândinga rammuol pumpuia mâitâm natak chul atih, ti ratha min rietin a phuonga; ha mâitâm hah Claudius inlal lâiin atung zoi.

²⁹ Ha anghan, ruoisingei han an thei lam chitin Judea rama iempungei kôm sanna muthuon rang an masata.

³⁰ Ma hah an thoa masuole sum han koiindang upangei kôm pêk rangin Barnabas le Saul kuta an muthuon zoi.

Sinthongei 12

Nuomlona rik uol

¹ Hanchu, ma zora han, Rêng Herod'n koiindanga mi senkhat ngei a nunuom a lo zoia.

² Jacob, John nâipa hah khandaiin a tuk thata.

³ Ama han Judangei an râiasân ok ti a rietin chu Peter khom sîr rang a bôk tita. (Ma zora hah cholboivâipôl ruolhoi zora ani).

⁴Peter hah a sôr suole chu intâng ina a khuma, râlmi pâl minli minlin angâk an inthâk lîpa. Kalkân kût ruolhoi chumin mipui makunga kai sua jêk rangin a mintuo ani.

⁵Masikin Peter hah intâng ina a khum rapa, hannirese, ama ta rangin koiindangngeiin ningsiettakin Pathien kôm chubai an thope ngâi.

Peter intâng in renga ajôkna

⁶Herod'n a kai sua, a jêk rang nijân tak han chu Peter hah rungungei inik kêra rênrokol inik bunin a jâla, a ngâkngêi khom mokot bula an oma, an ngâk chiena.

⁷Inningloiin vântîrton inkhat a kôla ajuong indinga intâng in sînga han vâ ajuong inlanga. Vântîrton han Peter dâra anîk min hara, “Inrangin! inthoi roh!” a tia. Hanchu, voikhatrengin Peter kuta rênrokolngêi hah a kutngêi renga a tâkrila.

⁸Masuale Vântîrton han a kôm, “No kongkhit mindên inla, ne kekok bun roh,” a tia. Peter'n ha anghan a thoa, hanchu vântîrton han a kôm, “Na kâncholiinchuol inhak inla, mi jûi roh,” a tia.

⁹Peter intâng in renga a jôka, a jûi zoia; nikhomrese a tak ani ti riet mak, Vântîrton hah inlârna a mu mini kêng a bôka.

¹⁰A rungngêi inkhatna le inikna an khêlin chu khopuiliena lûtna thîr mokot an va tunga. Mokot hah athethenin alei inonga, an jôka, lamlien inkhat an khêlin chu voikhatrengin vântîrton han Peter a mâk zoia.

¹¹Hanchu Peter hah a harin chu, “Pumapa'n a vântîrton a juongtîra, Herod kut renga le Judangei sabeina murdi renga mi mojôk ti adiktakin ki riet zoi,” a tia.

¹²A mulung a min chong zoiin chu John Mark nû Mary ina a sea, mahan mi tamtak lên bûmin an lei chubaia.

¹³Peter'n bokrop inkhâr a tôk lehan, tîrlâm inkhat Rhoda dôngmate han mong rangin a sea.

¹⁴Peter rôl a riet lechu a râisân rai sikin inkhâr mo ong loiin a tân nôka, “Peter inkot bulah son ânding,” tiin a va rila.

¹⁵Anni han a kôm, “Na châng ani zoi hi!” an tia. Ama'n chu adik tatak kêng? a ti tita. Anni han “a vântîrton nîng atih,” an tia.

¹⁶Nikhomrese Peter'n a tôk tita nûktaka chu an va mo onga, ama hah an mua kamâm aom an ti tataka.

¹⁷Ama han an dâirekna rangin a kut a jâpa, Pumapa'n intâng in renga a kêlsuo tie hah a misîr zoia. Hanchu, “Hi chong hih Jacob le iempu dangngêi va ril roi,” a tia. Masuale chu a jôka ram danga a se zoi.

¹⁸Hanchu, jîng ahongni lechu rungpungei hah, Peter imo a chang zoi? tiin asân an mulung ajîng zoia.

¹⁹Herod han a rok rangin chong a pêk ngeia, hannirese mu mak ngeia a ngâkngai hah a rekela, that ngei rangin chong a pêk ngei zoi. Masuole chu, Herod judea khuo a mâka Caesarea khuoa môrkhat ava om zoi.

Herod thina

²⁰Hanchu, Herod hah Tyre le Sidon khuo mingei chung a taksi sabaka. Anni han inruolin ama kôm se rangin an hong a, rêng milien Blastus hah an malin an sin baka. Masuole Herod kôm an sea, an ram hah rêngpa ram renga sâk, nêk an man ngâi ani sikin inngêi rangin an ngêna.

²¹A nikhuo khâm nîn chu Herod hah puon inlal insilin rêngsukmuna ânsunga, mipuingei kôm chong a misîra.

²²Mi murdi'n, "Miriem rôl nimak, Pathien rôl kêng," an tia, an inieka.

²³Voikhatrengin ama han Pathien kôm miritna a pêk loi sikin Pumapa vântîrtonin voikhatrengin Herod chung a kut a musuma, rûlkûtin a sâka, athi zoi.

²⁴Ma lâia han Pathien chong ânzara an pung tir zoi.

²⁵Barnabas le Saul'n an sintum an sin suole chu Jerusalem renga an kîr nôk zoia, John Mark hah an kôm an tuong sa.

Sinthongei 13

Barnabas le Saul an thangna le an tîrna

¹Hanchu, Antioch koiindangngai lâia Dêipungei le minchupungei an oma; Ma ngei hah Barnabas ngei, Simeon (miduk an ti) ngei, Cyrene khuoa Lucius ngei, Manaen (Râiôt Herod'n a vâi minlien) ngei le Saul ngei an ni.

²Pumapa sin an thoa, bu an ngêi lâiin Ratha Inthiengin an kôm, "Barnabas le Saul hih ko koina lama sintho rangin mi pêk roi," a tia.

³Bungêiin chubai an tho zoiin chu an chung a kutngai an minngama, an tîr ngei zoi.

Cyprus tuihuola

⁴Ha anghan, Ratha Inthieng tîrin an sea, Seleucia khuo an tunga, ha mun renga Cyprus tuihuola rukuongin an se zoia.

⁵Hanchu, Salamis khuoa an tungin chu Judangei Synagog ngeia Pathien thurchi an misîra. John Mark hah an insanpui rangin an tuong sa.

⁶Tuihuol hah Paphos dênin an chai sua, dôithei, dêipu inti Juda inkhat a riming Bar-Jisua an tonga.

⁷Ama hah tuihuol râiôt Sergius Paulus mi vâr tak khom a malpa ania. Ha râiôt han Pathien chong rangâi a nuom sikin Barnabas le Saul a koia.

⁸Hannirese, dôipu Elimus (Greek riming) han râiôt hah takminsôn loi rang pûtin anni hah a lei deia.

⁹Hanchu Saul, Paul an ti sa ngâi hah Ratha Inthiengin a sipa, dôipu hah a en ngita, a kôm,

¹⁰male “Nangma khori nâipasal!, satnangei nâm râlpa, milak ngei nâmin ni minsipa, zoratin Pathien chongtakngei hih chong milak min chang rang no bôk ngâi ani.

¹¹Atûn Pumapa kut nu chung a achum rang ani, ni mit jîng a ta, sîn khovâr mu khâino tini,” a tia. Sûm le ijîngin ama hah abok kelen zoia, a kairuoi rang mi zongin ânâk titira.

¹²Râiôt han ahong mu lehan khoimo atung hah, a iem zoia; Pumapa minchuna chungroi hah a kamâm oka.

Pisidia rama Antioch

¹³Paul le a champungei hah Paphos khopuilien renga rukuongin an sea, Pamphilia rama Perga an tunga, mahan John Mark'n anni hah a mâka, Jerusalema a kîr nôk zoia.

¹⁴Anni hah Perga renga an se tita, Pisidia rama Antioch an tunga, male Sabbathnin chu Synagog taka an lûta, an insunga.

¹⁵Moses balam le dêipungei lekhabungei an miziekngei hah an pore suole chu Synagog ulienngeiin an kôm mi an tîra: “Sungsuokngei, mohôkna chong nin dôn aomin chu mipungei kôm misîr rangin nangni kin nuom ani,” an tia.

¹⁶Paul ândinga, a kutin a jâpa, thurchi misîr a phut zoia: “Ki Israel champungei le Jentialngei murdi Pathien biek ngei, ko chong rangâi roi!.

¹⁷Israelngei Pathien mingei ei richibulngei a lei thanga, Egypt khuolmingei anghan an om lâiin nam lienpân a sina, a ranak lienin Egypt renga a kai suo ngeia,

¹⁸male kum sômminli ramchâra an sinthongei hah a en chien theia.

¹⁹Canaan rama nam sari an inmanga, a mingei a ram puma a minchang zoi.

²⁰Ma ngei nâm hah Kum raza minli sômrangnga alût ani. “Masuole han roijêkpungei a pêk ngeia, dêipu Samuel dêna han.

²¹Male Rêng an ngêna, ma anghan Pathien'n Saul, Kish nâipasal, Benjamin rûia mi hah kum sômminli sûnga an rêng rangin a pêk ngeia.

²²Ama hah an hengpai suole chu Pathien'n David hah an rêng aminchanga, ma chungroi hah Pathien'n hi anghin a misîra; 'David Jesse nâipasal, ku lungdo mi ka mân zoi, ama han sin ranga ku nuom murdi sin a tih,' a tia.

²³Mahi Jisua, David richisuonpârngei lâi renga han Israel mingei Sanminringpu'n ai sin ani, Pathien'n a lei khâm anghan.

²⁴Jisua'n a sin a phut mân han, Israel mingei an sietnangei renga an insîra baptisma an changna rangin John'n thurchi a misîr pe ngei ngâia.

²⁵Male John'n a sintum a zoi rangto han mipuingei kôm, "Keima hih tumo ani mi nin ti? nin ngâkpu hah keima hih ni mu ung. Aniatachu, rangâi ta u! ku nûka juong a tih, kei chu a kekok khek rang luong inhoi mu ung," a tia.

²⁶"Abraham richisuonpârngei, ki richibulngei le Jentailngei murdi Pathien biek ngei, hi Sanminringna chong hih ei kôm a juongtîr ani.

²⁷Jerusalema mi omngei le an ruoipungei han sanminringpu ani an riet loi sik le dêipungei chong Sabbathni tina an pore ngâi hah aomtie an rietloi sikin Jisua theiloi min changin dêipungei chong an mintung min dik zoi.

²⁸Thina rang rak dôr a chung a ite abi an man no khomin that rangin Pilat kôm an ngêna.

²⁹Male a chungroi Pathien lekhabun amiziek murdi atung suole chu Khros renga an musuma, tâna an min jâl zoia.

³⁰Aniatachu, Pathien'n thina renga a kaithoi nôk zoi,

³¹Galilee ram renga Jerusalema ama leh munkhata lei se ngei kôm han sîn tamtak ânlar ngâia; ha mingei hah atûna hin Israel mingei kôm ama rietpuipungei an ni.

³²⁻³³Ei richibulngei kôma Pathien'n chong a lei khâm hah, eini a richisuonpârngei ta rangin Pathien'n atûna hih Jisua kaithoiin atung ani ti Thurchi Sa nangni kin mintung pe. Lapui inikna taka aom anghan.

'Ka Nâipasal ni ni; Avien hin na Pa ko hongni zoi.'

³⁴Monna mun tâna kîr nôk khâi loi rangin Pathien'n ama hah thina renga a kaithoi rang roi hi anghin a misîra;

'Satvurna inthieng le adik David kôma kên khâm hah nang pêk ki tih,' tiin.

³⁵Masikin, minpâkna la dangin,

'Ni mi inthieng chu tâna mon rangin phal no ti nih,' ati sa.

³⁶David'n ama zora kai chu Pathien lungdo a sina, masuole chu a thia, a richibulngei leh an phûma, a takpum hah tâna amon zoi.

³⁷Pathien'n thina renga a kaithoipu ha chu mon mak.

38-39 Ki Israel sungsuokngei, mahih nin riet rangin kin nuom, Jisua sikin ani sietnagei ngâidamna chong nin kôma misîrin aom; male tukhom ama iem kai chu Moses balamin a mojôk theloi sietnagei murdi renga an jôk zoia.

40 Masikin, indîn roi, dêipungei lei ti hah nin chung a tung duoi nih.

41 ‘Mumâkpungei, en ta u!, kamâm aom ti ungl a, thi roi! asikchu aviena sin ko tho hih, Mîn nangni ril minthâr pe khom rese ngei iem no tunui!’ ti hah a tia.

42 Paul le Barnabas hah Synagog renga an jôkin chu sabbathni nôka ma chong hah hong misîr nôk rangin mipuingei han an siela.

43A nbûm ngei an chîn zoiin chu Judangei le an Juda rotholngei tamtakin Paul le Barnabas an jûia, Tîrtonngei han, Pathien moroina nuoi han om tit rangin an mohôka.

44 Sabbathni nôka chu akhopui pumpui ti dôrin Pathien chong rangâi rangin an hong intûpa.

45 Judangei han mipuingei an mûn chu an narsa oka, Paul thurchi misîr hah an makhala, an misîr minpôta.

46 Aniatachu Paul le Barnabas han hâi uolin an misîra, “Pathien chong hi nin kôma misîr masa rang piel ani; hannirese, nin henga, kumtuong ringna manpui rangin ahunin nin be loi sikin, nangni mâkin Jentailngei tieng pan kin tih.

47 Mahi Pumapa chong mi pêk ani; “Jentailngei min vâpu'n nang ki minchang, masikin ramhuol murdi an ring theina rangin” ti hi, an tia.

48 Jentailngei han ha chong hah an rietin chu an râiasâna, Pumapa chong an chôiminsânga; kumtuong ringna chang ranga thang ngei kai chu iempungei an hong chang zoi.

49 Pumapa chong hah ramhuol muntina ânzar zoia.

50 Hannirese Khopuiliena Juda uliengei le Pathien biek mi Jentail nupang mirit omngei an misieta; Paul le Barnabas hah an nuom an min loa, an ramhuol renga an rujûlpai zoia.

51 Tîrtonngei han anni ngei chung a an mulung hoiloi minlangnân an kepha taka pildi an không mathâka, Iconium an pan zoi.

52 Antioch taka iempungei chu râisâna le Ratha Inthiengin an sip zoi.

Sinthongei 14

Iconiuma Paul le Barnabas thurchi misîr

1 Ma angdên han Iconiuma khom Judangei Synagog taka an lûta, thurchi an misîra, Juda le Jentail tamtakin an iem zoia.

²Hannirese a iem nuomloi Judangei han Jentailngei an misieta an min mumâk zoi.

³Tîrtonngei han hâitaka Pumapa thurchi misîrin ha khuoa han sôtak an oma; mahan a lungkhamna chongril tîrtonngeiin an misîr hah adik ti minlangnân an kuta sininkhêlgei le sin kamâmruoingei an sina.

⁴Khopuilien sînga mipuingei pâl inikin an insen zoia. Senkhat Judangei tieng, senkhat tîrtonngei tieng.

⁵Hanchu Jentailngei le Judangei an ruoipungei le tîrtonngei hah lung leh dênga dûkmintong rang an bôka.

⁶Tîrtonngeiin ma chong hah an lei riet lechu Lycaonia rama Lystra le Derbe khopuilienggei le a kol revêla ram ngeia an rota.

⁷Mahan annîn Thurchi Sa an misîr tir zoi.

Lystra le Derbe khuo

⁸Lystra khuoa mi inkhat a suok renga kholra lôn theiloi a oma.

⁹Mahan ama ânsunga Paul thurchi misîr a rangâia. Damna ranga iemna a nei ti Paul'n a mûn chu ama hah Paul'n a en ngita,

¹⁰male rôl inringtakin, “Ne ke le injîkzatin inding roh!” a tia. Ama hah ân chôma, a lôn titir kelen zoi.

¹¹Mipuingeiin Paul sintho hah an mu lechu anni Lycaonia chongin an inieka, “Pathiengei miriem changin ei kôm an juong chum ani hih!” an tia.

¹²Barnabas riming hah Zeus an tia, male Paul hah thurchi misîr uol ngâi ani sikin Hermes an tia.

¹³Hanchu, Zeus pathien ochai, an biekin, khopui pên tienga om han seratchalngei le pârthilrûingei mokota a hongchôia, mipuingei lehan tîrtonngei biekna ranga that rangin an mintuoa.

¹⁴Ma anga tho ranga an mintuo hah Barnabas le Paul'n an riet lechu an puon an potkhêra, mipui lâi tieng tânin an inieka.

¹⁵“Mahih irang mo nin tho? keini khom nangni anga miriem papai kêng kin ni. Mahin keini hih Thurchi Sa misîr ranga om ke kin ni, hi kâmnângloi neinunnggei hih mâka Pathien aring, invân, pilchung, tuikhanglien le asûnga om murdi sinpu tienga nin hong kop theina rangin.

¹⁶Tiena han chu, Pathien'n mitin an lampui chit jûi rangin a phal ngâia.

¹⁷Hannirese ama aom ti rietnân neinun sa nangni thopên a minlang ngâi. Invân renga ruo le chimungei azora taka nangni a pêk ngâia, sâk rang le nin mulungrîla râisâna sip nangni a pêk ngâi” an tia.

¹⁸Ha chonga han tîrtonngeiin mipuingei chu an kôm inbôlna pêk loi rangin an khap thei jâma.

¹⁹Pisidia rama Antioch le Iconium renga Juda senkhatngei an hong; mipuingei hah an tieng an methêm mene zoia; Paul hah lung leh an dênga, a thi zoi tiin an mindona khopui renga an kai sua.

²⁰Hannirese, iempungei hah a kôla an hong indingin chu ânthoia, khopuia han a lût nôk zoia. Anangtûkah chu Barnabas le Derbea an se zoi.

Syria rama Antioch khuo taka an kîr

²¹Paul le Barnabas'n Derbea han Thurchi Sa an misîra, ruoisi tamtak an man nûkin Lystra, Iconium le Pisidia rama Antioch ngeia an kîr nôka.

²²“Intakna tamtak tuong ngêtin Pathien Rêngrama ei lût rang ani,” tia minchûn iempungei hah an mindeta, taksôn dika omtit rangin an mohôka.

²³Koiindang tina upangei an phun pe ngei tira, bungêiin an chubai suole an iemna Pumapa, an taksônpu kuta an bâng tir zoia.

²⁴Pisidia ram an sir zoiin chu Pamphylia ram an hong tunga.

²⁵Perga taka thurchi an misîr zoiin chu Attalia an sea,

²⁶ma renga hah chu rukuongin Antioch an se nôk zoia. Ha mun hah hi zora an chuonsin an zoi hih, an phut rang lâia Pathien moroina kuta bânga an omna mun hah ani.

²⁷Antioch an tungin chu koiindangngei an koibûma, anni ngei manga Pathien'n sin a tho ngei murdi le Jentailngei ta ranga iemna lampui a mo-ong pe ngei tie hah an rila.

²⁸Mahan iempungei leh zora sôtzan an oma.

Sinthongei 15

Jerusalema roijêkna

¹ Mi senkhat Judea ram renga Antioch an juonga, “Moses Balam anghan sertan nin tho nônchu sanminring ni thei no tu nui,” tiin iempungei an minchua.

²Paul le Barnabas han ma roia han anni ngei hah an inkhalpui ngei oka, masikin, Paul le Barnaba le an lâia mi senkhat le ha bâiinkhamna chungroia han Jerusalema tîrtonngei le upangei hong intongpui rangin an minsûk zoia.

³Koiindangin an hong mathâna, anni han Jentailngei Pathien tienga an inlet roi hah misîr tirin Phoenicia ram le Samaria ram an sir sua ha an misîr renga han iempungei murdi an râiasân oka.

- ⁴Jerusalem an tungin chu koiindangin tîrtongei le upangeiin an lei modôma ma ngei kôm han Pathien'n anni ngei ma anga sin a tho ngei murdi hah an rila.
- ⁵Hannirese Pharisee pâla mi iempungei senkhat an indinga, "Jentailngeiin sertan ngêta, Moses Balam an jôm rangin tipe ngei rang ani" an tia.
- ⁶Tîrtongei le upangei, ha roi hah jêk rangin an intûpa.
- ⁷Asôt tak an inkhal suo nûkin Peter ândinga, "Sungsuokngei, Jentailngei Pathien chong an rieta, an iem theina ranga Thurchi Sa misîr pe ngei ranga nin lâi renga tien renga Pathien'n mi zen ani ti hah nin riet.
- ⁸Mitin mindona rietpu Pathien'n ei kôm mi pêk anghan Jentailngei khom Ratha Inthieng pêk sân a khôk tiin ânlanga.
- ⁹Eini le anni sensâi loiin, an iem sikin an sietnagei a ngâidam zoia.
- ¹⁰Masikin, ei richibulngei le eini pêl zoi khâiloi puok hah atûna hin iempungei chung a mokhop pe rang bôkin irang mo Pathien nin minsin hi?
- ¹¹Ni mak!, Anni ngei angdênin eini khom Pumapa Jisua iema moroina han Sanminring ei ni," a tia.
- ¹²Barnabas le Paul'n anni ngei manga Pathien'n Jentailngei lâia sininkhêlungei le kamâmruoingei a sin roi an misîr kêr chu mipuingei nâm an dâireka.
- ¹³An misîr suole chu Jacob khomin a misîr sa, "Sungsuokngei, ko chong rangâi ta u!
- ¹⁴Pathien'n ama riming ruput ranga anni ngei lâia ni lâk suok rangin Jentailngei a juong pan phut roi Simon'n a misîr zoia.
- ¹⁵Ha chong le dêipungei chong hi ântok thap ani. Pathien lekhabun,
- ¹⁶ "Masuole, Pumapa han kêr nôk ka ta David omna rêngram achim hah minding nôk ki tih. a sietnagei sin nôk ka ta male mindet nôk ki tih.
- ¹⁷Male mi murdi ngei le Jentailngei, Ki mi niranga ko koi ngei nâm Jentailngei ko kôm hong an ta.
- ¹⁸Rammuol insieng renga hi chong min riet ngâipu Pumapa han a ti," ati anghan.
- ¹⁹"Masikin Jacob'n, mahi ki mindon chu ani. Jentailngei Pathien tienga hong inlet ngei chu minjêl no ila.
- ²⁰Manêkin, lekha muthuonin mirmilngei biekna neinun inthiengloi sâk mo, hur le ngal mo, sâ lei thisai le thisen sâk mo, mong rangin tipe ngei ila ki ti ani."
- ²¹Moses Balam chu tienlâi renga sabbathni rachamin Synagog taka an pore ngâi zoia, a chongngei khom khopui tina an misîr ngâi zoi," a tia.

Jentail iempungei kôma lekhamuthuon

²²Hanchu, tîrtongei, upangei le koiindang pumpuiin an lâia mi senkhat an thanga, Paul le Barnabas pâla Antiocha min se rangin an min chukka. An ulien uol inik iempungeiin an mirit, Judas, Barsabass an ti le Silas an thang ngeia.

²³Hi anghin miziekin, an min chôî ngeia: “Keini, tîrtongei le upangei nin sungsuokngeiin kin iempu champui Jentail ânzir ngei Antioch, Syria le Cilicia rama omngei chibaingei nangni kin mûk.

²⁴Kin pâla mi senkhatin thurchi juong misîrin nangni an minjêla, mulungjîng nangni an shak ti kin rieta; nikhomrese, anni ngei ha kin kôm renga ite rilnangei man mak ngei.

²⁵Masikin kin intûpa, mulung inruol takin kin thanga nin kôm juongtîr rangin kin minsûk ani. Ei ruol moroitak ngei Barnaba le Paul

²⁶Jisua Khrista sinthona an ringna phal ngei lehin juong rese ngei kin ti.

²⁷Ha anghan, Judas le Silas kin juongtîr ani, hi ngei hin kin miziek hih mêl inmûn nangni misîr pe an tih.

²⁸Ratha Inthieng le inruolin hi balamngei sin om pêna hi chu puok rik dang sin loi rangin kin inruol;

²⁹mirmilngei biekna sâkruo sâk no roi, thisen sâk no roi, sâ sômthat sâk no roi, hur le ngal renga inkêm roi. Hi ngei hih tho tet loi rangin nin indîn theiin chu nin ta rangin sa ok atih, chibai” tiin.

³⁰An tîrlâmngei hah an sea, Antioch an tunga; mahan iempungei pâl murdi an koibûma, lekhamuthuon hah an pêk ngeia.

³¹An pore suole chu ma mohôkna chong sika han râisânin an sip zoia.

³²Judas le Silas chu dêipungei khom an ti sa, asôtzan an chongpui ngeia, an mohôk ngeia, an min rât oka.

³³Sûn sôtzan an om suole chu a juongtîr ngei kôm kîr nôk rangin an se zoia, iempungeiin rathangamriemin an mathân ngeia.

³⁵Paul le Barnaba chu midang tamtak ngei le Pumapa chong minchu le misîrin Antioch'a han zora sôtzan an la oma.

Paul le Barnabas an insen

³⁶Zora sôtzan suole chu Paul'n Barnabas kôm, “Tho se nôk ei ta, khopui tina Pumapa chong ei misîrna murdia ei sungsuokngei pan ei ta, i angin mo an om va en ngei rei,” a tia.

³⁷Barnabas'n John Mark an kôm tuongsa rang a nuoma.

³⁸Hannirese Paul'n chu nuom maka, abi chu Pamphylia ram tena a kîra, an sin a zoipui loi sikin ani.

³⁹An inkhal bita, an insen zoia, Barnabas John Mark a tuonga, rukuongin Cyprus tuihuol tieng an sea.

⁴⁰Paul'n chu Silas a thanga, iempungeiin Pumapa moroina kuta an bâng ngei suole chu a se zoi.

⁴¹Koiindangngei mindet tirin Syria le Cilicia ram a sir zoi.

Sinthongei 16

Timothy'n Paul le Silas a jûi

¹Paul'n Derbe le Lystra khom a sir sa, mahan Khristien inkhat a riming Timothy a oma. A nû khom Khristien dên Juda mi ania, a pa chu Greek ani.

²Lystra le Iconiuma iempungei murdi'n Timothy an minlut ok ngâia.

³Paul'n ama hah tuong rang a nuoma, ma revêla Judangei han Timothy pa hah Greek ani ti an riet sikin Timothy khom a sertan pe ani.

⁴Khopuingei tin an sir malamin, Jerusalema tîrtongei le upangei balamngei masat hah iempungei an pêk tira, jôm rang khomin he an be tira.

⁵Masikin, koiindangngei hah taksônân an rât uola nîngtin an pung titira.

Troas taka Paul inlârna a mu

⁶Ratha Inthiengin Asia rama thurchi misîr a khap sikin Phrygia le Galatia ram an sira.

⁷Mysia ramri an tungin chu Bithynia rama se rang an bôka, hannirese, Jisua Ratha'n phal ngei maka.

⁸Masikin, Mysia ram khêlin Troasa an se zoia.

⁹Hanchu, mani jâna han Paul'n inlârân Macedonia rama mi inkhatin "Macedonia rama hong kêi inla, mi hong san roh," tia ngênin a mua,

¹⁰Paul'n inlârna hi a mu suole chu Macedonia rama se rangin kin inthok kelen zoia, ha rama mingei kôma Thurchi Sa misîr rangin Pathien'n mi koi sikin.

Phillipi khuoa Lydia inthûlna

¹¹Troas renga rukuongin kin jôka, Samothrace kin thengpata, male anangtûka Neapolis kin sea.

¹²Ha renga hah Philippia kin sea, ha khopuilien hah Macedonia; rama khuo inkhat ania, ma biela han chu khuo kâm omtak ani. Rom mingei bung ani. Ma khuoa han sîn tamtak kin châma.

¹³Sabbathni khopui pêntienga tuidung panga Judangei chubaithona ngâi mun ni ranga kin iema han kin sea; mahan kin insunga nupang intûp ngei kôm thurchi kin misîra.

¹⁴Ha ngei lâia mi a riming Lydia, Thyatira, khuo mi puon senduk juor ngâi, Pathiena inbei mi nupang inkhatin chong a rieta; male Paul thurchi misîr jôm rangin Pumapa'n a mulungrîl a minvâr pea.

¹⁵Ama le a inmingeiin baptisma an chang zoiin chu, “Pumapa iem tatakin ni nan bêa anin chu ki ina hong tung roi tiin mi siel rîta,” ni sâr zoi.

Phillipia Paul le Silas intâng ina ankhum

¹⁶Sûnkhat chu chubaithona muna kin se lâiin suok dôngmate inkhat ramkhorî sûra taruosân thei kin intongpuia, amanu han taruosân a theina sika han a pu ngei sum tamtak a lo pe ngâia.

¹⁷Hanu han Paul le Keini mi jûia, “Hi mi, Sanminringna lampui nangni ril ngei hih, Âchungtak Pathien târlâmngêi an ni hi,” tiin ânîek ngâia.

¹⁸Ma anghan, sîn tamtak a tho tenin chu Paul a mulung hoi khâi maka, a takasia. Ramkhorî kôm han, “Jisua Khrista rimingin a sâng renga jôk rangin chong nang ke pêk,” a tia. Ha mitmisim kongkâr han a jôk pai kelen zoia.

¹⁹A pumangei han an sum manna om khâi mak ti an riet lechu Paul le Silas hah an sûra, roijêkpungei kôm mipui intûpna muna an kai minlûta.

²⁰Rom roijêkpungei kôm an min tungin chu, “Hi mingei hih Juda an nia, kin khopuilien sûnga bâiinkhamna an sin ngâi.

²¹Balam dang kin balam le ânkal, keini Rom mingei kin pom rang le kin mang ranga ânthiengloi an misîr ngâi” an tia.

²²Mipuingei hah Paul le Silas jêm rangin an inthoka. Masuole chu roijêkpungei han Paul le Silas puon an khêr pe ngeia, jêm rangin chong an pêka.

²³An jêm bit suole jêl ina an khuma, angâkpu kôm han asân khumrap rangin chong an pêka.

²⁴Ma anghan, intâng insûng ânîaina taka a khum ngei, an kea thing kekol riktak an min bun ngeia.

²⁵Jân lâitaka chu Paul le Silas'n Pathien kôm chubai an thoa. Minpâkna lâ an thoa, intâng ina midangngeiin an rangâia.

²⁶Inningloiin nîngnupui a hongga; intâng in lungphûmngêi tena khom ânphêh heta, voikhatrengin inkhârngêi hah ân-ong leta, mitin renrokolngêi hah ânkhêk rilla.

²⁷Hanchu, angâkpu a in hah a hong hara, inkhârngêi in-ong letin a mua, intâng ina intângngêi an rot suo zoi tiin a bôka, khandai a kaidûka, inthat rang a thoa.

²⁸Hannirese Paul'n rôl inringtakin, “Ite inlo no roh, kin rêngin kin la om let” a tia.

²⁹Ama han meiser a roka, a tâna, chi le innîk pumin Paul le Silas ke bulah ânbokraka.

³⁰Hanchu anni han a ruoi suok ngeia, “Pungei, Sanminringa ko om theina rangin imo ko tho rang?” a tia.

³¹Anni han, “Pumapa Jisua iem inla, hanchu sanminringin om ni tih, nangma le ni inmingei leh,” tiin an thuona.

³²Masuole chu ama le a inmingei han Pumapa thurchi an misîra.

³³Mani jâna han, ma zora lelêa han an sâbengei hah a rusûk pe ngeia; hanchu ama le a inmingei baptisma an chang kelen zoi.

³⁴Masuole Paul le Silas hah a ina a tuong ngeia, sâk rang a pêk ngeia Pathien an iem zoi sikin an insûng pumin an râiasân tatak zoi ani.

³⁵Anangtûk jînga chu Rom roijêkpungei han, “Ha mingei hah mojôk ta roh,” ti chongpêk chôiin misûr ngâi ngei uliengei an tîra.

³⁶Masikin a ngâkpu han Paul kôm, “Roijêkpungeiin nangni mojôk rangin chong an hong muthuon. Hong jôk unglâ, rathânngamtakin se ta roi,” a tia.

³⁷Aniatachu, Paul'n misûr ngâi uliengei kôm, “Rom miriem kêng kin ni, kin tho minchâina om le omloi luo en loiin loko makunga min jêma, intâng ina min khuma. Atûn inrûkin mi mojôk rang an ti na? Ni thei tet no nih! Anni ngêt hong rese ngei, mi hong mojôk rese ngei,” a tia.

³⁸Misûr ngâi uliengeiin ha chong hah roijêkpungei kôm an misîra; Rom miriem anni ti an rietin chu an chi zoia.

³⁹Masikin an sea an vânvûia, male chu an mojôk ngeia khopuilien renga jôkpai rangin an ngêna.

⁴⁰Paul le Silas hah intâng in renga an jôka, Lydia ina an sea. Mahan iempungei hah an mua, mohôkna chong an pêk ngei suole chu an mâk ngei zoia.

Sinthongi 17

Thessalonica khopuia

¹Paul le Silas hah Amphipolis le Apollonia an khêla. Thessalonica an tunga. Mahan Judangei Synagog taka ava oma.

²Paul'n a tho ngâi balam anghan an kôm a lûta, sabbathnia voithum Pathien lekhabu renga asân a sûtpuuin,

³Messiah chu dûktonga thina renga ânthoinôk rang piel ani ti a rilminthâra, a minlang ngâia, “Hi Jisua, nin lâia ku phuong hih Messiah ani,” a ti sa ngâi.

⁴An lâia senkhat chu Paul thurchi misâr hah an iema, Paul le Silas hah an jôm zoia; nupang ruoipu tamtak le Pathiena inbei mi Greek mipuingei lehan.

⁵Hannirese Judangei han an narsa, lamliena thaboi pâlŋgei hah an tuonga, mipui an koibûma, khopuilien pumpui bâiinkham chara, Paul le Silas hah loko makunga tuong rang bôkin Jason in an hong lûtkhuma.

⁶Hannirese, an manloi lehan chu, Jason le iempu senkhatngei hah khopuilien uliengei makunga an hong kainâl ngeia, an inieka. “Hi mingei hin muntina bâiinkhamna an sin ngâi! atûna hin ei khopuiliena an hong ani.

⁷Jason hin a ina a lei mintung ngei ngâia. Hi ngei hin, a riming Jisua, Rêng dang aom tiin Caesar balam an siet ngâi,” an tia.

⁸Ma chong hah an rietin chu mipui le khopuilien uliengei hah bâiinkhamin an om zoia.

⁹Khopui uliengeiin Jason le a champuingei hah sum anâng dôr an pêka, an mojôk ngei zoi ani.

Berea khopuia

¹⁰Hanchu, iempungeiin hani jân ahongni lechu Paul le Silas hah Berea khopuia an min se ngei kelena, an tungin chu Judangei Synagog an lûta.

¹¹Ma taka mingei kai chu Thessalonica mingei nêkin chu an mulungrîl ân ong uola. Thurchi hah atui takin an rangâia, Paul thurchi misâr hah adik le dikloi rietna rangin nîngtin Pathien lekhabu an inchu ngâia.

¹²Ha ngei lâia mi tamtakin an iem zoia, Greek nupang mirit om tamtak le pasal tamtak khomin an iem zoi.

¹³Hannirese Thessalonica Judangei han, Paul'n Berea khopuia khom Pathien thurchi a misâr ti an riet lechu mahan khom an va sea, mipuingei an mohôka; bâi an inkham char zoi.

¹⁴Iempungeiin tuipei dênin se rangin Paul hah an tîra, Silas le Timothy chu an la oma.

¹⁵Paul juong thak ngei han Athens dênin an juong thaka; Silas le Timothy kôm han innota a kôma se ranga Paul chongbê chôiin an kîr nôk zoi.

Athens khopuia

¹⁶Paul'n Athens taka anni hah a lei ngâk lâiin ha khopuilien hah mirmilngeia sip ani ti a mûn chu a mulung a minna oka.

¹⁷Masikin Synagog'a Judangei le Jentailngei, Pathien biek ngei hah a dem ngâia; mipui intûpna muna khom mataka omngei ngân chu nîngtin an injêk ngâi.

¹⁸Epicurean le Stoic minchupungei lâia khomin an inkhalpuia. Senkhat chu, “Hi mûr thiempa hin imo misîr rang a bôk hi?” an tia. Adangngeiin chu, “Ram dang pathiengei chong a misîr rang ani hi,” Paul, Jisua le inthoinôkna. misîr sika ani.

¹⁹Masikin Paul hah a koia, roijêkna Areopagus han an tuonga; a kôm “Hi minchuna thar ni misîr ngâi hi a riet kin nuom.

²⁰Ni misîr kin riet ngei hih la riet ngâi makme; itina mo ani a riet kin nuom,” an tia.

²¹(Athens khopui mi murdi le ramdangmingei ajuong omngei khomin an zora dôn murdi neinun thar misîrna le rangâina mang an nuom sikin).

²²Paul hah roijêkna Areopagus moton taka ândinga, “Nangni Athens mingei, lamtina sakhuo mi tatak nin ni ti ki riet.

²³Nin khopuilien sûnga ka chai malamin chubai nin mûk ngâi ngei ke ena; mâichâm inkhat, ‘Rietloi pathien ta rang,’ tia ânziek ku mua. Nin rietloi chubai nin mûk tit ngâi hah atûna nangni ki misîr pe hih ani.

²⁴Pathien'n rammuol le asûnga neinunngiei murdi sinpu chu pilchung le invân Pumapa ani sikin kuta sin in ngeia om ngâi mak.

²⁵Miriam ei sem rang neinun ite khom insam mak. Ama ngêt han hah ngei nâm kôma ringna ngei, phûk ngei le mitin kôma neinunngiei nâm a pêkpu ani uol.

²⁶Rammuol pumpuia om rangin, mi inkhat renga jâtin a sina. An ta rang zorangi a khitpe ngeia, an omna rang rikung a khangpe ngeia.

²⁷Ma hih a thona abi chu ama an ena, an zonga an mu theina ranga ani. Adiktakin, Pathien chu tute renga la uol mak.

²⁸Mi senkhatin an ti anghan,

‘Ama sikin ei ringa, singinsa'n, ei om ani,’ Nin lâ phuopungei khomin an ti sa anghan,

‘Eini khom a nâingei ei ni.’

²⁹Pathien nâingei ei nin chu, Pathien chu rângkachak mini, sumin mini, lungin mini, miriem kut thiem le mindonna mirimil an sin ngâi anga han om rang tetên ei bôk rang nimak.

³⁰Pathien'n ama ei riet mâna ngei kai chu rietloi om a tho ngâia; aniatachu, atûn chu ramtina mi murdi sietna renga inhei rangin chong a pêk zoi.

³¹Nikhuo a khita, ha nia han a mi phunpu hah rammuola mi murdi ngei roi adiktakin jêk atih. Ma chong ha chu Pathien'n ama hah thina renga kaithoiin mi murdi kôm a min riet zoi,” a tia.

³²Thina renga inthoinôk roi an riet lechu senkhatin an munuisana; senkhat nôkin chu, “Hi chong hi no kôm renga la rangâi nôk kin nuom,” an tia.

³³Male Paul a mâk ngeia.

³⁴Mi senkhat chu a tieng an kop tita male an iem zoia. Ha ngei lâia senkhat chu, Areopagus roijêkpu pâla mi Dionysius le nupang inkhat a riming Damaris le midang ngei an ni.

Sinthongi 18

Paul Korinth khopuiliena

¹Masuole han, Paul hah Athens renga Korinth a se zoia.

²Mahan Juda inkhat a riming Aquila a mua, ha mi hah Pontus rama suok ania, Claudius Juda murdi Rom renga jôkpai rangin chong a pêk sikin a lômnu Priscilla le Italy ram renga hong inthon bil an ni. Paul an kôm a sea.

³Ha ngei khom hah Paul anga puon in sin ngâi anni sikin an kôm a oma, munkhatin sin an tho zoi.

⁴Sabbathni racham Synagog taka chong a mintukpui ngâia. Judangei le Greekngei hah min riet minthâr rang a bôk ngâia.

⁵Silas le Timothy Macedonia ram renga an juong tungin chu Paul hah thurchi misâr injên a zora a mang zoia, Jisua chu Messiah ani tiin Judangei kôm a ril minthâr ngâia.

⁶Hannirese an doia an ril minsieta masuole, chu Paul'n a puona rababngei hah thikin chongnatakin a thuona, an kôm, “Nin thina chungroi chu nangnin pêl roi, keima chu ko jôk ani, atûn renga chu Jentailngei kôm se ki tih,” a tia.

⁷Masikin a jôka Jentail inkhat a riming Titius Justus ina a lûta, ha mi hah Pathien biek ngâi mi ania, a in khom Synagog le ântôn chak.

⁸Crispus Synagog ruoipu han a inmingei murdi le Pumapa an iema, Korinth khopuia mi tamtak khomin an rieta, an iema baptisma an chang zoi.

⁹Jân khat chu Paul'n inlârna a mua, mahan Pumapa'n a kôm, “Chi no roh, dâirek loiin thurchi misâr tit roh,

¹⁰asikchu nang ko ompui tit nang minna rangin tutên nu chung a kut musum noni ngei, hi khopuia hin mi tamtak ko dôn kêng,” a tia.

¹¹Masik han, Paul hah ma khopuiliena han Pathien chong minchûn kum khat in-ang a oma.

¹²Gallio ha Achaia rama râiôt a chang lâiin Judangei an inruola, Paul an sûra, roijêknamuna an tuonga.

13“Hi mi hin balam niloia Pathien biek rangin mi methêm rang a bôk ngâi,” an tia.

14Paul hong chong rang a ti lehan, Gallio han Judangei kôm, “Judangei, mahi neinun dikloi mini, aninônchu tho minchâina mini luo nirese chu, inkhêl loiin nangni mindonpe ki tih.

15Hannirese, chongngei, rimingngei le nin balam chungroia inkhalna papai kêng ania, nangnin jêk roi. Kei chu ha anga neinunngai kai chu jêk no ning,” a tia.

16Roijêkna mun renga a rujûlpai ngei zoia.

17Anrêngin an Synagog ruoipu Sosthenes an sûra, roijêknamun mâia an jêma. Aniatachu Gallio han ma anga an tho ha itên rangâi pe ngei tet mak.

Paul Antioch a kîr nôkna

18 Masuole han Paul hah iempungei leh sîn tamtak a la oma, hanchu iempungei hah a mathân ngeia Syria ram tieng rukuongin a se zoia, a kôm Priscilla le Aquila khom an se sa. Paul'n chonginkhâm a lei dôn sikin Cenchreae a se mân a sam a ep baka.

19Ephesus an tunga, mahan Priscilla le Aquila chu a mâka, ama chu Synagog taka a lûta Judangei hah chong a la mintukupi ngeia.

20Anni han asôtzan om rangin an ngêna, hannirese pompe ngei maka.

21Manêkin, an kôm se khom inlang “Pathien lungdo anîn chu nin kôm la hong nôk ki tih,” tiin chong hoiin a mâk ngeia, Ephesus renga rukuongin a se zoia.

22Caesarea a tungin chu Jerusalema a sea, koiindang chibai a mûka, masuole chu Antioch taka a se zoia.

23Mahan sîn tamtak a om suo nûkin a se nôka, iempungei mindet tirin Galatia ram le Phragia ram a sir suo zoi.

Ephesus le Korinth taka Apollos thurchi a misîr

24Ha lâia han Juda inkhat a riming Apollos, Alexandria taka suok Ephesusa a juonga. Ama hah thurchi misîr theitak ania, Pathien Lekhabungei khom a riet oka.

25Ama hah Pumapa lampui chong ânchu zoisai ania, mulungrîla satna tak inveiin Jisua thurchi a misîr ngâia, Nikhomrese, John baptisma vai kêng ala riet.

26Synagog taka hâitakin thurchi misîr a phuta, hanchu Priscilla le Aquila hah a thurchi misîr an rietin chu an ina an tuonga, a kôm, Pathien lampui roi adik uolin an rilminthâr pea.

27Hanchu ama hah Achaia rama se rang a bôk sikin Ephesus'a iempungeiin an mohôka ama an lei modômna rangin Achaia rama iempungei kôm lekha an

miziek pea. A tungin chu Pathien moroina sika iempu hong chang ngei ta rangin a sanpu satak a changa.

²⁸Loko rieta Judangei hah a makhal mindoka, Pathien lekhabu mangin Jisua chu Messiah ani ti a minlang ngâi.

Sinthongei 19

Ephesus'a Paul thurchi misîr

¹Apollos hah Korinth taka a la om lâiin Paul'n sak tienga biel a hong sira, Ephesus a tunga mahan ruoisingei senkhat a mua.

²Ama han, "Iempu nin changa han Ratha Inthieng nin lei modôm ngâi mo?" tiin a rekel ngeia. "Ratha Inthieng aom ti luo riet mak me," tiin an thuona.

³Asa!, "Nônchu, khoi baptisma mo nin chang?" a tia. Anni han "John baptisma," an tia.

⁴Paul'n an kôm, "John'n mingei kôm, ku nûka juong rangpu Jisua nin la iem rang ani tiin Isrealngei an sietna renga inhei ngei hah a baptis ngâi ani ha," a tia.

⁵Maha an rietin chu Pumapa Jisua rimingin baptisma an chang zoia.

⁶Paul'n an chung a kut a minngama, Ratha Inthieng an chang kelen zoi, rietloi chong ngeiin an chonga, Pathien chong an misîr zoi.

⁷Anrêngin pasal sômleinik dôr an ni.

⁸Paul'n Synagog lût bangin than thum chu Pathien Rêngam thurchi mintukupiin methêm mene rang bôkin hâitakin thurchi a misîr tita.

⁹Aniatachu, senkhat chu an seletrûka, iem nuom mak ngeia, mipui makunga Pumapa lampui thurchi hah an ril minsiet, masikin Paul'n anni ngei hah mâkin iempungei hah a tuonga nîngtin Tyrannus inchuna ina han chong an mintukupi ngâia.

¹⁰Ma anghan, kumnik a thoa, masikin Asia rama om murdi, Judangei le Greekngei khomin Pumapa chong an riet zoia.

Sceva nâingei thurchi

¹¹Pathien'n Paul kuta sininkhêl adangviek a min thoa.

¹²Paul'n a lei mang ngâi mâihuinangei le a rôpthupna puonngai hah damloingei kôm a min chôia, an natnangei an dam ngâia, an sûnga ratha saloi tena khom an jôk ngâi.

¹³Judangei senkhat ratha saloi rujûlpai rang a bôka, ânvlak ngâi ngei khomin Pumapa Jisua riming an manga. Ratha saloi kôm, "Paul'n a misîr ngâi Jisua rimingin a sùng renga jôk rangin chong nang ke pêk," an tia.

- ¹⁴Juda Ochai Inlaltak, Sceva han nâipasal sari ha anga chong ngâi a dôna.
- ¹⁵Hannirese ratha saloi han an kôm, “Jisua ki riet, Paul khom ki riet nangni rêk hi chu tu ngei mo nin ni?” a tia.
- ¹⁶A sũaga ratha saloi dôn han a hong invôra, amene ngei riei zoia, ha in renga hah popnekin le an puon chet chitin an tân riei zoi.
- ¹⁷Ephesus taka om Judangei le Jentailngei murdi'n ma roi hah an rietin chu an chi sabak zoia, hanchu Pumapa Jisua riming ânthang uol zoi.
- ¹⁸Iempu tamtak an hongga, loko rieta an chong minchâina an phuonga.
- ¹⁹Dôitheingei tamtak khomin an lekhabungei an hong bûma, mitin mitmua an hâla, male aman an minsâpa, sumdârngei isâng sômrangnga ani tiin an rieta.
- ²⁰Ma ang taka sintho theina lien han Pumapa thurchi ânzara, rât takin ânsôn tir zoi.

Ephesus a bâiinkhamna

- ²¹Masuale chu Paul'n Macedonia ram le Achaia ram a sir suo baka, Jerusalema se rang a bôka “Ma han ke se suole chu Rom khom sir sa ngêt ki tih,” a tia.
- ²²Masikin âsanpui ngâi mi inik, Timothy le Erastus hah Mecedonia rama a lei tîr baka, ama chu Asia rama ala oma.
- ²³Ma zora lâihan Pumapa lampui thurchi sikin bâiinkhamna lientak Ephesus'a a oma.
- ²⁴Mi inkhat a riming Demetrius, sumtuia Artemis pathiennu biekin rimil sin ngâi a oma, maha a sintho ngei kôm inlâpna lientak an pêk ngâia.
- ²⁵Masikin ama han anni ngei hah a koibûma, an sintho anga tho ngei lehan chu, an kôm, “Miriempa, hi sin hih ei neina ani ti nin rieta.
- ²⁶Atûn, hi Paul sintho hih nangni khomin nin mua, nin rieta Ephesus vaia khom niloiin Asia ram pumpuia ti rang dôrin hi mi hin, kuta sin pathiengei hih pathien ni tet mak tiin mi tamtak a huong mene suo zoia.
- ²⁷Masikin ei sintho hih min en minnuoi an tih, ti vai niloiin, Asia rama mi murdi le rammuola mîn an biek ngâi pathiennu Artemis roiinpui khom boi atih, ti hih ichi aom ani,” a tia.
- ²⁸Ha chong hah mipuingeiin an riet lechu an taksi sabaka, “Ephesus Artemis hi a roiinpui tak,” tin an hêta.
- ²⁹Hanchu, khopuilien pumpui bâi an inkham zoia, Gaius le Aristarchus, Mecedonia rama mi Paul nûkjûingei hah an sûra, a pâlîn enhoi sinna ina an tânpuia.

³⁰Paul'n mipui makunga vânding rang a bôka, hannirese, iempungeiin phal mak ngeia.

³¹Asia rama ulien senkhat Paul malngei an oma, ha ngei khom han Paul hah enhoi sinna ina vânlang loi rangin chong an muthuona.

³²an thup ngeia, anrêngin bâi an inkham char zoia, mi tamtakin an intûpna bi khom riet mak ngei. Masikin, senkhat chong inkhat an hêtpuia senkhatin chong dang an hêtpuia.

³³Mi senkhat chu Alexander sika nîng atih, an tia; ama hah Judangeiin moton tieng an nam minlût sikin. Alexander'n mipui ruhu dâina rangin a kut a jâpa, an theina thurchi misîr rang a bôka.

³⁴Hannirese Juda ani ti an riet lechu darkâr nik inruolin, "Ephesus'a Artemus hih a roiinpui tak," tiin an iniek tita.

³⁵Amongnataka chu an khopuilien jêkpu'n mipuingei hah a ngo mindâia. A ngo mindâi suole chu an kôm, "Ephesus'a Artimus roiinpuitak biekin le invân renga lung inthieng achul hah Ephesus'a mingei hih a donsûipu nin ni ti mitinin an rieta.

³⁶Hi chong hi tutên makhal thei noni ngei. Masikin nin ruhu mindâi ngêt rang ani, mindon bak loiin ite nin tho rang nimak.

³⁷Hi mi, hi taka nin hong tuong ngei hih biekin inru khom nimak ngeia, ei pathiennu rilminsiet khom nimak ngei.

³⁸Demetrius le a sinthongei khomin tu chung a khom roi intak an dônin chu roijêkpungei ei dôna, roijêkna in khom ân-ong tit, ma son vânlang ngo rese ngei.

³⁹Aniatachu, roi intak piel nin la dônin chu jâttin roijêkna ina mindon nîng atih.

⁴⁰Aviena inkhôm sika hin mîn bâiinkhamna musuo ngei tiin, mi tîng an tih, ti hih ichi om ani. Hi bâiinkhamna hi abi boi ani sikin tute lakin abi misîr thei noni ngeia," a tia.

⁴¹Ma chong hah a ti suole chu mipuingei intûp hah an chîn zoi.

Sinthongei 20

Macedonia le Achaia an se

¹Ruhu lumpa hah ahek suole Paul'n iempungei a koibûma, a mohôkna chongin a mâk ngeia. Hanchu a jôka Macedonia rama a se zoia.

²Mingei mohôkna chong tamtak misîrin ha ram hah a sir sua, Achaia ram a tung zoia.

³Mahan than thum aom suole Syria ram tieng se rangin ânthoka; hannirese, Judangeiin an lei muruong chien ti a riet sikin Macedonia tieng kîr nôk rang a bôka.

⁴Pyrrhus nâipasal Sopater Beroea mingei, Aristarchus le Secundus, Thessalonica mingei, Gaius, Derbe, mingei, Timothy ngei, Tichicus le Trophimus Asia rama mingei an se sa.

⁵Ha ngei hah moton aninsa. Troasa min lei ngâka.

⁶Keini chu cholboivâipôl ruolhoi chumin Philipi renga rukuongin kin jôka. Sûn rangnga suole Troasa an kôm kin tunga, mahan sûn sari kin châma.

Paul'n anûktaka Troas a vasir

⁷Sûnrukni kholojiin vâipôl khoi rangin kin intûpa, Paul'n anangtûka se rang a bôk sikin jânchim tena thurchi a misîr jêta.

⁸Kin intûpna khâltan chunginhuon han châti tamtak mochok ania.

⁹Hanchu ruotharte inkhat a riming Eutychus, kotvênga ân sunga innngûi a lênsua Paul thurchi misîr hah asôt rai sikin a lei inphara; in chunginhuon inthumna renga a juong tâka. An juong rût tena chu a lei thi zoi.

¹⁰Aniatachu Paul a chuma a juon kûna a poma, “Nin mulung minjîng no roi, a la ring ke,” a tia.

¹¹Hanchu, Paul hah in chunginhuona a kal nôka, vâipôl a khoia, an sâk zoia. Asôtzan khuovâr rak dôr nisa asuok tena a chongpui ngei suole chu a se zoia.

¹²Ruotharte hah damin a in tieng an tuonga an phûk adâiriam zoi.

Troas renga Miletus a se

¹³Keini chu rukuongin Assos khuo panin moton kin lênsa zoi, mahan Paul min chuong rang kin bôka, ama hah kea hong rang a bôk sikin hi anga rangin mi ril sai ani.

¹⁴Assosa mi hong huoma, kin min chuonga Mitylene kin tung zoi.

¹⁵Ha mun renga hah rukuong nanâkin kin se nôka, anangtûka Chios kin tunga hatûk chu Samos kin tunga, anangtûk nôka Miletus kin tung zoia.

¹⁶Paul'n Asia rama om sôt a nuom loi sikin Ephesus chu sûnapal rang a bôk piel ani. Ani thei paia anîn chu Jerusalema Penticos ni mang rang a bôka, ânnot ani.

Ephesus Upangei kôma Paul mathâna chong

¹⁷Miletus renga Paul'n Ephesusa mi a tîra, koiindang uliengei ava min koi ngeia.

¹⁸A kôm an tungin chu an kôm, “Asia ram ku lût masa ni renga nin kôma ko om kêra ko omlam hah nin rieta.

- 19**Judangeiin min muruong sika mitrithi tâk pumin le zora intak ku chung a hong tung ngei tuongin intem takin Pumapa sin ko tho ngâi.
- 20**Nin ta ranga inlâpna rang ite thup loiin lôko lâia le insûngngeia nangni ki ril ngâia, nangni ki minchu ngâi duo.
- 21**Judangei le Jentailngei khom Pathien tieng an sietnangei renga insîrin ei Pumapa Jisua Khrista an iem rang ani ti insiemna chong ke pêk ngeia.
- 22**Male atûn Ratha Inthieng chong jômin Jerusalema ke se rang ani, mahan ku chung a imo atung rang riet mu ung.
- 23**Khophuilien tina, intâng ina le bâiinkhamnân mi ngâk ti vai hi Ratha Inthiengin mi min rieta, ki riet ani.
- 24**Pathien moroina Thurchi Sa misîr rang sintum Pumapa Jisua Khrista mi pêk zoina rangin chu ki ringna khom hi itên be mu-ung.
- 25**“Masikin riet roi, nin rêngin Pathien Rêngam thurchi misîra kên vâkna ngâi ngei hin atûn renga chu mi mu khâi no tu nui, ti ki riet.
- 26**Mapêna an mang nin om duoi le khom kei chu ko jôk ani ti avien hin nangni ki min riet.
- 27**Pathien neinun khîn murdi anrêngin nin lâia misîr inrîng mu ung.
- 28**Masikin Pathien koiindang, a Nâipasal thina sika ama ta ranga a sin chung a belripungei chang ungla, nangni le belripâl Ratha Inthiengin nangni a min kolna ngei satna rang zong roi.
- 29**Ku nûk le chu melang ichi om ngei nin lâia hong lût an ta, belripâl hôih noni ngei ti ki riet.
- 30**Nin pâla mi senkhat khomin iempungei an tieng an tuong theina rangin milak an ril zora la tung atih.
- 31**Hanchu sîn, jân mitrithi tâkpumin kum thum piel mitin nangni ki minchu hah rieltitin sing thei roi.
- 32**“Atûn hin Pathien donsuina le moroina chonga nangni ka bâng a ama han nangni a sin minlien theia, Pathien'n a mingei ta ranga a khâm satvurna hah nangni a pêk thei.
- 33**Tute sumdâr khom, rângkachak khom, sil le bom khom ôi ngâi mu-ung.
- 34**Ku kutngei lehin keima le ka champuingei anâng murdi asuo ngâi ti nangni rengin nin rieta.
- 35**Lamtina sintho ranak songin le Pumapa Jisua'n, “Lâk nêkin pêk râisâna aom uol” a ti hah rieltitin râtloingei ei san rang ani ti nangni ki min mu ngâi,” a tia.

³⁶Paul'n ha chong hah a ti suole chu, khûkinbilin an rêngin chubai a thopui ngeia.

³⁷He hoiin an mathân zoia, anrêngin an chapa Paul hah an kuoa an tuma.

³⁸A mêl an mu nôk khâi loi rang chong Paul'n a misîr pe ngei hah an rangâi sietna bitak ani. Masuole chu rukuong dênin an juong thak zoi.

Sinthongi 21

Paul Jerusalema a se

¹Anni ngei le kin insen suole chu rukuong leh kin se pata Cos kin tunga anangtûka Rhodes kin tunga, tuihuol kin tung nôka ma renga hah Patara kin tung nôka.

²Ma mun han rukuong inkhat Phonicia tienga se rang kin mua, mahan kin chuonga kin se nôk kelena.

³Cyprus tuihuol ânlangna mun ten kin va phâk lehan Cyprus hah voi tieng kin mâka Syria tieng kin sea Tyre chu neinun an musum sikin kin chuma.

⁴Ma mun han iempungei senkhat kin va mua an kôm sîn sari nikhuo kin châma, anni ngei han Ratha Inthieng rilin Paul hah Jerusalema se loi rangin an khapa.

⁵Hannirese, sîn sari ahok suole chu ha renga hah kin jôka kin se nôka iempungeiin an lômnungei le an nâingei le tuikôl tena min juong thaka ma mun han khûkinbilin chubai kin thoa.

⁶Masuole chu chonghoiin inkhat le inkhat kin insena rukuonga kin chuonga anni ngei chu in tieng an kîr nôk zoi.

⁷Rukuong leh kin se pata Tyre renga Tolemais kin tunga iempungei chibai kin pêka mahan sîn khat an kôm kin châma.

⁸Anangtûka chu kin se nôka Caesarea kin tunga mahan Thurchi Sa misîrpu Philip ina kin tunga, Philip hah Jerusalema sanpu ânthang sari ngei lâia inkhat hah alei ni.

⁹Ama han nâi dôngmate inneilo minli a dôna anni ngei han Pathien thurchi an misîr ngâia.

¹⁰Mahan sîn tamtak nikhuo kin châma ha nikhuo kin châm sêng han Judea ram renga dêipu a riming Agabus a juonga.

¹¹Kin kôm a hong Paul a kongkhitngei hah a lâka, a kengei a kutngei athenin a khita masuole chu kin kôm hi anghin a tia, "Jerusalema, Judangeiin hi anga kongkhit a dônpu tak hi, hi angtak hin khit an ta, Jentailngei kuta an pêk rang ti hi Ratha Inthiengin mi ril sai ke ani," a tia.

¹²Ha thurchi hah kin riet lechu keini le ma khuoa omngei han Paul hah Jerusalema se loi rang kin tipe tita.

¹³Hannirese Paul han kin kôm, “Khoimo nin tho, ma angdôr hih nin chap, ku mulung nin khi hi? Pumapa Jisua sikin Jerusalema khit rang vai hi kên phal nimaka, thi rang ten khom kên phal ke,” a tia.

¹⁴Methêm theijât ani khâiloi sikin, “Pumapa ti lam tak nirese,” kin tia, kin mojôk zoi.

¹⁵Masuole chu, kin insiema Jerusalem tienga se rangin kin jôk zoi.

¹⁶Caeserea khuo renga ruoisi senkhat ngeiin min jûia, anni ngei lâia mi inkhat a riming Mnason, ruoisi masa ngei lâia mi Cyprus tuihuola om ngâi ama han kin tungna rang ina mi sepui zoi.

Paul'n Jacob a vapan

¹⁷Jerusalem kin tungin chu iempungeiin râisântakin min lei dona.

¹⁸Anangtûka chu Paul'n Jacob ina mi sepua ma mun han koiindang upangei murdi khom an oma.

¹⁹Anni ngei hah Paul'n chibai a pêk suole chu Pathien'n a ranak a minsila Jentailngei lâia sin a tho lam ngei hah anrêngin a misâr pe ngeia.

²⁰Ha thurchi hah an rietin chu anrêngin Pathien an minpâka, Hanchu Paul kôm, “Sungsuokpa, Judangei lâia iempungei tamlam le Balama an inpêk lam ngei nu mua.

²¹Nangman Jentailngei rama Juda omngei murdi kôm, Moses balam nûksonga an nângei sertan khâiloi rang le Juda balam jûi khâiloi rang ni minchu ngâi ti mân an rila.

²²No hong tung ti laka hi an riet ngêt rang ania, kho angin mo ei tho rang?

²³Masikin chong nang kin be lam angtakin tho roh, chonginkhâmna lei dôn sai mi pasal minli an oma.

²⁴Anni ngei hah tuong inla, an kôm nang khom inthieng inla an sam. epna man hah nangman pêk roh, male chu mingei murdi'n nu thurchi an lei misâr ha dik mak ti hong riet thei an tih, nangma ke Moses balam ajûi mindik ti hong riet kelen an tih.

²⁵Jentailngei lâia iempungei rangin chu, mirmil biekna sâ inthiengloi ngei, sâ alei thi sai ngei, ha renga athi ngei sâkloi rang le, hur inditna ngei khoma inthieng rang ani tiin lekha'n ei roijêk ei min riet zoi,” an tia.

²⁶Masikin Paul'n anangtûka chu pasal minli ngei hah a tuonga an kôm ama khom ânthienga Pathien Biekina an lûta, inthiengna nikhuo ahek suomân chu inbôlna rang sângei pêk thei ni noni tiin ochai'n a lei ril ira.

Paul Biekina an sôr

27Aniatachu sôn sari ahek suo vâng dôrin Asia rama Judangeiin Paul hah Biekina an mua lokongei an misieta Paul hah an sôra.

28An hêtsana, “Israel mingei mi san roi, ma miriem hih ramtina mingei murdi kôm, Israel mingei Moses Balamngiei ma Biekin ngei hi a rilminsiet bang ngâipu hah ani, atûn reng hin khom ma Biekina hin Jentailngiei a hong tuonga ma Biekin hih a min nim,” an tia.

29(Ma anga an tina chu moton han khopuilien sûnga Ephesus renga Trophimus hah Paul kôm an mua, Biekin sûnga a tuong nîng atih, tiin an iem sikin).

30A khopuilien pumpui an injêl sabak zoia lokongei hah an tama, Paul ha an sôra Biekin renga an mojôk paia Biekin ngei an khâr kelen zoia.

31Paul hah that rang an ti lâitakin Jerusalema mingei murdi an injêl ti Rom râlmi ulientak kôm an hong rila.

32Masuale chu, râlmi pâl ulientakpu han râlmi ulienngiei le râlmingei hah a tuonga lokongei tieng an tân kelena, lokongei han, râlmi ulientak le râlmingei ha an mu lechu Paul an lei jêm hah an inngama.

33Hanchu, râlmi ulientak han a kôm a hong nâia, Paul hah a sôra a kuta zingjirûi inik a minbun kelena, masuale chu lokongei kôm han tumo ani le imo a tho minchâi a rekela.

34Lokongei an chong inruol khâi maka, pâl dadangin an chong hah ahong om zoia, lokongei an hêtsan rei sikin khoite mindik thei maka Paul hah kulpuia minlût rangin chong a pêka.

35Paul hah kalbi a phâk vâng dôr an tuonga, lokongei an pût rei sikin râlmingei han a domin an dom paia.

36Lokongei han “That roi” tia hêtsan chungin an jûi ngei bang.

Paul adikna thurchi a misîr

37Hanchu, Paul han kulpui an minlût rangto han, râlmi ulientak kôm han “No kôm chong imakhat ti thei ning mo?” a tia. Râlmi ulientak han, “Greek chong ni riet mo?”

38“Tiena misaloi mi thata isâng minli ramchâr tienga tuong, Egypt mi hah nimak che mo?” a tia.

39Paul'n “Juda, Cilicia rama Tarsus khopuiliena suok ki nia, khuo kâm omtak mi ki ni, rangâihoitakin lokongei makunga hin chong thei rangin ni phal roh,” a tia.

40Male chu râlmi ulientak han chong thei rangin phalna a pêka Paul hah indingna mun han a vândinga, lokongei hah dâirek rangin kut a jâpa lokongei rahang adâi lehan Hebrew chongin a chonga:

Sinthongi 22

il,” a tia.

²Hebrew chongin a chong ti an riet lechu an dâirek uol zoia Paul'n a ti banga.

³Hanchu Paul'n, “Juda ki ni, Cilicia rama Tarsus khuoa suok ki ni, hannirese Jerusalema Gamaliel minchuna hong seilien ki nia, ei richibulngei anga balam inngartaka lei inchu ki ni. Aviensûn hin nangni ngei angataka Pathien tienga theidôra inpêk ke lei ni.

⁴Hi Lampui lei jûingei hih that rang dôra lei pûta ku nuom lei lo ngâi ki ni, pasal nupang ku sûra intâng ina lei khum ngâi ki ni.

⁵Ochai Inlalngei le Roijêkpuengei murdi'n ko chong hih adik ti nangni ril thei an tih, an kôm renga Damascus taka Juda champuignei surna rang lekha ka mana, masikin ma khuo mingei hah sûra dûkmintonga zingjirûi leh khita Jerusalema hong tuong ranga se ki nia.

Paul suok tharna thurchi

(Sin 9:1-9; 26:12-18)

⁶“Hanchu ke sea, Damascus khuo kôl kin phâk le sunchimripa inningloi rengin invân renga vârin mi juong êla.

⁷Hanchu nuoia kên leta, chong ki rieta, ‘Sual, Sual ithomo dûk mi ni mintonga?’ a tia.

⁸Keiman, ‘Pumapa Tumo ni ni?’ tiin ke rekela, ama han ko kôm, ‘Keima Nazareth Jisua, dûk ni mintong ngâipu hah ki ni,’ a tia.

⁹Ko kôla miriemngei han vâ chu an mua, hannirese ko kôma chong juong tung hah chu riet mak ngei.

¹⁰Keiman ‘Pumapa imo ko tho rang?’ ki tia, Pumapa han ko kôm ‘Inthoi inla Damascus khuo lût roh, mahan Pathien'n no tho rang ngei murdi nang lei ril atih’ a tia.

¹¹Avâr hah avâr rai sikin ki mitngei khom ajînga, masikin ka champuignei han ku kutin min keiruoia Damascus khuoa kin lût zoi.

¹²“Ma khopuilien han mi inkhat a riming Ananias, Pathien biek mi le balam lei jûi ngâi a oma, mataka Juda omngei murdi'n an mirit sabaka.

¹³Ama hah ko kôm a hong, ko kôla ândinga, Lâibung Saul hong mu thei ta roh, mi tia. Ma zora tak han ko hong muthei nôk zoia, ama hah ko hong ena.

¹⁴Ama han, ei richibulngei Pathien lungdo ngei riet rang le mi diktak tîrlâm hah mua, a chongbâingei riet rangin nang a thang ani.

¹⁵Nu mu le ni riet ngei angak han mi murdi chung a rietpuipu na la ni rang sikin.

¹⁶Atûn reng, hi hin khoi mo na la ôt bang? Inthoi inla, baptisma chang inla ni sietnagei rusûk minsâina rangin a kôm chubaitho ta roh, a tia.

Paul Jentailngei kôm koiin aom

¹⁷“Jerusalem tieng ki kîr nôka, Biekina Pathien kôm chubai ko tho lâiin inlânân,

¹⁸Mahan Pumapa ku mua, ko kôm, ‘Inrangin Jerusalem mâk roh, ku thurchi ni misîr rang, hi muna mingeiin an modôm loi rang sikin’ a tia.

¹⁹Hanchu keiman, ‘Pumapa, synagog murdi ngei lûta nang iempungei lei sûra lei jêm ngâipu hah ki ni tiin min riet let kêng alei ni.

²⁰Male no chong rietpuipu Stephan an that zora han khom ko oma, an that rang hah asa lei ti puipu le ama that ngei an puonngei lei dar pepu hah ki ni,’ ki tia.

²¹Pumapa'n, ‘Se roh, alataka Jentailngei kôm nang tîr ki tih,’” a tia.

²²Hanchu, ha thurchi ten hah an rangâia, masuole chu rôl inringtakin an inieka minboi pai roi! That roi! a ring rangin chuk mak an tia.

²³Anrêngin an inieka an puonngei an voka, pildi invân tieng an vora.

²⁴Hanchu Rom râlmi ulientakpu han Paul hah rukulpui sâng tieng ruoi rangin chong a pêka, a chungma ma angdôra an hêtsana abi riet theina rangin jêm pumin rekel tit rangin a ti pe ngeia.

²⁵Hannirese jêm ranga an khit suole chu, Paul'n a kôma înding râlmi razakhat ruoipu kôm han, “Rom mi adik loina khoite boi hih jêm rangin balam ani mo?” a tipea.

²⁶Râlmi razakhat ruoipu han ha chong hah a rietin chu, râlmi ulientak kôm a sea. “Khoimo tho rang nin ti hi? Ma miriem hih Rom mi ke ani” a tipea.

²⁷Masuole chu, râlmi ulientakpu hah Paul kôm a sea, “Rom mi ni ni mo, mi ril roh!” tiin a rekela, Paul'n “Ki ni,” a tiin a thuona.

²⁸Râlmi ulientakpu han “Kei chu Rom mi changna rang hin sum tamtak ka thâm ok,” a tia, Aniatachu Paul'n kei chu “Rom mi nisai piela juonzir ki ni,” tiin athuona.

²⁹Voikhat rengin, Paul kôma chong rekel rang dônpu ngei murdi khom an rot let zoia. Râlmi ulientak ha khom Paul hah Rom mi ani ti a riet lechu asân a chi zoi, moton han Paul ha zingjirûi leh a lei thung zoi sikin.

Roijêkpungei makunga Paul ânding

³⁰Hanchu, anangtûka chu râlmi ulien han, Judangeiin itho sikin mo Paul an nôna riet rang a nuom sikin, a zingjirûi khitna an sût pea, ochaisingei le roijêkpungei murdi lei intûp rangin chong a pêka, masuole chu Paul ha a tuonga an makunga a minding zoi.

Sinthongi 23

¹Paul'n roijêkpungei hah a en ngita, "Ka champui Isrealngei aviensûn ten hin Pathien mâkunga sielesarietna diktak dônin ko tho rang ngei murdi ko hong tho ani," a tia.

²Ochai Inlaltak Ananias han, Paul kôma inding ngei kôm han Paul hah a bâikuo bên pe roi, a ti pe ngeia.

³Paul'n a kôm, "Nangma, bang rusûk minchekpu Pathien'n nang bên atih, a tia. Mahan nên sunga Balam anga roijêk rangin nên sunga balam khêlin mi min bên rang ni ti mo!" a tipea.

⁴Paul kôm inding ngei han, Paul kôm han "Pathien Ochai Inlaltak khom jâ loiin khoi ithomo no ngo," an tia.

⁵Paul'n "Ka champuingei Ochai Inlaltak ani ti ki riet loi sika kêng, Pathien lekhabun 'Ni mi, roijêkpungei chung a chong saloi ni ti rang nimak ati,'" a tia.

⁶Paul'n Saduceengei senkhat, Phariseengei senkhat le anni ti a riet lechu, roijêkpungei lâia han inringtakin "Ka champui Isrealngei keima Pharisee ki ni, Pharisee nâipasal ki ni, keiman mithi inthoinôkna aom ti sabeina ko dôn sikin ma angta intakna ko om ani," a ti pe ngeia.

⁷Maha a ti suole chu, Phariseengei le Saduceengei bâiinkhamin pâl inikin an insena.

⁸(Saduceengeiin chu mithi inthoinôkna reng om mak, vântîrtonngei, rathangei ommak, aniatachu Phariseengeiin chu anin thumin an iem sikin.)

⁹Hanchu an iniek hah ânring uola, Pharisee tienga Balam minchupungei senkhat an indinga asân an makhala, "Hi miriem hih a tho minchâina khoite mu mak me, vântîrton le ratha'n a chongpui tatak khom nisenla khoimo asiet?" an tia.

¹⁰Hanchu asân an inkhal sikin Paul hah khêr nôinek ni ngei tiin râlmi ulientak han a chia, râlmingei hah lokongei lâia han juong sea, Paul hah hong tuonga kulpui sùng tieng tuong pai rangin chong a pêka.

¹¹Mani jân han Pumapa hah, Paul kôm a juon dinga, a kôm, "Chi no roh! Jerusalema ko chong ni min riet angdên han Rom khopuia khom ko chong la min riet nôk ni tih," a tipea.

Paul that rang huongvâr an phan

¹²Anangtûk jînga chu Juda senkhatngei an intûpkhôma, huongvâr an sina Paul an that mân chu ite sâkloi rang nêkloi rang tiin khomâk an insâma.

¹³Ma anga tho ngei hi mi sômminli nêkin an tama.

¹⁴Hanchu anni ngei hah ochaisingei le upangei kôm an sea, “Paul kin that mân chu ite sâkloi rang nêkloi rangin khomâk kin insâm ke ani zoi.

¹⁵Masikin atûn hin, nangnin roijêkpungei le a roi asa uola jêk rang angin Paul hi nin kôm juong tuong rangin Rom râlmi ulientak kôm chong hong pêk roi, nin kôm a juong tung mân khom lei that rangin kin insiem suo ke ani zoi,” an tia.

¹⁶Hannirese ma thurchingei hah Paul a tupa'n a lei rieta, kulpui sûnga a va lûta, Paul a va rîla.

¹⁷Hanchu Paul han râlmi razakhat ruoipu inkhat a koia, “Hi ruotharte hi râlmi ulientak kôm tuong roh, râlmi ulientak kôma chong khat ril rang a dôn,” a tipea.

¹⁸Râlmi ulientakpu kôm a tuonga, “Intâng ina ompu Paul han mi koia hi ruotharte hi no kôm hong thak rangin mi tia, no kôm hin chong inkhat ril rang a dôn tiin chong mi be sa,” a tia.

¹⁹Râlmi ulientak han a kut a sûra, mun ânkilna uola a tuonga “Imo mi ril rang no dôn,” tiin a rekela.

²⁰Ama han, “Juda rachamneipungei Paul a roi hi adik uola jêk rang tiin nangtûka roijêkpungei kôma tuong rang minlêmin nang an hong zong rang ani.

²¹Hannirese an chong lei don no roh, an lâia mi sômminli nêka tam uolin Paul an that mân chu ite sâkloi rang nêkloi rang tiin chong an inkhâm, atûn hin that rangin an insiem chak kêng ani zoi no chong vai ke an ngâk,” a tipea.

²²Râlmi ulientak han, “Hi thurchi hi ko kôma ni misîr pêna chu tute kôm misîr khâi no roh,” tiin chong a bea. Male ruotharte hah a min se zoi.

Paul hah râiôt Felix kôm an tîr

²³Hanchu, “Râlmi razanik ruoipu inik a kôia, avien jân, dârkuo dôrin Caesarea se rangin râlmi razanik le, sakor chung chuong thei somsari le isei a chôi râlmi razanik insiem roi,

²⁴Mapêna han Felix kôm a tung ngêt theina rangin, Paul a chuongna rang sakornei khom mintuo pe sa rangin chong a be sa zoi.”

²⁵Male Râlmi ulienpu han, hi anghin lekhamuthuon a mizieka.

²⁶“Claudius Lysias Râiôt jâ omtak Felix: chibai a pêk.

²⁷Hi miriem hih Judangeiin an sûra, that rang an ti lâitakin ka râlmingei juong kêlsuo rangin ke sea, Rom mi ani ti ki riet sikin ko hong sanminjôka.

²⁸An nôna bi riet rang ku nuom sikin, an roijêkpungei kôm khom ku tuonga.

²⁹Anni an balama a lekti sikin an nôn pai ani ti ki rieta, hannirese thi rak rang dôr le intâng ina omna rang dôr ite minchâi mak.

³⁰Male Judangeiin that rangin an pût tit ti min rîla, masikin no kôm ku juongtîr kelen ani. A nônpungei khom a thurchi misîr rang a nônpungei murdi chu no kôm hong misîr rangin chong ke pêk ngei,” a tia.

³¹Hanchu râlmingeiin a chongpêk angin Paul hah an tuonga mani jân han Antipatris khuo an tungpuia.

³²Anangtûka chu râlmi kea se ngei hah chu rukulpui tieng an kîr nôka, sakor chungu chuong mingei vai hah Paul sepui tit rangin an oma.

³³Hanchu Caesarea an tuonga, Râiôt kôm lekha hah an pêka, male Paul ha khom a kuta an bang kelena.

³⁴Râiôt'n lekha hah a pore suole chu Paul omna ram a rekela, Cililia ram mi ani ti a riet lechu a kôm,

³⁵“Nang nônpungei an juong tung lehan no roi hih keiman rangâi ki tih,” a tipea. Hanchu Paul hah râiôt omna munpuia han dara vêng bang rangin chong a pêk ngeia.

Sinthongi 24

Judangeiin Paul an nôna

¹Sûn rangnga suole Ochai Inlaltak Ananias hah upangei senkhat le balamtheipu a riming Tertullas ngei le Ceasarea khuoa an sea. Felix makunga an vânlanga male Paul an nôna roi hah an va rila.

²Hanchu Paul hah an koi lûta, male Tertullus'n hi anghin an nôna roi a hong misîr phuta: “Nasa sabak na! No roijêk theina jârin inngêi takin zora sôtak kin om ngâi sik le kin ram sana rang sinsiem anângngei murdi khom nangman mi ni thop sikin.

³Kho zora khoma, kho muna khom râisântakin kin om ngâi.

⁴No zora minchâi ok rang hi jôt mu ung han khom nu nunhoina sikin ko chong bongkik hi mi lei rangâi pe rangin nang ko hong ngên.

⁵Ma miriem hin asân mi min jêla; muntina Judangei lâia injêlnangei a musuok phuta Nazareth pâla ruoipu inkhat ani ti kin riet.

⁶Pathien Biekin min nim rangin a tho ngâi sikin kin lei sîr ania, kin balam angin a roi hih jêk kin nuoma.

⁷Hannisenla, râlmi ulientak Lysias a hongu, male rangrât rengin kin kôm renga a tuonga.

⁸Ama nônpungei khom na makunga inlang rangin chong a pêk sa, nangma reng khomin rekel inla, kin nôna bi ngei hi ama renga khom hin riet thei ni tih,” a tia.

⁹Judangei khomin an nôнна an lei thopa ma ngei murdi hah adik kêng an lei tia.

Felix makunga Paul'n adikna roi a misîr

¹⁰Masuole chu râiôt'n Paul hah chong rangin kut jâpin a kôia, Paul'n, “Kum tamtak hi jât nget chung a roijêkpu ne lei ni ti ki riet sikin asân ka râiasâna, râisântakin na makunga hin ki dikna thurchi ki misîr rang ani, a tia.

¹¹Jerusalema Pathien biek rangin ko hong se ni renga hi sùn sômleinik pên lani nonih ti nangma rengin riet thei ni tih.

¹²Pathien Biekina tute kên khal puina omak, Synagogngeia le khopuiliena, kho mun khoma, Mipuingei saloi tho ranga ki misietna Judangeiin mu mak ngei.

¹³Atûna no kôma min juong nôнна hi khom inthâr takin misîr thei no ni ngei.

¹⁴Nikhomrese hi chong hih no kôm muphuong ki tih: “Anni ngeiin minchuna dikloi an lei ti ngâi lam dang tieng ei richibulngei Pathien ke lei jûia, hannirese Moses Balama lênziek le dêipungei lekhabungei murdi chu ke lei iem ani.

¹⁵Keima khom anni ngei angin Pathiena sabeina ko dôn, mi murdi ngei, midik le dikloi, thina renga inthoinôkna ngeia.

¹⁶Masikin Pathien le miriem makunga hin sielesarietna diktak hih kho zora khom dôn tit rang hih ke lei nuom tak ani.

¹⁷ “Kum tamtak Jerusalem ka mâk suo nûkin, ka jât mingei rang sum le inbôlnangei pêk rangin ke sea.

¹⁸Ma zora han inthiengna ko dôn suole Biekina min mua, ma zora han mipuingei khom ommak ngeia ite rahang a rât khom om mak.

¹⁹Hannirese, Asia rama Judangei senkhatngei mahan an oma; anni ngei han min nôнна thurchi hin imo misîr rang an dônin chu, no kôm hin juong misîr rese ngei.

²⁰Nônchu ma muna mingei hin roijêkpungei makunga kên ding zora han imo ki minchâina an man misîr rese ngei.

²¹Hi neinun inkhat an makunga kên ding lâia ki ti telloiin chu: ‘Mithi inthoinôkna aom tiin iemna ko dôn ti hi aviensûn ten hin hi angtaکا dûktonga ko omna chu ani.’” a tia.

²²Hanchu Felix hah, ma roi hah asadima lei min riet ani sikin, roijêkna hah a minngama, “Râلمي ulientak Lysias a juong tung tena nin roi hi la jêk rong,” a ti pe ngeia.

²³Hanchu Paul a rungpu ulientak kôm han asadima enkôl rangin chong a pêka, aniatachu alekti mojôk rangin le a malngei anângngei pêk thei rangin phalna a pêka.

Felix le Drusilla makunga Paul

²⁴Sûn idôr mini suole Felix le a lômnu Drusilla, Juda nupang leh an hong. Paul hah an kôia Jisua Khrista taksônna roia an chonga, a thurchi hah an rangâia.

²⁵Paul'n dikna ngei, indînna, male roijêk nikhuo ahong tung rang ngei, a misîr pea anînchu Felix han asân a chia, "Atûn chu ne se thei zoi. Zora ka man tika nang koi nôk ki tih," a tipea.

²⁶Ma zoratak han Paul'n sum mi pêk duoi mo ti sabeina a dôna; masika han a kôia a chongpui bang ngâi ani.

²⁷Kum inik dôr a vunsuo lechu, Porcius Festus, Felix hah râiôt'n a thûl zoia. Felix han Judangei modômna man rang a nuom sikin Paul ha intâng ina a mâk chiena.

Sinthongi 25

Paul'n Caesar kôm tung rang a nuom

¹Hanchu Festus'n ha ramhuol hah a tunga, sînthum suole chu Caesarea renga Jerusalema a sea.

²Mahan ochaisingei le Juda ruoipungeiin Paul hah an hong tuonga an nôna Festus kôm han an ngêna

³an nuomna thope ngeia Paul hah Jerusalema hong tuong rangin, asikchu lampuia lei that rang an bôk sikin.

⁴Festus a thuona, "Paul hi Caesarea intâng ina lei dar ania male keima khom mason se nôk lei rang ki ni.

⁵Nin ruoipungei Caesarea tena mi jûi senla ngei ma miriem hah a tho lei minchâina aamin chu juong nôn rese ngei," a tia.

⁶Festus hah sîn riet mini, sîn sôm mini, anni ngei leh ala châma male Caesarea tieng a se zoi. Anangtûka chu roijêkna âsunga Paul hah hong tuong rangin chong a pêka.

⁷Paul hah a hong tung lechu a kôm han Jerusalem renga juong Judangei hah a rihîla an indinga an nôna thurchi tamtak an misîra, minthârna man mak ngei.

⁸Aniatachu Paul han athenin ânrunga: "Judangei balam roia, Biekin roia nônchu Caesar chung a khom ite minchâiin doina lei tho mu-ung," a tia.

⁹Hannirese Festus han Judangei modômna man rang a nuomna, masikin Paul kôm han a rekela, "Jerusalema sea, ka makunga nang an nôna ngei hih khi taka hôn jêk rang nu nuom mo?" a tia.

¹⁰Paul'n, "Caesar roijêkna makunga ko roi an jêkna muna jêk pea om rang piela inding ki ni. Judangei chung a ite minchâina dôn mu ung ti nangma khom ni riet sai ania.

¹¹Balam ki minchâia, thi rang dôrin minchâina ko dôn anîn chu, thi rang khomin kên phal. Hannirese min nôna ngei hi adikloi anin chu tutên an kôm mi pêk thei no ni ngei Caesar kôm tung ki tih,” a tia.

¹²Hanchu Festus roijêkpungei, a chongpui suole chu, “Caesar kôm tung rang nu nuom lam angtakin tung ni tih,” a tia.

Agrippa le Bernice makunga Paul

¹³Sûn idôr mini avun suole chu Rêng Agrippa le Bernice Caesarea an hong tunga Festus mirit an pêka.

¹⁴Sûn tamtak an om nûkin, Festus'n Paul thurchi ngei hah Rêng kôm han a misîr pea Felix han mi inkhat intâng ina hin a mâka.

¹⁵Jerusalema ke sea han, Juda Ochaisingei le Juda ruoipungeiin asân an lei nôna dikloi minchang ngêt rangin ko kôm an ngêna.

¹⁶Aniatachu hi anghin ki tipe ngei, “An nônpu le anônpu ngei mâi intongin, an nônpu han an nôna roia han a dikna thurchi misîr rang a riet khâi noa, dikloi ani ti ânlang mân chu mojôk rang hih Rom mingei balam nimak.

¹⁷Mahin an juong tung suo nûkin zora sôtloiin anangtûka roijêkna taka kên sunga, ama hah hong tuong rangin chong ke pêka.

¹⁸Anônpu ngei hah an indinga, aniatachu Paul chungu han ma dôra dikloina khoite an misîr angin riet mu-ung.

¹⁹An inkhalnangei senkhat ha chu sakhuo roia ania mi inkhat a riming Jisua an ti, ama hah a thia; aniatachu Paul'n ama hah aring nôk a tia.

²⁰Keiman chu ma thurchi ngei ha chu ajêkna chang khom riet mu-ung, masikin keiman Paul ke rekela Jerusalema a sea mahan ajêk rangin nu nuom mo? tiin ke rekela.

²¹Aniatachu Paul han Caesar jêk pe rangin a ngên sikin, ki min se thei mân chu lei donsûi rangin chong ke pêk ngei ani,” a tia.

²²Agrippa han Festus kôm, “Kei khom ma miriem hah a chong rangâi rang ku nuom,” a tia. Festus'n “Nangtûka rangâi ni tih,” tiin a thuona.

²³Anangtûka chu Agrippa le Bernice han inlal takin mipuingei intûpna an va lûta, râlmî uliengei le khopuilien sûnga uliengei khom an oma. Hanchu Festus chongpêkin Paul an hong tunga.

²⁴Festus han, “Rêng Agrippa le kin kôma omngei murdi, hi mi hih nin mu ania, Judangei murdi'n hi taka omngei le Jerusalema omngei murdi'n ko kôm an juong nôna min ring khâilo rangin an tia.

²⁵Hannisenla thina rang dôr ite tho minchâina dôn mak ti ki rieta. Aniatachu ama'n Ceasar kôm tung rang a nuom sikin tîr rangin ki ti ani.

²⁶Aniatachu, a thurchi hi Ceasar kôm ki miziek rang hi ânthârin riet mu-ung, masikin nin kôm ko hong tuong ani hi, Rêng Agrippa nangma kôm hin ani uol, a chungroi nin phuol suole, amiziek rang imakhat ko dôn thei rang.

²⁷Asikchu mi intâng ina om, an nôna bi inthârlaka ril loia tîr rang chu keima rangin omzie boi aphuo rang,” a tia.

Sinthongi 26

Paul Agrippa makunga adikna thurchi a misîr

¹Agrippa'n Paul kôma, “Ni dikna thurchi misîr thei rangin phal ni nih,” a tipea. Paul'n a kut a phara a dikna thurchi, hi anghin a misîra:

²“Rêng Agrippa! Judangeiin min nôna murdia ki dikna thurchi avien hin no kôm ki misîr rang sikin asân ka râlvân asa okin ki riet,

³mahin, Judangei balam le ânjêlna omngei murdi ni riet minthâr sikin rangâihoitakin ko chong hi ni lei rangâi pe rangin nang ko hong ngên ani.

⁴“Judangei murdi'n nâipang ka chang lâia ko omlam le ku nunchan, motona kin rama, masuole Jerusalema khom an rêngin an riet.

⁵An misîr nuom ngânin chu, ku thurchi hi aphut renga an riet let, ei sakhuo tienga pâl inngartak Phariseengei lâia ke lei omngei hah.

⁶Male atûn ei richibulngei kôm Pathien chong a lei khâmsai hah sabeina sikin hima mun hin kên ding ani.

⁷Ma chonginkhâm sika han ei jât sômleinik ngeiin sîn le jânin Pathien chubai an lei mûk ngâi ani, male ma sabeina sika han Pumapa, hima sikin kêng Judangei hin min nôn ani.

⁸Pathien'n mithi a kaithoi ngei thei ani, tiin hi taka omngei hin ithomo nin iem theiloi?

⁹ “Keima nanâk khom hih Nazareth Jisua riming doiin neinunngei murdi tho ngâi ke lei ni.

¹⁰Maha Jerusalema ke lei tho ngâi. Ochaisingei renga rachamneina ngei ka mana, male Pathien mingei tamtak intângna ina ke lei khum ngâi; male that rang an ti zora khomin, asa ke lei ti pui ngei ngâi.

¹¹Synagogngeia khom voi tamtak dûk ke lei mintong ngei ngâi, an taksônna ngei min mâk rangin ke lei pût ngâia, ka takasi rei sikin ram dang khopuilienggei khom ku nunuom lo rangin ke se ngâi.

Paul'n a ringnun ânthûl a misîr

(Sin 9:1-19; 22:6-16)

12“Ma rang sik piel han ochaisingei renga rachamneina le phalna chôiin Damascus khuoa ke sea.

13Pu Mirit-omtak, lampuia ke se lâitak sunchimripa, O Rêngpa, invân renga juong vâ, nisa nêka vâ uol hah, keima le ka champuingei revêla hin ajuong êl ku mua.

14Kin rêngin nuoia kin inleta, male Hebrew chongin ‘Saul, Saul! ithomo nangman nu nunuom mini loa? Nangmananâk kêng nang minna rang, seratchalin a pumapa tôkmol doiin athâi anghan’ kêng ani rang.

15Keiman, ‘Puma tumo ni ni?’ tiin ke rekela, male Pumapa han, ‘Keima hih Jisua, dûk ni mintong bangpu hah ki ni, tiin a thuona.

16Aniatachu, inthoi inla ne ke leh inding roh, ki sinthopua nang phun rangin no kôm ku juong inlâr ani. Avien sîna keima renga nu mu ngei le sînmoton tienga nang ki min mu rang ngei murdi hi midangngei khom ril roh.

17Israelngei le Jentailngei renga nang kêlsuo ki tih, nang ki tîrna rang ngei kôm renga.

18An mitngei minvâr pe ngei na ta, hanchu ijîng renga avâr tieng hong inhei an ta, soitan kut renga Pathien tieng hong inhei an tih, masikin ku chung a taksônna an dôn sika an sietnangei ngâidam an changna rang le Pathien mi thang ngei lâia mun an manna rangin.’ a tia.

Paul'n a sinthongei a misîr

19“Male, Rêng Agrippa, invân renga inlârna ku mu jômloiin tho mu-ung.

20Motontaka Damascus sînga male Jerusalem sînga male chu Judea ram murdi le Jentailngei lâia khom, an sietnangei renga insîrin, male Pathien tieng an nin hei zoi ti riet theina rangin thurchi ki misîr pe ngâi ani.

21Masik taka han hi Judangeiin Biekin sînga ko om han min sîra, male ma that rang an pût ani.

22Aniatachu avien sînten hin Pathien'n ni sana, male mi chîn le mi lien ngei kôm indingin rietpuipu nina hih nin rêngin nin kôm ka la misîr thei ani, ki ti ngâi ngei chu, Moses le dêipungeiin la juong tung atih, an ti bang ngâi hah ani:

23Messiah han dûktong ngêt a ta, male thina renga inthoinôk masatak nîng atih, Sanminringna vâ thurchi Judangei le Jentialngei kôm muphuong atih,” a tia.

24Ma anghan, Paul'n a dikna thurchi a misîr lâitakin, Festus hah a hong hêtsana, “Paul, na châng ke ani zoi! nê chu mintam rei sikin na châng zoi!” a tia.

25Paul'n, châng mu-ung, Festus mirit omtak hangvangin adiktak ki misîr ani.

²⁶Rêng Agrippa! hâitakin no kôm ko chong thei, hi neinunngai chungroi hih ni riet sikin, hi thurchi hih inkila tho nimaka a kôm hin ite ip rang ommak ti ki riet mindik ani.

²⁷“Rêng Agrippa dêipungei ni iem mo? ni iem ti ki riet ani!”

²⁸Agrippa han Paul kôm, ma zora bongte sâng hin Khristien mi min chang rang no bôk mini? a tia.

²⁹Paul'n, “zora bongtên mo, aseiin mo, nangma vai nang ti mu unga, avien sâna ko chong rangâi ngei murdi hih keima anga om rangin Pathien kôm ke ngên bang ngâi hi zingjirûi hi chu bun uol loi rangin!” tiin athuona.

³⁰Hanchu Rêng, le Râiôt, le Bernice, le adangngei murdi an inthoi leta,

³¹Male an mâk suole anni le anni a nin tia, “Hima miriem hin a thina rang dôra le intângna ina khum rang dôra minchâina dôn mak.”

³²Male Agrippa han Festus kôm, “Hi miriem hin Caesar kôm tung rangin lei inzong no rese chu, ma reng hin mojôk thei rang piel ani,” a tia.

Sinthongi 27

Paul hah Rom taka rukuonga a se

¹Italy taka rukuonga se rangin kin masat lehan, Paul le intângna ina om senkhatngei hah “Rom râlmi pâl” ulien Julius kuta an bang ngeia.

²Adramyttium renga rukuonga kin sea Asia ramhuol sâng rukuong inngamna mâk rangin ânthoka male Aristarkus Macedonia rama Thessalonica khuo mi kin kôm a oma.

³Anangtûka chu Sidon kin tunga. Julius han Paul hah lungkham a mua, male a malngei vântongpui rangin phalna a pêka a nângngei an lei pêk theina rangin.

⁴Ma renga han kin se nôka, male phaivuon anôk tieng mi hong sêm sikin Cyprus tuihuola kâirêng omna tieng kin se zoia.

⁵Cilicia rama tuikhanglien kin rakâna male Pamphylia le Lycia rama Myra kin hong zoi.

⁶Mahan râlmi ulien han rukuong inkhat Alexandria renga hong Italy rama se rang a mua, masikin mahan mi min chuong zoi.

⁷Nikhuo tamtak thâmin jâm jâmin kin sea male intak takin Cnidus khopuia kin tunga, phâivuo han ma tieng han mi min se thei maka, masikin kâirêng omna Crete tuihuol tieng asukin kin sea, Cape Salmone kin tung zoi.

⁸Tuipâng kin vanâia male intak takin Rukuong Inngamna Hoi, an ti hah kin hong tunga, Lasea khopui renga hah labâk mak.

⁹Mahan nikhuo tamtak kin min hek zoi sikin rukuong dêna se nôk rang hah chi a oma, Ratanna Nikhuo alei vun zoia, Masikin Paul'n hima rilna hih a pêk ngeia.

¹⁰“Miriem ngei, atûn renga ei mântieng hi chu asân chi aom ti ku mua, sietna le inmangna lientak rukuong le a neinunngai chung a le ei ringna khom ân mang thei.”

¹¹Aniatachu râlmi ulienpu han Paul chong jôm nêkin rukuonga ulienpu le rukuong pumangei chong a mindon ngei uola.

¹²Rukuong inngamna hah phalbia omna rangin asaloi sikin mi tam uolin an omna renga sea, Phoenix an tung theia anin chu la tunga ma muna han phalbi la min hek rangin a min sûka. Phoenix chu Cret tuihuola rukuong inngamna inkhat thang-mâr le sak-mâr maiinthak ani.

Tuikhangliena phâivuo-pui

¹³Thang phâivuo jâmin ahong lechu an mintuo tak ha an tho thei rangin an bôka, thîrrûi ha a kaisua Crete tuipâng tienga han nâi theidôra nâiin an jâpa.

¹⁴Aniatachu chomolte ani lechu phâivuo râttak “Sak-Sim” an ti ngâi hah tuihuol renga ajuong sêma.

¹⁵Rukuong hah ajuong tokthapa, phâivuo mâithakin kin se thei khâiloi tena chu pût khâi makme phaivuo rukuong ha asemna titieng mi chôia.

¹⁶Cauda tuihuol saktieng kin khêl lechu kâirêng chînte kin mana. Mahan, intak takin, rukuong sûnga rukuong chînte hah kin kêlsuo theia.

¹⁷An kêlsuo nûkin insanna rûi lehan rukuong nuoiteng an thunga an khitbela. Libya tuipânga sietsâia mi nôngpai atih, ti an chi sikin puonjâr hah an min nuoia, male phaivuo ajôtna titieng amin sêma.

¹⁸Phaivuo hah ala rât tit sikin anangtûka chu neinun hah senkhat an vôr paia,

¹⁹male hatûknôka chu rukuonga mangruo neinunngai ha an vôr pai nôka.

²⁰Nikhuo tamtak nisa, ârsingei khom inlang khâiloiin phâivuo-pui râtin ahong sêm tit sikin amongnataka chu ring rang khomin in sabei khâi makmea.

²¹Masuale bunêk loia zora sôttak an om nûkin, Paul'n an motona ândinga male, “Miriemngai, ko chong hah nin rangâia Cret tuihuol renga ei juong khâiloi nirese chu hi sietna le inmangna hi tong loi rang ei nia.

²²Aniatachu atûn hin nangni ke ngên ratha inngamtakin om roi! tute nin ringna machân uol no tunui, rukuong hi vai kêng machânin aom rang.

²³Ata ki nia, a sin ki sin bang ngâipu Pathien vântîrton inkhat jânin han ko kôm a juonga.

24‘Paul, chi no roh! Caesar makunga lânding ngêt ni tih. Male Pathien asatna sikin rukuonga na champuingei ringna khom hôi pe ngei atih.’

25Masikin miriem ngei rathângamtakin om roi! Pathien ka sabei sikin mi juong ril angin nîng atih.

26Aniatachu kho tuihuol pângâ makhata mi chôl atih.”

27Mediterranean tui puia jân sômleiminli phaivuopuiin mi chôl suo nûkin, jânchimripa rukuongpungei hah tânga suok thei rangin an mindona.

28Masikin anni ngei han tui minkhina le an minkhia metres 40 ânthûka; chomolte suole chu ma angdên han an thoa metres 30 an man nôka.

29Kho lungkâra makhat mi juong nông nih ti an chi sikin rukuong remei tieng thîrrûi minli dôr an juong mathâka khuovâr rang ngâklalin chubai an tho.

30Hanchu rukuongpu ngei han, rukuong renga rotpai rang an pûta; rukuong chînte hah tuia an mathâka, rukuong moton tienga han thîrrûingei mathâk inlêmin an thoa.

31Aniatachu, Paul'n râlmi ulienpu kôm le râlmingei kôm, “Rukuongpungei hah rukuong chungâ an om nônchu nin ring rangin sabeina om mak,” a tia.

32Masikin, râlmingei han rukuong chînte rûi hah an âtsata, an min se zoi.

33Khuo ahong vâv vângin, Paul'n, bunêk rangin a ngên ngeia: “Aviensûn ten hin sûn sômleiminli nin ngâkna ani zoia, male madôr zora sôt hi khoite sâkloi nêkloia nin om ani zoi.

34Bunêk rangin nangni ke ngên, nin ring theina rangin. Nin lua samsang inkhat luo inmang no nih” a tia.

35Mahi a ti suole, Paul'n vâipôl senkhat a lâka anrênga makunga han Pathien kôm râisânchong a rila, a khoa an sâk phut zoi.

36Anni ngei khom han an ratha ânngama an rêngin bu an nêk zoi.

37Rukuonga miriem hah kin rêngin 276 kin ni.

38Mitinin an khop dôr an nêk suole chu rukuong hah ajâng theina rangin bungei hah tuikhangliena an vôrpai zoi.

Rukuong asiet

39Khuo ahong vârin chu, rukuongpungei han kho mun mini rietthei mak ngeia, aniatachu, tui inkilna mun inkhat sietsâibil an mua, anithei nisenla chu ma mun han rukuong hah tâng makhâi ngêt rang an pûta.

40Masika han thîrrûingei hah an âtsata, male tuikhangliena han an minngima, an jâpna thîrrûingei khom madên han an sûta, mântieng puon an mazara

phaivuon ajôtna titieng atuong thei rang lam takin an min sânga sietsâibil an va muna tieng han an pan zoia.

⁴¹Aniatachu tuisou inik inchunna taka kin lûta rukuong lu han tâng ava sika rukuong lu hah singinsa thei khâiloiin ân-ôk tita, rukuong remei tieng hah tuidârsokin ahong suka akoi zoi.

⁴²Intângna ina intâng ngei hah tui inlieiin lei rot ni ngei ti sika han râlmingei han anrêngin that let rang an mintuoa.

⁴³Aniatachu, râlmi ulienpu han Paul hah mojôk rang a nuoma masikin hima anga an tho hah a khap ngeia, manêkin tui inliei thei ngei kai chu tui inlieia tâng lei kêi rangin;

⁴⁴adangnei khom thingpêk chung a aninônchu rukuong hârngi lehan tâng lei kêi rangin chong a pêk ngeia. Ma anghan kin rêngin damtakin tâng kin kêi zoi ani.

Sinthongi 28

Malta tuihoula

¹Damtakin tuiônga kin hong lehan, tuihuol hah Malta ani ti kin riet zoi.

²Ma rama mingei hah keini rangin mal satak an lei nia. Ruo ajuonga adâi sikin mei an thoa male kin rêngin uôt rangin min modôm ani.

³Paul han thing pomkhat ava lâka meia a tuoalum lehan murûl ahong jôka Paul kut hah a muchuka a kher tita.

⁴Ma rama mingei han Paul kuta murûl akâi hah an mua, inkhat le inkhatin, "Ma miriempa hi mi thatpu kêng ani ngêt rang, tuikhanglien renga damin a hong jôka, aniatachu adika roijêkpu han min ring no nih," an tia.

⁵Hannirese, Paul han murûl hah mei lâia a hirthâk paia, khoite tiriêk mak.

⁶Anni ngei han chu inthing a ta, aninônchu harengan inletin a thi rang, ha an ôta. Hannisenla zora sôtzan an ôt suole khoite ati an mu loi lechu, an mindona hah an thûla, "Paul hi pathien kêng ani duo!" an ti zoi.

⁷Ma mun le inla bâkloi han ram alekti a oma a puma chu, tuihoula an ruoipu lien a riming Publius ani. Ama han mulunghoitakin mi lei modôma sînthum tena khuolmi kin chang ani.

⁸Publius a pa hah jâlmun sônga a oma, ritun le êksen damloi ani. Paul hah khâltana ava sea, chubai a thoa, a chung a kutngi a minngama, a mindam zoi.

⁹Masuole chu, ma tuihoula om damloi dangngi murdi an hong an dam zoi.

¹⁰Neinun ngâihoipêk tamtak min pêka, male rukuonga kin se lehan, rukuonga kin om sônga kin nâng rang ngei hah rukuonga an dar zoi.

Malta renga Rom

11Thânthum suole chu Alexandria renga rukuong inkhat han kin sea, ariming “Pathien Inphâr,” maha phalbia ma tuihuola alei om sai ani.

12Syracuse khopuilien kin tunga male mahan sûnthum kin oma.

13Ma renga hah kin se nôka male Rhegium khopuilien kin tunga. Anangtûka chu sim phâivuo ahonga, sûnnik sûngin Puteoli khopui kin tung zoi.

14Mahan iempungei senkhat kin mua an kôm sûn sari nikhuo châm rangin min tia, masuole chu Rom kin hong zoi.

15Rom taka iempungei han kin thurchi an rieta male alazan ten Appius khopuingeia bazar lei Tung-in Inthum ten han keini ngei leh intong rangin an hong. Paul'n a mu ngei lechu, Pathien kôm râisânchong a rîla mohôkna lientak ngei a man ani.

Rom taka Paul

16Rom kin tung lechu, Paul hah a rungpu râlmi inkhat leh atheivaia om rang an phal zoia.

17Sûnthum suole chu Paul'n khotuola Juda ruoipungei hah intong rangin a koitûpa. An intûp suole, ama'n an kôm, “Ka champui Isrealngei, ei mipuingei chung a nôchû ei jât balam ei richibulngei renga ei manna chung a ite minchâina dôn khom no rong, Jerusalema intâng ina min khuma male Rom ngei kuta mi banga.

18Chong min rekel suole, Rom ulienngeiin mi mojôk rang an nuoma, asikchu thi rang dôra ki minchâina ite an mu loi ani.

19Aniatachu maha Judangeiin an makhal lechu, ki mingei lelê doi ngei rang jôt khom no rong, Caesar kôm jêk rangin namnôl ko tho zoi ani.

20Masikin kêng nangni inmupuia nangni chongpui rangin nangni ko koi ani. Maha atatak kêng, Ma sabeina hanchu Israelngei an sabeipu han zingjirûi leh thungin ma anghin ko om ani,” a tia.

21Anni ngeiin a kôm han, “Judea renga nu chungroia lekhamuthuon khom ite man makme, ei miriem so renga juong ngei khomin no roi ngei aninônchu nu chung a asie juong ti mak ngei.

22Aniatachu nu huongvârngei hih riet rang kin nuom ani, asikchu muntina mingeiin no omna pâl hah an misîr minsiet ngâi kin riet,” an tia.

23Masikin Paul le nikhuo an khita, ma nikhuo han chu mi tamtak Paul omna han an hong. Jîng renga jânjîng ten an kôm Pathien Rêngam thurchi a misîr minthâr pe ngeia, Moses Balam le dêipungei miziekngei hah mangin Jisua thurchi min iem ngei rang a pûta.

24 Senkhatngeiin chu an iema, hannirese senkhatngeiin chu iem mak ngei.

25 Masikin anni le anni khom inngêi khâi mak ngeia, Paul'n hi chong inkhat hih a ti pe ngei suole: “Ratha Inthieng han dêipu Isaiah renga nin richibulngei kôma a lei misîr ha idôra adik mini.

26 Ama'n a kôm “Sênla ma mingei kôm han va ti roh: Rangâi rangâi nin ta, aniatachu rietthei no tunui; En en nin ta, aniatachu mu no tunui,

27 asikchu ma miriemngei an mindona hih ânômôl zoi, male an kuorngei hîprap an ta an mitngei sîng an tih. Aninônchu, an mitin a mu rang, an kuorin a riet rang, an mulungbôkngêi han rietthei an ta, male ko kôm hong kîr an tih, Pathien'n a ti, male keiman lei mindam ngei duoi nîng,” a tia.

28 Male Paul'n: “Nangnin nin riet rang chu, Pathien'n sanminringna chong hah Jentailngei kôm min pêl ani zoia. Anni ngei ke a lei rangâi rang!” tiin a khâr zoi.

30 Kum nik ten chu Paul hah athena rang in man oma han a oma, male mahan ama mu nuoma ahong ngei murdi chu a lei modôm ani.

31 Pathien Rêngram thurchi a misîrpe ngeia male Pumapa Jisua Khrista thurchi a rila, tutên khap mak ngeia ngamtakin a misîr tit ani.

Rom

Rom 1

¹Paul renga, Jisua Khrista tîrlâm le tîrton ranga thang, Pathien'n a Thurchi Sa ngei misîr ranga koi.

²Ma Thurchi Sa hah tien renga Pathien'n a dêipungei mangin a lei khâma, Lekhabu Inthieng taka miziekin.

³Mahi a Nâipasal, ei Pumapa Jisua Khrista roi ani: Miriem nina tieng chu David richisuonpâra inzir ania;

⁴Anthiengna Ratha Inthieng chu, thina renga ânthoinôkna han Pathien Nâipasal ani tie sinthotheina roiinpuetak chu a minlang ani zoi.

⁵Ama sika han Pathien'n tîrton ni rangin Khrista jôtna sika sintum ni pêk ani, Ramtina mingei iema le jômna tienga ruoi ngei rangin mikhâm ani.

⁶Rom taka om ngei khom nangni huomsa ani, Jisua Khrista ata nirangin nangni a koi ani.

⁷Masikin Rom taka om Pathien lungkham ngei le ama mi ni ranga a koi ngei nâm ranga ki miziek ani: Pathien ei Pa le Pumapa Jisua Khrista'n, moroina le inngêina nangni pêk rese.

Râisânchongrila chubaithona

⁸Amotontaka, rammuol pumpuia nin taksônna thurchi ânthang sikin nin rênga rangin Jisua Khrista jâra ka Pathien kôm râisâna chong ki mintung bak ani.

⁹Chubai ko thona ngeia nangni ki riettit ngâi ti a Nâipasal Thurchi Sa misîra ku mulung murdia sin ko tho ngâi Pathien hah ni rietpuipu ani.

¹⁰A lungdo anînchu atûn luo nangni ko hong sir phâk theina rangin Pathien kôm ke ngên tit ngâi ani.

¹¹Nin dik nôk uolna rangin ratha satvurna ngei nangni min chang rangin mu rang nangni ku nuom tatak ani.

¹²Maha keima le nangni hih nin taksôn han inmhôk inlôm ku nuom ani, ei insan inlôm theina rangin.

¹³Ka lâibungngei le sarnungei, nangni hongpan rang ko bôk tit ngâia, hannirese insûkloina a om kelen ngâi ti nin riet ku nuom ani, Jentail dang ngei lâia taksôn thar ka man anghan nin lâia khom man rangin ka sabe.

¹⁴Mitin chungâ lâkâi ke nei, Greek mingei le mi môlma ngei mivârngei le mi inmhôl ngei kôma khom.

¹⁵Ma anghan nangni Rom khopuia omngei kôma khom Thurchi Sa misâr rangin inthok chakin ko om ani.

Thurchisa sinthotheina

¹⁶Thurchisa hih inzakpui mu-ung, tukhom a iem murdi sanminringna ranga Pathien sinthotheina ania, aphuta Judangei ta rangin masuole Jentailngei ta rang khomin ahongni.

¹⁷Thurchisa hin taksôn sik vaia Pathien'n mi thei a minchang lam aphut renga amongna tena a juong minlang ani, Pathien lekhabun, "Taksôn sika thei intumpu chu ring a tih," tia ânziek anghan.

Miriamngei sietna

¹⁸Invân renga Pathien taksina hah miriemngei Pathien lunghâng tholoina sietna le dikloina murdi chung ajuong minlang ani, an sietna sikin chongtak hah an kal tita.

¹⁹Pathien'n intakna a mintuong ngeia, asikchu thurchi rietruongei chu an kôma ânlang tita Pathien'n ama rengin a min riet zoi sikin.

²⁰Anina mita mutheiloi a kumtuong sinthotheina le a Pathien nina hah rammuol sinphut renga a neinun sin ngeia inthârin mutheiin ânlanga. Masikin anni ngei chu jôkna rang lampui ite dôn mak ngei.

²¹Pathien an riet chakin Pathien angin chôiminsâng mak ngeia ama kôm râisânchong khom ril mak ngeia; sin kâmboi mang an mindona an mulungrîl sêt tak hah ahong jîng zoia.

²²Avâr okin an inbea hannirese an inmôl ani.

²³Thitheiloi Pathien chubaimûk nêkin a thithei miriemngei le vângei sângei le iring rimilngei pathien an min chang zoia.

²⁴Masikin, an mulungrîl nuomlam neinun porinchengei tho rangin Pathien'n nûk a song ngeia inzakpui omtakin an om zoi ani.

²⁵Pathien chongtak nêkin milak an thang uola, asinpu biek nêkin a sin ngei biekna sin an thope uola, Asinpu chu kumtuongin minpâkin om rese!, Amen.

²⁶Masika han kêng Pathien'n inzak taka an hur ha phalin nûk a song ngeia. An nupangngei hah khom nunchan insiengpui angtaken om loiin an oma.

²⁷An pasalngei khom nupang mang ngâi lam mâksanin, hurin an in en inlôma, pasal le pasal dikloi takin an lênga. An taksa ngeia an sietna man an man ani.

²⁸Pathien rietna diktak hah an mulungrîla an nei nuom loi sikin an mindonna siet tak anga om rangin Pathien'n nûk a song ngeia, an tho loi ruo khom an tho zoia.

²⁹Dikloina murdi'n an sipa sietnagei, insâp râtnagei, puoloina ngei, narsana ngei, inthatna ngei, insuol inkhalna ngei, inhuongna ngei le inmumâkna ngeiin an sipa,

³⁰an inêroa, an indema, Pathien an henga, an indoia, an inpâka, an insonga, sietna dadang athar an min suoka, an nulepangei mirit mak ngeia.

³¹Asielesarietna nei mak ngeia an inkhâmna mang mak ngeia, midang lungkhamna le inriengmuna reng dôn ngâi mak ngei.

³²Ma anga tho ngei chu Pathien'n a khâm anga thiruo anni ti riet chakin, anni an tho vai niloiiin midang a tho ngei khom an nuompui sa ngâi.

Rom 2

Pathien roijêkna

¹ O miriem, mi jêkpu tukhom ni roh inlêmna rang reng dôn riek mak che, midang ne jêkna dêna han nangma theiloi na chang kêng, nangma a jêkpu reng khomin ma anga sin hah no tho ngâi sikin.

²Ha anga tho ngâi mingei hah Pathien'n theiloi a min changin a jêk mindik thap ani ti ei riet.

³Aniatachu, O miriem ma anga sin tho ngâi ngei jêkpu, nang khomin ha anga sin hah no thôn chu Pathien'n roijêkna piel thei rangin nên tung mo?

⁴Aninônchu nang mehei rang a nuom sikin Pathien'n a moroina lien, a tuong theina le a tuongdierna hi misit mo ni ni?

⁵Nangma tukdullien le mulungngar sikin Pathien taksina le roijêkna diktak juong inlang rang Nia rangin nu chung a dengtheina nu bûm ani.

⁶Pathien'n mitin an sintho lam angtakin râisânman a pêk rang sikin.

⁷Tuongdiertaka sin asa thoa roiinpuina le chôiminsângna le ringna thitheiloi zong ngei kôma han kumtuong ringna pêk atih.

⁸Hannirese, a rang mang zonga chongdik hengpaia dikloina an jûi theina rangin, an chung a Pathien taksina le ningthikna musum atih.

⁹Adikloi sin ngei murdi chung a dengtheina le jâmzalna ngei om atih, Judangei chung a om bak a ta, Jentailngei chung a om nôk atih.

¹⁰Hannirese, sin asa sin ngei murdi chung a chu roiinpuina, chôinsângna le inngêina ngei Pathien'n pêk atih, Judangei pêk bak a ta masuole Jentailngei pêk a tih.

¹¹Pathien'n zen uol a neiloi sikin.

¹²Jentailngei chu Moses Balam dôn mak ngeia, Balam dôn loia nunsie ngei chu balam boia inmang rang an nia, Judangei chu Balam an dônna, Balam an dônna nunsie ngei khom Balam taka an roi jêk rang ani.

¹³Asikchu, Pathien makunga midika a tel chu Balam ariet ngei nimaka, ajômpu ngei kêng thei intum rang an ni.

¹⁴Jentailngeiin Balam dôn no khom rese ngeia mulungrîla an insiengpuia balam sin ngei hah sinin, anni le anni Balam an changa.

¹⁵An mulungrîla balam chongpêk inziek ani ti an nunchana an minlanga, an sielesarietna han khom ânlanga, an mindonna ngei ânjêla, akâra thei a mintuma, akâra chu theilo a mintum ngâi.

¹⁶Pathien'n mi murdi mindonna inthup Jisua Khrista manga a jêk Nikhuo tika chu Thurchi Sa ki misîr angtak hin jêk a tih.

Judangei le balam

¹⁷Hannisenla nangma Juda kini ni tia, Balam han nênen beia Pathien no songa,

¹⁸a lungdo khom ni rieta, Balam ni riet sikin asielesa khom ni riet.

¹⁹Nangma ngêt hah mitcho ngei ruoipu ajînga om ngei êlpu.

²⁰Amo ngei minvâr theipu le nâipangngei minchupu ni uol takin nênen bê ngâia, rietna le chongtak murdi chu Balama aom let ni riet sikin.

²¹Midangngei ki minchu ngâi ni tia, ithomo nethenin nênen chu loi? inru loi rangin mi ni minchu ngâia, nangma'n nênen ru ngâi na?

²²Inre no roh ni tia, ania nangma nênen re ngâi mini? mirmilngei mumâkpu, nangman mirmil bieka ina neinunngei hah nu muruk ngâi mini?

²³Pathien Balam hah insong puiin balam minchâiin Pathien thang ni minsiet ngâina?

²⁴Pathien lekhabu'n, "Nangni sikin Pathien riming chu Jentailngei lâia rilminsiet ani," ti ânziek anghan.

²⁵Balam hih jômîn la chu ne sertana khom asêna om ok atih, Balam no jôm nônchu sertanloi angtakin ni ni rang.

²⁶Jentail mi hah sertanloi ania, Sertan loiin Balam chu a jôma, Pathien'n maha sertan anga a bê loi rang mini?

²⁷Nangni'n sertana, Balam inziek nin neia, hannirese Balam chu nin minchâi nôka, Jentail taksa sertanloi ngeiin chu Balam chong chu an jôm ngit nôka, theilo nangni an minchang rang ani.

²⁸Apêntieng vaia Juda mi ki ni ti chu Juda mi taktak ni mak, taksa vaia sertan chu sertan taktak ni nôk sa mak.

²⁹ Manêkin, mulungrîla Juda mi ni chu Juda taktak chu ania, sertan taktak khom hah mulung tienga ania balam inziek vaia niloiiin Ratha tieng ani uol. Ma anga mi ha chu miriemin minpâk no khomrese Pathien'n chu minpâk atih.

Rom 3

¹Hanchu, Juda mi ni hah Jentail mingei nêkin imo chungtuorna aom uola? sertan khom imo asena aom?

²Lamtina asena aom ok! Amotontaka chu Pathien chongngei hi Judangei chungajuong mintung ani.

³mi senkhatin taksônna dônloi ngei ha inmo an ni rang? an taksôn loina han Pathien taksôn omna hah an minboi thei rang mini?

⁴Nitet mak! mi murdi milak ni riei khomrese ngeia Pathien chu dik tit atih, Pathien lekhabu'n, "Nangma no chong zorân chu thei na chang ngêt rang anâng, roijêkpea no om tika no motor theina rangin", tia ânziek anghan.

⁵Ei dikloina ngei hin Pathien dikna a min lang thei aninte i angin mo ei mindon? Pathien'n mi sepna a pêk inte a minchâi ei ti thei rang mini? (Miriem balama ki ril ani).

⁶Nitet mak! ha anghan nirese, Pathien'n i angin mo rammuol roi a jêk thei ranga?

⁷Aniatachu, adikloi ki nina hin a roiinpuina rang Pathien dik tie ânlang thei uolin te i rangin mo kei khom dikloia be'n ka la om ranga?

⁸Mi senkhatin, "Asa ahong suok theina rangin asie lei tho rei u," a ti, tia min rilsiet anga han ei tho rang mini? ha mingei ha chu theiloi intum ruopiel an ni.

Tute midik ommak ngei

⁹Hanchu, eini Judangei hih Jentailngei nêkin ei sa uol bak mini? nitet mak! Judangei le Jentialngei nunsie suoka om zit ei ni ti ki ril suozoi.

¹⁰Pathien lekhabu'n, "Tute midik reng ommak ngei, inkhat luu ommak ngei,

¹¹Tute mivâr reng ommak ngei, tute Pathien a rok reng ommak ngei,

¹²Pathien renga an pêt suo zoia, dikloina tieng an se suozoi, inkhat luu asa sin reng om khâi mak ngei.

¹³ An rôl chu thân in-ong ania, an meleiin milak an rila, an bâi sùng renga murûl tûr asuoka,

¹⁴ an bâi hah khomâksamna le chongkhân asipa,

¹⁵ an ke hah thisen min suok rangin kal achôi ânrange;

¹⁶an lampui chu inmangna le jâmzalna asipa.

¹⁷Inngêina lampui reng riet mak ngei,

¹⁸ an mitmua Pathien china reng om riek mak," tia inziek anghan.

¹⁹Balam chonggei chu Balam nuoia omngei chung a mang rang ani ti ei riet, tutên ite an ti theiloina rangin le rammuol pumpui hi Pathien roijêkna nuoia aom theina rangin.

²⁰Masikin Balam jôm mindik sikin tute Pathien makunga dik intum theiruo nimak Balam chu miriem sietna inrietna mang kêng ani.

Taksônna sika Pathien kôm adik intumna

²¹Atûn chu Pathien'n miriemngei dik a mintum lam a juong minlang zoi. Balam in ite atho rang ommak, Moses Balam le Dêipungeiin rietpuipu lei ni senla ngei khoma.

²²Jisua Khrista an taksônna sikin Pathien'n mi thei a min chang ani, tukhom a iem murdi chu inteina reng ommak.

²³Mi murdi'n nunsie an tho zita, Pathien sanminjôkna hah an chang thei khâiloi ani.

²⁴Nikhomsenla, Khrista Jisua râtanna jârin Pathien'n a moroina sik vaiin ke mi a manboiin thei a min chang zoi.

²⁵⁻²⁶Pathien'n ama hah ngâihoiin a pêka, ma anghan a thisena ama an taksônna sika mi murdi nunsie ngâidam anni narangin, mîn dik an chang theina rangin Pathien'n a tho ani. Zora lei vunsai han chu tuongdierin miriemngei nunsienangei chu riet khâiloiin a min vun ani. Pathien'n ama lelê midik ani tie le Jisua iem ngei murdi dik an chang ti minthârna rangin atûn lâihin mi dik a minchang lam hah a juong minlang ani hi.

²⁷Hanchu song rang mo ei dôn? dôn makme, itho sikin mo? balam jôm sika mini? nimak, iemna sika kêng ani.

²⁸Masika han miriem hi Balam jôm sika Pathien kôm adik a chang niloiin, taksônna sikin kêng mîn dik an chang tiin kin min mong ani.

²⁹Pathien chu Judangei ta rang uol mini? Jentailngei ta khom ani loi mini? O, ani sa.

³⁰Pathien chu inkhat ania, Juda sertanngai chu an taksônna sikin thei min chang ngei a ta, sertanloi Jentailngei khom an taksônna sik nanâk han thei min chang ngei atih.

³¹Hanchu taksônna ei misîr uol sikin Balam hah mangmunboia ei dar rak rang tina mini? Ni uol mak, Balam hah ei mindet ani.

Rom 4

Abraham enminkhina

- ¹Hanchu, taksa tieng ei richibul Abraham hah i angin mo ei misîr rang ani zoi? Inmo a sinthona a lei intem?
- ²Sintho sika thei intum nirese chu, Abraham'n song rang imini chu a dôn rang kêng, hannirese Pathien mitmua chu ni mak.
- ³Pathien lekhabu'n imo ati? "Abraham'n Pathien a iema, a taksônna sika han Pathien'n midikin a pom ani," ati.
- ⁴Sinthopu rathaman chu lungkham pêk niloiin lâkâi anga be ani uol, an sinthona an man kêng ani.
- ⁵Aniatachu mingei hah an sintho han midika tel nimak ngeia nungsiengi ngâidampu Pathien taksônna sikin kêng ani.
- ⁶Mi Sintho sika niloia Pathien'n dikna a minchang ngei satvur anni tie, David khom hi anghin a ril:
- ⁷ "An tho minchâinangei ngâidamin a oma, an sietnangei mukhua aom ngei chu, satvur an ni!
- ⁸Pumapa'n sietna dôn a be loi ngei chu satvur an ni!"
- ⁹Ha satvurna hah sertan ngei rang vai mo? Sertanloi ngei rang khom mo? Abraham'n taksônna sikin dikna achang ei tia.
- ¹⁰A sertan mâna chong mo, a tan suole mo? nimak, sertan suole nimaka, sertan mân ani.
- ¹¹A sertan mâna a taksônna sika, Pathien'n thei a minchang minenna ranga sertan kêng ani. Hanchu sertan khom no rese iemna sika Pathien'n thei a minchang ngei ta rangin chu Abraham chu an rathatienga pa ani.
- ¹²Sertan ngei pa khom ani, sertan anni vai sika niloiin ei pa Abraham'n a sertan mâna an taksôn angdêna iemna an nei sika ani.

Pathien chongkhâm taksônna sika man thei ani

- ¹³ Balam jôm sik niloiin, iemna sika thei minchang a lei ni, Pathien'n Abraham kôm, ama le a jâisuon ngeiin rammuol hih la luo an tih, ti a khâm ani.
- ¹⁴ Balam jôm hih rochon luona anînchu, taksônna hih akorong nîng ata, chongkhâm khom hah kâmomloi ani, tina nîng a tih.
- ¹⁵ Balam han Pathien taksina a minsuok ngâi balam boina hanchu minchâina khom om ngâi mak.
- ¹⁶ Masikin, chongkhâm hah Abraham jâisuonngei murdi rangin balam a jôm ngei mang niloiin ama taksôn anga iempungei rang khomin Pathien manboipêk

anitie min langna rangin iemna sikin ani Abraham kôma chong a lei khâm hah, ama hah ratha tienga ei rênga ei pa ani.

¹⁷ Pathien lekhabu'n, "Nam tamtak pa'n nang ki minchang zoi" a tia, inkhâmna hah Pathien tieng chu asa ani. Hi chongkhâm hih Abraham'n ai iem Pathien mithi ngei min ringnôkpu le neinun a omloi ngei min ompu kôm renga ai mu ani.

¹⁸ Abraham han sabei rang aboi tet nûk khomin ala sabei ngit sikin, "Nam tamtak ngei pa", a hongchang zoi ani. Pathien chongin, "Na jâisunongei ârsi dôr la nîng an tih", ati anghan.

¹⁹ Kum raza mi ani zoia a taksa mindon nân chu mithi angdôr ani zoia, Sarah khom aching ani ti a riet chien pum khomin a taksônna chu duoi uol mak.

²⁰ Taksônna insamin Pathien chongkhâm hah mindon kârminlak maka, a taksônna a rât uol uola Pathien a chôiminsânga.

²¹ Pathien'n a chongkhâm tuonmintung thei ngêt a tih, ti a riet minthâr sikin.

²² Masika han kêng, "A taksônna sika thei minchang ani", ti ani.

²³ Hi chong, "midika pom ani," ti hih ama chungroi misîrna rang manga miziek ni maka.

²⁴ Eini, ei Pumapa Jisua thina renga kaithoipu iemngei sika dikna intum sai ngei rang khomin miziek ani.

²⁵ Jisua hah ei sietnangei sikin thatin a oma Pathien makunga dikna intum theina rangin kaithoiin a om nôk ani.

Rom 5

Pathien makunga dik intumna

¹ Hanchu taksônna sika dik intuma omin, ei Pumapa Jisua Khrista jârin Pathien leh inngêiin ei om zoi.

² Ama jârin hi ei omna moroina nuoia hin taksônna ei lut zoi Pathien inlalna sabeina sikin insongin, râisânin ei om ani.

³ Mapêna ei intakna khom ei insong ani, intaknân tuongdierna asuoka,

⁴ Tuongdierna'n Pathien pomna amusuoka, detna han sabeina asuok ti ei riet ani.

⁵ Ha sabeina han ei bei mindong maka, asikchu Pathien'n Ratha Inthieng renga a lungkhamna hah ei mulung sûnga a juong vura, maha eini ranga Pathien manboipêk ani.

⁶Asan rang boi ei ni lâitak han, azora taka Khrista chu mi nunsie ngei rangin a juong thi zoia.

⁷midik ranga thi chu a nuom om khet noni ngei, misa ta rangin chu tumakhat athi ngam khom an om duoi thei.

⁸Nikhomrese, Pathien'n mi lungkham tatak ti a minlang zoi, mi nunsie ei la ni lâitakin Khrista hah ei ta rangin a juong thi zoi.

⁹A thisen sika han Pathien'n dik mi juong mintum zoia, a taksina renga khom ama jârin mi sanminjôk ngêt atih.

¹⁰Pathien leh râl ei lei nia, aniatachu a nâipasal thina sikin a malngeiin mi sin zoi. Atûn chu Pathien malngei ei ni zoia, Khrista ringna sikin vângchu idôra sanminring mo ei ni rang na!

¹¹Ma mang hah nimaka, atûna inngêina mi pêkpu ei Pumapa Jisua Khrista jâra han Pathiena ei râiasân ani.

Adam le Khrista

¹²Rammuola hin mi inkhat sikin nunsie ahong lûta, nunsie sika han thina ahong om zoia hanchu rammuola mi murdi'n nunsie an sin zoi sikin, thina han mi murdi ahuom zoi.

¹³Balam aom mân khomin rammuola nunsie aom zoia, hannirese balam aom loi sikin nunsie hah nunsiea be nimak.

¹⁴Hannirese, Adam zora renga Moses zora dênin mi murdi chung a Adam'n Pathien chongpêk jômloia nunsie a tho sikin nunsie tho loi ngei chung a khom thina han racham aneia. Adam hah a la juong rangpu le mintêk ani.

¹⁵Hannirese, Pathien manboipêk hah chu Adam nunsie leh han in-ang tet mah, ha mi inkhat nunsie sika han mi tamtak an thia. Aniatachu, Pathien moroina chu alien oka male mi inkhat Jisua Khrista sika a manboipêk chu mi tamtakin an chang ani.

¹⁶Pathien manboipêk leh mi inkhat nunsie hah in-ang riek mak, mi inkhat nunsie sikin theiloi changna ahong oma, nikhomrese, mi tamtak nunsie sikin moroinân thei inchangna ahong om nôk zoi.

¹⁷Mi inkhat nunsiena sikin rammuola hin thina'n roi ajêka, hanchu, mi inkhat nanâk, Jisua Khrista sikin Pathien moroina lientak leh a manboipêka thei inchangna omngei han ringna changin inlaltakin roi la jêk ngêt an tih.

¹⁸Ma anghan, mi inkhat nunsie sikin mi murdi theiloi intum an nia, ma angdênin mi inkhat dikna sikin mi murdi dik intumin an ring thei zoi ani.

¹⁹Mi inkhat chong jômloina sikin mi tamtak nunsie an ni zoia, ha angdênin mi inkhat chong jôm sikin mi tamtak dik intum an tih.

²⁰Hanchu, nunsie apung nôk uol theina rangin balam ajuong oma, hannirese, nunsie apung nôk uolin Pathien moroina apung nôk uol ani.

²¹Hanchu nunsie chu thina'n roi ajêka ei Pumapa Jisua Khrista jâra kumtuong ringna ei man theina rangin Pathien moroina han thei intumnân roi a jêk ani.

Rom 6

Nunsiea thina le Khrista taka ringna

¹Imo ei ti rang ani zoi? Pathien moroina apung uol theina rangin nunsie ei la tho tit rang mini?

²Nitet mak! Ei ni nunsiea thisai ngei hin i-angin mo nunsiea ei la om tit thei ranga?

³Khrista Jisua han baptis chang murdi ngei chu a thina han baptisin ei omsa ti nin riet loi mini?

⁴A thina han baptis changin, ama leh phûmin ei omsa zoi, Pa'n roiinputakin thina renga Khrista a kaithoi anghan ei ni khom ringna thara ei lêng theina rangin.

⁵A thi anghan ei ni khom ama leh inzomin ei thia ma anghan ama leh inzomin kaithoiin om sâng ei tih.

⁶Nunsie suoka ei om khâi loina rangin nunsie pêt taksa hih that rangin ei miriem muruo hah Khrista leh khros chung a jêmdelin aom zoi ti ei riet.

⁷Tukhom a thiin chu nunsie sinthotheina renga a jôk ani.

⁸Hanchu, Khrista kôma ei thisân chu a kôma ringsa nôk ei tih, ti ei iem ani.

⁹Khrista hah thina renga kaithoiin a oma, thi nôk tet khâi no nih ti ei riet, thina han a chung a racham nei khâi mak.

¹⁰Hanchu a thi sikin nunsie han a chung a racham nei khâi maka, male atûn chu a ringna ha Pathien leh inzomin aom zoi.

¹¹Ha anghan, nangni khom nunsie tieng athi saiin inbe unglâ, Khrista Jisua han Pathien tieng a ringin inbe roi.

¹²Masika han, nin taksa mulungbôk jôm rangin nin takpum athithe i han nunsie hah minlal khâi no rese.

¹³Nin takpum abâkngêi khom dikloina mangruo rangin nunsie thona rangin phal no roi. Manêkin thina renga a ring nôk anghan Pathien kôm inpêk unglâ, nin takpum abâkngêi hah dikna mangruo rangin Pathien kôm pêt rangin phal let roi.

¹⁴Nunsie han nin chung a racham nei khâi no nih, balam nuoia om loiin Pathien moroina nuoia nin om zoi sikin.

Dikna suokngei

¹⁵Inmo a ni rang ani zoi? balam nuoia om loiin Pathien moroina nuoia ei om zoi sikin nunsie ei la tho tit rang mini? Nitet mak.

¹⁶Tu kôma khom nirese an chong jôm ranga an suoka nin inpêklûta thina rang raka nunsie suok mini, dikna ranga chong jômna suok mini khom nirese a chong nin jômpu suok chu nin ni ti nin riet minthâr ani, Pathien kôm dik intumna han a minlangsuok ani.

¹⁷Hannirese, Pathien chu minpâkin om rese, voikhat nunsie suok lei ni ta khom ungla, minchuna chongdik nin man, nin mulungrîl murdia nin jôm sikin.

¹⁸Hanchu, nunsie suok renga chu mojôkin nin oma, dikna suokngei nin hongni zoi.

¹⁹(Nin riet theina rangin anîngtina chong ei mang ngâi lamin ki ril ani) nin takpum abâkngei hah inthiengloina le dikloina suoka siet rangin nin lei phal ngâi anga han, atûn chu dikna suoka inthienga ring rangin hong pêk phar roi.

²⁰Nunsie suok nin ni lâihan chu dikna renga nin inkêm ani.

²¹Atûna nin inzakupi tak nin lei sin ngâi hah nin inlâp pui mo? ha ngei murdi mongna hah chu thina kêng ani.

²²Atûn chu nunsie suok renga mojôka omin Pathien suokngei nin hong ni zoi. Hanchu a kôma ringna akipphar le ânthieng kumtuong ringna hah nin hong nei zoi.

²³Asikchu nunsie sin mara chu thina ania, Pathien manboipêk rêk chu ei Pumapa Jisua Khrista leh inzomin kumtuonga ringna ani.

Rom 7

Innei roia rilna

¹Sungsuokngei, balam nin riet let sikin ki misîr rang hih riet thei nin tih. Balam han mi an ringsûng kêr mang kêng an chung a roi a nei ngâi ani.

²Dongma hah a lômpa ringsûng kêr chu a lômpa balam han akhita, hannirese a lômpa a thi inchu a lômpa renga balamin akhit hah sûtin aom ngâi.

³A lômpa ringsûngin midang a nei inchu a inre ania, a lômpa thi nûkin chu balamin akhit hah a jôk ania, midang nei khom senla inre nikhâi mak.

⁴Ma angtak han ani, ku sungsuokngei, Khrista takpum machangngei nin ni zoi sikin Balam tieng chu nin thi zoia, atûn chu thina renga kaithoia ompu ta nin ni zoi, Pathien chuonsina mangruo sa ei nina rangin.

⁵Ei miriem nina muruo nuna ei lêng lâihan chu ei ngâituina saloi Balam in anchoka han ei takpuma sin athoa, thina amintung ngâi.

⁶Atûn chu mikhit ngâipu hah ei thisan zoia, balam renga mojôkin ei om zoi, balam inziek muruo papai ang niloian Ratha balam tharin sin ei tho ani zoi hi.

Balam le nunsie

⁷Imo ei ti rang ni zoi, Balam ha nunsie mini? nitet mak! Aniatachu balam han mi min riet no rese chu nunsie hih riet no ning. Balam han “Mi ta ôi no roh” ti no rese chu, ôi hi ki riet loi rang ani.

⁸Hi chongpêk hih chuminrenna mangin sietna han ôina tamtak amin om ngâi, Balam om no rese chu nunsie hih neinun thi ani.

⁹Moton han chu balam boian ke lêng ngâia, hannirese, chongpêk hah ahong oma, nunsie hah ahong hara,

¹⁰kei chu ki thi zoia. Ringna ranga chongpêk hah kei rangin chu thina ahong ni zoi.

¹¹Asikchu sietna han chongpêk hah chuminrêna mangin mi huonga mi that zoi ani.

¹²Balam chu ânthienga, chongpêk khom ânthienga, adika asa ani.

¹³Nônchu, neinun sa han kata rangin thina amintung mini? nitet mak! nunsie hin ani, nunsie ani ti minlangna rangin neinun sa mangin kata rangin thina amintunga, chongpêk sik han nunsie hah saloina inchung uolin aminlang ani.

Ei kêra inkalna

¹⁴Balam chu rathatienga neinun ani ti ei riet, keima rêk chu athithe miriem papai nunsie suoka juor ki ni zoi.

¹⁵Ki sintho hi rietthei mu-ung ko jôtlam tho ngâi loa, manêkin ko jôt loilam sin ngâi ki ni.

¹⁶Ko tho nuom ngâilo hah ko thôn chu, balam hah asa tia jôm nîng ki tih.

¹⁷Masikin, hi sinngai hih keima a thopu ni mu-unga, nunsie keima taka om han atho ngâi ani.

¹⁸Keima miriem nina hin neinun adik reng om mak ti ki riet adik tho nuomna nei ngâi khom inlang thothei ngâi mu-ung.

¹⁹Neinun asa ko tho nuom hah tho loian, neinun saloi ko tho nuomloi hah ko tho ngâi.

²⁰Ku nuom loi ko thôn chu athopu hah keima ni khâi mu-unga, nunsie keima taka om han atho ngâi ani.

²¹Masikin, hi balam hih sin atho tit ti ki riet thei zoi, neinun asa tho ku nuom ngâi nâka, neinun saloi ko tho nôk kelen ngâi.

²²Ki miriem sîngrîlin chu Pathien Balam hah a râiminsân ngâia.

²³Nikhomsenla, ka takpuma hin balam dang sin atho tit aom ti ki riet, ama han ku mulung sung balam hah adoia, nunsiena balam ka takpuma sin atho tit ngâi suok mi min chang chien ngâi.

²⁴I anga mi Lungkham omtak mo ki nina! hi thina mi tuong rang takpum renga hih tûn mo mi sanminjôk rang ani zoi?

²⁵Pathien vaiin kêng. Ei Pumapa Jisua Khrista jârin ei Pathien minpâkin om rese. Hanchu ku mulungrîl takin chu Pathien Balam sin ko tho ngâia, ki miriem nina rêkin chu sietna balam sin atho ngâi.

Rom 8

Ratha ringnun

¹Masika han atûn chu Khrista Jisua taka om ngei rangin chu theiloi intumna rang reng om khâi mak.

²Khrista Jisua a ringna Ratha balam han sietna le thina balam renga mi sanminjôk zoi sikin.

³Miriam nina rât loina sika balamin atho thei viet loi hah Pathien'n a juong thoa, miriem taksa nunsie nina pêlin a Nâipasal hah, nunsie inbônân Pathien'n a juongtîra, miriem nina nunsie aom hah theiloi a minchang zoia.

⁴Pathien'n mahih a tho ani, taksa balama om khâiloi Ratha Balama omsai ngei, einia hin balamin aphut hah thangsuo aom theina rangin.

⁵Taksa nina balama om ngeiin chu taksa tienga neinunngei an nuoma, Ratha tienga om ngeiin chu Ratha tienga neinunngei an nuom ngâi.

⁶Taksa nina tienga neinun a nuom chu thina ania, Ratha tienga neinun a nuom chu ringna le inngêina ani.

⁷Taksa nina nuomlam han Pathien adoia ngâi, Pathien Balam ajôm loi sikin, jôm khom jôm thei ngâi mak.

⁸Masikin taksa nina nuomlam ajôm ngeiin chu Pathien râiminsân thei mak ngei.

⁹Hannirese, Pathien Ratha hah nin kôm aom tikin chu taksa nina mi nikhâi mak chôia, Ratha mi kêng nin ni zoi. Tukhom Khrista Ratha dôn loi chu ama mi nimak.

¹⁰Khrista hah nangnia aomin chu nin takpum hah nunsie sikin thi khomrese Pathien kôm dik inchang nin ni sikin nin Ratha chu a ring ani.

11 Thina renga Jisua kaithoi nôkpu Ratha hah nangnia han aomin chu thina renga Khrista Jisua kaithoi nôkpu han nin takpum athi thei hah nangnia han ama Ratha omin min ring atih.

12 Masikin, sungsuokngei, lâkâi ei dôn, taksa nina balama omloi rangin, taksa tieng khom ni sa loiin.

13 Taksa nina balamin nin omin chu nin thi ngêt rang ani, nikhomsenla nin taksa nunsie sintho ngei hah Ratha'n nin thatin chu ring nin ti.

14 Pathien ratha iruoi ngei kaichu Pathien nâingei an ni.

15 Nin Ratha chang hah ichia om nôk ranga suokngei nina Ratha nimaka, Pathien nâingei nina Ratha kêng nin chang, ha ratha sinthotheina jâra han "Abba! Pa!" tiin Pathien kôm ei koi ngâi ani.

16 Ma Ratha nanâk han ei Ratha leh inzômin Pathien nâingei ei ni tiin amin rieta.

17 Hanchu, a nâingei ei nînchu a rochon luopungei Pathien rochon luopu ngei Khrista luopu ngei ei ni, Khrista tuongna ei tuongpuiin chu a roiinpuina khom ei changsa ngêt rang ani.

Sûnmotona roiinpuina

18 Atûn lâia tuongna ngei hih chungsa roiinpuina inlanga la om rang lehan mintuk zatin be mu-ung.

19 Neinun sin murdi ngeiin Pathien nâingei hong inlang rang zora an ngâklal tatak ani.

20 Neinun sin murdi ngei hah an nuom sika niloiin Pathien nuom sikin mangmunboi ni rangin heng an ni zoi, nikhomsenla, sabei rang ala om.

21 Neinun sin murdi ngei khom nikhuo khat chu sietna suok renga mojôkin la om an ta, Pathien nâingei zalenna roiinpui hah la koppui an tih, ti sabeina hah ani.

22 Neinun sin murdi ngei hah atûn tena nâiha na inrûm anga inrûm ti ei riet.

23 Maha vai niloiin ei ni Ratha mara chang masapu ngei khom hih a nâingei mi minchang rang zora ei takpum minjôk rang ngâklalin ei inrum ani.

24 Ma sabeina han kêng min ringin ei oma, nikhomsenla, mu thei tit sabeina hih sabeina tatak nimak, ei mu thei tit hah i angin mo ei la sabei tit ranga?

25 Ei muloi hah ei sabeiin chu tuongdiertakin ei ngâk zajâm ngâi ani.

26 Ma angdênin, Ratha'n ei rât lolina mi san ngâia, i anga chubaitho rang mo ei nâng khom riet mak meh, nikhomsenla, Ratha han inrûm misîr thei loiin chubai mi thope ngâi.

²⁷Mi mulungrîl bôkna rietpu Pathien'n chu Ratha bôkna a rieta, asikchu Ratha'n chu Pathien a mingei ruthûlin ama nuomlam takin a ngên pe ngâi.

²⁸Hanchu Pathien'n lungkham a mupu ngei chu, a mintuo anga a koi ngei rangin chu an satna rangin neinuntin a thope ngei ngâi ti ei riet.

²⁹Pathien'n a lei thangsai ngei hah ama nâipasal angin om rangin a lei mintuma, masikin a nâipasal chu urêng tamtak kêra nâi lutîrtak ni theina rangin.

³⁰Hanchu, Pathien'n a lei thangsai ngei hah a koia, a koi ngei chu dik a mintuma, dik intum ngei chu a roiinpuina a semsa ngei ngâi ani.

Khrista jâra Pathien lungkhamna

³¹Ma roia han imo ei ti rang ani zoi? Pathien eini tieng a kop inte tumo mi doi thei ranga?

³²Nitet mak, Pathien'n a Nâipasal luo manar loia ei rênga ruthûla pêkpu han neinun dang murdi khom manboiin mi pêk sa noni mo?

³³Pathien'n a thangsai mingei hah tûn mo a rilminsiet ngam ranga? adik mintumpu hah Pathien ani sikin.

³⁴Tu ngânin mo theiloi a mintum ranga? a thi hah Jisua Khrista ania, a thina renga ânthoinôka Pathien changtieng omin mi chongpepu hah ama nanâk kêng ani.

³⁵Khrista lungkhamna renga chu tûnmo mi sensâi thei ranga? Injêlna ngei mo? intakna mo, nuomlona mo, vonchâmân mo, inriengnân mo, chi omna mo? nôncu thina'n mo, mi sensâi thei rang mini?

³⁶Pathien lekhabun, “Nangma jârin zoratin thina rang chi-omin kin oma, Belri that rang toto, anga bên kin om ani hih,” ati anghan.

³⁷Nithei no nih, ha ngei murdi renga han lungkham mi mupu sikin roiinpui taka azoipu ngei ei ni.

³⁸Thina khomin, ringna khomin, vântîrton khomin, invâna rachamneina khomin, neinun aomsai le ala hong om rang khomin, sinthotheina khomin,

³⁹insângna khomin inthûkna khomin, neinun sin dadang ngei khomin, ei Pumapa Khrista Jisua a om Pathien lungkhamna renga chu mi sensâi thei no nih, ti ki riet minthâr ani.

Rom 9

Pathien le a mingei

¹Chong diktak ki ril ani; Khrista taka kini milak ril mu ung. Ki sielesarietna Ratha Inthieng ruoina han khom milak tho mu ung ti mi minthâr ani.

- ²Ku mulung dûktongna lientak le mulung nanah boitheilo ko dôn tie ki ti zora hin,
- ³Ki mingei, taksa tienga ki richibulngei ruthûla hin Pathien khomaksâmin Khrista renga minsenin om inlang chu ku nuom ngâi.
- ⁴Pathien mingei an nia, aman a nâingeiin a sin ngeia, an kôm a roinpuina ngei a minlanga; chonginkhitngei a sinpui ngeia male Balam ngei a pêk ngeia; Sava diktak an dôna; Pathien chonginkhâmngei an man ani;
- ⁵Richibulngei inthang tak Hebrew jâisuon an nia, taksa tieng roia chu Khrista reng khom hah an rûia mi ani. Jâtin chung roijêkpu Pathien chu tuonsôtin! minpâkin om rese, Amen.
- ⁶Pathien chonginkhâm hah ite asena ommak ki tina ni riek mak. Israelngei nâm hah anrêngin Pathien mi ni zit mak ngei.
- ⁷Abraham richi murdi khom anrêngin Pathien nâingei ni let uol mak ngei, "Isaac hin nu rûi isûi nîng atih," Pathien'n a ti pe ani.
- ⁸Ma hah taksa lama a nâingei hah Pathien nâingei nimak ngei, chonginkhâm nâingei hah kêng Abraham richi diktaka be an ni tina ani.
- ⁹Pathien chonginkhâm hah mahi ani "Azora taka juong nôk ka ta, Sara'n nâipasal nei atih," ti hi.
- ¹⁰Ma vai hah nimaka, Rebecca han ei richibul Isaac renga nâi inphîr a neia.
- ¹¹⁻¹²Nâite ngei an la suok mân, asielesa an tho thei mân Pathien'n a lungdo angin inkhat lam a thang ani ti ânlang. Sintho sik ni loiin a koipu lungdo sikin Rebecca kôm, "A ulienpu'n nâipangpu sin thông atih", Pathien'n a ti hah.
- ¹³Pathien lekhabu'n, "Jacob ku lungkhama, aniatachu Esau chu ke heng," ati anghan.
- ¹⁴Hanchu, imo ei ti rang ani zoi? Pathien han dik zoi loina aom mini? Nitet mak.
- ¹⁵Ama han Moses kôm han, "Ku nunuom moroi ka ta, ku nunuom chung inriengmu ki tih a ti anghan."
- ¹⁶Masikin, miriem nuom sika le sin tho sika niloiin Pathien inriengmuna sikin kêng ani.
- ¹⁷Pathien lekhabu'n Pharaoh kôm, "Ki sinthotheina ki minlang theina rang le rammuol pumpuia ki riming ânthang theina rang pielin rêngin nang ku phun ani," a ti.
- ¹⁸Ma anghan Pathien'n a nuom kai inriengmuna a neia, a nuom kai a mulung a minngar ngâi ani.

Pathien taksina le inriengmuna

¹⁹Ma anghan aninte, “Pathien'n irangin mo mi a lei dem tit rêka? A lungdo hah tumo a makhal theia?” mi nin ti thei.

²⁰Hannirese, O miriem, Pathien makhalpu hah tumo ni ni? bêlpil han a sinpu rekel ngâi mak, “Irangin mo hi anghin mi ni sin?” ati rang mini?

²¹Bêlpil tangkhat renga bêl a lut uol, anem uola sin rangin bêl sinpu han bêlpil chung a racham a dôn nimak mo?

²²Ma anghan Pathien'n a tho ngâi, a taksina le a sinthotheina minlang nuom khomrese, a taksina changpu bêl inmang kelen ruo ngei chu a tuong zajâma.

²³Hanchu, a inriengmuna bêl a roiinpuina chang ranga a minsûk, eini ngei kôma hin a roiinpuina tamtak a juong vur ani.

²⁴Ma anga bêl ngei hah eini Judangei lâia vai niloiin Jentailngei lâi renga a koi ngei khom ei ni sa.

²⁵Hosea lekhabua, “Ki mi ni ngâi loi ngei hah
'ki mingei' tîng ka ta. Lungkham ku mu ngâi loi nu hah
'Lungkhamnu' tîng ki tih.

²⁶'Ki mingei nimak chei' a tina mun lelê han Pathien a ring nâingeiin ibên om an tih,” tia a lei misîr anghan.

²⁷Isaiah khom han Israelngei chong hêt puiin “Israelngei hah tuikhangliena sietsai dôr tam khomrese ngei, mi tômte kêng sanminringa om rang an ni.

²⁸Pumapa'n pilchunga a roijêkna rang hah a jêk kelen rang sikin,” a ti hah.

²⁹Isaiah nanâkin, “Pumapa Râtinchung han suonpâr mi lei hôih pe no rese chu, Sodom anghan nîng ei ti zoia. Gomorrah angta kin nîng ei ti zoi,” tia a lei ril anghan.

Israel le Thurchisa

³⁰Imo ei ti rang ani zoi? Jentailngei, Pathien taka dikna zong loi ngei hah taksônna sikin dik an hong intum zoi ani.

³¹Balam jôma adik chang rang bôk Pathien mi Israelngei hanchu balam angta kin dik chang makngei.

³²Itho sikin mo? Taksôn nân minngam loiin sintho nân an zong sika ani. Masikin “Inpalna rang lunga” an inpal zoia.

³³Pathien lekhabun, “En roh! Keiman Ziona han lungpui ka dara mahan mingei minpal a ta, ma lungpui han minlet ngei atih. Tutu khom ama iem murdi'n chu mâimôkinshakin om noni ngei,” tia inziek anghan.

Rom 10

¹Ku sungsuokngei Israelngei chu sanminringin om rese ngei ti hih ku nuom tak le Pathien kôma ki ngên ngâi tak ani.

²Pathien tieng ningsietakin an om ti ki riet, aniatachu an inpêkna hah rietna diktaka inngam nimak.

³Pathien'n mi dik a minchang lam hah riet theiloiin anni an lampui an jûi ngita, Pathien'n dik a min changna balam nuoia han inpêklût nuom mak ngei.

⁴Khrista chu Balam murdi mongna ania, a iem murdi chu Pathien kôm dik intuma an om theina rangin.

Mi murdi ranga sanminringna

⁵ Moses han Balam jôm sika dik changna thurchi hi anghin a miziek, “Balam chongpêk a jômpu chu ring atih,” ti.

⁶Taksônna sika dik changna thurchi rek chu, “Tumo invâna kal ranga?” (Mahan tumo chungtieng renga Khrista hong ruoi rang tina ani)

⁷Tumo pilrîla juong se ranga? (thina renga tumo Khrista hong ruoi rang, tina ani) nin mulungrîlin ti no roi, a tia.

⁸Hanchu imo a ti? “Pathien chong han, nu mûr le nu mulungrîla nang anâi ani,” ma taksônna chong hah kin misîr ani.

⁹Na mûrin Jisua hah Pumapa ani tiin nu phuonga, thina renga Pathien'n a kaithoi ti nu mulungrîlin ni iemin chu sanminringin om ni tih.

¹⁰Mulungrîla taksôn chu dik minchang an nia, mûra thop chu sanminringin an om sa ngâi.

¹¹Pathien lekhabun, “Tukhom ama iem murdi chu mâimôkinshakin om no ngei,” a ti ani.

¹²Juda le Jentialngei hah ite lei teina dôn mak ngei, Pumapa inkhat hah anrênga Pumapa ania, Ama ralam ngei kai chu sat a vur ok ngâi.

¹³Pathien lekhabun, “Tukhom Pumapa riming ralam ngei murdi chu sanminringin om an tih,” ati anghan.

¹⁴Nikhomsenla, an iem loi hah i angin mo an ralam thei ranga? An rietloi hah i angin mo an iem thei ranga? Thurchi misîrpu omloiin kho angin mo an riet thei ranga?

¹⁵Itîr niloiin kho angin mo thurchi an misîr ranga? Pathien lekhabun Thurchi Sa hong mintungpu ngei chu en ahoi bâk na! ati anghan.

¹⁶ Hannisenla, Thurchi Sa hah anrêngin chu pom let mak ngeia, Isaiah reng khomin, “Pumapa kin chongril tumo a iem?” a ti ani.

¹⁷Ma anghan, taksônna hah chong riet sikin ahong oma, chong rietna hah Khrista thurchi misîrna sikin ahong om ngâi.

¹⁸ Hanchu, thurchi an riet loi tatak mini? an riet ngêt Pathien lekhabun, “An rôl miring hah ramtina ânthanga; An thurchi hah kôlkung dênin ânthang suo zoi,” ati anghan.

¹⁹ Hanchu, Israelngeiin an riet loi mini? amotontaka Moses rengin “Nama telkhâloi ngei hah nangni min narsa ka ta; Nam inmôlngei sikin nin takminsi ki tih,” a lei ti ani.

²⁰ Isaiah'n hâi uolin, “Mi rok loi ngeiin min mua, mi ralam loi ngei kôma kên lâ,” a lei ti sa.

²¹ Hannirese, Israelngei chungroia chu, “Hedonloi ngei le inhel mingei modôm rangin suntuonin ka bân ka phar ngâi,” a ti.

Rom 11

Israelngei chungra Pathien inriengmuna

¹ Hanchu, Pathien'n a mingei a hengpai mini? Nitet mak, keima reng khom hih Israel mi, Abraham richi Benjamin rûia mi ki ni.

²Pathien'n aphuta a thang, a mingei hah paiphar mak. Pathien lekhabun Elijah roi a misîr hah imo a ti nin riet. Ama han Israelngei chungroi Pathien kôm a mintunga.

³“Pumapa ne dêipungei an thata, na mâichâmngai an misima; Keima vai kêng ko om zoi. Keima khom hi mi that rang an bôk,” tiin.

⁴ Hannirese, Pathien'n, “Baal makunga khûk lân bil ngâiloi mi isâng sari ka ta rangin ka la dar tit ani,” tiin a thuona.

⁵Ma angdênin atûn hin khom Pathien'n a moroina sika a thangsuok ngei pâl atômte an la om.

⁶A moroina sika a thangsuok anni an sintho sika nimak, ma anghan aninônchu moroina hih moroina tatak ni thei no nih.

⁷Imo ei ti rang? Israelngeiin an rok hah man mak ngeia, Pathien thang atômte ngei vaiin an mana, midang ngei murdi chu Pathien koina han an sêt suo zoi.

⁸Pathien lekhabun, “Pathien'n avien sîn tena an mindonna le an mulungngai a min môl pea, an mua an riet thei loina rangin a ti anghan.

⁹ David khomin, “An ruolhoi thona bukhalâi hah châng le in ôkna chang senla, An inbana le an khitrui chang rese.

10An mu theiloina rangin an mit hong jîng senla, an intakna puokrikin del ngei tit rese,” a tia.

11Hanchu an inba sikin an inluoi phar rang mini? Ni mak! an inpal sikin Jentailngei kôma sanminringna a juong tung ani. Judangei narsana rang ani.

12Ha anghan, Judangei an inpalna man rammuol neina ania, Judangei ratha tienga an insamna man hah Jentailngei neina a ninte, Judangei an hong kip tena vâng chu idôra satvurna mo a ni rang ani zoi.

Jentailngei sanminringna

13Ha anghan, nangni Jentailngei kôm ki ti ani, Jentail tîrton ki ni anghan ki sinthona hih ki minlût ani.

14Ki mingei nangni ki min narsa senkhat luo ka sanminring thei ngêt na rangin.

15An hengpai lâihan rammuol ta ranga Pathien leh inngêi nôkna aninte, an pom nôkna tenah inmo ani rang? Maha thina renga ringna nîng atih.

16Vâipôl hâr ât masatak han Pathien kôm pêk minthieng anînchu apumin pêk minthieng ani. Hanchu thing khom a ruzung ânthienga anînchu amachangngei khom an inthieng ani.

17Olive thing machang senkhat tanpaiin, nangni ram olive, an lâia zomin nin oma, ruzung asa hah nin inzompui zoi ani. Nangni Jentailngei hah ram olive angin nin nia, male atûn chu Judangei ratha râtna tienga ringna hah nin insepui ani.

18A machang dangngei chung a insong no roi, insong khom unglâ, aruzung vâipu nimak chei, aruzungin kêng nangni avâi ani.

19Hanchu, nangman, “Zoma ko om theina ranga amachangngei hah thâk kêng an ni,” tîng ni tih.

20Ani, an iem loina sikin thâkin an oma, nang chu na taksônna sikin zom ni ni, inpâk nônlâ, manêkin chi roh.

21Pathien'n amachang taktak angati Judangei luo a manar nônchu nang khom nang manar uol no nih.

22Masikin, Pathien sa tie le chi aomtîe ei mua, ânpal ngei ta rangin chu chi a oma, a satna no omtitin chu nangma ta rangin chu asa ani. No omtit nônchu nang khom thâkpai sa nîng ni tih.

23Male, Judangei khom an iemloina an maka anînchu zomin la om nôk an tih, Pathien'n a zom nôk thei sikin.

24Nangni Jentailngei, ram olive machang renga thâkpai luon olive thing bâk sa taka inzomin nin om inte, nangni Judangei, olive thingkung diktak amachangngei azom chu Pathien rangin abai pe uol ok rang ani.

Mi murdi chung a Pathien inriengmuna

- ²⁵Ka malngei hi chong inthup hih nin riet rangin ku nuom ani, aninônchu avâr intum nin tih. Isreal mingei tukdullienna hah aomjêt rang nimak. Aniatachu Jentailngei hah Pathien kôma an hong kipphar tena rang vai ani.
- ²⁶Hanchu, Israelngei murdi sanminringin om an tih. Pathien lekhabun, “Zion renga Minringpu hah juong a ta, Jacob jâisuonngei renga puoloinangei minboi atih.
- ²⁷Mahih an kôma ko chongkhith rang chu ani, An nunsienangei ka lâk pai tika chu,” ati anghan.
- ²⁸Thurchi Sa an hengpaia, nangni sikin Judangei chu Pathien râl an ni. Pathien'n a thang ngei na mindonin chu an richibulngei sikin a champui lungkhamna ngei an ni.
- ²⁹Pathien'n mi athangna le sat a vurna lama a mulungrîl thûl ngâi mak.
- ³⁰Tienlâi han chu nangni Jentailngeiin chu Pathien chongjôm mak cheia, atûn chu Judangeiin an jômloina sikin a moroina nin chang zoi ani.
- ³¹Ma ang nanâk han, atûn nang nin moroina nin chang sikin Judangei khomin Pathien moroina an chang sa theina rangin atûn hin chu chongjômloia om an ni.
- ³²Asikchu anrênga chung a inriengmuna a minlang nuom sikin Pathien'n mi murdi chongjômloina a khum zit ani.

Pathien minpâkin om rese

- ³³Pathien neina ngei chu idôra roiinpui mo! a vârna le a rietna khom idôra ânthuk mo! tûn mo a roijêk a rilminthâr thei ranga? tun mo a lampui a riet thei ranga?
- ³⁴Pathien lekhabun: “Tun mo Pumapa mulungrîl rieta? Tu mo rilna a pêk thei ranga?”
- ³⁵Tumo a kôma lâkâi amin tanga, tumo a kôm renga a man nôk rêk ngai?” ati anghan.
- ³⁶Asikchu neinun murdi hih ama sin ania, ama sika hong om le ama ta riempet ani. Pathien kôma tuonsôtin inlalna chu om rese! Amen.

Rom 12

Pathien chuonsinna ringnun

- ¹Masikin ka malngei, Pathien inriengmuna lientak sika hin inbôlna ring le inthieng leh a khôktheiruo ni rangin nin takpum hah Pathien kôm pêk rangin nangni ki ngên ani. Maha nin biek rang lampui diktak chu ani.

²Hi rammuol omlam anghin om no unglâ, Pathien lungdo asa le a khôktheiruo le asakipdir ngei hah nin riet minthâr theina rangin nin mulungrîl minthara omin hong tei ta roi.

³Pathien'n mi pêk moroina neinunpêk sika hin nangni ke ngên ani. Nin kêra tute rangâiinlut rai om no roi. Manêkin, Pathien'n mitin kêma taksônna a pêk angtakan intukpui chit mulungrîl pêl roi.

⁴Takpum inkhata amachang tamtak ei dôna ha amachangngei sintum hah aom chit.

⁵Ma angdênin, eini khom tamtak ni khom inla, Khrista leh takpum inkhat ei nia, ei rêngin takpum abâk anga ânzom chit ei ni.

⁶Masikin Pathien moroina mi pêk angtaken hin manboia pêk adang dang ei chang chita. Pathien chongril rang anînchu ei taksônna dôn angtaken hin misîr ila.

⁷Sintho rang anînchu ei sinthona hin inpêk ngit ila, mi minchu rang anînchu minchu ngit ila.

⁸Mi mohok rang anînchu mohok ngit ila, neinun pêkpu'n phaltakin pêk senla, rachamneipu han takintaitakin tho senla, mi lungkhamu khomin râisântakin lungkham rese.

⁹Lungkhamna chu a rothol koploin nirese. Asie hah mumâk unglâ, asa ha chu mutu tit roi.

¹⁰Khristien sungsuokrêng angin inkhat le inkhat inlungkham inlôm unglâ, mirit inlômna minlang rang jôt tit roi.

¹¹Sinthona lama ningsiet unglâ, nin ratha minboi no roi. Mulungrîltakin Pumapa sin tho roi.

¹²Nin sabeina han nin râiminsân senla, intaknangei nin tuong khomin dier unglâ, zora tina chubai tho ngâi roi.

¹³Nin Khristien champui ngei insamna nin neinun insan unglâ, nin ina khuolmi mintung ngâi roi.

¹⁴An nuom nangni lo ngâi ngei hah khomaksâm loia satvur ngei rangin Pathien kêma ngên roi.

¹⁵A râisân ngei râiminsân pui unglâ, a chap ngei chappui roi.

¹⁶Mindon munkhatin om unglâ, insong no roi rangâiinchîn mingei leh ruol inchang roi. Nin thetheiin avâr intum no roi.

¹⁷Mingeiin nin chungâ an sin minchâina sietna nanâkin thuan no roi. Mi murdi ranga asa hah tho rang pût roi.

¹⁸Mi murdi leh inngêia lêng theina rangin bôk ngit roi.

¹⁹Ka malngei, phuba lâk tet no unglâ, manêkin Pathien taksina han tho rese. Pathien lekhabun, “Phuba murdi chu keiman ka lâk rang ani, Keiman thvon ki tih, Pumapa'n a ti”, ati anghan.

²⁰Manêkin, Pathien lekhabun ati nôka, “Na râlngei an vonachâmin chu sâk rang pêk ngei inla, an tui ân râlin chu an nêk rang pêk ngei roh, ha anghan no thvon chu ni min zak ngei ok rang ani.”

²¹Sietnân motorin om nôla, manêkin nangman sietna hah motorin satnân zoiin om roh.

Rom 13

Rachamneingei chungâ sintumngei

¹Mitinin an chungâ rachamneipungei chong an jôm ngêt rang ani. Pathien'n a phun ni nôchute tute rachamneipu om ngâi mak ngei, atûnlâia rachamneipungei khom hih Pathien'n a phun an ni.

²Masikin, tukhom rachamneipu adoipu chu Pathien aphunpu an idoi ani, adoipu ngei han an chungâ roijêkna tung atih.

³Roijêkpungei hah neinun dik thovu ngei rangin chu ichi om mak ngeia, neinun dikloi thovu ngei ta rangin chu ichi an om ani. Rachamneipungei chi loia om nu nuom mo? Neinun dik tho inla hanchu nang minpâk an tih.

⁴Na satna ranga Pathien tirlâmngei kêng an ni. Hannirese, neinun dikloi no thvon chu chi roh, khandai hah an chôi papai nimak kêng. Pathien tirlâmngei an nia, neinun dikloi tho ngei chungâ taksia dûkmintongpu ngei an ni.

⁵Masikin, Pathien dûkmintongna chi sik vaiin niloian, ni sielesarietna sik khomin rachamneipungei chong no jôm ngêt rang ani.

⁶Masika han kêng choiruol nin chôi ngâi, rachamneipungei han an sintum asân an thvon chu Pathien sin an tho kêng ani.

⁷Pêkna rang murdia pêk roi, pilman pêk rang anînchu pêk unglâ, mimala le neinun man chôi rang anînchu chôi unglâ, miritna le minlalna minlang pe ngei roi.

Urêng lungkhamna

⁸Lungkham inmu inlômna ti loian chu tute kôm ite intâng no roi, ei miriem champui lungkhampu han Balam a jôm mikhip zoi ani.

⁹Chongpêkngai, “Inre no roh, mi that no roh, inru no roh, mita ôi no roh,” ti ngei le chongpêk dang ngei murdi hih, “Nangma nêl lungkham angin nu bunga mingai lungkham roh,” ti hin akaikhôm zit ani.

¹⁰Mi nu lungkhamin chu an chung a asaloï tho tet no tinia, lungkhamna chu Balam pumpui jôm mikhipna ani.

¹¹Atûnlâi neinun omtie nin riet sik le a in ngei inthoi zora ani tatak zoi ti nin riet sikin maha ki ril ani, atûna hin chu ei iem phut lâia nêkin chu ei sanminringna hah anâi uol zoi.

¹²Jân hih ase ok zoia, khuovâr rang kêng ani zoi. Masikin ajîng sintho ngei hah mong ei ta a avâra indoina râlvovôn invo ei ti u.

¹³Sûna om ngâi mingei angin enhoitakin om ei ti u, junêk omhoina le jû inruiin om loiin hurindit le inditnasaloï songloin, insuol le innarsân khom om loiin.

¹⁴Pumapa Jisua Khrista râlvovongei hah lâk unglâ, nin taksa nunsie nina ôina saloi ngei thangminsuo rang bôk no roi.

Rom 14

Midangngei jêk no roh

¹ Hanchu taksônna tienga râlvovon mingei chu anthena an mindona hah dem loiin môdôm ngei roh.

² Mi senkhatin an taksônna han jâtin sâk thei rangin a phal zoia, aniatachu taksônna râlvovon mi han chu ansûl vai a sâk ngâia.

³ Jâtin sâk thei mi han a sâk loi mi hah dem no rese, a sâk loipu khom han a sâkpu hah jêk no rese, Pathien'n ama hah a khôk kêng ani zoi.

⁴ Midang tîrlâm jêkpu hah tumo ni ni? Ânding indetin mo, ânletin mo, a mindon rang chu a pu ani. Inding det ngêt atih, Pumapa a minding mindet thei sikin.

⁵ Hanchu, mi senkhatin nikhuo khat hah nikhuo dang nêkin a mindon minlut uol ngâia, mi dangin chu nikhuo murdi an angnatin a be ngâi. Mitinin ama mindon lam diktak nei chit rese.

⁶ Nikhuo khata aseruolpu han Pumapa chôiminsangna rangin a ser ani, jâtin sâkpu han Pathien kôm râisânchong a ril baka a sâk ani sikin Pumapa a chôiminsang ani. A sâk loipu khom hah Pathien kôma râisânchong a ril sa nôk sikin Pumapa chôiminsangna rangin a ngêi ani.

⁷ Tute eini ta ranga vaia ring nimak mea, tute eini ta ranga vaia thi khom nimak me.

⁸ Ei ringin chu Pumapa ta ranga ei ring ania, ei thi khomin Pumapa ta ranga ei thi ani. Masikin ei ring khomin ei thi khomin Pumapa ta ei ni.

⁹ Masikin, mi ring le mi thi Pumapa ani theina ranga Khrista hah a thia, a ring nôk zoi ani.

10 Hanchu, nangma ansûl riempet sâkpu'n irang mo midangei ne jêk? Nônchu, nangma jâttin sâkpu irang mo iempu dangngei ne dema? Pathien roijêkna makunga ei rêngin ei lân ding pak rang kêng.

11 Pathien lekhabun: “Adiktakin Keima hi Pathien ring ki ni, Pumapa han a ti, mi murdi ka makunga an minkhûk lân bil pak an ta, Male mitinin keima Pathien ki ni la Phuong an tih,” a tia, ânziek anga han.

12 Ma anghan, ei rêngin Pathien makunga ei thurchi ei la misîr pak rang ani.

Na lâibung minba no roh

13 Masika han inkhat le inkhat injêk inlôm khâi no roi. Manêkin na lâibung nunsie mo, inbana mo a tho tet loina rangin no bôk rang ani.

14 Athei mamangin chu ânthiengloi neinun ite ommak ti Pumapa Jisua leh kin inzomna hin ki riet minthâr ani. Nikhomsenla, neinun senkhat chu ânthiengloi iempu rangin chu ânthiengloi ani.

15 Na sâk sâk sikin na lâibung mo na sarnu mo, mulungrîl ahoi nônchu lungkhamna lampui nu jûi khâi loi ani. A thi sika Khrista a thi pe hah na sâk sâk sikin minsiet no roh.

16 Masikin ninta ranga asa anga nin mindon hah ril min sietin om no rese.

17 Asikchu Pathien Rêngam chu sâk le nêk roi nimaka, Ratha Inthieng jâra diknangei, inngêina le râisâna ngei kêng ani.

18 Tukhom ma anga Khrista sin tho chu Pathien râiamisâna male midangngei pomna khom a chang ngâi ani.

19 Masikin, inkhat le inkhat inngêina rang le min râtna rang ngei hah ei rujûl tit ngêt rang ani.

20 Na sâk sikin Pathien sintho siet no roh. Sâk murdi sâk thei ania, hannirese midang nunsie minchâina ranga sâk chu sa mak.

21 Na lâibungngei le na sarnungei inbana rang anînchu me ngei, jû ngei le neinun dadang ngei angêi hih asa uol.

22 Ni iemna hah iem chien roh, Pathien le nin kongkâra ama iemna lama theiloi intum loi chu satvur an ni.

23 Hannirese tukhomin mulungokcha pumin a sâkin chu a taksôn lam niloi a tho ani sikin Pathien'n theiloi a mintum ani. Male i-ih neinun khom taksônna chungâ anngam loi hih chu nunsie ani.

Rom 15

Eini niloii midangngei râiminsân rang

¹Eini taksôna taka râtngêi hin eini râisâna rang rok loiin, râtloi ngei râtloina han ei san ngei rang ani.

²Manêkin taksôna ei phun mindet theina rangin iempu dangei râiminsânin anni ranga neinun sa hah ei tho rang ani.

³Asikchu Khrista khom ama râisâna rok maka. Pathien lekhabun, “Nang êro ngei êrona hah ku chung a achul zoi,” ati anghan ani.

⁴Pathien lekhabun apêk ngâi sabeina renga tuongdierna le mohôkna ei nei theina rangin Pathien lekhabua lei inziek ngei murdi hah ei inchu rang ani.

⁵Khrista Jisua nin jûi anghan nin lâia inngêina ratha han tuongdierna le mohôkna hah Pathien'n nangni min dôn senla.

⁶Hanchu, nin rêngin rôlûm khatin ei Pumapa Jisua Khrista Pa le Pathien hah nin minpâk thei rang ani.

Jentailngei ranga Thurchisa

⁷Pathien roiinpuina rangin Khrista'n nangni a pom angin inpom inlôm chit roi.

⁸Nangni ki ril, Pathien taksônomna minlangnân an richibulngei kôma a chonginkhâm tuontungin Khrista hah Judangei ruthûlin sinthopu'n a juong oma,

⁹Jentailngei khomin a moroina sika Pathien an minpâk theina rangin. Pathien lekhabun: “Masikin Jentailngei lâia nang minpâk ka ta, Ni riming minpâkin uoi ki tih,” ati anghan.

¹⁰Ati nôka, “Jentailngei Pathien mingei leh râiminsân roi”, ati sa.

¹¹Male, “Nangni Jentailngei murdi, Pumapa minpâk roi; Mingei murdi khomin minpâk rese ngei!” ati nôka.

¹²Male avêlin, Isaiah khomin, “Jesse jâisuon la hong inlang a ta; Jentailngei chung a inlal rangin la hong om a ta, Ama chung a han an sabeina minngam an tih,” a tia.

¹³Ratha Inthieng sinthotheina jâra sabeina nin sip theina rangin sabeina nâr Pathien han ama nin taksôna sikin, râisâna le inngêinangei nangni minsônpe bang rese.

Paul'n hâitaka lekha a miziekna abi

¹⁴Ku sungsuokngei, nangni hih satna akip, rietna murdi dônna, inril inlôm thei rang nin ni tiin tak ko sônchet ani.

¹⁵Nikhomsenla, neinun senkhat nangni min riet nôk rangin hâitakin ma lekha hih ki miziek ania, Pathien'n mi pêk moroina sikin

¹⁶Jentailngei sinthopu rangin Khrista Jisua tîrlâm ki ni. Jentailngei hah Ratha Inthiengin minthienga Pathien inbôlna ringa khôktheiruo min ni ranga Thurchi Sa misîrna hin ochai angin ki sin ani.

¹⁷Masikin Khrista Jisua leh inzomin hima Pathien sinthona hin insongna ke dôn thei ani.

¹⁸Jentailngei ruoia Pathien chong min jômna rangin Khrista'n sintho le chongrilin keima mi manga, a sinthongei pêna chu ite dang ril ngam no ninga,

¹⁹sininkhêlgei le sin kamâmruoingei, Pathien Ratha sinthotheina han mi manga, masika han Jerusalem le akôl revêla ram renga Illyricum dênin Khrista Thurchi Sa chu ku phuong let zoia.

²⁰Midang lungphôm chungu sinminding ki ni loina rangin Khrista la riet loina muntina Thurchi Sa phuong hi ku lungdo ani.

²¹Pathien lekhabun: “A thurchi la rilna ngâi loina mingei han mûng an ta, A koura la riet ngâi loingei han riet an tih”, tia ânziek anghan.

Paul'n Rom khopuillen vapan rang a bôk

²² Masika hah kêng ani, nin kôma hong rang ki minchâi titna ngâi.

²³Aniatachu, atûn hin hi ram revêla hin chu ki sintho ko zoia, kum tamtak nangni hong mu rang ke lei nuom ngâi anghan.

²⁴Spain rama se malamin nangni hong mu rang ko bôk ani. Chomola nangni le inlopkhôm zoiin, nangni sanna renga ka panna rang mun tieng se thei rangin ka sabei ani.

²⁵Atûntak hin chu Pathien mingei sintho rangin Jerusalema la sêng ki tih.

²⁶Macedonia le Achaia rama koiindang mingei han phaltakin Jerusalema Pathien mingei kêra inriengngei rangin chôiruol an tho sikin.

²⁷Inphaltaka an tho ani, aniatachu an kôma an intâng sa piel khom ani. Asikchu, Jentailngeiin ratha satvurnangei Judangei an insempeiin chu rammuol neinun satvurna tieng khomin Jentailngeiin Judangei san rang anâng ani.

²⁸Ma hah ko tho zoiin, an sum ngei an kôm ka bâng let zoiin Spain rama se rangin nangni la hong lût ki tih.

²⁹Nin kôm ko hong tika chu Khrista satvurna akipin hong ki tih ti ki riet.

³⁰Sungsuokngei, ei Pumapa Jisua Khrista le Ratha pêk lungkhamnân Pathien makunga chubai mi nin thopui tatak ngâi rangin nangni ki ngên.

³¹Judea rama iemloingei kut renga ko jôk theina rang le Jerusalema ki sintho hih Pathien mingei khôktheiruo ani theina rangin chubai mi thope roi.

³²Pathien'n asa a tiin chu râisâna sipmata nin kôm ko hong a ei har inruol theina rangin.

³³Atûn inngêina Pathien hah nin rênga nin chung a om rese, Amen.

Rom 16

Mimal chibaimûknangei

¹Ei sarnu Phoebe Cenchreae koiindang mingei sinthonu hih a mêl nangni min riet ku nuom.

²Pumapa rilinga Pathien mingei anga nin lei modômna rang le asan anângna tinah nin lei san theina rangin. Ama reng khom hi mi tamtak lei san ngâi ania, keima reng khom mi lei san ngâi ani.

³ Priscilla le Aquila, Khrista Jisua chuonsinna ki sintho champui ngei hah lei chibai roi.

⁴Anni han ki ringna minjôkna rangin an ringna tena lên phala an chung a ka râisân sabak ani, keima vai niloiiin Jentail koiindang murdi khom an chung a an râiasân ani.

⁵An ina koiindang inkhôm ngâi ngei hah chibai mi mûk pe sa roi. Asia rama Khrista lei iem masatak ka mal Epaenetus hah chibai mi lei mûk pe roi.

⁶Mary ninta ranga sin dûktongnu hah lei chibai roi.

⁷Andronicus le Junia, ku Juda champui le intâng ina ke lei lûtpuingei hah mi lei chibai pe roi. Ma ngei hah tîrtonngei riming inthangtak le keima nêka Khrista lei iem masa an ni.

⁸Ampliatu, Pumapa taka ku ruol miditom hah mi chibai pe roi.

⁹Khrista chuonsinna kin sinthopui Urbanus le ku ruol miditom Stachys hah mi chibai pe roi.

¹⁰Khrista mi tatak ânthârlak Apelles hah mi chibai pe roi. Aristobulus insûngmingei hah mi chibai pe roi.

¹¹Ku Juda champui Herodion, Khristien insungmingei lâia Narcissus mi chibai pe roi.

¹²Tryphaena le Tryphosa, Pumapa a sin ngâi hah mi chibai pe roi. Ku ruol miditom Persis, Pumapa sintho râttaknu mi chibai pe roi.

¹³Pumapa chuonsinna sinthopu satak, Rufus le a nû, a nâi anga mi be ngâinu hah mi chibai pe roi.

¹⁴Asyncritus, Phlegon, Hermas, Patrobas, Hermes ngei le a kôma Khristien sungsuok dang omngei murdi hah mi chibai pe roi.

¹⁵Philologus le Julia Nereus le a sarnu, Olympas le an kôma Pathien mi omngei murdi hah mi chibai pe roi.

¹⁶Intum inthiengin inkhat le inkhatin chibai roi. Khrista koiindangngei murdi'n chibai nangni an pêk.

Azoinataka rilnangei

¹⁷Sungsuokngei, rilna chong nin man ha ânkal lama nin kêra insenna le mingei taksônna minngûipu ngei renga han indîn rang le mangei hah nûksong rangin nangni ke ngên.

¹⁸Ha mingei han ei Pumapa Khrista sintho mak ngei, an phûngpui sin kêng an tho ani. An chong hoi le an mûr thiemin mi theiloinaboi ngei an huong ngâi ani.

¹⁹Thurchisa taka nin det tie mitinin an riet zoi masikin nin chung a kin râiasân ani. Nikhomsenla, satna tieng nin vâra sietna tieng chu theiloinaboi nin ni rang ku nuom ani.

²⁰Hanchu ei inngêina bulpui Pathien han Soitân hah nin kepha nuoia om rangin min nôichit lâi atih. Ei Pumapa Jisua Khrista moroina hah nin kôma om rese.

²¹Ki sinthopui Timothy le Lucius, Jason le Sosipater ku Juda champuingein chibai nangni an pêk.

²²Keima, Tertius hi lekha miziekpu hin, Pumapa rimingin chibai nangni ke pêk.

²³Ku tungnapa Gaius le koiindangngei inkhomna ngâi inpumapa, khopuiliena sumrâkpu Erastus le a lâibungpa Kuartus khomin chibai nangni an pêk.

²⁴Ei Pumapa Jisua Khrista moroina hah nin rênga nin chung a om rese, Amen.

Chongkhârna

²⁵Pathien chu chôilôm ei ti u! Ama han Jisua Khrista thurchi, Thurchisa kin ril le zora sôt taka chongtak inthup lei muphuong anghin nin taksônna dettakin nangni minding thei ani.

²⁶Atûn chu ha chong dik hah dêipungei lekhabua ajuong inlanga, tukhomin an iema an jôm theina rangin kumtuong Pathien chongpêk angta kin namtin kêra min riet ani zoi.

²⁷Pathien inkhat mang avârtak kôma om, Jisua Khrista jâra tuonsôtin roiinpuina chu om rese! Amen.

1 Korinth

1 Korinth 1

¹Paul renga, Pathien lungdoa Khrista Jisua tîrton ni ranga koi le ei lâibungpa Sosthenes han,

²Korinth taka Pathien koiindang aom, Pathien mi inthieng ni ranga koi ngei, Khrista Jisua leh inzoma ama ta, muntina ei Pumapa Jisua Khrista biek mi murdi ngei leh munkhatin, an Pumapa le ei Pumapa kôm:

³Pathien ei Pa le Pumapa Jisua Khrista kôm renga moroina le inngêina nin kôm om rese.

Khrista taka satvurnangei

⁴Khrista Jisua Pathien'n moroina nangni a pêk sikin nin ta rangin Pathien kôm râisânchong ki misîr bang ngâi.

⁵Ama renga lam tina minei nin nia, chong le rietnangeia nin insôn bang sikin.

⁶Khrista chong hah nin kôma mindetin aoma

⁷ei Pumapa Jisua Khrista inlâr rang nin ngâk angin a satvurnangei inkhat luo man loiin om mak chei.

⁸Ei Pumapa Jisua Khrista Nikhuo han khom châinaboia nin omna rangin a kôm han among dênin nangni mindet atih.

⁹A Nâipasal Jisua Khrista, ei Pumapa leh inlopna dôn ranga nangni koipu Pathien hah taksôn aom ani.

Koiindang sînga insennangei

¹⁰Ka lâibungngei le sarnungei, nin tina murdia inruola, nin lâia insenna reng om loa, mulungrîl munkhat leh mindonna munkhat dôna om rangin ei Pumapa Jisua Khrista rimingin nin rêngin nangni ke ngên.

¹¹Ku sîngsuokngei, nin lâia inkhalna aom ti Khloe insîngmi senkhatngeiin ânthârlakin min ril.

¹²Ma anghin lei ti rong: nin rêngin nin ti lam atei chita, senkhatin an ti “Kei chu Paul pâl ki ni”; “Kei chu Apollos pâl ki ni”; adangin “Kei chu Peter pâl ki ni”; male adangin “Kei chu Khrista pâl ki ni” nin tia.

¹³Khrista chu pâlungeiin semin aom mo! Nin ta ranga khrosa thipu hah Paul mini? aninônchu tîrton Paul rilinga baptis chang mo nin ni?

¹⁴Krispus le Gaius tiloiin chu tute ka baptis loi sikin Pathien kôm râisânchong ki ril.

¹⁵Masikin, tutên ku ruoisingei rimingin baptis ka chang ti thei no tunui.

¹⁶(O ani, Stephanas le a insûngmingei khom baptis ko thoa, midang ka baptis sa mo khom riet mu-ung.)

¹⁷Khrista'n baptis rangin mi tîr maka, Thurchi Sa misîra, ma thurchisa hah miriem vârna mang loia misîr rangin mi tîr kêng ani, Khrosa Khrista thina hah asenaboi achang loina rangin.

Khrista sinthotheina le Pathien vârna

¹⁸Khrosa Khrista thina roi hih ânmanng tir ngei ta rangin chu mona ania, aniatachu eini sanminring tira omngei ta rangin chu Pathien sinthotheina ani.

¹⁹Pathien lekhabu'n: "Mivâr vârna chu min boi riei ka ta, male mitheingei riettheina chu paivar ki tih," ati.

²⁰Hanchu, mivârngei hah khonmo an om? mitheingei hah khonmo an om? Hi rammuola mi makhal theitakngei hah khonmo an om? Pathien'n hi rammuol vârna hih mona ani ti a minlang zoi!

²¹Miriamngeiin an vârna mangin Pathien an riet thei khâiloi lehan Pathien vârna thurchi misîr "inmôl tak" manga a iemngei sanminring hah Pathien lungdo tak ani.

²²Judangeiin minthârna rangin sininkhêlungei an zonga, Greekngeiin vârna an zong.

²³Keini rêkin chu Khrista jêmdelna roi kin misîr ngâia, mahah Judangei ta rangin chu inpalna ania, Jentailngei ta rangin mona ani;

²⁴aniatachu Juda mo, Greek mo Pathien'n a koingei ta rangin chu Khrista hah Pathien sinthotheina le Pathien vârna ani.

²⁵Pathien inmôlna chu miriem vârna nêkin avâr uola, a râtloina khom miriem râtna nêkin arât uol sikin.

²⁶Ka lâibungngei le sarnungei atûn, nangni a koi lam hih mindon ta u, nin lâia mi tamtak hi taksa tienga mivâr nimak choia, mi sinthoheitak khom nimak choia, mi roiinpui lâia khom nimak choi.

²⁷Pathien'n mivârngei mâimôkashak theina rangin rammuol mindonna inmôlngei a thang ngeia, mirâtnggei mâimôkashak theina rangin rammuol mindonna midok ngei a thang zoi.

²⁸Mapên han rammuol mindonna neinun kâm omngei hah kâmnângloi a min chang theina rangin rammuolin a en nuomloia amintem le itea abe loi hah a thang sa zoi.

²⁹Masikin Pathien makunga han tute omlien song thei om noni ngei.

³⁰Aniatachu nangni chu Pathien'n Khrista Jisua le nangni minzomin, Khrista hah ei vârna rangin a sin ani. Ama jârin Pathien makunga midik ei changa, Pathien mi inthieng ngei ei hongnia mojôkin ei om zoi.

³¹Masikin Pathien lekhabu'n ati anghan, "Tukhom insong rang ajôt ngei chu Pumapa sintho hih song ngêt rese ngei."

1 Korinth 2

Khrista jêmdela aom roi

¹Ka lâibungngei le sarnungei, Pathien chongtak inthup, misîra nin lâia ko hong lâihan, chong roiinpui le rietna roiinpui mang mu-ung.

²Nin lâia ko om han khom neinun dang murdi mingil riein Jisua Khrista jêmdela aom roi vai kêng nin riet rang ku nuom ngâi.

³Ma anghan nin lâia han râtloi le innîk pumin leh ichin ko oma,

⁴male ka bâi renga minchuna chong asuok le ku thurchi misîrngei khom hah miriem vârna methêmna chong nimaka, Pathien Ratha sinthotheina chong kêng ani uol.

⁵Masikin nin taksônna hah miriem vârna han inngam maka, Pathien sinthotheina han kêng ânngam ani.

Pathien vârna

⁶Hannoma rathatienga mitungsuo ngei kôm chu vârna chong ki misîr ngâi. Hannirese hi rammuol vârna chong chu nimaka, hi rammuol roijêkpungei an inlalna ânman tir ngei vârna chong khom nimak.

⁷Pathien vârna chong inthup ha kêng ki misîr ngâi, vârna chong inthup ei roiinpuina ranga Pathien'n rammuol om mâna a lei thangsai hah kêng ani.

⁸Ma vârna hah hi rammuol roijêkpungei rengin riet mak ngei. Riet senla ngei chu roiinpuina Pumapa hah jêmdel noni ngei.

⁹Hannoma Pathien lekhabu'n, "Tutên an mu ngâloi le an riet ngâloi, Ma anga tung ranga tutên an mindon loi, Pathien'n a lungkham ngei ta ranga a mintuosai ngân chu," ati anghan.

¹⁰Aniatachu Pathien'n eini rangin chu a chongtak inthup hah Ratha'n mi min riet zoi. Ratha han jâttin a sûisuok ngâi, Pathien neinunkhîngei inthûktaka inthup khom.

¹¹Ei sûnga om ei ratha lelê hih vai kêng ei chungroi a riet ngâia; ma angdên han, Pathien Ratha vai kêng Pathien chungroi murdi a riet thei ngâi.

¹²Ei man hih rammuol Ratha nimaka; manêkin, Pathien'n neinun mi pêk ngei murdi ei riet theina rangin, Pathien juongtîr Ratha ha kêng ei man ani.

¹³Masika han miriem vârna minchûn, misîr ngâi mak mea, Ratha minchûn kêng kin misîr ngâi, rathatienga chongtakngei hah Ratha dônngai kôm kin rilsensâi ngâi.

¹⁴Tukhom Ratha dôn loiin chu Pathien Ratha renga manboipêkngai hah man thei ngâi mak ngei. Ma anga mingei han chu ma neinunngai hah riet thei ngâi mak ngeia; ama ta rangin chu inmôlna vai kêng ani, a luttie hah Ratha'n vai kêng a riet thei sikin.

¹⁵Tutu khom Ratha man ngei chu neinuntin aluttie an riet ngâi, hannirese, ama chu tutên jêk thei ngâi mak ngei.

¹⁶Pathien lekhabu'n ati anghan: "Tu'n mo Pumapa mulungrîl a riet? Tu mo minchuna chong a pêk thei rang?" Nikhomrese, einin chu Khrista mulungbôk ei pêl ani.

1 Korinth 3

Pathien tîrlâmngai

¹Ka lâibungngai le sarnungei, ratha mingei kôma ki misîr angin nin kôm thurchi misîr thei mu-unga; hi rammuol mi, khrista taksônna tieng nâitengei kôma misîr angin kêng nangni ki misîr pe.

²Burum niloiin, runutuuiin nangni ka vâi ani hi, bu nin la nêk theiloi sikin. Male atûn khom la nêk theiloi dên nin nia,

³rammuol mingei om anghan nin la om tit sikin. Nin lâia innarsana le inkhat le inkhat inkhalna aom kêr chu rammuol ta nin ni tiin minlangin aoma, anni angdêna la om nin ni tina nimak mo?

⁴Nin lâia, "Kei chu Paul pâl ki ni," a dangin "Kei chu Apollos pâl ki ni," ti ngei nin la om kêr chu rammuol mingei angin nan la om bang nimak mo?

⁵Apollos hah tumo ani? Paul khom tumo ani? Pathien tîrlâmngai, nin iem theina ranga sinthopu papai kêng kin ni. Pathien'n tho rang mi pêk chit kêng kin sin:

⁶Keiman chimu ker thea, Apollos'n tui a buoka, aniatachu chimukung a minsônpu chu Pathien ani.

⁷A minsônpu Pathien ni loiin chu chimu rethepu le tui buokpu hah ite nimak ngei.

⁸A lingpu le tui buokpu hah ite an teina om mak. An sintho lam angtakan Pathien'n râisânman pêk ngei atih.

⁹Pathien ta ranga munkhata sintho kin nia, nangni hih Pathien loimân nin ni. Pathien in nin ni sa.

¹⁰Pathien'n manboipêk ni pêk mangin in sinpu theitak angin keiman lungphûm ku phûma, midangin in an sin ani. Aniatachu mitinin an sin rang lam angtakin indîn thei rese ngei.

¹¹Pathien lungphûm a lei phûm sai Jisua Khrista pêna chu tutên lungphûm dang phûm thei noni ngei.

¹²Ma lungphûm chung a han senkhatin rângkachakin mini, sumdârin mini, lung mantam mini mangin sin an ta; senkhatin thingin mini, sûlbuon mini, sapôl mini mangin sin an tih.

¹³Khrista Nikhuo han meiin ânlar rang sikin mei ngêt han mitin sintho hah phuol a ta; anina tak inlang atih.

¹⁴Lungphûm chung a sin hah akâng nôncu a sinpu'n râisânman man atih.

¹⁵Aniatachu tutu sintho khom akângin chu dok atih; hannirese, ama ha chu mei rakân angdôrin sanminjôkin om atih.

¹⁶Pathien in nin ni le Pathien Ratha nin kôma aom ngâi ti nin riet minthâr khet mo?

¹⁷Masikin tutu khom Pathien biekin hah a sietin chu Pathien'n ama hah siet atih. Pathien biekin chu ânthieng kêng, male nangni ngei hah a biekin nin ni.

¹⁸Tutên athenin inhuong no rese. Nin lâia tutu khom hi rammuol balama avârin ân bên chu a vâ tatak theina rangin amo chang bak rese.

¹⁹Hi rammuolin vârna ati hih Pathien mitmûn chu achâng ani sikin, Pathien lekhabu'n, "Pathien'n mivârngei chu kin vâ an intina han a min ôkngai ngâi," ati anghan;

²⁰male Pathien lekhabu dangin, "Pumapa'n chu mivârngei mindonna hah mangmunboi ani ti a riet," ati sa anghan.

²¹Masika han tutên miriemngei song no rese ngei. Adikin chu neinun nâm nin ta ani:

²²Paul khom, Apollos khom, Peter khom; hi rammuol khom, ringna le thina khom, neinun omsai le ala hong om rang ngei khom anrêngin nin ta riempet an ni,

²³male nangni khom Khrista ta nin nia, Khrista khom Pathien ta ani.

1 Korinth 4

Khrista Tîrtongei

¹Keini hih Khrista tîrlâmngai, le Pathien chongtak inthup donsûipungeiin mi mindon roi.

²Hi taka neinun ankhat anâng chu tîrlâmngei hah an pu mitmua mi taksônom an ni rang ani.

³Atûn nangnin mi nin jêkna le miriem mindonna balama mi nin jêkna hah kei rangin chu itên bê mu-ung; Ke thenin khom ko roijêk ngâi mu-ung.

⁴Ki sielesarietna chu ânthâr, hannirese mahan keima sietnaboi ki ni tatak inthârna om uol mak. Pumapa hah ku chungu roijêkpu chu ani.

⁵Masikin Pumapa juong nôk mâka chu azora diktak motona roi lei jêkmasat lai no roi. Azoina roijêkna chu Pumapa juong rang ngâk ngêt nîng a ta; ama'n ijînga inthup ngei hah avâra hong kêlsuong a ta, miriem mulungrîla bôkna inthup ngei khom minlang sâng atih. Male mitinin minpâkna an chang rang dôr Pathien renga an khôk rang ani.

⁶Ka lâibungngei le sarnungei, “Balamngei hih jôm roi,” ti hi nin inchu theina rangin keima le Apollos hih nin enton rangin ko hong târminlang ani, tutên mi inkhat songin midang enkhûm no roi.

⁷Tumo midang chungu ulienin nangni sin? Neinuntin nin man ngei hah Pathien'n nangni a pêk nimak mo? Asa, nin man anînte ithomo manboipêk aman loi angin omlien nin songa?

⁸Nin nâng ngei murdi nin dôn zoi mo? Nin nei mo ani zoi? Kin om nonnom rêngngei nin chang thei mo ani zoi? Asa, rêngngei chang thei tatak ungla ku nuom ani, hanke nangni leh munkhata rêngngei ei chang thei rang.

⁹Pathien'n keini tîrtonngei hih thi ranga inkhâm anga anûktaka mi tîrsuokin kin bê ani; rammuol le vântîrtonngei le miriemngei mitmua enhoia sinin kin om sika hin.

¹⁰Keini chu Khrista jârin amo kin ni; aniatachu nangni chu Khrista jârin mivâr nin ni! Keini chu kin doka, hannirese nangni chu nin rât! keini chu mingeiin min enkhûma, nangni chu mirit nangni an tho!

¹¹Atûn ten vonchâm le tui inrâlin kin oma; rovo chetin kin invoa; mi tôkmol kin tuonga; ommun invâiin kin chai titir ani;

¹²Kin kuta sinthôn dûktong takin kin invâi ani. Mîn khomâk min sâm khomin sat kin vur ngâia; dûk min mintong khomin diertakin kan tuonga;

¹³Mi min êro khomin chong dâiriemin kin thunon ngâi. Hi rammuola ronok leh tei uol khâi mak meh; hi zora ten khom hin rammuola pornôngkok angin kin ni.

¹⁴Hi chong ki miziek hih nin inzakpuina ranga ki ti niloiin, Ka nâi moroi ngei angin nangni minchu ku nuom sika ani.

¹⁵Khristien ringnuna enkolpu isâng sôm dôn khom ungla, Pa chu inkhat vai kêng nin dôn. Nan lâia Thurchi Sa hong mintunga Khrista Jisua leh inzoma nin ringna han nin pa ko hongni ani.

¹⁶Masikin keima ku nunchan jûi rangin nangni ke ngên.

¹⁷Hi chungroia hin Timothy, khristien ringnun jâra ka nâipasal moroi le taksônom hih nin kôm ko hongtîr. Ama'n Khrista leh inzomin ringna thara ku nunchan muntina koiindangnei murdi ki minchu ngâi anghan nangni min riet nôk atih.

¹⁸Nin lâia ko hong khâi loi rang mini ti nin bôk sikin, mi senkhatin chu omlien nan song ani.

¹⁹Nikhomrese, Pumapa'n asa a tiin chu nan lâia hong lai ki tih, Hanchu hi mi ânsong ngei hih an mûrra an ti vai niloiiin, sinthotheina an dôn khom mu thei ki ti zoi.

²⁰Pathien Rêngam chu chongbâingei vaia om niloiiin sinthotheinân aom kêng ani uol.

²¹Imo nin nuom uol? Tôkmol leh mo nin kôm ku juong rang, aninônchu ratha lungkhamna le nuninnêmin mo?

1 Korinth 5

Koiindang lâia inditnasaloi

¹Atûn, nin lâia inditnasaloi aom ti mîn an hong misîr baka, ma-angdôra inditnasaloi ha chu sonongnei lâia luu om ngâi mak. Mi inkhatin a puingâk a jâlpui ngâi ti khom min lei ril ani!

²Hanchu, kho angin mo nin lân song bang theia? Ânsong nêkin, Ma anga saloi thopu ha chu nin inzomkhômna renga nin rujûlpai theina rangin kângdoinân nin sip uol rang ani.

³⁻⁴Nin lâia taksan inchel thei no khom rong a ratha'n chu kên chel ani; nan lâia om anghan ei Pumapa Jisua rimingin ma angtaaka saloi ichi om thopu chung a han roi ke jêkmasat zoi. Nangni le keima ratha Pumapa Jisua sinthotheinân intûpin,

⁵ha miriem hah Pumapa Nikhuoa han a ratha sanminring ani theina rangin Soitan kuta a takpum minmang rangin nin pêk rang ani.

⁶Nin inpâk rang hi dik mak! “Chol tômtên vâipôl bil pumpui amin thoizit ngâi,” ti nin riet nimak mo?

⁷Chol koploi vâipôl bil nin nia, vâipôl tang atharzek nin ni theina rangin sietna chol muruo hah khâipai roi. Atûn, ei Kalkân Khohoi thona rang Khrista, ei Kalkân belrite hah, inbôlnân pêkin aom zoi sikin.

⁸ Masikin ei Kalkân khohoi mang ei ti u, Chol muruo puoloina le sietna kop vâipôl niloiin cholboi inthiengna le chongtak vâipôl leh mang ei ti u.

⁹ Ke lekhamuthuon han inditnasaloi song mingei leh inlop loi rangin nangni ki tia.

¹⁰ Sonongngiei inditnasaloi song ngei mini, tamrâival ngei mini, inrungei mini le mirmil biekngiei mini inloppui tet no roi ki ti nimaka, ma anghan nisenla chu rammuol hih nin mâkving rang anâng rang ani.

¹¹ Ki ti tak chu tutu khom iempu intia, inditnasaloi song mini, tamrâival mini, mirmil biek mini, inngo song mini, ju inrûi mini, inru mini ala thopu chu inloppui no roi ti hih ani. Ma anga mingei lehan chu insungin nêk le sâk khom thopui no roi.

¹²⁻¹³ Keiman pêntienga mingei roi ke jêk rang nâng mak. Pathien'n jêk ngei atih. Hannirese nin lôm kêra mi chu nin jêk rang nimak mo? Pathien lekhabu'n, "Mi saloi hah nin pâl renga khâipai roi," ati anghan.

1 Korinth 6

Khristien champuingei leh insûkloina

¹ Nin lâia tumakhatin a Khristien champui leh insûkloina dôn senla, ma insûkloina roi hah jêk rangin Pathien mingei kôm mintung loiin sonong roijêkpungei kôm a mintung ngam rang mo?

² Pathien mingeiin rammuol roijêk an tih, ti nin riet loi mo? Rammuol roi luo mana nin la jêk rang anînte, roi achînte jêk rang hi nin jêk thei loi mo?

³ Vântîrtonngei khom ei la jêk ngei rang anni ti nin riet loi mo? Hi damsûng roi vâng chu ti rang luo nâng mak.

⁴ Ma anghan damsûng roijêk rang ahong om duoiin chu, koiindanga itea tel bâkloi mingei nin min jêk rang mo?

⁵ Nin inzakna ranga ki ti ani! Nin Khristien champuingei lâia roi injêl jêk thei mivâr inkhat luo nin om loi mo?

⁶ Manêkin, khristien ankhatin a sûngsuok leh an insûkloina roijêkna mintungin sonongngiei a man jêk ngâi hi!

⁷ Roi injêl nin dôn ngâi sika hin chukloina tak nin dôn ti chu ânlang ani. Tho minchâia aom hah nin ta rangin asa uol nimak mo? Muruka aom hah nan ta rangin asa uol nimak mo?

⁸ Manêkin nangni rengin nin tho minchâi inlôm ngâia, nin inru inlôm ngâi, nin lâibungngiei le nin sarnungei lelê leh khom!

⁹Adiktakin mipuoloi ngeiin Pathien Rêngram luo noni ngei ti nin riet loi mo? Nin thethenin inhuong no roi; inditnasaloi song ngei, mirmil biekngei, inrêngei, hurngei, pinkuohurngei

¹⁰aninônchu inrungei, tamrâivalngei, ju inrûingei, inngo song ngei, murukmeret tho ngei hin Pathien Rêngram luo tet noni ngei.

¹¹Nangni khom senkhat chu ma anga mi nin lei ni ngâi. Aniatachu, sietna renga rusûk minsâiin Pathien kôm pêk nin ni zoia; ei Pumapa Jisua Khrista le ei Pathien Ratha sikin Pathien kôm adik nin chang zoi.

Pathien roiinpuina rangin nin takpumngei mang roi

¹²Tumakhatin, “Keima rangin jâttin tho phal ani,” a ti thei. Asa; aniatachu jâttin tho hi nangma rangin sa suolet mak. Jâttin keima rangin tho phal ani ki ti thei, aniatachu ite suokin om no ning.

¹³Tumakhatin, “Sâk nêk chu von ta rang ania, von chu sâk nêk ta rang ani,” a ti thei. Asa; aniatachu, Pathien'n minboi ruruoi atih. Takpum hih inditnasaloia mang rang nimaka, Pumapa sinthona mang rang kêng ani; male Pumapa'n takpum ranga anângngei a pêk minhun ngâi ani.

¹⁴Pathien'n Pumapa chu thina renga a kaithoia male eini khom a sinthotheinân mi kaithoi sâng atih.

¹⁵Nin takpumngei hah Khrista takpum amachangngei ani ti nin riet. Khrista takpum amachangngei hah lâkpên notizuor ngei takpum amachangin ki minchang rang mo? Ni tet mak!

¹⁶Notizuor inzompui mi hah chu notizuor leh takpum inkhat an ni ti nin riet loi mo? Pathien lekhabu'n ânthârtakin, “Anruonin takpum inkhat hong nîng an tih,” ati.

¹⁷Aniatachu, Pumapa inzompui mi hah chu ama leh ratha pumkhat an ni.

¹⁸Inditnasaloi hih mong ta roi miriemin sietna dang a tho ngei nâm chu a takpum pêntieng ania, inditnasaloi song mi rêk chu ama takpum chung a nunsie a tho ani.

¹⁹Nin takpum hah nin sûnga om Pathien nangni pêk Ratha Inthieng biekin ani ti nin rietloi mo? Nin ta nikhâi mak choia, Pathien ta kêng nin ni;

²⁰mana rochôk kêng nin ni zoi. Masikin nin takpumngei hah Pathien roiinpuina rangin mang roi.

1 Korinth 7

Inneina chungroia chongrekelngei

¹Atûn, nin chong miziek chungroi ngei hah mindonin. Pasal rangin innei loi asa.

- ²Aniatachu, inditna tamtak aom ngâi sikin pasalin an theia dôngma dôn chit senla ngeia, nupang khomin an theia ruothar dôn chit rese ngei.
- ³Pasalin a pasal nina sintum a dôngma kôm zoi senla, ma angdênin nupang khomin a pasal kôm a sintum zoi sa senla, an nângna nâma inmathâi inlôm rese ngei.
- ⁴Nupangin ama takpum chung a han racham nei maka, a pasalin kêng a nei; ma angdênin pasal khomin ama takpum chung a racham nei maka, a dôngman kêng a nei ani.
- ⁵Chubaitho ranga nin inpêk theina rang le nin inmunnôk theina rangin chomoltea rangin asa nin ti ruruoi nônchu nin rachamneina inchu no roi; aninônchu nin indînzoiloina sikin Soitan'n nangni huong i-nih.
- ⁶Hi chong hih chongpêk angin misâr mu-unga, phalna chong angin vai ki misâr ani.
- ⁷Adiktakin chu nin rêngin keima angin om ungl a chu ku nuom ani; aniatachu, mitinin an chang rang chit manboipêk Pathien kôm renga an chang chita, inkhatin lam dang tieng, adangin lam dang tieng.
- ⁸Atûn, inneiloi ngei le meithâingei rangin chu hi anghin ki ti, Keima angin intîmvielin om rang bôk tit ungl a nin ta rangin sa uol atih.
- ⁹Aniatachu, nin nângna han indîntheina nin dôn nônchu innei roi, hur nêkin chu innei asa uol.
- ¹⁰Inneisai mingei ta rangin chong ke pêk, ma hih keima renga niloiin, Pumapa chongpêk ani: nupangin a pasal insenpui no rese;
- ¹¹aniatachu ân senpui lekhom pasal dang nei khâi no rese, nônchu a pasal le ngêt inluo nôk rese; male pasal khomin a dôngma mâk tet no rese.
- ¹²Mi dangngei kôm chu ki ti (keiman, Pumapa niloiin): Khristien pasalin sonong dôngma a neiin chu a dôngma han a kôm om tit rangin a mulung achuk tatak in chu mâk tet no rese.
- ¹³Male Khristien nupang khomin sonong ruothar a neiin chu a pasal han om kelen rangin a mulung achuk tatak in chu mâk no rese.
- ¹⁴Iemloi pasal hah a dôngma jârin Pathien mitmua pomthei ani zoia, iemloi nupang khomin a pasal jârin Pathien mitmua pomthei ani sa zoi. Ma anghan nino senla chu, an nâingei hah inthieng noni ngei; aniatachu, Pathien mitmua pomthei ani zoi.
- ¹⁵Nikhomrese, iemloi inkhat han insen a nuomin chu insen chien rese ngei, ma anga roi hah atokin chu iempu pasal mo, nupang mo, khit nimak ngei. Pathien chu inngêia om rangin nangni a koi ani.

¹⁶Khristien dôngma na pasal na sanminring thei rang le thei loi rang kho angin mo ni riet? Aninônchu khristien pasal, no dôngma na sanminring thei rang le thei loi rang kho angin mo ni riet?

Pathien nangni koi anghan om roi

¹⁷Tutu khom Pumapa'n manboipêk a pêk lam angtakan le Pathien'n a koi lam angtakan om rese. Hi balam hih koiindang tina ki ril ani.

¹⁸Sertansai mi hah Pathien koina a pomin chu, a sertana sîn hah pai rang a bôk rang nikhâi mak; sertanloi mi khomin Pathien koina a pomin chu, ser a tan rang nikhâi mak.

¹⁹Sertan le tanloi ite ni uol mak; Pathien chongpêkngai jôm hi kêng ani uol tak.

²⁰Tutu khom Pathien koina a pom lâia an om anghan omtit rese ngei.

²¹Pathien'n nang a koi han suoka om mo ni ni? Asa, mindon no roh; hannirese, jôkna zora na manin chu mang roh.

²²Suok, Pumapa'n a koi chu Pumapa mojôk suok ania; ma angdên han suok niloi Khrista'n a koi khom hah Khrista suok ani.

²³Pathien'n mana nangni a rochôksai kêng; masikin mingei suokngai chang no roi.

²⁴Ka malngai, tukhom Pathien'n a koi lâia a omlam anghan Pathien leh inlopin omtit rese.

Inneiloingei le meithâingei chungroia chongrekeingei

²⁵Atûn, inneiloi mingei chungroia nin chong miziek hah mindonin: Pumapa renga chongpêk chu ite dôn mu-unga, aniatachu, Pumapa moroina sika mi iemom ki ni sikin ki mindon lam misâr ki tih.

²⁶Atûnlâi intakna mindonin mi a om lam angtaken a omtit rang hih sa uol le ki minhoi.

²⁷Dôngma mo no dôn zoi? Amanu renga jôkna rok no roh. Inneiloi mo na la ni? Dôngma rang rok no roh.

²⁸Hannirese lômnu no dôn khomin nunsie tho mak chea; inneiloi nupang khomin ruothar a dôn khomin nunsie tho mak. Aniatachu in nin neiin chu rammuola dûktong nin tih, maha nangni mojôk rang ku nuom ani.

²⁹Ka malngai, ki ti nuom tak chu mahi ani: Zora hih abong zoia, atûn renga chu dôngma dôn ngei hah a dônloi angin om senla ngeia;

³⁰achap ngei hah inngûiloi angin om senla ngeia; ânnoi ngei hah râisân loi angin om senla ngeia; a rochôk ngei han dônloi angin om senla ngeia;

³¹hi rammuola neinun sampâr ranga sinchuon tho ngei hah anrêngin luo loi angin om rese ngei. Hi rammuol hih, atûna anghin, aom sôt khâi loi rang ani sikin.

³²Mulungdûk dôn loi rangin nangni ku nuom ani. Ruotharte'n chu Pumapa râiminsân rang a bôk sikin Pumapa sin hah a mindon ngâi.

³³Aninâkchu pasal inneisai chu a dôngma râiminsân rang a bôk sikin rammuol neinun a mindon ngâia;

³⁴masikin kângnikin kaiphirînin a om ngâi ani. Nupang inneiloi, aninônchu dôngmate inthieng chu a taksa le a ratha inpêkphar rang a nuom sikin Pumapa sin hah a mindon ngâia; hanchu inneisai nupangin chu a ruothar râiminsân rang a nuom sikin rammuol neinun a mindon ngâi.

³⁵Nangni san rang ku nuom sika mahi nangni ki tipe ani. Nin chung a balam inngar nangni khang pe rang bôk mu-ung. Manêkin, neinun adik le asa nin sin theina rang le Pumapa sinthona han ite manar tet loiin nin inpêk let theina rangin nangni ku nuom ani.

³⁶Dôngmate le ruotharte innei roi chu sûtminthel ani zoi, innei nôk khâi loi rang ti ngei chungroia chu: ruotharte hah dôngmate tienga han mirita omin ândînthei tet noa, innei anâng angin a rietin chu innei rese, a nuom angin, mahan nunsie om mak.

³⁷Aniatachu, pasal hah dânderit ani noa, ha dôngmate hah innei loi ranga mulungbôk det taka sinsiema, male a nuomlam a dier theipu han chu om rang chang a mulungrîla a mindon suo zoi, dôngmate hah in a neipui loi sikin a tho min sa.

³⁸Masikin ruotharte inneipu han a tho min sa, aniatachu, inneiloipu han a tho min sa uol.

³⁹Nupang inneisai hah a pasal ringsûngin chu a pasal han khit ania; hannirese, a pasal a thîn chu, pasal dang a nuom tak in a nei pui thei, Khristien ani ngânin chu.

⁴⁰Aniatachu, a om ngâiin om senla, a râisân uol atih. Maha ki mindon lam ani, male kei khom Pathien Ratha chu ko dôn angin kên bê ani.

1 Korinth 8

Mirmil biekna sâknêk pêkna chungroia chongrekeln

¹Atûn mirimil biekna sâknêk pêkna chungroia nin chong miziek mindonin. “Ei rêngin rietna ei dôn,” an ti angin adik ani. Hannoma, ma anga rietna han chu mi a minpâk ngâia; aniatachu lungkhamna rêkin chu mi asin minding ngâi.

- ²Tukhomin idôr tena mini rietna dôn sai angin ân bên chu a riet rang dôr ala riet loi ani.
- ³Hannirese tukhomin Pathien lungkhamna a dônin chu ha mi hah Pathien'n a riet ani.
- ⁴Masikin, mirimilngei biekna sâknêk pêka omsai sâk chungroia chu: rammuola mirimilngei murdi hih atataka inzir niloi, rimila inding an ni tie le Pathien inkhat vai aom ti chu ei riet.
- ⁵Invâna mo, pilchunga mo pathien riming pêl “pathiengei” le “pumapangei” tamtak om khom senla,
- ⁶eini rangin chu Pathien inkhat vai, Pa, neinuntin Sinpu hah a oma, ama ta rangin ei ringa; male Pumapa khom inkhat vai, Jisua Khrista a oma, Ama sikin neinuntin sin ania, eini khom ama sikin ei ring ani.
- ⁷Aniatachu ma chongtak hih mi murdi'n riet mak ngeia, mi senkhat chu atûnten hin mirimilngei biek ngâinzong an ni sikin atûnten hin mirimil ta angta bân an sâk jêta an sielesarietna hah ânzala, ha sâk sika han a minnim ngei angin an inbe ngâi.
- ⁸I-ih khomnirse sâk hin Pathien leh ên zomna chu mi min sa pe thei no ni; sâk no khom ila ite dok no ih, sâk khom ila ite man uol no ih.
- ⁹Nikhomrese, nin zalenna sintho han taksônna tienga râtloi ngei hah sietna an chul loina rangin indîn roi.
- ¹⁰Chongkhatin, nangma “Rietna dôn,” ân tipu han, sielesarietna tienga râtloi mi han mirimil biekna ina na sâk lâitak nang mu senla, a sielesarietna han mirimilngei biekna sâknêk pêka omsai hah a sâk ngam rang nimak mo?
- ¹¹Masikin ma miriem râtloi, na lâibung Khrista'n a ruthûla a thi pepu hah nangma “Rietna” sikin ân mang rang ani!
- ¹²Ma anghan nin Khristien lâibungngei le sarnungei chung a thominchâiin an sielesarietna hah mophoppên Khrista chung a nin tho minchâi nîng atih.
- ¹³Masikin sâkin ka lâibungpa mo, ka sarnu mo sietna han amathâkin chu me sâk tet khâi no ning, ka lâibungpa mo, ka sarnu mo sietna a tâk khâi loina rangin.

1 Korinth 9

Tîrton rachamneina le sintumngei

- ¹Zalên mi ni mu-ung mo? Tîrton ni mu-ung mo? Ei Pumapa Jisua mu loi mo ki ni? Male nangni khom Pumapa ta ranga ki sinthona mara nimak choi mo?

²Midangngeiin tîrtonin mi pom no khom rese ngeia, nangnin chu mi nin pom ngêt! Pumapa leh nin ringna ânzom zoi sikin ki tîrton indangna chu nangni hah nin ni.

³Mîn min makhalin chu hi anghin kên rung ngâi:

⁴Sin ko tho theina ranga sâknêk man rangin racham ko dôn loi mo?

⁵Tîrton dangngei le Pumapa lâibungngei le Peter ngei anghan ku khuolchaina Khristien dôngma tuong rangin racham ko dôn loi mo?

⁶Aninônchu, Barnabas le keima vai mo kin ringna ranga sinthoa invâi rang?

⁷Tu râlmingei mo anninanâk thâma invâiin râl an doi ngâi? Tu chuonsinpungei mo grapebil thoa amara sâk ngâiloi? Tu belrihôlpungei mo belri pâl vâia an runutui nêk ngâiloi?

⁸Balam khomin ma angdên han ati sikin anîngtina enminkhina hih aten dôn mu-ung ani.

⁹Moses balam lekhabua han, “Sechal hah bu ni minchîl lâitak han a mûr khit pe no roh,” ti ei pore. Atûn, Pathien'n sechal mo a mindon?

¹⁰Eini ranga a misîr nimak mo? Ani, eini rang piela a miziek, âlkaipu le bu âtpu han an chang rangtum ngâituiin sin an tho rang ani.

¹¹Nin lâia ratha sachi kin rethea, nin kôm renga taksa neinun ngei ât unglang kamâmom rai no ni mo?

¹²Midangngei luo mana hi taksa neinun ngei hih nin kôm renga chang rangin racham an neiin chu, keini vâng chu rachamneina lien uol kin dôn nimak mo? Hannirese, ha rachamneina hah mang mak me. Khrista Thurchi Sa kin chakal loina rangin jâtin kin tuong zajâm ngâi.

¹³Pathien Biekina sintho mingei han Biekin renga an sâk rang an man ngâi ti le mâichâma inbôlnangei min tungpungei khomin mâichâma neinunpêkngai han rangtum an dôn ngâi tiin nin riet minthâr ani.

¹⁴Ma angdên han Pumapa'n Thurchisa hah a misîrpungeiin hima renga hah an sâk rangin chong a pêk ani.

¹⁵Aniatachu, Keiman chu mangei hah inkhat luo ka mang loi ani, atûn hin khom ku chungma anghan nin thona ranga ki miziek ni tet mak. Tutu khom kên songna hih asênaboi chongngei an minchang nêkin chu thi ving inlang kei rangin asa uol!

¹⁶Thurchisa ki misîr sika ririemin insong theina dôn mu-ung. Thurchisa hih misîr ngêt ranga dânde kêng ki ni. Thurchisa hih misîr nôn lang chu kei rangin ichi omtak ani rang!

¹⁷Hi sin hih keima nuom thangna sika ki sin nisenla chu thalo khôk thei ki tih; hannirese, Pathien'n hi sin hih mi minkol sikin ki sintum piela bên, ki sin ani.

¹⁸Hanchu, kho anga thalo mo ka man rang ani zoi? Thurchi Sa rang sika ki sinthona hin ka rachamneinangei mang loia thalo boia ki sin hih thurchisa rangin zora sa ani.

¹⁹Zalen mi ki ni, tute suok chu ni mu-ung; aniatachu thei dôra mi tamtak ngei ka lâklût theina rangin mi murdi suok ka chang ani.

²⁰Judangei ka lâklût theina rangin Judangei lâia chu Juda angin ko om ngâi; male Moses Balam nuoia om no khom inlang, balam nuoia om ngei kôm chu ka lâklût ngei theina rangin balam nuoia om anghan ko om ngâi.

²¹Ma angdên han, Jentailngei ka lâklût theina rangin Jentailngei lâia chu Jentail angin Juda balam pêngtieng ko om ngâi. Ma hah Pathien balam jôm mu-ung ki tina nimaka; Khrista balam nuoia ko om tatak ani.

²²Taksônna tom ngei ka lâklût theina rangin râtloingei lâia chu râtloi angin ko om ngâi. Masikin kho angin mo senkhat ngei luo ka sanminring theina rangin mi murdi kôm jâttin ki ni zoi.

²³Satvurna ka chang theina rangin mangei nâm hah Thurchisa sikin ki sin ani.

²⁴Tân insiet ngei hah anrêngin an tâna, hannirese inkhat vaiin kêng râisânman a man ngâi ti nin riet loi mo? Râisânman hah nin man theina rangin ma angtak han tân roi.

²⁵Insietna akop ngeiin chu lam tina an indîn ngâi. Anni chu rênglukhum sietthei man rangin an insieta eini chu rênglukhum siet theiloi kumtuonga om rang man rang ei ni.

²⁶Masikin ânjîkzatin zoina tenkung tieng ka tân ngâia; masikin kuttum leh insuk ngâipu'n min pâm loia a kuttum leh a suk ngâi angin ki ni.

²⁷Midangngei insietna taka ko koitûp suole keima chukloia ko om loina rangin, ka takpum dûk min tongin ke sep ngâi ani.

1 Korinth 10

Mirmilngei doia inningangei

¹Ka lâibungngei le sarnungei, ei richibulngei Moses jûingei chungu neinun atung hah nin riet bang rangin ku nuom ani. Anrêngin sôm thupna nuoia an om rieia hoiriemin Tuipui Sen varâl an kêi ani.

²Sôm le tuipuia han Moses nûkjûingei nitheina rangin anrêngin baptis changin an om ani.

³Anrêngin rathatienga bu munkhatin an nêka,

⁴munkhatin rathatienga tui an nêka. Anni ngei leh sepui pu rathatienga lungpui renga tui an nêka; ma lungpui hah Khrista ani.

⁵Aniatachu an lâia mi tam uol chung a chu Pathien mulunghoi maka, ramchâra han an ruok ânzamnung ani.

⁶Atûn, ma ngei hah eini ranga minenna ani, neinun saloi ngei an ngâitui angin ei ngâitui loina rang le

⁷an lâia mi senkhat mirimilngei an biek angin ei biek loina rangin. Pathien lekhabu'n, "Mingei ha ruolhoia sâk rangin an insunga, hannirese ju nêk le indit hoiinhâinân an inlet nôk" ati angin.

⁸An lâia mi senkhatin inditnasaloi an songa, sûnkhat sûngin mi isâng sômnikleithum an thi anghan eini chu inditna saloi song no uh.

⁹An lâia mi senkhat Pumapa an minsina, murûlin amuchuk that ngei ok anghan minsin no uh.

¹⁰An lâia mi senkhat Pathien kôm an chiera, Thina Vântîrtonin a minmang ngei anghan chier no uh.

¹¹Ma an chung a neinun tung ngei murdi hah midangngei rangin minennangei ania, eini zora monga lêng ngei inningna ranga mangei ha miziek ani.

¹²Adettaka inding nin ni tiin nin mindonin chu nin inlet loina rangin indîn roi.

¹³Huongna nin tong ngei murdi hah mingei tuong ngâi tena ani. Pathien chu a chonginkhâma iem aom sikin nin phari loi rang dôr chu huongna nin tong rang phal no nih; huongna nin tuong zorân tuongdierna ranak nangni pêk a ta, male huongna jôkna lampui khom nangni sin pe atih.

¹⁴Masikin, ku ruol moroitak ngei, mirimilngei biek hih mâk ta roi.

¹⁵Arietvar mingei kôma misîr anghan nin kôm ki misîr ani; ku thurchi misîr hih mindon roi.

¹⁶Satvurna khuri chung a Pathien kôm râisânchong ei misîr ngâi: ei nêkin Khrista thisen hah ên sempuina ani. Male vâipôl ei khoi ngâi ha: ei sâk khom hih Khrista takpum ên sempuina ani.

¹⁷Vâipôl hih tâpkhat ani angin, eini hih mi tamtak ni khom ila, vâipôl tâpkhat renga ei rêngin ei chang pak sikin takpum inkhat ei ni.

¹⁸Israel mingei hah en ta u, inbôlna neinunpêka om sâk ngei han mâichâma Pathien sin hah an insepui ani.

¹⁹Mirimil aninônchu a kôma sâk pêka om hah neinun kâmom ki tina mo?

²⁰Nimak! ki ti chu sonongngei mâichâmngeia inbôlna hah Pathien kôm niloii ramkhoringei kôm kêng an pêk ani. Ramkhoringei leh lôminchang rangin chu nangni phal tet mu-ung.

²¹Pumapa khuri le ramkhoringei khuri nêk molop thei no tunui; Pumapa dosâng le ramkhoringei dosâng khom sâk molop thei no tunui.

²²Aninônchu Pumapa hah ei min nuor rang mo? Ama nêka rât uolin ên be mini?

²³“Jâtin tho thei rangin phal ei ni,” an ti anghan. Adik, hannirese jâtin nâm sa let mak. “Jâtin tho thei rangin phal ei ni,” aniatachu jâtin hi satna ni let mak.

²⁴Tutu khom athei vaia satna rang vai rok loiin midang satna rang rok rese.

²⁵Me bazara an zuor kai chu ite rekel loiin nin sielesarietna sikin sâk roi.

²⁶Pathien lekhabu'n, “Pilchung le asûnga omngei murdi hih Pumapa ta ani,” ati sikin.

²⁷Sonong inkhatin bunêk rang nangni a sielin se ta unгла, nangni a do kai chu rekel tet loiin nin sielesarietna sikin sâk roi.

²⁸Aniatachu tumakatin, “Hi sâk hih mirimil kôma pêksai ani,” tiin nangni a rilin chu nangni rilpu sik le ama sielesarietna sikin sâk no roi

²⁹ma hih nin sielesarietna ki ti nimaka, midangngei sielesarietna ki ti kêng. “Asa, hanchu,” senkhatin, “Iranga midang sielesarietna han ka zalena tentana mi sin pe mini? tiin an rekel ngâi ani.

³⁰Ka sâk chung Pathien kôm râisânchong ki misîr sai piel ha irang mo mîn min la êro ngâi hi?”

³¹Asa, ma anghan nin sin murdi, nin sâk le nin nêk murdi, Pathien roiinpuina rangin tho roi.

³²Judangei, Jentailngei le Pathien koiindangngei ta ranga bâiinkhamna nin niloina rang lam takin om roi.

³³Ko tho angtak hin tho roi; Keima rang satna rok loiin, sanminring an ni theina ranga mi murdi satna rang rokin, ki sinthona nâma mi murdi râiminsân rangin ki mindon ngâi ani.

1 Korinth 11

¹Khrista nunchan inchupu ki ni anghan, ku nunchan inchu ngei ni roi.

Inkhômna taka lukhum inkhum chungroi

²Mi nin riëttit ngâi sik le nangni ki minchunangei nin jûi tit ngâi sikin nangni ki minpâk.

³Aniatachu, pasal lu chu Khrista ani, nupang lu chu pasal ani, male Khrista lu chu Pathien ani ti nin riet rangin ku nuom.

⁴Masikin pasal lukhum inkhum puma inkhômna taka chubaitho ngâi mini, thurchi misîr ngâi ngei mini chu Khrista an lu hah mâimôk an shak ani.

⁵Male nupang tukhom lukhum inkhum loia inkhômna taka chubaitho ngâi mini, thurchi misîr ngâi ngei mini khom an lu, an pasal mâimôk an shak ania; ma anga nupang chu nupang an sam zietminkol leh ateina om mak ani.

⁶Nupangin lukhum ân khum nuom nôncu epin ep let rese, ma anga nupang rangin samep mo, luvoï mo hi inzakpui aomin chu lukhum tho rese.

⁷Pasal chu Pathien rimil in-angpui le Pathien roiinpuina minlang ngâipu ani sikin lukhum ân khum rang nâng mak. Aniatachu nupang chu pasal roiinpuina minlang ngâinu ania;

⁸pasal hih nupang renga sin nimaka, aninâka nupang chu pasal renga sin ani.

⁹Pasal hih nupang jâra sin khom nimaka, aninâka nupang rêk chu pasal jâra sin ani.

¹⁰Masikin vântîrtongei sika han nupangin pasal rachamneina nuoia om ani ti indangna rangin lukhum a tho rang ani.

¹¹Nikhomrese, Pumapa taka ei ringnuna hin nupang hih pasal boiin chu om thei maka, pasal khom nupang boiin chu om thei mak.

¹²Nupang hih pasal renga sin ani anghan pasal hih nupang renga suok ania; male jâtin hih Pathien renga ânzir let ani.

¹³Mindon ta u, nupang lukhum inkhum loia inkhômna taka Pathien kôm chubaitho ânhoi mo?

¹⁴Pasal sam minsei chu ata rangin neinun inzakom ani ti nin inzirpui mulungrîl khomin a riet nimak mo?

¹⁵Nupang sam minsei chu ama roiinpuina ania, a sam hah ama inkhum rang piela pêk ani.

¹⁶Aniatachu, tumakhatin hi roi hih a makhal an om lekhom, mapêna hi chu balam dang reng dôn mak me, Pathien koiindangngei khomin dôn mak ngei.

Pumapa jânbu

(Mat 26:26-29; Mk 14:22-25; Luk 22:14-20)

¹⁷Nikhomrese, nangni ki rilnangei zomin chu nangni minpâk mu-ung, nin satna rang niloïin nin siet uolna rangin nin inkhôm ngâi sikin.

¹⁸Amotontaka, nin intûpnangei han doi pâlngei an om ti mîn min rila; male ma hih dik lekhom ki iem ani.

- ¹⁹(Midik ngei hah an inlang theina rangin nin lâia insenna aom rang piel ani.)
- ²⁰Apâla nin intûp zora nin sâk ngâi hah Pumapa Jânbu nimak.
- ²¹Nin nêkin nin bu pak motona nin nêk baka, senkhat nin inrûi lâiin senkhat nin von achâm ngâi sikin.
- ²²Nin sâk nin nêkna rangin inngei nin dônloi mo? Aninônchu, Pathien koiindang en min nuoiin mi intak ngei hah mâimôk nin shak mini? Hi chungroia hin imo ti-le mi nin minhoi? Nangni ki minpâk rang mini? Nangni minpâk tet mu-ung.
- ²³Inchuna nangni ke pêk ngei hah Pumapa kôm renga ka man kêng: Pumapa Jisua minsûra aom ni jâna han vâipôl hâr a lâka.
- ²⁴Pathien kôm râisânchong a misîr suole a khoia, “Hi ma hih ka taksa nin ruthûla pêk rang hah ani. Mi nin riettitna rangin ma hih tho ngâi roi,” a tia.
- ²⁵Ma angdên han, jânbu an nêk suole khuri khom a lâka, “Hi khuri hih Pathien chonginkhitna athar ki thisena mindet ani. Nin buong racham mi nin riettitna rangin tho ngâi roi,” a tia.
- ²⁶Zoratin hi vâipôl hih nin sâka, khuri renga nin buong racham a juong nôk mâka chu Pumapa thina hah nin phuong ani.
- ²⁷Masikin tukhom chukloi pumin Pumapa vâipôl hih nin sâka, a khuri renga buong ngei kai chu Pumapa taksa le thisen chung a theiloi chang nin tih, tiin ajûi sa ngâi ani.
- ²⁸Masikin mitin inphuol bak unglâ, masuole vâipôl hah sâkin male khuri renga hah buong roi.
- ²⁹Vâipôl sâkpu le khuri renga buongpu ngei han Pumapa taksa omtie nin riet minthâr nônchu nin sâk le nin buong sika han nin chung a roijêkna nin mintung ani.
- ³⁰Masika han kêng nin inzala, damloiin nin oma male mi tamtak nin thi.
- ³¹Eini nanâkin inphuol bak ila chu Pathien roijêkna nuoa om no uh.
- ³²Aniatachu rammuol leh munkhata theiloi ei chang loina rangin Pumapa jêkin le dûkmintongin ei om ngâi.
- ³³Masikin, ka lâibungngei le sarnungei, Pumapa jânbu ot ranga nin intûpin inngâk inlôm ngâi roi.
- ³⁴Nin intûpin Pathien roijêkna nuoa nin omloina rangin tutu khom a vonchâmin chu a ina nêk rese. Roi dangngei nâm chu ko hong tika hong min sûk ki tih.

1 Korinth 12

Ratha Inthieng renga manboipêkngai

- ¹Atûn, Ratha Inthieng tienga manboipêkngai chungroia nin miziek ngei mindonin. Ka lâibungngai le sarnungei hima roia han adiktakin nin riet rangin nangni ku nuom.
- ²Sonong nin ni lâihan chu ringna dônloi mirimilngai biekna lamtieng tuong minvâiin nin om ngâi ti nin riet.
- ³Tutên Pathien Ratha ruoiin, “Jisua chu vânisal ani!” ti thei ngâi mak ngei ti le tutên Ratha Inthieng ruoi loiin, “Jisua chu Pumapa ani,” ti thei mak ngei ti hih nin riet rangin ku nuom.
- ⁴Rathatienga neinunpêkngai adadang an oma, aniatachu ha Ratha nanâk han a pêk ani.
- ⁵Sinthona lam adadang ngei aoma, aniatachu Pumapa sin nanâk ani.
- ⁶Sinthona rangin thotheinangei adadang an oma, aniatachu Pathien nanâkin mitin kôm sin an thona rangin thotheina a pêk ngei ngâi ani.
- ⁷Mitin satna rangin Ratha aom ti ei misang chita lam tamtakin ânlang.
- ⁸Ratha han mi senkhat kôm vârna sip chong misîr theina a pêka, midang kôm han ma Ratha dên han rietna sip chong a pêk ngâi.
- ⁹Ma Ratha inkhat nanâk han mi inkhat kôm taksônna a pêka, midang kôm han mindam theina a pêk.
- ¹⁰Ratha han mi inkhat kôm sin kamâmom thotheina a pêka; adang kôm, Pathien chongbê misîr theina a pêka; male midang inkhat kôm Ratha adik le dikloi riet sensâi theina a pêka. Midang inkhat kôm rietloi chonga thurchi misîr theina a pêka, male midang kôm rietloi chong rilminthâr theina a pêk ani.
- ¹¹Aniatachu ha ngei murdi thopu hah Ratha inkhat dên ania; a nuom lam angtakin, mitin kôm manboipêk adadang a pêk ngâi ani.

Takpum inkhata abâkngai tamtak

- ¹²Khrista hih takpum inkhat angin ania, abâkngai tamtak a dôna, abâkngai tamtaka sin nikhomsenla maha takpum inkhat dên ani.
- ¹³Ma angdên han, ei rêngin Judangei mo, Jentailngai mo, suokngai mo, suokngai niloi mo takpum inkhata om rangin Ratha inkhat dên han baptis ei nia, male ei rêngin Ratha inkhatin buong rangin pêkin ei om zoi ani.
- ¹⁴Takpum hih abâk inkhat vai niloiin, abâkngai tamtak ani.
- ¹⁵Kepha hin, “Kut ki niloi sikin takpuma kop mu-ung,” ti ta senla masika han takpuma koploi ni uol no nih.

¹⁶Kuor hin, “Mit ki niloi sikin takpuma kop ni mu-ung,” ti ta senla masika han takpuma koploi ni uol no nih.

¹⁷Takpumpui hih mit nizat ta senla kho angin mo a rangâi thei rang? Kuor nizat ta senla inmo amirim a riet rang?

¹⁸Ma anghan, nikhomrese, Pathien'n takpuma hin a nuomnana muna a abâk a mokhop ani.

¹⁹Anrêngin abâk khat ni ta senla, takpum khom om no ni!

²⁰Ma anghan abâkngai tamtak nikhom senla takpum chu inkhat kêng ani.

²¹Masika han mitngai hin kutngai kôm, “Nangni nâng mak me!” ti thei mak ngai. Lu khomin kephangei kôm “Nangni min nâng mu-ung!” ti thei uol mak.

²²Ani, hima nêkin, takpum abâk râtloi anga ânlang ngai hih kam an nâng uol tatak ania;

²³male takpuma ei minlut ok ngâiloi abâkngai hih ei minlut tak ani ngâia; ei takpum abâk enhoi bâkloi ngai hin enhoina lien uol an man ngâi,

²⁴ei takpum abâk enhoi uol ngeiin chu ma anga tho rang hah nâng mak. Pathien lelên enhoina dônloi abâkngai hah minlut uolin takpum hih aminpholom ani.

²⁵Masikin takpuma hin insenna om maka; abâkngai murdi hin inangsarrin an mindon inlôm ngâi ani.

²⁶Ma anghan abâk inkhatin atuongin chu abâk dangngai khom an tuong puisa ngâi; abâk inkhatin minpâkin aomin chu abâk dangngai murdi'n an râiasân pui ngâi.

²⁷Nin rêngin Khrista takpum nin nia, male nin sika abâk inkhat chit nin ni.

²⁸Koiindanga Pathien'n hi mingai hih an mun chita a dar ngeia: inkhatna târtongai, inikna dêipungei, inthumna minchupungei; masuole chu sininkhêl sinpungei, mindam theina ranak dôn-pungei, mi san theina ranak dôn-pungei, roijêk theina ranak dôn-pungei le rietloi chonga thurchi misâr theina manboipêk changpungei hah an ni.

²⁹Anrêngin târtongai mini, dêipungei mini, minchupungei mini ni let mak ngai. Mitinin sininkhêl ngai sin thei let mak ngai

³⁰ri-ngai mindam theina mini, rietloi chonga thurchi misâr theina mini, rilminthâr theina mini dôn let mak ngai.

³¹Hanchu, manboipêk kâmom uol ngai chunga han nin mulungngai hah dar roi. Nikhomrese, mangai kêra asatak, chu a nuoia hih ani.

1 Korinth 13

Lungkhamna

- ¹Miriam chongngei le vântîrtonngei chongin thurchi misîr thei khom rongalungkhamna ko dôn nônchu, ko chongngei hih jâmluong miring aninônchusûmeng tôk miring angin kêng ani rang.
- ²Thurchi misîr theina neinunpêk dôn khom rongal; chong inthupngei murdi rietheina le rietnagei nâm dôn khom rongal; muolngei thînpai theina taksônna dôn khom rongal aniatachu lungkhamna ko dôn nônchu, ite ni mu-ung.
- ³Inriengngei rangin ko dôn murdi pêk khom inlang, male ka takpum tena khom kâng let rangin ka takpumpui pêk khom inlang, lungkhamna ko dôn nônchu ite a satna om mak.
- ⁴Lungkhamna chu atuongdiera male moroina adôna; narsa ngâi maka, inpâk ngâi maka, omin-ân tho ngâi maka;
- ⁵Lungkhamnân chu omsaloingei tho ngâi maka, ama satna rang rok ngâi mak, a ningthik ngâi mak; dikloinangei mindon tit ngâi mak;
- ⁶Lungkhamnân chu saloina arâisân ngâi mak, aniatachu, chongdika kêng arâisân ngâi.
- ⁷Lungkhamnân chu atuong zajâma; a taksônna ngei, a sabeina ngei le atuongtheina ngeia duoi ngâi mak.
- ⁸Lungkhamna hih kumtuonga om ani. Thurchi misîrnangei hih om khom senla la min mong nîng atih; rietloi chongngeia manboipêkngei hih om khom senla, la mong an tih; rietna hih om khom senla lan mang atih.
- ⁹Akiploiin ei rieta akiploiin thurchingei ei misîr ngâia;
- ¹⁰hannirese akipphar hih ajuong tika chu akiploi hih inmang atih zoi.
- ¹¹Nâipang ki ni lâihan chu, ko chongngei, ko khorietsangei le ki mindonnangei khom nâi ânpanga; aniatachu atûn chu ulien ki ni zoi sikin nâipang tho ngâi hah chu ka mâk zoi ani.
- ¹²Atûna ei mu hih chu lîmena rimil ânlangdap angin ania; nangkana chu mâi-intongin la mûng ei tih. Atûna ki riet hih chu akiploi ania; nangkana chu kip atih zoi, Pathien'n keima ni rietna akipphar anghan.
- ¹³Mangei inthum: taksônna, sabeina, le lungkhamna ngei hi chu omtit atih; male mangei lâia aroiinpuetak chu lungkhamna hih ani.

1 Korinth 14

Ratha manboipêk tamtakngei roi

- ¹Hanchu, nin rujûl rang tak chu lungkhamna hih ani. Rathatienga neinunpêkngêi chunga han nin mulungngêi ha dar roi, aliekin Pathien thurchi misîr theina neinunpêk hah rujûl roi.
- ²Rietloi chonga chongpu ngei hah miriemngêi kôm an chong nimaka Pathien kôm an chong ani, asikchu an chong hah tutên riet mak ngei. Anni ngei han Ratha sinthotheinân chongtak inthupngêi ha an misîr ani.
- ³Aniatachu Pathien thurchi misîrpu ngei han miriemngêi kôm an misîr ania male sanna ngei, mohôkna ngei le phûkdâina ngei apêk ngâi.
- ⁴Rietloi chonga chongpu ngei han chu anninanâk vai mâsôn an ta, aniatachu Pathien thurchi misîrpu ngei han chu koiindang pumpui an sinsiem ngâi.
- ⁵Nin rêngin rietloi chongngêiin thurchi nin misîr rangin nangni ku nuom; hannirese Pathien chong phuong theina neinunpêk dôn rangin nangni ku nuom uol. Rietloi chong chu koiindang pumpuiin sinminsana an manna ranga rilminthâr thei an om no vângin chu Pathien thurchi misîrpu hah rietloi chonga thurchi misîrpu nêkin chu a lut uol ok ani.
- ⁶Masikin atûn sûngsuokngêi, keiman nin kôm juongin rietloi chong juong tho rong, chongphuong mo, rietna mo, ratha chongphuong mo, minchuna chong mo, ku juong chôl nôncu nin ta rangin imo asena aom rang?
- ⁷Ringnadônloi miringhoi mangruongêi theili mo, serânda mo an mût le an ât hah amiring ânthâr nôncu ilâ mo an minjûi khom ânthâr nôncu kho angin mo riet thei ani rang?
- ⁸Bekul khom hih a mûtpu'n a mût minthâr nôncu tumo râl kâp rangin ânthok rang?
- ⁹Ma angdên han, nangni khom chong rietbai lamin nin misîr nôncu, i roi mo nin misîr inmo riet thei ani ranga? Nin chongngêi hah môk chochong ani rang!
- ¹⁰Rammuola hin chong jât tamtak aoma, hannoma inkhat luo asena boi reng om mak ngei.
- ¹¹Aniatachu achong omtie ki riet nôncu kei rangin chu ma chong mangpu ngei hah ramdangmingêi nîng a ta, kei khom anni rangin ramdangmi nîng ki tih.
- ¹²Ratha neinunpêkngêi dôn rang nin ngâitui anghan jâttin nêka asatak koiindang sinmindingna ranga mang uol rang ngei ha man rangin pût ngêt roi.
- ¹³Hanchu rietloi chonga chong ngâipu han a rilminthâr sa theina rangin chubaitho ngêt rese.
- ¹⁴Masikin rietloi chonga ku chubaitho chu ka ratha'n chu a chubai ngâia, hannirese ki mindonna chu mahan kopna dôn mak.

¹⁵Hanchu itak mo ko tho rang ani zoi? Ratha'n chubaitho ka ta, ki mindonna khomin chubaitho sa ki tih; Ka ratha'n lâtho ka ta, ka mindonnân khom lâtho sâng ka tih.

¹⁶Pathien kôm, Ratha vaiin râisânchong ni rilin chu, mi papai ânsungngei han no chong omtie hah riet noni ngeia, inmo na râisânchongril hah “Amen” an ti thei rang?

¹⁷Pathien kôma na râisânchongril chubaithona han asân asa khom ni ti thei, nikhomsenla midangngei sanna chu nimak.

¹⁸Nangni nêkin rietloi chong ka mang uol sikin Pathien chung a asân ka râiasân.

¹⁹Hannirese koiindang inkhôma chu rietloi chongbâingei isâng tamtak misâr nêkin mingei an rietthei rang lamin minchuna chongbâingei rangnga misâr ki tih.

²⁰Sûngsuokngei, nin mindonna tieng chu nâi inpang no unglâ; sietna tieng chu nâi inpang roi, nin mindonna tieng chu ulien ni roi.

²¹Pathien lekhabungeia ma hih miziek ani: “Pumapa'n, chong dangin ramdangmingei mûrrin ki mingei kôm thurchi misâr ki tih. Ramdangmingei bâiin chong ka ta, hannirese ki mingeiin ni rangâi pe uol noni ngei,” a ti, ti hih.

²²Masikin rietloi chong thona neinunpêk hih iemloipungei rangin sînthona ania, iempungei rang nimak, hanchu Pathien thurchi chongphuongna neinunpêk chu iempungei rangin sînthona ania, iemloipungei rang nimak.

²³Hanchu, koiindang pumpui inkhômna han nin rêngin rietloi chongin chong ta unglâ, male amolmangei senkhat aninônchu iemloipungei hong lût ta senla ngei, nin rêngin nin chângluk zoi nangni ti noni ngei mo?

²⁴Aniatachu nin rêngin Pathien thurchi misâr ta unglâ, iemloipungei aninônchu mi amolmangei, ahong lût ngei hah nin chong an rieta han an siet tie min riet atih. An chong rangâi han anni ngei ha jêk a ta,

²⁵an mindonna inthupngei hah minlangin om atih, an sietnangei inphuong an ta, inbokin Pathien chubaimûk an ta, “Nin lâia Pathien aom tatak!” an ti rang.

Koiindang sûnga chongpêk

²⁶Ka lâibungngei le sarnungei, ma hih ki tina abi chu ani. Nin inkhômin mi inkhatin minpâkna lâ, adangin minchuna chong, adangin Pathien renga chongphuong, male adangin rietloi chongngei le rilminthârna ngei nin dôn pak ngâi. Jâtin koiindang min sana rangin tho ngêt ni rese.

²⁷Tumakhatin rietloi chongin a chongin chu, inik mini, atamtakin inthum mini nisenla, inthâk senla ngeia male tumakhatin imo an ti ha rilminthâr ngêt ni rese.

- ²⁸Hannirese tute a rilminthâr thei an om nôncu koiindang inkhôma chu dâirek ngêt senla ama le Pathien kôm vai mang rese.
- ²⁹Pathien thurchi misâr ngei khom inik, inthum vaiin misâr senla ngei, midangin asadimin lei rangâi rese ngei.
- ³⁰Aniatachu ânsung ngei lâia han inkhat lamin chongphuong rang an omin chu a misâr masapu hah dâirek rese.
- ³¹Mi nâmin an inchu theina rang le mohôka an om theina rangin inkhat inkhatin Pathien chong nin misâr thei.
- ³²Pathien thurchi misâr theina neinunpêk hah thurchi misârpu jêkna nuoia aom rang ani.
- ³³Pathien'n injêl rangin mi nuom maka, minhoi rang le inngêi rangin mi nuom sikin. Koiindang tina Pathien mingei anghan,
- ³⁴koiindang inkhômngêia chu nupangngei hah an dâirek rang ani. An chong rang phal nimaka; Juda balamin ati anghan chong an jôm ngêt rang ani.
- ³⁵Imakhat riet nuom an dônnin chu insûnga an pasalngei rekel rese ngei. Nupang rangin chu Pathien koiindang inkhômna taka chong rang hih inzakupui om ani.
- ³⁶Pathien chong hi nangni renga suok ani thei rang mo? Aninônchu nin kôm vai mo ajuong tung?
- ³⁷Tumakhatin Pathien thangtheipu mini, rathatienga neinunpêk dônnin mini an inbên chu nin kôma ko chong miziek hih Pumapa chongpêk ani ti lei riet ngêt rese.
- ³⁸Hannirese lunghâng a tho nôncu ama khom lunghâng tho no roi.
- ³⁹Masikin, ka lâibungngei le sarnungei, Pathien thurchi misâr hih asân lunghâng tho unglâ rietloi chonga thurchi misâr ngei khom khap no roi.
- ⁴⁰Neinuntin hih asadimin le ani rang lam takin tho ngêt ni rese.

1 Korinth 15

Khrista inthoinôkna

- ¹Male ka lâibungngei le sarnungei, Thurchi Sa nangni ke lei ril hah atûn hin nangni minrietiônk ku nuom, male ma nin pomna chungâ han nin taksônna ânding mindet ngâi ani.
- ²Ma hah thurchisa, nin kôma ki misâr hah ani. Nin iem papai aninoa, nin pom mindet tatakin chu ma thurchisa han nangni sanminring ani zoi.

³Moton renga ka man kai chu nangni ki misîr pe ngâi, ma hi aroiinpui tataka: Khrista hah Pathien Lekhabungeia ânziék angin ei nungsiengei sikin a thia;

⁴Pathien Lekhabungeia ânziék anghan an phûma, sûnthum suole kaithoiin a oma;

⁵Peter kôm ânlâra masuole tîrton sômleinik ngei nâm kôm ânlâr nôk.

⁶Hanchu voikhat chu ama jûi ngâi ngei raza rangnga nêka tam ngei lâia ânlâr nôka, mangei lâia mi senkhat thi ta khom senla ngeia, atam uol chu an la ringa.

⁷Hanchu Jacob kôm ânlâr nôka, masuole chu tîrtonngei nâm kôm ânlâr nôk.

⁸Anûktaka chu keima azora niloia suok nikhom rongka ko kôm khom ânlâr nôka.

⁹Kei chu tîrtonngei lâia achîntak, Pathien koiindangngei dûk ko tho sika tîrton inti rang luó inhoi loi ki ni.

¹⁰Aniatachu Pathien moroina sikin imo ki ni chu ki ni zoi, male a moroina ni pêk ha akorong chang maka. Manêk han tîrton dangngei murdi nêkin a sin uol tak ka la ni, nikhomsenla maha keima ki sin nimaka, hannirese Pathien moroina ko kôma om han kêng a sin ani.

¹¹Masikin, keima renga mo, anni renga mo, ma hih kin renga kin misîr ania, male nangni khom ma hih nin iem zoi ani.

Ei inthoinôkna

¹²Atûn, Khrista hah thina renga ânthoinôk ti chong nangni ki misîr pe hah nin iem suole khom ithomo nin lâia mi senkhatin mithi inthoinôkna reng hih om mak nin ti?

¹³Mithi inthoinôkna reng hih aom nônchu Khrista khom kaithoiin om mak tina ania;

¹⁴male Khrista hih thina renga kaithoiin aom nônchu, ite misîr rang dôn mak mea, male nin iem rang khom ite dôn mak chei.

¹⁵Mapêna han, Khrista hih thina renga a kaithoi kin ti sikin Pathien chungroia milak kin minlang nîng a ta, mithi ngei aringin kaithoiin om mak ngei ti hih adikin chu, Khrista khom a kaithoi loi nîng atih.

¹⁶Mithi ngei kaithoiin an om nônchu Khrista khom kaithoiin a la omloi nîng atih.

¹⁷Male Khrista hah kaithoiin aom noa anînchu nan taksônna hah khom kâmnângloi nîng a ta, male nin sietnangei han nin lân mang tit ani rang.

¹⁸Mapêna iempungei Khrista jâra lei thi ngei khom hah an inmang zoi tina ani sa rang.

- ¹⁹Atûnlâi damsûng rang vaia Khrista chungã sabeina dôna masuole chu dôñ khâiloi einin chu rammuola mingei nãm nêka inriengomtãk nîng ei tih.
- ²⁰Aniatachu chongtak chu Khrista hah thina renga kaithoiin aom ngêt ani, thina taka a in ngei hah kaithoiin la om ngêt an tih, ti khâmân.
- ²¹Miriam inkhat sika thina ahong om anghan miriem inkhat sika nanâkin inthoinôkna ahong om ani.
- ²²Mi murdi Adam leh an inzomna sika an thi anghan mi murdi Khrista leh an inzomna sika kaithoiin om an tih.
- ²³Hannirese an zora angtakin kaithoi nîng an tih; amotontaka Khrista ania, Khrista ta ngei chu a juong nôk tika kaithoiin om an tih.
- ²⁴Hanchu zora mongna tung a ta; rathatienga roijêkpungei, rachamneipungei le sinthotheinangei hah Khrista'n zoilet a ta, male Rêngam hah Pa Pathien kuta bâng atih zoi.
- ²⁵Pathien'n a râl ngei a mene rieia a ke nuoia a dar mâka chu Khrista ân lal tit rang ani.
- ²⁶Râl nûktaka zoia om rang chu thina hih ani.
- ²⁷Pathien Lekhabu'n atia, "Pathien'n neinunngai *murdi* a ke nuoia a darleta," masikin "neinunngai *murdi*" ti chong hin Pathien neinunngai *murdi* Khrista ke nuoia darpu chu huom mak tiin ânlang ani.
- ²⁸Hannirese neinunngai *murdi* Khrista roijêkna nuoia a dar tika chu, Nâipasal khom Pathien neinunngai *murdi* a nuoia a darpu nuoia om a ta; male Pathien chu neinuntin chungã roijêk atih zoi.
- ²⁹Atûn, mi senkhatngei an ti anghan, mithi ngei aringin inthoinôk mak ngei, an ti hih adikin chu, athipu sika baptis chang ngei chungroi ha imo ani rang? Imo sintho lenna ha an sabei rang? Irang mo mingei han athipu sika baptis an chang ranga?
- ³⁰Male eini rang khomin itho mo azoratina chipumin ei tân ngâi?
- ³¹Ka lâibungngei le sarnungei, nîngtin thina ko tong ngâi! nangnia inpâkna ko dôñ ha, ei Pumapa Jisua Khrista leh ei ringnun inzomna han mi minlang ngâi ani.
- ³²Miriam tho ngâi vaia Ephesia "ram sarângngei" insuolpui ki nînchu, kei rangin imo ân lãp ranga? Hanchu, mithi ngei ha aringin kaithoiin an omloi rangin chu senkhat ngei ti ngâi anghan, "Tho sãk ei ta, lei buong rei u, nangtûka ei thi rang ani zoi sika."
- ³³Mo no roi. "Champui saloi ngeiin nunchan asa an siet ngâi."

³⁴Nin rietnagei adika han hongkîr nôk unglâ, male nunsietaka nin omna ngâi lamngei ha mak roi. Nin lâia mi senkhat chu Pathien rietna reng nin dônloi sikin nin inzakna ranga mahi ki ti ani.

Inthoinôk takpum

³⁵Tumakhatin, “Inmo mithi ngei hah aringin kaithoi an om rang? Kho anga takpum mo an dôn rang?” Tiin a rekel thei.

³⁶Nangma amo! Pila sachi ni ling hah athi bak nônchu mông ngâi mak ngah.

³⁷Male na sachi ling khom hah a takpum la om rangin ling mak chea, aramal samsâi kêng nu tuh ngâi duo, bu ramal mini aninônchu chimu dang mini khom ani thei kêng.

³⁸Pathien'n a nuom lam angtakan chimûtin takpum a min pêla; ama'n chimûtin an takpum rang chit a pêk ngei ngâi ani.

³⁹Iring parângei taksa nâm hih in-ang suo maka; munisingei taksa adang, sângei taksa adang, vângei taksa adanga, male ngangei taksa adang ani.

⁴⁰Male invân takpumngei le pilchung takpumngei khom aoma; invân takpumngei mêlsana adang ania, pilchung takpumngei mêlsana adang ani.

⁴¹Nisa khom amêlsana adanga, tha mêlsana adang, ârsingei mêlsana khom adang sa; ârsingei lâia khom an mêlsana ajât dadangngei aom ani.

⁴²Mithi ngei aringin an inthoinôk tika aom rang chang chu hih anghin ani. Takpum hih phûmin aom tika chu ma hih monthei ania, kaithoiin aom lechu montheiloî nîng atih.

⁴³Phûmin aom han chu mêlsietak le râtloi tak nîng a ta; inthoinôkin aom lechu enhoitak le râtak nîng atih.

⁴⁴Phûmin aom han chu taksatienga takpum nîng a ta; kaithoiin aom lechu rathatienga takpum nîng atih. Taksatienga takpum aom sikin rathatienga takpum khom aom rang ani.

⁴⁵Pathien lekhabu'n atia, “Miriem masatak, Adam, chu miringin sin ania”; Anûktaka Adam hih chu ringna-pêk Ratha ani.

⁴⁶Rathatienga hah ajuong om bak nimaka, taksatienga hah ajuong om baka, masuole kêng rathatienga hah ajuong om ani.

⁴⁷Adam masatak hah pila sin, pil renga hong ania; Adam inikna hah chu invân renga juong ani.

⁴⁸Pil ta ngei chu pila sinpu hah an phuo; invân ta ngei chu invân renga juongpu hah an phuo ani.

⁴⁹Pila sinpu miriem phuona ênsil anghan, masikin invân renga miriem phuona khom ei lan sil rang ani.

⁵⁰Lâibung le sarnungei, “Taksa le thisen hin Pathien Rêngram luu thei no nia, thithei hin thitheiloina hah luu thei no ni,” ti hih ki tina ani.

⁵¹⁻⁵²Chongtak inthup hi rangâi roi: Ei rêngin chu lei thi riei no ih, aniatachu bekul nûktaka ahôn ring lehan, chomoltên, mitmisim kongkârin ei rêngin inthûlin om ei tih. Bekul ânring tikin chu mithi ngei khom thi nôk khâiloi rangin kaithoiin om an ta, male eini khom inthûlin om ei tih zoi.

⁵³Thithei hih thitheiloiin thûlin om ngêt a ta; athi ngâi khom hi athi ngâiloiin inthûlin om ngêt atih.

⁵⁴Masikin hi thithei hih thitheiloiin thûlin aom lechu, hanchu Pathien lekhabua mizieka om hah hong tung tatak atih zoi: “Thina hih sietminmang ani zoia; motorna hih ânthôphar zoi!”

⁵⁵“O Thina, no motorna hih khonmo aom zoi? O Thina, ni minna theina ranga sinthotheina hih khonmo aom zoi?”

⁵⁶Thinân minna theina ranga sinthotheina chu sietna renga aman ngâi, male sietna sinthotheina chu Balam renga aman ani.

⁵⁷Hannirese ei Pumapa Jisua Khrista jâra motorna mi pêkpu Pathien kôm râisânchong om rese!

⁵⁸Masikin ko moroitak lâibunggei le sarnungei, adet le ngîrtitin inding roi. Pumapa ta ranga nin sintho hah ningsiettakin sin tit unglâ, Pumapa chuonsin hih mangmunboi chang tet ngâi mak, ti nin riet sikin.

1 Korinth 16

Iempu-champuingei ranga chôiruol

¹Atûn chu, Judea rama Pathien mingei ranga chôiruol chungroi nin miziek anghan. Galatia koiindanggei kôma ki ril anghan nangni khom lei tho ngêt sa roi.

²Masikin ko hong tika chôiruol rusuong anâng lolina rangin, Pathienni tinna nin sisika nin sum suo ngei renga hah khâi ngêt unglâ, male lei dar roi.

³Ko hong suole, nin neinunpêkngêi chôia Jerusalema se ranga nin thangpu ngei hah mêlinrietna lekhangêi min chôiin tîr ngei ki tih.

⁴Hanchu ke se ranga ânhoi ani vângin chu keima leh mên ruoipui thei an tih.

Paul mintuonangei

⁵Macedonia rama ka chai rang anâng sikin Macedonia rama ka chai suo tika nin kôm hong ki tih.

⁶Nin kôm chu asôtzan om ki tih, phalbi sâng kai khom anithei, kho-kho tieng khom apêna ke sena ranga ma san thei nin tih.

⁷Atûna selampala nangni mu rang chu nuom mu-unga; Pumapa'n aphal ngâiin chu nin kôm zora sôtzan châm rangin kên sakei ani.

⁸Ephesi khuo hin Pentecosni tena chu ko om rang.

⁹Mahan mi doipungei tamtak om khom rese ngeia, sin roiinputak le sin kâmomtak ki sin theina ranga zorâanchum tak aom ani.

¹⁰Timothy hah nin lampui tieng a hong duoia anînchu, chitet loa nin kêra aom theina rangin lamdon lei tho roi, keima angin Pumapa sin a tho ngâi sikin.

¹¹Tutên enkhum no rese ngeia, phûkdâitakin ko kôm a hong kêrnôk theina rangin san ngêt unglâ mojôk roi; iempungei leh munkhata hong rangin ka lei sakei kêng.

¹²Atûn, ei lâibungpa Apollos chungroi chu, iempu danggei leh munkhatin nangni hongpan rangin ko mohôk tita, hannirese ama hih ma vêl hin chu hong rangin la minnuom phar nimaka. Nikhomrese zorâanchum a man tika hong atih.

Azoinataka chongbâingei

¹³Intûngchienin om unglâ, taksônna han inding det unglâ, hâi unglâ, râttakin om roi.

¹⁴Nin sin ngei murdi hah lungkhamnân sin roi.

¹⁵Ka lâibunggei le sarnungei, Stephanas le a inmingei chungroi hah nin rieta; anni ngei hah Achaia rama Khristien chang masatak an nia, Pathien mingei chuonsin ranga inpêk an nia,

¹⁶ma anga mingei ruoipunina, le tumakhat khom anni leh chuonsin ngâingei le sintho ngâingei chu an chong jûi rangin nangni ke ngên ani.

¹⁷Stephanas, Fortunatus, male Achaicus ngei; an hong hih asân ka râiasâna nin omloi khom indang loiin min donsûia

¹⁸male nin mulungrîngei nangni an minhar pe anghan, kei khom min minhar kêng. Ma anga mingei hih minlut rang rohoi piel an ni.

¹⁹Asia ramhuol sûnga koiindanggei hin an chibaingei nangni an hong muthuona; Aquila le Priscilla male an ina koiindang inkhôm ngâingei hin Khristien chibaimûknangei nangni an hong muthuon.

²⁰Hi muna iempungei murdi khom chibaimûknangei nangni an hong muthuon. Intum inthiengin inkhat le inkhat inchibai inlôm roi.

²¹Keima ku kut lelên mahi ki miziek ani: Paul renga chibaingei hi.

²²Tukhom Pumapa lungkham mu loi ngei chun an chungá khomâksâmna om rese! *Marana tha* Ei Pumapa, a juong!

²³Pumapa Jisua moroina hah nin kôm om rese.

²⁴Khrista Jisua sika nangni ku lungkhamna chu nin rênga nin kôm om rese.

2 Korinth

2 Korinth 1

¹Paul, Pathien lungdoa Khrista Jisua tîrton, le ei lâibungpa Timothy ngei renga han, Korinth taka Pathien koiindang, male Achaia ram pumpuia Pathien mingei murdi kôm han:

²Pathien ei Pa le Pumapa Jisua Khrista'n moroina le inngêina nangni pêk rese.

Paul'n Pathien kôm râisânchong a misîrna

³Ei Pumapa Jisua Khrista Pathien le Pa, mulungjûrpuina sip Pa, sannangei murdi juongna Pathien kôm han râisânchong misîr ei tih u!

⁴Ama'n ei intaknagei murdia mi san ngâia, masikin eini khom Pathien renga sanna ei man nanâk hah mangin midangngei an intakna murdia ei san thei ani.

⁵Khrista tuongna tamtak ngei han rangtum ei dôn anghan Khrista jârin Pathien sanna lien khom han rangtum ei dôn ani.

⁶Kin tuongin chu, mahah sanna le sanminringna nin manna rang ania; sannin kin omin chu, hanchu nangni khom sannin nin oma male tuongna kin tuong hah tuongdierna dôna tuong rangin râtna pêkin nin om ani.

⁷Masikin nangni kin sabeina hah innîk tet ngâi mak; kin tuongnageia rangtum nin dôn anghan sanna kin manna ngei khoma hin rangtum nin dôn sa tiin kin riet.

⁸Lâibungngei le sarnungei Asia ramhuol sûnga intakna kin tong roi hah nangni minrietnôk kin nuom. Kin chungu puokrikngei hah alien rai sik le arik rai sikin la ring rangin sabeina reng dôn khâi mak me.

⁹Kin chungu thina rangin roi an jêkmasat angin kin riet. Hannirese maha chu keinia hin minngam loiin Pathien mithi kaithoi nôkpu kôm kin minngam theina rang sika alei ni.

¹⁰Ma anga thina chiruoi inrîngomngei renga hah mi sanminring zoia, mi la sanminjôk atih, male kin sabeina ama chungu kin minngama, ama'n mi la sanminring nôk atih,

¹¹nangni khom kin ta rangin chubaithonangeia mi nin san anghan. Masikin kin ta ranga chubaithona tamtak ngei hah thuinin om a ta, male Pathien'n sat mi vur a ta; male mi tamtakin kin ruthûlin a kôm râisânchong misîr an tih.

Paul Mintuonangei a thûlna

¹²Hi rammuola kin ringnuna leh aliekin nangni le kin inkainangei han munisi vârna sika ni loiin Pathien moroina sinthotheina sikin Pathien-pêk ngamna le takintâinân roi ajêka mi mindeta kin sielesarietnân mi ril sikin kin inpâkpui ani.

13-14 Nin pore thei le nin rietthei kai kêng nin kôm kin miziek. Nikhomsenla atûn hin la rietthei sabak no khom ungla, mi la rietthei tatak nin tih, tiin ka sakei ani, ei Pumapa Jisua Nikhuo han nangni kin minpâk anghan mi nin minpâk theina rangin.

15 Mangei murdi hah ki riet minthâr sabaka, vêlnik satvura nin om theina rangin nangni hongpan bak rangin mintuonangei ki sin ani.

16 Macedonia rama ke se balamin nangni hongpana, ko hongkîr nôk tieng khom nangni hongpan nôk rangin ki mintuo ani, Judea rama ku khuolchaina ranga han mi nin san theina rangin.

17 Hi anga mintuona sika hin mintuona thûldul mi anghan kên lang mini? Ki mintuonangei ki sin lâihan, ranghuolna bôknangei renga ki sin mo, “Ani, ani” le “Niloi, niloi” voikhat rengin ti ranga ânzoi sai mini?

18 Adiktakin Pathien'n chongtakin a chong ngâi anghan, nin kôma ko chonginkhâm khom hah “Ani” le “Niloi” nimak.

19 Jisua Khrista, Pathien Nâipasal, a thurchi nin lâia Silas, Timothy le keiman kin misîr hah, “Ani” le “Niloi” hih ani loi sikin. Ama hih Pathien “Ani,”

20 Pathien chu ama chonginkhâmngai murdia “Ani ngâi” ani sikin. Masika han kêng Jisua Khrista jârin Pathien roiinpuina rangin “Amen” ei ti ngâi ani.

21 Ma hih eini mi sinpu Pathien lelê ania, nangni leh munkhata, Khrista leh inzoma ei ringna mi min thîk pea; ma hih atheipiela mi darpu Pathien nanâk hah ania,

22 ei chungâ pumanina a sînthona darpu, le ei ta ranga neinun a lei mintûp murdi hah khâmna anghan ei mulungrîlgei sûnga Ratha Inthieng mi pêk ani.

23 Ni rietpuipu rangin Pathien ko koia—ku mulungrîl a riet ngâi! Nin ruthûla Korinth khuoa se khâi loi rangin ka masat zoi ani.

24 Nin iem ngêt rang thurchi nangni misîr pe rang pût mak mea; taksônna han nin inding det tiin kin riet. Manêkin, nangninanâk nan râisânna rangin nangni leh sin kin tho ani.

2 Korinth 2

1 Masikin nangni minngûi nôk ranga nin kôm hong khâi loi rangin ku mulungbôk ki sinsiem zoi.

2 Nangni minngûi rongâ tumo râisân mi shak ranga? Ki minngûi loi tute om mak ngei.

³Masika han kêng ke lekhamuthuon hah nin kôm ki miziek—râisân mi shak rang ngei tak hah nangni minngûi ranga hong rang chu nuom mu-ung. Ka râisânin chu nangni khom nin râiasân ngâi ti ki riet sikin.

⁴Mulungbôk injêl leh beidong takin le mitrithinngai tamtak tâkpuma ki miziek ani; ke neinunkhîn chu nangni minngûi loa, nin rêngin kho dôr mo nangni ku lungkham hih nin riet theina rang sika ani.

Asaloithopu ranga ngâidamna

⁵Atûn, hin tumakhatin nangni minngûiin chu, keima mi minngûi nimaka, nin rêngin nangni minngûi ri-riek let ani. (Hima hih ki tina abitak chu a chung a ânngar rai ku nuom loi sika ani.)

⁶Ha mi hah chu nin lâia mi tam uolin ma anga dûk nin tho hah ahun zoi ani.

⁷Nikhomresea, atûn, ngâidam ungla male ama hah mohôk roi, ânngûi phar lina rangin.

⁸Masikin ama hah nin lungkham tatak ani ti nin min riet rangin nangni ki ngên.

⁹Nin kôma lekhamuthuon ki miziekna bi tak chu minsina han nin lei hong indingdet le nangni ki rilna chong zoratin jôm tit rangin nin inthok mo ti riet ku nuom sika ani.

¹⁰Tukhom amanu mo amapa mo a sintho chung a nin ngâidam tika chu kei khom ka ngâidam ngei ani. Kei khomin ka ngâidam sa ngâi. Ka ngâidam tika chu, adiktakin, i-ih khom ngâidam rang ka nâng kai chu nangni sikin Khrista makunga ka ngâidam ngâi ani,

¹¹Soitan'n ei chung a zorânchum a man lina rangin; a mintuonangei hah ei riet chien sikin.

Troas taka Paul mulungdûktongna

¹²Khrista Thurchi Sa misâr rangin Troas taka ku tungin chu, mataka sintho rangin Pumapa'n lampui mi lei mo-ong pe ku mua.

¹³Aniatachu ei lâibungpa Titus ku mu loi sikin ka kângdoi sabaka. Masikin mataka mingei hah he hoiin ka mathân ngeia Macedonia rama ke se zoi ani.

Khrista jâra motorna

¹⁴Hannirese Pathien kôm râisânchong om rese! Khrista motorna sika lampui jûina han mi intângngei anghan Pathien'n Khrista leh inzomin mi ruoi tit ngâi sikin. Khrista rietna thurchi hah muntina mirimhoi angin minzar rangin Pathien'n mi mang ngâi ani.

¹⁵Keini chu Khrista'n mirimhoi hâla Pathien kôma pêk sanmiring tira om ngei le ân mang tira om ngei lâia minzar anghan kin ni.

16Amang tira om ngei ta rangin chu thina rang mirimsie ania; aniatachu sanminring tira om ngei ta rangin chu ringna rang mirimhoi ani. Hanchu, tumo ha sin thothei rangin achuk rang ani zoi?

17Midangngei tamtak chu Pathien chong hi sadâi thonân an mang anghan keini chu nimak mea; hannirese Pathien'n mi tîrna sikin kêng Khrista tîrlâmngei anghan Pathien mitmua takintâi takin kin chong ngâi ani.

2 Korinth 3

Chonginkhitna athara Tîrlâmngei

1Eini nanâkin ei insong nôkrêk rang mo ani zoi? Nônchu, midang senkhatngei anghan rilminsana lekhamuthuonngei nin kôma rang mini, nin kôm renga mini ei nâng mini?

2Kin lekhamuthuon dôn chu nangninanâk hah ania, mitin riet rang le pore ranga kin mulungrîngeia miziek nin ni.

3Hi lekhamuthuon hih Khrista lelên a mizieka keini mi hong min chôi tiin ânthâr ani. Hima hih pentuia miziek nimaka, Pathien ring Ratha leh miziek ani, male lungpêkngeia miziek khom nimaka, munisi mulungrîngeia miziek kêng ani.

4Khrista jârin Pathien kôm ngamna kin dôn sikin mahah kin ti ani.

5Hi sin tho rang hin ite thotheina le inti theina rangin phalna keinia hin omak. Thotheina kin dôn chu Pathien renga juong ngâi kêng ania;

6ama han balam mizieka niloiiin Ratha taka chonginkhit athar sin hah tho thei rangin mi sin zoi. Balam miziekin thina amintung ngâia, Ratha rêkin chu ringna a pêk ngâi.

7Balam hah lungpêkngeia lekhabulngeia miziek ania, pêka aom lâihan Pathien roiinpuina ânlang ani. Moses mâia vâh hah duoi tetet khomsenla, maha ala rât oka, Israelngei han an mitngei leh ama ha enlak thei mak ngeia. Balam mangin thina amintung ngâi luoi ha, madôra roiinpuina leh ajuongin chu,

8Ratha sinthotheina hah idôra roiinpuina lien uol mo ani rang ani zoi!

9Theiloi mintumna mintung ngâi lu mana a roiinpuin chu; sanminringna mintung ngâi sinthona ha idôr taka roiinpui uol mo ani rang ani zoi!

10Roiinpuina vâh uol ok sika han zora vunsaia roiinpuina vâh hah chu om khâi mak kin ti thei.

11Ma chomolte rang lu mana roiinpuina aomin chu, tuonsôta rang vângin chu idôra roiinpuina lien uolin mo aom rang ani zoi na!

12Ma sabeina hah kin dôn sikin kin hâi ani.

¹³Keini ngei chu Moses anghan nimak me, ama han vâ achuoi tetet le boipharna hah Israel mingeiin an mu loina rangin a mâi hah a mukhûa.

¹⁴Adiktakin, an mulungbôkngai hah ânkhâr ania; male aviensûn tena khom hin chonginkhit muruo lekhabungei ha an porên chu ma mukhûa nanâk han an mulungbôkngai ha amukhû ngâi. Mîn Khrista a zom tika vai kêng ha mukhûa hah pai ani ngâi.

¹⁵Aviensûn tena khom hin Moses Balam, an pore racham ha mukhûa han an mulungbôkngai ala mukhû tit ngâi ani.

¹⁶Hannirese Pathien lekhabu'n Moses chungroi a lei ti anghan, ha mukhûa hah pai thei ani: "Pumapa tieng a hônhei lehan a mâi mukhûa hah paiin aom zoi."

¹⁷Atûn, hi muna, "Pumapa" ti hi chu Ratha ania; male Pumapa Ratha omna nâma chu zalena aom ngâi.

¹⁸Hanchu, kin rêngin mâi mukhû loiin Pumapa roiinpuina min-êlin; male ma roiinpuina nanâk han, Pumapa renga juongpu, Ratha hih, roiinpuina lien uolin ama angin eini mi minthûl ngâi ani.

2 Korinth 4

Pilbêlŋeia Rathatienga rochon omngai

¹Pathien'n a mulugjûrpuiinân hi sin hih tho rangin mi pêka, masikin kin jâminzal mak.

²Neinun inthup le inzakpui om sin ngei hah kin mâka; milak leh sintho mak mea, Pathien chong mi huongnân khom mang mak me. Chongtak vârna akipin Pathien mitmua han mitin sielesarietna mi mitngai mintung rang kin pût ngâi.

³Kin thurchisa misâr hih thupin aomin chu ânman tir ngei renga vai thupin aom ani.

⁴Hi rammuola pathien saloi han an mulungbôkngai hah ijînga a dar pe ngei sikin an iemloi ani. Khrista, Pathien le in-angna dônpu roiinpui tie Thurchi Sa vâ an chung ajuong inlang hah an mu loina rangin an mitngai hah a mincho pe ngei ani.

⁵Keini kin roi misâr mak mea; Jisua Khrista chu Pumapa ani ti kêng kin misâr, male keini khom Jisua jârin nin târlâmngai kin ni ti kin misâr ngâi.

⁶"Ajîng renga avâr hong vâ suok atih!" a tipu Pathien nanâk hah ani, Khrista mêla Pathien roiinpuina vâ suok kin rietna rangin kin mulungrîlŋeia a minvâr zoi.

⁷Hannoma keini rathatienga rochon dôn ngei hih pil bêlŋeia anghan kin ni, sinthotheina lientak hah kin ta niloian, Pathien ta ani ti ânlang theina rangin.

⁸Bâiminkham pe bangin kin oma, aniatachu, duoi uol ngâi mak mea; akâra chu mulungjîngin kin oma, male kin beidong tet ngâi maka;

⁹râlngei tamtak an oma, aniatachu mal le ruol dôn loiin om tet ngâi mak me; male mophop nôinekin om ngâi khom rong unga, sietminmangin chu om mak me.

¹⁰Khotiklâi khom kin takpumngei thitheia hin Khrista thina kin ruput tit ngâi, a ringna khom kin takpumngei hin ânlang theina rangin.

¹¹Kin ringkâr chu Jisua jârin thi rang ichi omin kin om tit ngâi, a ringna khom kin takpumngei thitheia hin ânlang theina rangin.

¹²Mahi aomtie chu keini rangin thinân sin athoa, aniatachu, nangni rang rêkin chu ringnân sin atho ani.

¹³Pathien Lekhabu'n, "Ki iemna sikin thurchi ki misîr ani," ati anghan, ha taksônna ratha nanâk han keini khom kin iem sikin thurchi kin misîr ani.

¹⁴Pumapa Jisua aringa kaithoipu han keini khom Jisua leh mi kaithoi del a ta, male nangni leh a makunga mi tuong atih ti kin riet.

¹⁵Hingei murdi hih nangni jâra ania; Pathien moroinân mi tam uol chungga atungtir anghan, mangei han Pathien roiinpuina rangin râisânchongrilna chubaithonangei Pathien kôm min tung u-uol an tih.

Taksônân ring

¹⁶Masika han kin jâmminzal tet mak me. Kan taksatieng hih hong mon titir khomrese, kin rathatieng chu anîngtin sinmintharin aom bang ani.

¹⁷Hi chomolte ranga kin dûktongna achînte hin kumtuong roiinpuina lientak kin dûktonga nêka lien uol mi sin pêng atih.

¹⁸Mu thei neinunngai chu thîr mak mea, mu theiloi neinunngai kêng kin thîr ani. Mu thei neinunngai chu chomola rang an nia, aniatachu mu theiloi neinunngai chu tuonsôtin om tit an tih.

2 Korinth 5

¹Hi ei omna pilchung puon-in ei takpum hi rammuol chungga hih sietchit khomsenla, invâna omna rang in Pathien'n ama nanâkin mi sin pe, tuonsôta aom tit rang in det ei dôn tiin ei riet.

²Male atûn hin invâna ei omna rang in renga han mi mukhû rang ôi tatakini ei inrum tatak ngâi ani;

³Maha ei insilin chu takpum boiin om no uh.

⁴Hi pilchung puon-ina ei om lâihin sirdêna sikin chapin ei inrum tatak ngâi ania; hi ei pilchung takpum hih mâk ei nuom sika niloiin, aniatachu invâna in mi mukhû rang ei nuom sika ani, masikin hi thithe hi ringnân ânthûl rang ani.

⁵Hi inthûlna rang mi mintuo pepu chu Pathien ania, male eita ranga neinun a lei mintûp murdi hah khâmna anghan Ratha mi pêk zoi ani.

⁶Masikin zoratin hâinân kin sip tit ngâi ani. Takpum ina ei om kêr chu Pumapa ina om mak me ti ei riet.

⁷Ei ringnun hih mu theia om niloiin, taksônnân kêng ei om ani.

⁸Hâinân ei sipa, ei takpum in hih mâkin Pumapa ina om rang ei nuom uol ok ani.

⁹Neinun dadang nêkin, hi taka ei omna ina mo, khi khin mo, ama a râiminsân rang ei nuom ani.

¹⁰Khrista han ei roijêk rangin amakunga ei rêngin ei lân lang pak rang ani. Ei rammuol ringnuna ei sintho ngei murdi asa mo, asie mo, ei man rang rohoingei dungjûiin ei man rang ani.

Khrista jâra Pathien leh malinchangna

¹¹Pumapa china chang kin rieta, male midangngei khom kin methêm ngâi ania, Pathien'n mi riet minthâr let, male nangnin khom nin mulungrîlнгеia mi nin riet minthâr tiin ka sabei.

¹²Nin kôm keini nanâkin rilminsana ranga kin pût nimaka; manêk han, nunchan tieng niloia achungtieng ririema ânsong ngâi ngei hah nin thuon theina rangin keini mi nin songna rang abi nangni pêk rang kin pût ani.

¹³Kin mo tatak mini? Maha Pathien jâra ani. Aninônchu kin vâr mini? Hanchu maha nangni jâra ani.

¹⁴Khrista lungkhamna han mi jêk ani, mi murdi ta rangin mi inkhat a thia, maha aomtie chu an rêngin a thina han an inlopui sa ani tiin atûn chu kin riet minthâr zoi.

¹⁵Ama chu mi murdi rangin a thia, masikin a ring ngei han anni ta ranga ring ni khâi loiin, an ta ranga thia ân thoinôkpu ta rang vaia ring kêng an ni zoi ani.

¹⁶Hanchu, atûn pêna chu munisi vârnân tute jêk khâi noni ung. Munisi vârnân moton han Khrista hah lei jêk ta khom unglang, atûn pêna chu jêk khâi noning ung.

¹⁷Tukhom Khrista hah a zomin chu mi thar ani zoia; amuruo chu ahek zoia; athar kêng a hongni zoi.

¹⁸Ma ngei murdi hah ei râlinchangna renga Khrista jâra a malngei mi minchang, midangngei khom a malngei minchang theina sin mi pêkpu Pathien han a sin ani.

¹⁹Kin thurchi misîr chu mahi ani, Pathien'n khrista jârin munisingei murdi a ruolngeiin a minchang zoi. Pathien'n an sietnagei hah mindon pe ngei khâi loiin, male kho angin mo a ruolngeiin a sin ngei chang thurchi hah, keini mi pêk ani zoi.

²⁰Hanchu, mahin keini hih, Pathien'n nangni a ngêna hah kin chung a bâng anghan, Khrista ranga chong kin ni. Khrista ruthûlin nangni kin ngên: Pathien râlngei nin nina renga a ruolngeiin nangni thûl rese!

²¹Khrista han sietna dôn mak, aniatachu ama leh inzoma Pathien dikna hah ei chang sa theina rangin Pathien'n ei sietna hah a minchang sa ani.

2 Korinth 6

¹Hanchu, Pathien moroina nin chang hah asênaboia nin mang minhek loina rangin keini Pathien leh munkhata sinthongi hin nangni kin ngên.

²Pathien'n imo a ti rangâi roi: “Ku lungkhamna nangni min mu rang zora ahong tungin chu, nangni ka rangâi pea; nangni ka sanminring nikhuo ahong tungin chu, Nangni ka san ngâi.” Rangâi roi! Atûn tak hih Pathien lungkhamna chang zora ania; aviensûn hih sanminringna chang rang nikhuo ani!

³Kin sinthona hin tutên achâina man no rese ngei kin nuom ani, masikin tu lampuia teh lamchâishaknagei dar rangin pût mak meh.

⁴Manêkin, kin sinthona ngeia injêlnangei, dûktongnagei le intaknagei diertaka tuongin Pathien tîrlâmngei kin ni tie kin minlang ngâi.

⁵Jêm bitin, intângna ina khumin le phenêngin kin oma; sin sôlin, inmurahal inshakin le bungêiin kin om ngâi.

⁶Kin inthiengna, rietna, tuongdierna, le singna ngei hah, kin lungkhamna diktakin, Ratha Inthiengin, Pathien tîrlâmngei kin ni tiin keininanakin kin minlang ani,

⁷chongtak kin misîrna sikin le Pathien ranak râtin. Dikna hah doina rang le kin inrunnga rangin râlvovôn kin mang ngâi ani.

⁸Mirit pêkin le mâimôkinshakin kin om ngâia; êro le minpâkin kin om ngâi. Chongtak kin misîr ngâi, hannoma milakngei intumin kin om ngâia;

⁹mi ngei rietloi anghan kin oma, hannoma mi murdi'n min riet; athi anga omin, hannirese, mi nin mu anghan kin ring ani. Dûkmintongin om khom unglang that chu nimak mea;

¹⁰inngûiin om khom unglang, zoratin kin râiasân tit; inrieng kêng kin ang, aniatachu mi tamtak minei kin min changa; ite dônloi kêng kin anga, hannoma neinunngai murdi kin dôn suolet ani.

¹¹Korinth taka ruol moroitak ngei! nin kôm ngampengin kin chonga; kin mulungrîlgei alienin kin min-onga.

¹²Keini chu kin mulungrîlgei nin tieng khâr mak mea; nangni chu nin mulungrîlgei kin tieng nin khâr ani.

¹³Ka nâingei anghan nangni bên atûn hin ki ti ani: ninta ranga nuomnangei kin dôn anghan nangni khom mi minmu roi. Nin mulungrîlgei alienin mo-ong roi!

Sonong menenangei doia inningna

¹⁴Iemloipungei leh munkhatin sin ân-angbangin tho rang pût no roi, maha tho thei aniloi rang sikin. Kho angin mo adik le adikloi an inlop thei ranga? Kho angin mo avâr le ajîng munkhatin an om thei ranga?

¹⁵Kho angin mo Khrista le Diabol an inruol thei rang? Kho angin mo iempu le iemloipu an dôn inchun thei rang?

¹⁶Kho angin mo Pathien Biekin le sonong mirimilngei an inmun thei ranga? Eini chu Pathien aring Biekin kêng ei ni! Pathien lelên a ti anghan: “Ki mingei kôm in sin ka ta male an kôm om ki tih; Keima an Pathien nîng ka ta, male anni ngei hah ki mingei nîng an tih.”

¹⁷Masikin, Pumapa'n a tia, “Anni ngei hah mâk ngêt unglâ male nangninanâkin anni renga atheipielin om roi, Ite ânthiengloi reng tho tet no roi, male keiman nangni pom ki tih.

¹⁸Keima nin Pa nîng ka ta, male nangni hah ka nâipasalngei le nâinupangngei nîng nin tih, Pumapa Râtinchung han a ti.”

2 Korinth 7

¹Ku ruol moroitak ngei, hi chonginkhâmngei murdi hih ei ta ranga sin ani. Masikin takpum le ratha min nim thei ngâi neinunngai renga inkêm ei ta, male Pathien rin puma omin inthiengna mikhipphar ei ti u.

Paul râisâna

²Nin mulungrîlgeia mun mi pêk roi. Tute chungâ saloi tho mak mea; tute siet mak mea, tute chungâ khom inlâpna rok uol mak me.

³Mahi theiloi nangni minchangna ranga ki ti ni maka; motona ke lei ti anghan, mi nin moroi sabak sikin munkhatin ei om tit ani, ei ringle, ei thile.

⁴Nangni ki riet minthâr sabaka; nangni ko song tatak ani! Kin intaknangei murdia khom mohôknân ka la sip tita; râisânnân ki sipmat ani.

⁵Macedonia kin tung suole khom inngamna reng dôn mak me. Muntina intaknagei aoma, midangngei leh inkhalin kin oma, kin mulungrîngeia chinangei kin dôna.

⁶Aniatachu Pathien mulungrîl inngûi minhar ngâipu han Titus a hong sikin mi mohôk minhara.

⁷A hong sika han kin râiaminsân vai nimaka, ama'n kho angin mo nin mohôk minharna chang khom mi min rieta. Ama'n ni mu rang nin nuom tie ngei khom mi rila, nin mulung nin min ruongtie ngei le mi thop ranga nin inthok tie ngei; mi ril sikin atûn hin chu ka râiasân uol ani zoi.

⁸Ke lekhamuthuon han nangni minngûi khom senla, ki miziek hah insîr khâi mu-ung. Chomolte chu nin inngûi ti ku mu lehan kên sîr ani.

⁹Aniatachu atûn chu ka râiasân zoi nangni ki minngûi sika niloiin, nin inngûina han nin lampuingei nangni min thûl pe sikin. Ha inngûina hah Pathien'n a mang ani, male masikin nin chungâ tho minchâi mak me.

¹⁰Inngûina, Pathien'n a mang han mulungrîl inthûlna nangni pêkin sanminringna amintung ngâi sikin mahan insîrna om mak! Hannirese munisi inngûina mamangin chu thina amintung ngâi.

¹¹En ta u, nin inngûinân Pathien sintho hih: ningsietna nangni min dôn tie ngei, nin theiloinaboi tie minlang ranga nin ngâklal tie ngei! Ma anga adikna tienga taksinangei, ma anga inningnagei, ma anga nuomnagei, ma anga inpêknangei, ma anga asaloï tho ngei dûkmintong ranga nin inthok tie ngei! Ma ngei roi han nangninanâkin minchâina reng dôn mak chei ti nin minlang ani.

¹²Masikin, ma lekhamuthuon hah miziek khom rongâ, atho minchâipu sika nimaka aninônchu tho minchâina tuongpu sika khom nimak. Manêkin idôr mo kin ta ranga nin inpêkna inthûktie, Pathien mitmua nangni min mu rangin ki miziek ani.

¹³Masika han kêng mohôkin kin om. Mohôka kin om vai niloiin; Titus nin lei sanna jâra a raisâna sikin keini khom kin râiaminsân sabak ani!

¹⁴A kôm nangni ko song ngâia, male nangnin mâimôkinshakin mi dar mak chei. Nin kôm chongtak kin misîr bang ngâi, male ma anghan Titus kôm nangni ko songna han adik tiin ânlang zoi.

¹⁵Male a rilnagei jôm rangin nin rêngin nin inthokngei, chi le innîk puma ama nin lei phâm ngâi hah a riettîk sikin nin ta rangin a lungkhamna ânsôn uol zoi.

¹⁶Nin chungâ kên ngamphar thei sikin idôra râisân mo ki ni zoi!

2 Korinth 8

Khristien pêkna

- ¹Kin lâibungngei le sarnungei, Macedonia rama koiindangngei lâia Pathien moroina sintho lenna hah nin riet rangin kin nuom ani.
- ²Intaknangei an tong han minsin tatakin an oma; aniatachu, an râisâna alien tatak sikin inriengtak nikhomsenla ngei, phaltakin pêkna an dôn ani.
- ³An pharidôr chu an pêka, an phari nêka tam khom an nuom dodôrin an pêk ti nangni ki min riet minthâr ani.
- ⁴An theia mulungsuokin Judea rama Pathien mingei sanna thona tieng khom sintum dôn sa rangin min ngên ani.
- ⁵Maha kin sabeina pêna ani! Amotona Pumapa kôm an pêk baka; masuole chu, Pumapa lungdon kin kôm anninanâkin an inpêk nôk ani.
- ⁶Masikin hi sin phutpu, Titus hih kin ngên, hi lungkhamna chuonsin alieka sa uol hih sin minzom tita nangni zoipui rangin.
- ⁷Nin dôn murdi: taksônna ngei, thurchi misîr theina ngei, le rietna ngei, mi san ranga nin jôtna ngei le mi nin lungkhamna han nin nei oka. Masikin hi lungkhamna chuonsin khoma hin phaltaka nin inpêk sa rangin nangni kin nuom ani.
- ⁸Ite balamngei nangni khang pe ma-ung. Nikhomsenla midangngeiin mi san rang an jôt tie ngei nangni min mûn, mi nin lungkham hih adik tatak mo ti riet rang ku pût ani.
- ⁹Ei Pumapa Jisua Khrista moroina hah nin rieta; nei bâk khomsenla, nangni a min nei theina rangin, nangni jârin amananâkin inrieng a chang ani.
- ¹⁰Ku nuomlam chu nikuma nin phut hah atûn hin zoi unglâ chu nin ta rangin sa uol atih. Sin ranga aphut masa vai nimak choia, hannirese sin ranga a nuom masa khom nin ni sa.
- ¹¹Hanchu ma chungâ han minngam titin, nan chuonsin hah zoi ta roi! Nin lei mintuo anghan zoi rangin jôt unglâ, male atûna nin dôn lam tak lehin tho roi.
- ¹²Pêk rang nin jôtin chu, nin dônloi chungâ niloiiin, nin dôn chungâ nin neinunpêk hah Pathien'n khôk atih.
- ¹³⁻¹⁴Nin chungâ puokrik nangni min pêlin midangngei mojôk rang pût mu-unga; aniatachu hi zora hin atam nin dôn sikin, ânsam ngei nin san ngei hah asa ani. Hanchu, nangni nin insama anni an dôn mintam khomin nangni san an tih. Ma anghan in-angna om atih.
- ¹⁵Pathien lekhabu'n, "Arût mintam pu han dôn mintam uol maka, male arût mintôm pu han dôn mantôm uol mak," ati anghan.

Titus le a champuingei

¹⁶Nangni san ranga kin jôt anghan Titus khom jôtna min dônpu Pathien chung a kin râiasân tatak!

¹⁷Kin ngênna a lei modôm vai niloiin; ama theia mulungsuokin nangni san rang jôtin nin kôm hong rangin a masat ani.

¹⁸Ama leh lâibung inkhat thurchisa misîrna sin a thona sika koiindangnei murdi'n an jâ tatak ngâipu hah kin juongtîr sa.

¹⁹Male mapên han, ama hih lungkhamna sin Pathien roiinpuina rang le nangni san kin nuomna minlangna rang kin chuonsina le khuolchaina mi jûi ranga koiindangnei an thanga an phun ani.

²⁰Phaltaka neinunpêk tam kin semna roia hin tute chiernangei akaithoi lina rangin kin indîn ani.

²¹Kin neinunkhîn chu Pumapa mitmua vai niloiin, midangnei mitmua khom dikna sin hih ani.

²²Masikin anni lehan kin lâibung inkhat kin juongtîra; vêl tamtak kin minsina male nangni san rang a jôt tatak tiin kin riet. Male atûn vâng chu nin chung a mulungngamna a dôn sabaka, nangni san rang a jôt uol ok zoi.

²³Titus hi chu, ka champui le nangni sanna sin ni thopui ngâipu ani; lâibung dang a champuingei hi chu koiindangnei ruthûla Khrista kôm roiinpuina mintung ngei an ni.

²⁴Anni ngei kôm han nin lungkhamna minlang roi, masikin nangni kin songna chungroi hin kin dik ti hih koiindangnei murdi'n an riet theina rangin.

2 Korinth 9

lempu ânsamngai ranga sanna

¹Judea rama Pathien mingei sanna muthuona aom chungroia hih nangni miziek pe rang nâng tet mak.

²San rang nin nuom tiin ki rieta, male Macedonia rama mingei kôm, "Achaia rama lâibungnei le sarnungei," anni chu, "Nikum renga san rangin an inthok sai kêng ani zoi." tiin nangni ko song ani. Nin jôtna han an lâia mi tamtak akaithoi minhar ngei ani.

³Atûn hin hi lâibungnei hih ku juongtîr ngei ani, masika han nangni kin songna chungroi hah chongbâingei koronga ânlet lina rangin. Aniatachu, ki tisai anghan, nin sanna lehan inthoksaiin lei om roi.

⁴Nikhomrese, Macedonia ram renga mingei ngânin ni juong jûiin nin inthok loi juong mu duoi ta rese ngeia, idôr mo kin inzak rang—nangni nin inzak rang pairakin—tak nangni kin sôn sabak tie ha!

⁵Masikin neinunpêk ranga nin inkhâm hah nin lênthok theina rangin hi lâibungngei hih ko motona nin kôm lei juong ranga ngên rangin anângin ki riet. Hanchu ku juong tung tena chu lêntuosai nîng a ta, male nin dôn sika niloiiin nin nuom sika nin pêk ani ti inlang atih.

⁶Chimu tômte lingpu han sâkthar tômte dôn a ta; chimu atam lingpu han atam dôn atih, ti hih riëttit roi.

⁷Hanchu, nin sisika, nin masat angin nin pêk rang ani, insîr pum le nin sintum ani ti rietloi niloiiin; mulungtâihieia pêkpu hah Pathien'n a lungkham ngâi sikin.

⁸Male Pathien'n nin nâng nêka tam nangni a pêk thei, masikin nin nâng murdi nin dôn tita, sin asa ngei rangin dôn thei uol nin tih.

⁹Pathien lekhabu'n, "Phaltakin ânsamngei kôm a pêk ngâia; a lungkhamna chu tuonsôtin adier ngâi," ati anghan.

¹⁰Male Pathien'n, chimuru rethe ranga pêk bang ngâipu le vâipôl sâk ranga pêk bang ngâipu, han chimu nan nâng murdi nangni pêk bangin nangni minsôn pe a ta, phaltaka nin pêkna renga han amara tamtak mintûp rang nangni musuo pêng atih.

¹¹Phaltaka nin pêk tit theina rangin Pathien'n nangni min nei tit a ta, mi tamtakin nin neinunpêkngei keini renga an man sika han Pathien kôm râisânchong misîr an tih.

¹²Hi nin chuonsin hin Pathien mingei an nângngei a mintongngei vai nimaka, Pathien kôm aliemrak dôra râisânchong misîrna lientak khom amusuo ngâi ani.

¹³Male nin chuonsin minthârna amintung sika han mi tamtakin Pathien kôm roiinpuina pêk an tih, Khrista thurchisa nin phuong ngâia iem nin om sik le an ta rang le mitin ta ranga nin phal tatak sika han.

¹⁴Male masikin moroina inthûk tak dônin chubai nangni tho pe an tih, Pathien'n moroina aliekasa nangni a min mu sikin.

¹⁵Amanboi neinunpêk sika han Pathien kôm râisânchong misîr ei tih u.

2 Korinth 10

Paul'n a sinthona a rung ngâi

¹Keima, Paul, nin kôm ko om lâihan nin chung a innuoitak le dâiriema omin, aniatachu nin kôm ko omloi lechu nin chung a lumraka om ngâipu an ti hin. Khrista nunnêmna le lungkhamnân misangin nangni ke ngên.

²Nin kôm ku juong zorân rammuol mingei mulungbôkngai anga sinthoa mi bê ngei chung a chu ku lumrak ngêt rang khomin; nangni nin chung a chu lumrak loi rangin ni namnôl loi rangin nangni ke ngên ani.

- ³Mahi adik rammuola lêng chu kin ni, aninâka rammuol mingei mulungbôkngai angin chu doi mak meh.
- ⁴Indoina râlrovongei kin mang ngei hi chu rammuol râlrovongei hih nimaka, aniatachu Pathien râlrovongei ranakrâtak ngei kêng ani, maha kulpuidetngai sietminmangna rangin kin mang ngâi ani. Inkhalna dikloingei kin minheka;
- ⁵Pathien rietna khâr ranga inpâkna lamchâingei murdi hah kin seta, mindonna murdi sûrmintangna renga tuongin Khrista chong kin min jôm ngâi ani.
- ⁶Male iemom tatak nin ni minthârna nin dôn suole chu, iemomloingei dûkmintong rangin inthok kelen kin tih.
- ⁷Nangnin neinunngai hi pêntienga ânlang vai kêng nin en ngâia. Mahan tumakhatin amapa mo, amanu mo Khrista mân ân bê an om mini? Asa, an omin chu an thethenin an chungroi mindon nôk rese ngei, anni ngei an tho angtakeni keini khom Khrista ta kin ni sikin.
- ⁸Nangni setna rang niloia, nangni sinmindingna ranga Pumapa'n rachamneina mi pêk hih insongpui ok khom ronga inzak ma-ung.
- ⁹Ke lekhamuthuonngai hin nangni misih anga ânlang rang chu pût mu-ung.
- ¹⁰Tumakhatin, “Paul lekhamuthuonngai hi chu ana le ânngar ani, aniatachu ei kôm a omin chu ânzala, a chongngai khom ite nimak!” tîng an tih.
- ¹¹Ma anga mingei han mun danga kin oma kin lekhamuthuonngai leh nin kôm kin oma kin sintho rang hah ateina reng om mak, tiin an rietthei ngêt rang ani.
- ¹²Adikin chu anni le anninanâk ân pâka ân sâng oka ân bê ngei lâia han intelin anni leh intêk ngam mak me. Idôra amo mo an ni! Anninanâk an inkhina rang leh an injêkna rangin balamngai an sinna!
- ¹³Nikhomrese, keini rangin chu, kin insongna hah tentanangei khêl no nia; Pathien'n sintho ranga tentanangei mi dar pe sûnga han ani ngâi, male nin lâia kin sintho khom hih ahuom sa.
- ¹⁴Male ma tentanangei sûnga om nin ni sikin Khrista Thurchi Sa chôia nin kôm kin juong lâihan khom tentanangei pêna chu se mak me.
- ¹⁵Masikin Pathien'n tentanangei mi dar pe pêna chu midangngai an sin hah song mak me. Manêkin, nin taksônna hah hônsôn a ta, male Pathien'n tentanangei mi dar pe sûnga chu zoratin nin lâia sinthona lien uol ok tho thei kin tih, tiin kin sabei ani.
- ¹⁶Hanchu Thurchi Sa hih nin kôm pêna ram dangngai khom misîr thei kin ta, mun danga mân sin an lei tho sai hah song noni ung.
- ¹⁷Aniatachu Pathien lekhabu'n ati anghan, “Tukhom a song nuom kaiin chu Pumapa sintho hih song rese ngei.”

¹⁸Eini nanâkin asa kin ni tiin ei mindonin chu pomna chang ngâi mak mea, Pumapa'n asa tiin mi mindon pe tika kêng pomna ei chang tatak ngâi ani.

2 Korinth 11

Paul le Tîrton dikloingei

¹Ânmôl siei anga ko om lâi khomin mi nin tuongdier pe rangin ku nuom. Rangâihoitakin tho roi!

²Pathien narsana angin kêng nangni ka narsa; dôngmate inthientak angin nin nia, pasal inkhat vai, Khrista ngêt lehan in nangni min nei ranga kên khâm pe ngei nin ni.

³Nin mulungbôkngai hah hong sietin Khrista taka nin inpêkna akip le ânthieng hah mâkrak nin tih, ti hih ki chi ani ma angdên han Eve hah murûl vârna milakngai han huongin aom ani.

⁴Tumini nin kôm juongin Jisua dang, a thurchi kin misîr niloi a juong misîra; râisântaka nin lei rangâi thei sik le keini renga nin man niloi Ratha le thurchisa adang viek ratha dang le thurchisa dang nin lei pom sikin!

⁵Aliekin, “tîrtonngai” tia nin koi ngâi ngei nêka chîn uol ki ni rangin chu mindon mu-ung!

⁶Thurchi misîr chu ke theibâkloi khom ani thei, aninâka rietna tieng chu ma anghan ni tet maka; maha chu zoratin le lampui tina khom nangni kin minthâr pe suo zoi ani.

⁷Pathien Thurchi Sa nin kôm ku juong misîr lâihan ite neinum nangni ngên mu-unga; nangni chôiminsângna rangin keimananâk kên nuoi ani. Maha ko tho minchâi mo?

⁸Nin lâia sin ko tho zorân koiindang adangngaiin sanna min pêk ani. Masikin chongna rangin, anni ngei murûkin ke nangni ka san ngâi ani.

⁹Male nin kôm ko om sêng han sum kên sam zorân tute nangni minjêl mu-unga; Macedonia ram renga lâibungngai le sarnungei an hong han ka nâng murdi min juong chôl pe ani. Sûnnûk tienga anghan, sûnmoton tieng khom nangni rangin puokrik ni tet no nîng!

¹⁰Khrista chongtak keima taka om sika han hi kên songna hih Achaia ram pumpuia dâirek noni tih hih kên khâm ani.

¹¹Nangni ku lungkham loi sika mahi ki ti mini? Pathien'n nangni ku lungkham tatak tiin a riet ngâi ani!

¹²Atûna sin ko tho anghin tho tit ki tih, “tîrtonngai” adangngai hah an insong thei loina rang le keini kin sintho angtakan sin an tho an ti thei loina rangin.

¹³Ha mingei hah tîrton dik nimak ngei, anni ngei hah tîrton dikloi an nia, an sinthoa milak thoa Khrista tîrton tatakngai anga inlang ranga ânthok ngei ha an ni.

¹⁴Asa, kamâm rang om mak! Soitan luo mana vântîrton vâ angin inlang rangin ânthok duo!

¹⁵Masikin a tîrlâmngai khom dikna tîrlâmngai anga inlang ranga an inthok hih neinun kamâmom ni uol mak. Amongna chu an sinthongei angtakin an man rangrohoi hah la man an tih.

Tîrton anina sika Paul tuongngai

¹⁶Ki ti nôk: tutên amo angin mi mindon no rese ngei. Aniatachu nin mindonin chu, alekti luo kên song theina rangin amo angin ni pom roi.

¹⁷Adiktakin atûna ki ti hi chu Pumapa'n ti ranga ni nuom anga ki ti nimaka; hi insongna roia hin chu amo tatak angin ko chong ani.

¹⁸Hannirese mi tamtak munisi ninangei song an om sikin kei khom ma angdênin tho ki tih.

¹⁹Nangni chu nin vâ tatak, male masikin râisântakin amo ngei ha nin tuongzit ani!

²⁰Nangni chu mîn nangni dânde khom rese ngei, inlâpnân nangni mang khom rese ngei, chângang nangni min ôk khom rese ngei, nangni enminnuoi khom rese ngei, nin mâia nangni bên khom rese ngei nin tuongzit ngâi.

²¹Ha neinunngai hah tho rangin chu kin chi rai sikin apom khom kên zak! Hannirese tukhomin i-ih lama khom an insong ngamin chu—amo angin ko chong ani—kei khom ka hâi ngam.

²²Hebrew mi mo an ni? Kei khom ki ni. Israel mi mo an ni? Kei khom ki ni. Abraham richisuonpârngai mo an ni? Kei khom ki ni.

²³Khrista tîrlâmngai mo an ni? Achâng ku phuo nâka chu anni rangin chu keima ke tîrlâm asa uol ki ni! Sintho ranak ko song uol ok, intângna ina ku lût zora atam uol, vîkin ko om uol, male vêl tamtak thi vavângin ko om uol.

²⁴Judangeiin voisômthum voikuo chum rangnga min tôka;

²⁵Rom mingeiin voithum min vîka, male voikhat lung leh dêngin ko oma. Voithum rukuong sietna ko tonga, voikhat chu sînkhât jân khat tui chungâ ko oma.

²⁶Ku khuolchaina voi tamtak tuilien ichîn, inru ichîn, ku Juda champuingei ichîn, Jentailngai ichîn; khopuiliengai sûnga chîna tongin, rama chîna tongin, tui puiliengai chîna tongin, male mal saloingai chîn ko om ngâi.

²⁷Ki sinthona ko sôl rai sika inloia ko om tik atam ngâi; vonchâm le tuiinrâlin ko om ngâia; bu ko khop loi tik, omna rang ka man loi tik, aninônchu puonsil kên vâi tik atam ngâi.

²⁸Male neinun dangngei tiloiin, koiindangngei murdi ki mindonna ni dêlin nîngtin ko om ngâi.

²⁹Tumakhat an inzalin chu, kei khom kên zal ok ngâia; tumakhat sietna tieng tuongin aomin chu beidongin ki sip ngâi.

³⁰Ko song ngêt rangin chu kên zal tie ânlang neinunngai hih song ki tih.

³¹Pumapa Jisua Pathien le Pa riming chu tuonsôtin satvurin om rese! milak tho mu-ung ti a riet ngâi.

³²Damascus taka ko om lâihan, Rêng Aretas nuoia râiôt'n mi sûr rangin khopui mokotngeia rungpungei a dar ani.

³³Aniatachu kok sûnga kulpui bang in-onga min mathâka, ma renga hah ko rotpai ani.

2 Korinth 12

Paul inlârnagei a mu le chongphuongngei

¹Kên song ngêt rang ani, ite asena aom loi rang khomin. Aniatachu atûn Pumapa'n inlârnagei mi min mu le chongphuong rang mi pêk ngei hah misîr ki tih.

²Khristien mi inkhat invân insângtaka khin juong lâkin aom ti ki riet ama hah kum sômleiminli ani zoia (mahi ataka mini, inlârna a mu mini riet mu-ung Pathien vaiin a riet).

³⁻⁴Ki ti nôk, ma miriem hah Paradis taka rangin juong lâkin aom ti ki riet (mahi khom atak mini, inlârnan a mu mini riet mu-ung—Pathien vaiin a riet), male ama han chong a misîr theiloi, le munisi mûrngeia misîr ranga phal loi neinunngai a hong rieta.

⁵Masikin hi mi hih song ki tih—aniatachu ko dok tie ânlang neinunngai tiloiin chu keimananâkin chu insong no ning.

⁶Insong nuom khom rong, amo chu ni no ning, chongdiktak ki misîr rang sikin. Aniatachu insong no ning, tukhomin min mu angin le keima renga chong an riet lam nêkin min mindon minsâng lolina rangin.

⁷Kamâmom neinunngai tamtak ku mu ngei sikin inpâknân ki sip lolina rangin taksatieng damloina natak pêkin ko om ani, maha kên pâk lolina ranga Soitan thangtheipu anga sinthoa ni jêm ngâi ani.

⁸Ma natna hah mi khâi pai pe rangin voithum Pumapa ke ngênna.

⁹Aniatachu ama'n, “Ko moroina hi kêng na nâng ani, na râtloi zorân kêng ki sinthotheina akip ngâi,” tiin mi thuoan ani. Hanchu, ku chungu Khrista sinthotheina mi rungna hi rietna rangin râisântakin ka râtloinangei hih song ki tih zoi.

¹⁰Khrista jârin chu râtloinangei, êronangei, intaknangei, nuomlonangei le dûktongnangei khom ku mulung achuk. Ka râtloi zorân kêng, ka rât ngâi sikin.

Paul'n Korinth mingei ranga a mindonna

¹¹Amo angin ko oma—aniatachu nangnin mo rangin mi nin tho pe sikin. Nangni kêng mi nin pomna minlang rang nin ni. Ite ni no khom rongu, i-ih lampuia khom alieka nin, “tîrtongei” nêkin chu chin uol no ning.

¹²Tîrton ki ni minthârân sininkhêlgei le neinun kamâmomngei tamtak nin lâia dierna tatak dônin ki sin ani zoi.

¹³Koiindang adangngei nêka saloi uola enin inmo nin om, sumtienga sanna nangni ki minjêl lona hah ani nônchu? Rangâihoitakin ki dikzoiloina hah ni ngâidam roi!

¹⁴Atûna zora hih nin kôm juonga nangni juongpan rang kên thok voithumna ani zoi, male ite nangni sîng no ning. Ka nâng chu nangni hah nin ni, nin sum nimak. Mangei murdi suole, nângeiin an nulepangei sem rang an dôn rang nimaka, nulepangeiin kêng an nângei sem rang an dôn rang ani.

¹⁵Nangni sanna rangin ko dôn murdi râisântakin thâm let ka ta, male nangni sanna rangin keima khom inpêk let sa ki tih. Nangni ku lungkham sabak sika han mi nin lungkham bâkloi rang mini?

¹⁶Hanchu, puokrik nangni ka chang pe loi hah chu nin jôtinruol atih. Hannirese tumakhatin keima hih milaka sip, male milakngei leh nangni a min ôk zoi ani la tîng an tih.

¹⁷Inmo? Nin kôma thangtheipungei ku juongtîr ngei mangin nin chungu inlâpna ko rok rang?

¹⁸Titus hah juong rangin ke ngênna, male iempu dang hah ama leh ku juongtîr ani. Titus'n nin chungu inlâpna a rok nin ti thei rang mo? Ama le keima hih bôknangei inmunin lampui inkhata singinsa'n sintho ngâi mak me mo?

¹⁹Nin kôm kin dikna thurchi kin misîr tit angin nin mindon thei. Nimak! Khrista'n kin chong ranga mi nuom anghan Pathien makunga kin ti ani, male ruol moroitak ngei, neinuntin kin tho ngei murdi hih, nangni sanna rang kêng ani.

²⁰Ku juong tika ku nuom lamin nangni mu loiin ti le nangni khom nin nuom lamin mi nin mu nônchu ti hih, ki chi ani. Inkhalnangei le narsanangei,

mulunglumngei le ranghuolna rokngai, êronangei le mûrtamnangei, inpâknangei le bâiinkhamnangei ku juong mu rang mini ti hih, ki chi sa ani.

²¹Ku juong nôk tika ka Pathien'n nin mitmua mâimôkin mi dar ni ti, le zora vunsai mi tamtak sietna an sina an nunchan saloi neinunngai, an ngâituina le hurna sietnangei renga insîr loipu ngei hah ka chappui rang mini ti hih, ki chi sa ani.

2 Korinth 13

Azoinataka inningnangei le chibaimûknangei

¹Atûna nangni ku juongpan rang hih avoithumna ani. Pathien lekhabu'n ati anghan, "Nônna hah rietpuipungei inik mini, inthum mini an om vaiin kêng mindet ani rang."

²Zora vunsai sietna sinpu ngei, le midangngei murdi khom nangni ril ku nuom ania; nin kôm ku juong avoinikna han ki tisai, aniatachu atûn hin nin kôm ko om loi sikin ti sir ki tih: Ku juong nôkin chu tute sepna renga rotpai thei no tunui.

³Khrista, keima renga a chong ngâi minthârna nin rok hah anrêngin mûng nin tih. Ama hah nangni a mindon zorân, ama chu inzal ngâi maka; manêkin, nin lâia a sinthotheina a minlang ngâi ani.

⁴Ama hah râtloinân khrosa jêmdelin thatin om khomsenla, Pathien sinthotheinân aring tit ani. Keini khom ama leh inzomin râtloi kin nia; aniatachu nangni leh kin inzomnangei sikin a ringna han Pathien sinthotheina chang sa kin tih.

⁵Taksônna han nin om le nin omloi nin riet theina rangin nangninanâkin minsin ngâi unglâ, injêk ngâi roi. Khrista Jisua hih nangnia han aom nin riet minthâr nimak mo? minsina han nin kêi tetloi ani noa anîn chu.

⁶Minsina han keini chu akâiloi nimak me la riet nin tih tiin, iemzoina ko dôn.

⁷Ite asaloi nin tho lina rangin Pathien kôm chubai kin tho ngâi—kin thangsuona minlangna rang niloiin, hannirese keini chu akailoiin om khom rong unga, nangnin adik nin tho theina rang sika han.

⁸Chongtak rang sika ani nônchu, adoi rangin chu sintho thei mak me.

⁹Kin inzal zora khom nin lei rât ngâi sikin kin râiasân ani. Masikin akiphar nin hongni theina rang khomin kin chubai sa ngâi.

¹⁰Masika han kêng mahi nin kôm ko om loi zorân ki mizieka; nangni setna rang niloiin, nangni sinmindinga rangin rachanneina Pumapa'n ni pêk hih mangin ku juong tung tika nin chungâ ku lumrak lina rangin.

11Male atûn chu, ka lâibungngei le sarnungei, dam roi! Akippharna rangin rujûl unglâ; Ke ngênangei rangâi roi; inkhat le inkhat jôtinruol unglâ; inngêiin lêng roi. Male lungkhamna le inngêina Pathien hah nin kôm om atih.

12Inkhat le inkhat inngêina intum inthiengin chibai inmûk inlôm roi. Pathien mingei murdi'n chibaingei nangni an hong muthuon.

13Pumapa Jisua Khrista moroina, Pathien lungkhamna, le Ratha Inthieng inloppuina hah nin rênga nin kôm om rese.

Galatia

Galatia 1

¹Paul, Miriem renga niloi, miriem jâra khom niloi, Jisua Khrista le thina renga kaithoipu Pathien jâra tîrton keima.

²Male ko ompui sângsuokngei nâmin Galatia taka om koiindangngei chibai nangni an muthuon;

³Pa Pathien le ei Pumapa Jisua Khrista renga moroina le inngêina nangni pêk rese.

⁴Atûnlâi rammuol sietna renga Khrista'n mi kêlsuo theina rangin, ei Pathien le ei Pa lungdo jômin, ei nunsie sikin ama ânpêk zoi.

⁵Pathien kôma inlalna tuonsôtin om rese, Amen.

Thurchisa adang ommak

⁶Khrista moroina jâra nangni koipu hah irang mo inrangtaka nin mâka, Thurchisa dang nin ipom hih nangni ka kamâm.

⁷Maha thurchisa adang viek ni uolma, mi senkhatngei hin nangni minjêlin Khrista thurchisa thûl an bôk kêng ani.

⁸Nikhomsenla, keinin mo, invân renga vântîrton khomin mo thurchisa dang an misîr duoiin chu meidîla rang theiloiintumin om rese.

⁹Motona kin ti anghan kin ti nôk, nin pomsa thurchisa hah niloia thurchisa dang nin kôm juong misîr an omin chu, ama hah meidîla rang theiloiintumin om rese.

¹⁰Keiman atûn hin miriemngei pomna zong mo kini? Nitet mak! Keiman ka nuom chu Pathien pomna kêng! Miriem riming inthangna rang rok ka la nîn chu, Khrista tîrlâm ki ni loi rang ani.

Inmo Paul tîrton a hongchang

¹¹Ma anghan, sângsuokngei, thurchisa nangni ki ril hah miriem tienga chong ni mak iti nangni minriet rong.

¹²Miriam kôm renga ka man ni maka, tute mi minchu khom ni mak. Mahah Jisua Khrista'n ko kôm lelea ânlar ani.

¹³Juda sakhuo balama kênpêk lâia ko om lam hah nin riet; Pathien Koiindangngei lungkhamna boiin dengminthei ngeia, theidôra minmang ngei rang bôkin ke lei oma.

¹⁴Hanchu, ki richibulngei chong mâk chung a kênpêk uol ngâi sikin Juda balama ki sinthona han ki richingei lâia ka ruolngei tamtak chu ke khêl ani.

- ¹⁵Hannirese, Pathien'n a moroinân ka nu vonsûnga ko omlâi renga mi thangsai, a sin tho rangin milei koi ani. Male ama'n mi mindon ha,
- ¹⁶Jentailngei lâia Thurchi Sa ki misîr theina ranga a Nâipasal ko kôma ânlar han tute rekel loiin;
- ¹⁷Jerusalema ko motona tîrton lei changngei kôm khom se khâi loiin, Arab rama ke se kelena, masuole Damascus'a ko hongkîr nôka.
- ¹⁸Hanchu, kum thum suole chu, Peter kôm roi ngei riet rangin Jerusalema kava sea, a kôma hapta nik ka va oma.
- ¹⁹Ania, Pumapa lâibungpa Jacob, telloi chu tute tîrton dangngei mu mu-ung.
- ²⁰Nin kôma chong ki miziek hih adik ani. Milak tho mu-ung iti Pathien'n a riet.
- ²¹Masuole han Syria le Cilicia ramhuol sûnga ke se zoi ani.
- ²²Ma zora han Judea rama Koiindangngeiin ke mêl la riet mak ngeia;
- ²³“Motona mi esêlpu le iemna ahong minboi phar rang bôk ngâipu han atûn hin chu taksônna chong kêng a misîr zoi” ti mi misîrna vai an riet.
- ²⁴Ma anghan, keima sikin Pathien an minpâk zoi.

Galatia 2

Paul le tîrton dangngei

- ¹Hanchu, kum sômleiminli suole, Barnabas le Titus tuongin Jerusalema kin se nôka.
- ²Pathien ânlara mitîr sikin ke se ani. Koiindang ruoipungei leh atheiin kin chong khôma Jentailngei lâia thurchisa ki misîr ngâi hih an kôm ki rilminthâr pe ngeia; zora lei vunsai ki sinthona mo, atûnlâia mo, mok sôl ki ni loina rangin.
- ³Ania kên ruoipui Titus hih Greek mi aniatchu rangrâtin sertan min tho uol mak ngei.
- ⁴Sûngsuok rothol, inrûka hong lûtngai vai han sertan tho ngêt rang an bôka; ma-ngei han suoka min minchang theina rangin Khrista Jisua zalêna ei nei hih enrichik ranga lût an ni.
- ⁵Aniatchu, thurchisa chongtak hah ninta ranga aom bang theina rangin hapkhat khom an chong jôm makme.
- ⁶Ania, ruoipu uola an ibe ngei hah i-anga mi khom nisenla, keima rangin chu ite dang uol mak, Pathien'n chu pêntienga ânlang a jêk ngâiloï sikin, mangei han sin tho rang tie athar ite mi ril thei uol makngei.
- ⁷Manêkin Juda ngei lâia thurchisa misîrna sin Peter minkola aom anghan, keima Jentailngei lâia thurchisa misîrna sin keima minkolin ko om iti an riet.

⁸Pathien'n, ranakin Peter Judangei tîrton a minchang anghan kei khom Jentailngei tîrton mi minchang.

⁹Pathien'n hi sin ngêt hih mipêk ti hih ruoipungei, Jacob, Peter le John ngei khomin an rieta, Keima Jentailngei lâia se rangin le anni Judangei lâia se rangin keima le Barnabas inlopna kut changtieng min lei pêk zoi.

¹⁰An lâia inriengngei hah kin rieltit rangin an nuoma, ma tak hah tho ranga ka lei ngâklal ngâi khom ani.

Antioch khuoa Paul'n Peter a ngo

¹¹Hanchu, Peter hah Antioch a hong lâihan dik mak ti inthâr takin ânlang sikin, loko ngei rietin mâi intongin ko ngoa.

¹²Jentailngei lâia bu a nêk ngâia, ania Jacob kôm renga mi senkhat Jentail sermintan rang bôkngai hah a chia, an hong tung lechu a chia, a theiin a om zoi.

¹³Juda dangngei khom Peter thâiindôp anghan an thâiândôp suo zoia; Barnabas tena an thâiindôpnân an tuong minmang sa zoi.

¹⁴Ania, thurchisa chong takin lôn mak ti ki rieta an rênga makunga Peter kôma, "Nangma Juda mi ni nia, Judangei om anghan om loiin Jentailngei om anghin, irang mo Jentailngei hah Judangei anga min om ngêt rang no bôka? ki tipea."

Judangei le Jentailngei hah taksônna sika sanminring an ni

¹⁵Eini chu Juda mi rang piela suok ei nia, "Jentail mi nunsie ngei" an ti ngâi angin ni makme.

¹⁶Aniatachu, Jisua Khrista taksônna sika vai, Balam jôm sika ni loiin, mîn Pathien makunga dik ei chang thei iti ei riet; Balam a nângngei jôm sika ni loaia Khrista iem sika Pathien makunga dik ei chang theina rangin keini ngêt khom Khrista han taksônna kin min ngam ani.

¹⁷Khrista leh inzoma Pathien kôm dik chang rang ei bôk lâi hin Jentailngei anghan ei la nunsie bang inte, Khrista hih nunsie thona mi sanpu mo ai ni? nitet mak!

¹⁸Balam keset sa hah ki minding nôkin chu balam sietpu ki ni iti ânthâr.

¹⁹Pathien tienga ki ring theina rangin keichu Khrista leh khrosa jêmdel ki ni zoi, Balam a om sikin Balam tieng chu ki thi ani zoi.

²⁰Khrista kôm jêmdelin ko om zoia, aniatachu, ki ring ani, keima chu ni khâi mu unga, Khrista hah keima han a ring zoi ani. Atûna taksa taka ki ring hih, mi lungkhampu kei ranga ringna pêkpu, Pathien Nâipasal taksônna ring kini.

²¹Pathien moroina hih heng mu-ung. Ania, Balam sikin Pathien kôm mîn dik an inchang theiin chu Khrista chu asenaboia thi nîng a tih!

Galatia 3

Balam nônchu taksônna

¹0, Galatia rama mi mo ngei, tumo nangni dôî? Nin mitmu ngêta Jisua Khrista hah khrosa jêmdel ani tie ânthârtaka ânlang anga han.

²Ma inkhat hih mi ril ta u; Balamin ai nâng ngei sintho sikin mo Pathien Ratha hah nin man, Thurchisa nin rangâia nin rieta nin iem sikin mo?

³Inmo madôrpa nin moh theia, Pathien Ratha leh nin phut hah atûn nin theia rachamin min mong rang nin nuom mo ani?

⁴Ma angdôra nin tuongna hah môk tutuong mo ani rang? nitet noni!

⁵Hanchu Pathien Ratha nangni a pêka, nin lâia sininkhêl ai tho hah Balamin anâng ngei nin sin sika mo, Thurchisa nin rieta nin iem sika mo?

⁶Abraham'n a leirietna hah mindon roh, Pathien lekhabu'n ai ti anghan Abraham'n Pathien a iema, ha a taksônna hah a diknân ipompe ani.

⁷Masikhan a taksôn mingei nâm chu Abraham richi diktak an ni, ti riet roi.

⁸Pathien lekhabu han aphuonga, Pathien'n an taksônna sikin Jentailngei dik a minchang rang ani. Hanchu Thurchi Sa han Abraham kôma, “Nangma renga hah miriem murdi satvur a tih”, tiin a lei ril suo zoi ani.

⁹Abraham'n Pathien a iema, satvura a om anghan, a iem ngei murdi chu satvurin an om.

¹⁰ Balam jôm vaia inngam ngei chu khomâksâmna nuoia an oma, Pathien lekhabu'n, “Balambua ânziek murdi jôm tit loi kai chu Pathien khomâksâmna nuoia an om ani,” ati.

¹¹Masikin, balam jômin Pathien makunga tute dik intum mak ngei, ti hih ânthâr zoi; Pathien lekhabu'n, “taksôn sika Pathien makunga dik intum ngei vai ring an tih,” ati sikin.

¹²Aniatachu, Balam leh taksônna chu ân manna om maka, manêkin, “Tukhomin Balamin ai ti murdi *thopu* chu ring an tih,” ati ani.

¹³ Aniatachu, Khrista hah ei ruthûla khomâksâm lei nîn, balam khomâksâm renga mi khôk zoi ani; Pathien lekhabu'n, “Tukhom thinga makhâi chu Pathien khomâksâm chang ani” ati.

¹⁴Khrista'n ma-ngei murdi a tuongna chu Abraham chungu Pathien satvurna hah Khrista Jisua jâra Jentailngei chungu a hong om theina rang le taksônna sika Ratha inkhâm hah ei chang theina ranga ani.

Balam le chongkhâm

¹⁵Ka malngei, nîngtina nin riet ngâi neinun enminkhinân ka mang rang ani hi; mi inikin an chonginkhâma inruol senla ngei, pominruolna chong nei senla ngei; ha an chong hah tutên set thei noni ngei, bôk khom bôk thei noni ngei.

¹⁶Atûn Pathien chonginkhâm ngei hah Abraham le a richisuonpârngei kôma a pêka, Pathien lekhabu'n mi tamtak chungroi a misîr loi anghan “Richisuonpârngei,” ti maka, mi inkhat vai rilna anghan “Jâisuon” ai ti ani, ama hah Khrista ani.

¹⁷Imo ki tina tak chu, chonginkhâm Pathien'n Abraham kôma, a lei phun mindetsa hah, kum razaminli kum sômthum suoleh balam hong oma han Pathien chonginkhâm hah mangmunboi achang loina rangin thonpai uol mak.

¹⁸Asikchu Pathien neinunpêk hah Balama ânngam rang anînchu, chonginkhâm sika ni khâi nonih; aniatachu, Pathien'n chonginkhâm sika kêng, Abraham kôm neinunpêk ai pêk.

¹⁹Ma anghan ni senla, balam hi itho sika mo pêk ai ni? Pathien'n chonginkhâm a pêkna Abraham jâisuon hah a hong om mâka minchâina ânlang theina rangin Balam hah ipêk ani. Ma Balam hah vântîrtonngei leh palâi imanga a mingei kôm juong mintung ani.

²⁰Aniatachu chonginkhâm a pêk lâihan palâi nâng loiin mi inkhat vai ân chela; male inkhat hah Pathien ani.

Balamin ai khîn ngei hah

²¹Ma anghan nisenla, Pathien chonginkhâm hih balam hin ânkal mo? Inkal mak! Miriemngei'n ring theina rang balam an lei man nisenla chu, mitinin ha balam hah jômin Pathien kôm dik inchangin an om rang ani zoi.

²²Ania, Pathien lekhabua han, rammuol pumpui hih nunsie nuoia a om a ti; masikin Jisua Khrista taksônna sika manboipêk inkhâm hah a iem ngei kôm han pêk ani.

²³Ania, Taksônna ahong om mân, taksônna ajuong inlâr mâka han chu, ha balam han mi intâng ina om anghan mi khitphier ani.

²⁴Maleh taksônna sika Pathien kôma dik ei chang theina rangin balam hah Khrista juong mâka han chu eini ni lei enkolpu ani.

²⁵Atûn chu taksônna a om zoi sikin balamin ni kairuoi khâi mak.

²⁶Taksônna sikin kêng nin rêngin Khrista Jisua leh inzomin Pathien nângei nin ni.

²⁷Khrista leh inzomin baptis nin chang zoia, atûnchu Khrista ringnân nin invoa, ama leh nin chonga, Khrista ringna han inzomkhôm nin ni zoi.

²⁸Masikin Juda le jentail khom tei uolna reng ommak, suok le suok niloi khom pasal le nupang khom, Khrista Jisua leh inzomin nin rêngin inkhat nin ni.

²⁹Hanchu, Khrista mi nin nînchu Abraham richi ngei nin ni zoi; Pathien'n ânkhâmna hah nin man rang ani.

Galatia 4

¹Nikhomsenla, keiman ki ti nuom chu, nâi, a pa rochon murdi luo rangpu hah nâipang a lani kêr chu suok leh ite tei uol mak, neinum murdi a ta ni let khom rese.

²Nâipang a lani sâng kêr chu, a pa zora khâm atung mâka chu a donsûipu le a rochon jêkpepu a om ngâi ani.

³Ma anghan eini khom ratha tieng ulien eini mân chu, rammuol ratha saloi ruoina nuoia suok ei chang ani.

⁴Aniatachu, zora khâm a hong tung tik han, Pathien'n a nâipasal a juongtîr ani. Mahan nupang sênga inzirin, Juda balam nuoia a lênga;

⁵Pathien nâingei ni theina ranga Balam nuoia om ngei murdi mirtan rangin.

⁶Hanchu, a nâingei nin ni ti rietnân, Pathien'n a Nâipasal Ratha hah ei mulungrîla a juongtîra, Ratha han, "Abba" O Pa tiin ei iniek ngâi ani.

⁷Masika han, suok ni khâi mak cheia, nâi nin ni zoi. Hanchu, nâi nin nina sikin Pathien'n a nâingei ranga ânkhâm murdi hah nangni pêk a tih.

Paul'n Galatia mingei a mindon tie

⁸Tienlâi hanchu Pathien la riet mak cheia, masikin pathien ni ngâiloi ngei suoka nin om ngâi.

⁹Ania atûn chu Pathien nin hong riet zoia, nônchu Pathien'n nangni riet suonûkin, inmo adok le inrieng om ratha ngei ruoina dikloi tieng inhei nôk rang nin nuoma? Inmo an suok chang nôkrêk rangin nin nuoma?

¹⁰Nangnin nikhuongei, tha ngei, kumtentana ngei, kumngai, nin ser ngâia.

¹¹Nin chungroi nangni ka kamâm sabak ani! Ninta ranga ki sin murdi mangmunboi achang rang mini?

¹²Ka malngei, nangni anga ko om anghin nangni khom keima anghin om roi, tiin nangni ke ngên. Nangnin adikloiin ite mi lo mak chei.

¹³Ka damloina sikin motontaka thurchisa nangni ki ril hah nangnîn nin rieta.

¹⁴Ka taksa dingmun hah nangni ranga minsinna lientak khom nisenla, mi mumâkin ni hengpai mak chei. Ma-ang nêkhan invâna vântîrton anghan le Khrista Jisua anghan mi nin modôm ani.

15Nin râiasân bâka! itho mo? thei nisenla chu nin mitngei khom kêlpai nin ta mipêk nin tih ki ti thei.

16Chongdik hah nangni ki ril sikin nin râl ka chang zoi mo?

17Midangngei han lunghâng nangni an tho sabak, ania an mindona sa mak. An nuom tak chu keima leh nangni minsen rang, hanke lunghâng nangni an tho anghan, nangni khomin lunghâng nin tho ngei rang hah ani.

18Mindonna asa anîn chu ma anga lunghângna hi khotik khom asa ani, nin kôma ko om lâi vai niloiin.

19Ka nâi moroingei! avêllin voikhat, Khrista nina hah nin kôm sin mindetin a om mâka chu nupang nâiha phut anape ngâi anga na han nin rang sikin ku tuong ani.

20Male atûn hin nin kôm hongga chong rôlûm dangin thurchi misîr ku nuoma; ithomo ei tiin chu nin chungroi ka kângdoi sabak ani.

Hagar le Sarah minenna

21Balam nuoia om nuomngei hah, nangni rekel rong; Balam in ai ti hah nin rietloi mo?

22Ma anghin a ti, Abraham'n nâipasal inik a dôna inkhat chu a suoknu nâi ania, inkhat chu suok niloinu nâi ani.

23Suoknu leh an nâi hah chu taksa balam anghan ânzira, suok niloinu leh an nâi ha chu Pathien chongkhâm sikin ânzir iti hih.

24Ma chong hah chongmintêka riet thei ani; ma nupang inik ngei hah chonginkhit inik an ni. A nâingei suoknu renga ânzir a nu hah Hagar ania, Sinai tânga chonginkhit hah ani.

25Male Hagar hah Arabia rama Sinai tâng hah ania, atûnlâia Jerusalem khuopuiliena mi murdi ngei le suoka omngei leh hin munkhat an ni.

26Hannirese, suok niloinu hah chu chung tieng Jerusalem ania, suok nimaka, hanu hah ei nû ani.

27Pathien lekhabu'n; "Nangma aching nâi nei ngâi loi, Na râmînsân roh! Nangma nâiha la doi tet ngâiloi, Râisânin tânghâi roh! Nupang a pasalin ai mathân tet ngâiloi nu Nêkin nupang mi imâknu han nâi nei mintam uol a tih," tiin ânziek sikin.

28Atûn nangni ka malngei, eini khom Isaac anghan Pathien chongkhâm nâingei eini.

29Ma zora lâihan, taksa balama suokpu han Pathien Ratha lama suokpu hah deng-amintheia, atûn hin khom ma anghan ani.

³⁰Aniatachu Pathien lekhabu'n imo ai ti hah? “Suoknu le a nâipasal chu rujûlpai roh; suoknu nâipasal han suok niloinu nâipasal leh a pa rochon luopui thei no nih.

³¹Masikin, ka malngei, suoknu nâingei ni mak mea, suok niloinu nâingei kêng eini.”

Galatia 5

Nin zalênna hôi roi

¹Zalênna ei nei chu, Khrista han mi mojôk zoi! Hanchu zalên mingei ang takin inding det unglâ nin theiin suok achang nôk rangin inphal khâi no roi.

²Rangâi roi! keima Paul'n nin kôm ki ti ani, sertan rangin nin inphalin chu Khrista hah ninta rangin ite asena om tet loi nîng a tih.

³Sertan ngei ngân chu balam chong murdi jôm ranga nuom an ni iti ki min riet nôk.

⁴Balam jôm sika Pathien kôma adik inchang abôk ngei, Khrista leh nin insen zoia, Pathien moroina pêntieng han nin om ani.

⁵Keini rangin chu, kin taksônân Pathien Ratha sinthotheina jârin Pathien kôm adik inchang kin tih iti kin sabei ani.

⁶Khrista Jisua leh inzomna han chu sertan khom, sertanloi khom ite ateina ommak, lungkhamna sika taksôna sin vai asêna aom ani.

⁷Nin tho minsa sabak! chongdik hah nin jôm loina rangin tumo nangni akhap? Inmo nangni a methêm.

⁸Mahi chu nangni koipu Pathien renga chu nitet mak.

⁹An ti anghan, “Chol hâr chînte hin vâipôl pumpui athoi zit ngâi.”

¹⁰Aniatachu, nangni ka la taksôn tit Pumapa ei ringna ân zomna sikin mindonna dang uol nei no tunui ti ka sabei; hanchu, nangni minjêlpu ha chu i-anga mi nikhomsenla, Pathien'n dûkmintong a tih.

¹¹Ka malngei keiman sertan anâng tiin lei misîr ngâi inlang, ithomo dûk ko tong ranga? Ma anghan nisenla, khros chong ki misîr hin intakna suok no nih.

¹²Nangni minjêl kai chu sertan vai ni loiin, ma anghan tho lilia rese ngei anthenin tanpit rese ngei ku nuom ani.

¹³Ka malngei, nangni chu zalên ranga koi nin ni. Aniatachu nin zalênna hah nin taksa mulungbôkngai rangin zoranchumin mang no roi. Manêkin, in lungkham inlômin sintho insan inlôm roi.

¹⁴“Nangma nêh lungkham anghan nu bungmingei lungkham roh” iti chong hin Balam pumpui chongpêk inkhatin a kaikhôm let ani.

¹⁵Aniatachu, ramsa anghan nin inpetta, nin insâk inlôm duoiin chu, nin inmang let loina rangin indîn roi.

Ratha le munisi nina

¹⁶Ki ti chu mahih ani; ratha'n nin ringnun ruoi rese, hanchu, miriem nina mulungbôkngêi hah nin jôm loi rang ani.

¹⁷Ei miriem nina mulungbôk hah ratha mulungbôkin a doi ngâia, ratha mulungbôk khom miriem nina mulungbôkin adoi ngâi. Ma ngei inik hah râi an ni. Masikin nin sin tho nuomngêi hah nin tho theiloina ani.

¹⁸Ratha'n nangni a ruoia anin chu Balam nuoia ommak chei.

¹⁹Miriam nina sintho ngei chu ânlang-iem. Mangei hah inditnasaloingêi, inthiengloina ngei, hurna ngei,

²⁰mirimil biekna ngei, dôh theina ngei. Mingêi râi inchangin an indoia, an innarsaa, an ningathika an innumâka. Pâl dang le lôm dangin an inkêm ngâi.

²¹narsana ngei, ju inrûina ngei, hurinliekna ngei le ma anga adang dang an tho ngâi. Motona nangni ke lei ril sai anghan atûn khom nangni ki ril nôk, ma anga sin tho ngei hah chu Pathien Rêngram luo tet noni ngei.

²²Aniatachu Ratha mara chu; lungkhamna ngei, râisâna ngei, inngêina ngei, tuongtheina ngei moroina ngei, satna ngei, taksôn omna ngei,

²³rangâiinchîna ngei le indîntheina ngei hih ani. Ma ngei akal rangin balam reng ommak.

²⁴Khrista Jisua mingêi chu an miriem nina hah an mindonna le an mulungbôkngêi murdi leh an that suozoi.

²⁵Ratha'n ringna thar mi pêk zoia; ama'n ei ringnun khom a jêk ngêt rang ani.

²⁶Inpâka, insuol inkhalin le inkhat le inkhat innarsân ei om tet rang nimak.

Galatia 6

Puokpêl insan inlôm roi

¹Ka malngêi, mi tumakhatin nunsie sinin in ôk senla, nangni ratha mingêiin nin mindik rang ani; hannirese, mulung innêm takin nin tho rang ani. Nangni khom huongna han nin lût sa loina rangin in enchak roi.

²Nin puokpêl insan inlôm roi; hanchu Khrista balam nin jôm nîng atih.

³Nangman ite ni tetloia milien takin nênbên chu nethena ânhuong ni ni.

⁴Nin sin tho chit injêk bak unglâ. Asa anin chu, mi sintho leh mintêk loiin, maleh nin sin thoa han insong thei nin tih.

⁵Nin rêngin nin puok chit nin pêl rang sikin.

⁶Nangma hah Khristien chong minchuna changpu ninia anînchu neinun sa no dôn murdi nang a minchupu kôma han ne sem sa rang ani.

⁷Nin theiin inhuong no roi; tutên Pathien a môh mintum no roi. Nu tu tak hah na ât rang ani.

⁸Na taksa ngâituina tienga nerthên chu thina hah ât na ta, Ratha tienga nu tua anînchu na ratha han kumtuong ringna hah ât atih.

⁹Masikin sin sa sin sôl no ih, ei mâk nônchu a ât zora la hong tung ngêt a tih.

¹⁰Ma anghan zora sa ei man dôr han mitin chungâ sin sa sin ei ti u, aliekin taksônna han ei inmi ngei chungâ sin uol ei ti u.

Rilna nûktak le chibaimûkna

¹¹Keima kut ngêta nin kôma inrolbura ki miziek hih en ta u!

¹²Sertan ranga nangni pût ngâingei hah apêntieng korong minlanga, ânpâk nuomngei hah an ni. An tho ngâi nikhomrese, Khrista khros sika nuomlona an jôkna rang papaia an itho ngâi ani.

¹³Sertan ngei luo khomin Balam hah jôm ngâi makngei; taksa balama nin inpêk tia an insong theina rang ser nangni mintan nuom kêng an ni.

¹⁴Nikhomresea, keiman rang chu, ei Pumapa Jisua Khrista khros vai song ki tih, ha a khros jâra han rammuol hih ka rangin jêmdelin a om zoia, kei khom rammuol rangin jêmdelin ko om zoi.

¹⁵Miriam insintharna tiloi chu sertan le tanloi ite nimak.

¹⁶Male an ringnuna ma balam a jûi ngei chungâ le Pathien mingei chungâ inngêina le moroina om rese!

¹⁷Amongna rangin: atûn pêna chu tutên mimintak khâi no rese; isikamo ei tiin chu ka takchungâ sabe hin Jisua suok kini hih a minlang ani.

¹⁸Ka malngei ei Pumapa Jisua Khrista moroina hah nin rênga kôma han om rese. Amen.

Ephesi

Ephesi 1

Chibaimûkna

¹ Pathien nuomlama Khrista Jisua a tîrton Paul han, Ephesi taka om Pathien mingei, Khrista Jisua leh munkhata an ringnun taksônoma mang ngei.

² Pathien ei Pa le Pumapa Jisua Khrista'n moroina le inngêina nangni pêk rese.

Khrista taka ratha satvurnangei

³ Pathien le ei Pumapa Jisua Khrista Pa kôm ei râisânchong mintung ei tih u! Khrista leh ên jômna sika han invânrama ratha satvurnangei nâm mi vura.

⁴ Rammuol insieng mân renga, Pathien'n Khrista jâra a makunga inthieng le minchâinaboi nirangin mi lei thangsai ani zoi. A lungkhamna sikin

⁵ Pathien'n Jisua Khrista jâra a nâingei mi minchang rangin alei mintuosai ani, maha a râisâna le a neinunkhîn ani.

⁶ A lungkhamna roiinputak hah, a nâipasal taka han neinun manboipêk mi pêk sikin Pathien chu minpâk ei tih u!

⁷ Khrista inbôlna thisen sikin ei sietnangei ngâidamin, jôkin ei om zoi. Pathien moroina roiinpui tie hih,

⁸ minkhîna lientak mi pêk hi! A vârna le a rietheina ngei nâmin

⁹ Pathien neinunkhîn ngei hah zoiin aoma, a lungdo inthup hah zoi ranga a lei khâm chu Khrista taka han min zoi rangin mi min riet zoi.

¹⁰ Ma a lungdo hah azora diktaka Pathien'n neinunsinngeni nâm, invân le pilchunga omngei nâm minchunin Khrista han alutak ani rang.

¹¹ Neinunngeni murdi hih Pathien lungdo le a jêklam ang taka tho ania; hanchu Pathien'n aphutnataka a mintuo lam ang takin Khrista taka a mingei nirangin mi thang zoi ani.

¹² Tho masikin eini Khrista lei sabe masa ngei hin Pathien roiinpuina minpâk ei tih u.

¹³ Sanminringna Thurchi Sa, chongtak nin riet lehan Pathien mingei nin hongni zoi. Jisua Khrista nin iema, male Pathien'n Ratha Inthieng a khâm lehan pumanina mohôr nangni nam ani.

¹⁴ Pathien'n a mingei a khâm pe ngei hah la man ei tih, ti hah ratha khâmna ania, Pathien mingei murdi zalên pharna pêk atih, ti khom mi min riet sa ani. Tho a roiinpuina minpâk ei tih u!

Paul chubaithona

- ¹⁵Masikin keima khom, Pumapa Jisua nin taksôn le Pathien mingei nin lungkhamna ti ki riet renga chu,
- ¹⁶Pathien kôm râisânchong ki mintung hih mong khâi mu-ung. Chubai ko thôna khom nangni ki riëttit ngâi.
- ¹⁷Male ei Pumapa Jisua Khrista Pathien, Pa roiinpuetak han, ama nin rietna rangin, Ratha vârna le inlârna nangni pêk rangin ke ngên ani.
- ¹⁸Ama vârnin mu theina rangin nin mulungrîl ngei ân-onga, nangni a koina taka sabeina aom ngei, a mingei ranga a khâm satvurnangei kamâmruoi tamtak ngei le,
- ¹⁹keini a iemngei kâra sinthotheina lien tie ngei hah nin riet theina rangin ke ngên ngâi ani. Hi râtna, kin chung a sin atho tit hih râtna inthieng
- ²⁰Khrista thina renga inthoi nôka invânrama a chang tienga ânsung lâia a mang nanâk hah ani.
- ²¹Khrista chu invâna roijêkpungei, rachamneipungei, sinthotheinangei, le pumangei; hi rammuol le rammuol a lahong om ranga rachamneipungei chung a riming ânchungtak a la dôn rang ani.
- ²²Pathien'n neinunngai murdi hih Khrista ke nuoia a dara, ma neinunngai murdi hah Pumapa ânchungtak han koiindang kôm a pêk zoi.
- ²³Koiindang chu Khrista takpum ani, muntina neinun murdi mikhippharpu kipna hah ani.

Ephesi 2

Thina renga ringna

- ¹Zora vunsai han chu chongdonloi le sietnangei sikin rathatieng nin thi ani.
- ²Mâlâia hanchu rammuola lampui saloingei nin jûia; munronga ratha sinthotheinangei, rachamneipungei chong nin don ania, atûna Pathien chongdonloingei lâia sinthotit ratha hih ani.
- ³Adiktakin eini khom ei rêngin anni angin ei om ani, ei taksa ngâituina dungjûiin ei oma, ei takpum le ei mulungrîl lungdongei ei sin ngâi ani. Eini khom midangngei angin eini sikin, Pathien ningthikna tuong rang piela inzir ei leini.
- ⁴Aniatachu, Pathien moroina hah atamin a lungkhamna hah alien ani,
- ⁵ei chongdonloina sika rathatieng athi eini lâitak khomin ama'n Khrista leh mi minring zoi ani. Pathien moroina han kêng sanminring nin ni zoi.
- ⁶Khrista Jisua leh ei inzomna sika han invânrama ama leh roijêk rangin ama leh mi kaithoi zoia.

⁷Mangei murdi hah a lei thôna abi chu, zora lahong rang ngeia Khrista Jisua han mi lungkhamna le mi moroina alieka lien tie hah ei chung a minlang theina ranga ani.

⁸Pathien moroina sikin nin taksôna han sanminring kêng nin ni. Nangni renga suok nimaka, Pathien neinunpêk ani.

⁹Sinthona sika khom nimak, masikin tute insong thei mak ngei.

¹⁰Pathien kutsuokngei eini, Khrista Jisua han sin asa tho ranga mi sin ani, ma sin sa hah ei tho ranga a lei minsûk piel kêng ani.

Khrista taka pumkhatnina

¹¹Nangni, ânzir renga Jentailngei, Juda “Sertan” (maha miriemngei an takpuma an tho, a rokôkna ani) ki ni inti ngâi ngeiin “Sertanloingei” nangni an ti ngâi hah, zora vunsai nin nina hah riettit roi.

¹²Ma lâia han chu Khrista leh nin tei ani, Ramdangmingei nin nia, Pathien mi thangngei nimak cheia. Pathien'n a mingei kôma a chonginkhâm chongtung han rangtum dôn mak chei, male sabeina boi le Pathien boiin nin om ani.

¹³Aniatachu, atûn chu Khrista Jisua han, nangni ala taka om ngâi ngei hah Khrista thisen sikin nangni hong minnâi zoia.

¹⁴Khrista'n, Judangei le Jentailngei hih mi inkhata sinin inngêina mi pêk zoi. An insenna le râl an inchangna banglâi hah ama takpum lelên a misim pe ngei zoi.

¹⁵Ama han Judangei balam leh chongpêkngai le jûiruongi murdi a minboia, ama'n inik ngei hah miriem thar, inkhata sinin, inngêina a sin ani.

¹⁶Khrosa a thina sika han, Khrista'n râl an inchangna hah a minboia, ma khros sika han jât inik ngei hah molopin takpum inkhata sinin Pathien tieng a hong mikhâr nôk ani.

¹⁷Masikin, Khrista a juonga mingei murdi kôma inngêina Thurchi Sa hih a misîr ani, nangni Jentail Pathien leh inkârzana omngai kôm khom, Juda ama nâikik ngei kôm khom.

¹⁸Khrista jârin ei rêngin Judangei le Jentailngei Ratha inkhatin Pa kôm ei lût thei ani.

¹⁹Masikin nangni Jentailngei khom ramdangmingei le khuolmi ni khâi mak cheia, atûn chu Pathien mingei le ramkhatmi le Pathien insûngmingei kêng nin ni zoi.

²⁰Nangni khom tîrtonngai le dêipungei lungphûm chung a sinminding nin ni, akila lung kâmomtak chu Khrista Jisua lelê hah ani.

²¹Ama hah a in pumpui sûra Pathien biekin inthieng minsôna Pumapa kôma minlang ngâipu ani.

²²Ama leh inzomin nangni khom midangngei leh Ratha taka, Pathien omna mun ranga sinminding nin ni.

Ephesi 3

Jentailngei ranga Paul Sintho

¹Masikin keima Paul hin, nangni Jentailngei rang sika Khrista Jisua taka intângmi hin Pathien kôma chubai ko tho ngâi ani.

²Nin satna ranga sintho rangin Pathien'n a moroina mi minrâk hah lei riet ngêt nin tih zoi.

³Pathien'n a lungdo inthup hah a phuonga, keima mi minriet tie hah. (Ma roi hih abongkikin ki mizieka,

⁴ma ki miziek hah nin pore a anînchu Khrista chong inthup ki riet tie hah riet nin tih.)

⁵Zora lei vunsai han chu hi chong inthup hih miriemngei lei ril ni ngâi maka; nikhomrese, atûn chu Pathien'n a tîrton inthiengngei le a dêipu inthiengngei kôma Ratha Inthiengin a minlâr zoi.

⁶Chong inthup chu mahih ani, Thurchisa sikin Judangei, Pathien satvur an changna han Jentailngei khom an changdelsa, takpum inkhata mi an nia, Jisua Khrista taka Pathien chonginkhâm ha munkhatin an chang thei ani.

⁷A sinthotheina ranak sintit jâra mi pêk, Pathien manboipêk satak han thurchisa tîrlâmin mi sin ani.

⁸Keima hih Pathien mingei nâm lâia achîntak nêka achîn uol ki ni, hankhoma Pathien'n sintum satak mi pêk, Jentailngei kôma Khrista neina suisuok theiloi Thurchi Sa misîr rangin,

⁹male Pathien mintuo inthup kâmnânga om rangin mi nâm kôm min mu ranga sin ania. Pathien, neinunngei murdi sinpu han, kum leivunsai ngeia chong inthup inrûk a dara,

¹⁰ma anghan atûnlâia hin, koiindang sikin, vântîrton roijêkngei le invânrama sinthotheinangei le a vârna dadang ngei murdi an inchu theina rangin.

¹¹Kumtuonga alei mintuo dungjûiin Pathien'n ei Pumapa Jisua Khrista jârin thang a min suo zoi.

¹²Khrista ei inzompuina sik le ama ei taksôn sikin hâitak le ngamtakin Pathien kôm ei se thei zoi ani.

¹³Masikin nangni sika intak ku tuongna sika hin nin jâminzal lona rangin nangni ki ngên ani, mangei hah nin satna rang inzie ani.

Khrista lungkhamna

- ¹⁴Hingei sika hin Pa makunga khûk kên bil ngâi,
- ¹⁵Pa, invân le pilchunga insûngkuo murdi'n an riming diktak an manna hah.
- ¹⁶Ama Ratha jâra nin sîngrîl tieng râtna nin man theina ranga a roiinpuina rochon renga sinthotheina nangni a pêk theina rangin Pathien kôm ko zong ngâi,
- ¹⁷male, Khrista hah taksônna sika nin mulungrîla aom theina rang le lungkhamna han ruzung mathâka lungphûm nin nei thei rangin ku chubai sa ngâia,
- ¹⁸masikin, nangni, Pathien mingei nâm lehan Khrista lungkhamna inzar tie ngei, aseï tie ngei, ânsâng le ânthûk tie ngei riettheina ratha nin dôn theina rangin.
- ¹⁹Nangni minriet mikhip riei thei nino khomrese, a lungkhamna hah riet thei unglâ Pathien nina atakin sipmat roi.
- ²⁰A kôma a sinthotheina ranak einia a sintitpu han, ei zong phâkloi le ei mindon phâkloi a tho theia:
- ²¹zoratina Pathien kôm, koiindanga le Khrista Jisua han a roiinpuina chu tuonsôt tuonsôtin om tit reseh! Amen.

Ephesi 4

Inpumkhatna takpum

- ¹Hanchu, keima Pumapa sintho sika intângmi hin: Pathien'n nangni a koi lâia nangni a dar lam angtaaka om rangin nangni ke ngên ani.
- ²Khotiklâi khom nunnêmna, rangâiinchîna le tuongtheina ngei dôn tit ngâi roi, nin lungkhamna hah tuongdiernân inkhat le inkhat chungâ minlang roi.
- ³Inngêina han inpumkhatna nangni akhitlomna ngei sika Ratha nangni a pêk inpumna hah dôn tit rangin nin theidôr pûtrît roi.
- ⁴Pathien'n nangni a koina taka sabeina inkhat ani anghan takpum inkhat le Ratha inkhat mamang aom.
- ⁵Pumapa inkhat, taksônna inkhat, baptisma inkhat aoma;
- ⁶mitinngêi Pathien le Pa inkhat aoma, ama hah neinun murdi Pumapa ania, neinun murdi chungâ sin a thoa, neinun murdi chungâ aom ani.
- ⁷Khrista'n ei rangtum mi pêk lamtakin ei sika neinun manboipêk satak ei chang ani.
- ⁸Pathien lekhabu'n, "Chungtieng insângtaka a kal lâihan, suok intângngêi tamtak a tuonga; Miriemngêi kôm neinunpêkngêi a pêk," ati anghan.

⁹“Chungtieng a kal” ti hih khoimo aomzie? Pilchung innuaitaka hin a juong chum bak tina ani.

¹⁰Masikin, a juong chumpu nanâk hah pil le invân murdia aom let theina rangin invân chung a le invân pênah a se nôk ani.

¹¹“Miriemngei kôma neinunpêk a pêkpu” hah ama ania, mi senkhat chu tîrtonin a phuna, senkhat chu dêipu'n a phuna, senkhat chu Thurchisa misîrpu'n a phuna, senkhat chu koiindang enkolpu'n a phuna, senkhat chu mi minchupu'n a phun ani.

¹²Khrista takpum sinmindingna rangin Pathien mingei murdi Khristien sinthona taka an inchel theina rangin maha a tho ani.

¹³Male Pathien Nâipasal ei rietna le ei taksônna lama han ei rêngin ma inkhatnina han ei hong intûp rang ani; mitungsuo nîng ei ta, Khrista ulien nina insângtak hah phâk ei tih zoi.

¹⁴Hanchu miriem milaknagei, an milak mang sika midangngei minvâi ngâi ngei, minchuna dikloi sika tuilien insôn ranak le sêm in mang anga nâipang nikhâi no ih.

¹⁵Manêkin, ratha lungkhamna chongtak misîrin Khrista ei lu tieng lamtina hong insôn ei tih u.

¹⁶Ama enkolna nuoia takpuma abâkngei murdi minsûk khomin rotin sin atho chit anghan, takpumpui chu a sîr minding ani; Masikin abâk chitin sin an tho rang lamtakin an tho inchu takpumpui hah lungkhamna sikin insônin ândingsuok ngâi ani.

Khrista taka ringna thar

¹⁷Hanchu, mahih Pumapa rimingin nangni ki min riet; sonongngei angin om khâi no roi, ha ngei mindonna ha chu asenaboi ania,

¹⁸an mulungrîl ngei khom ijînga om ani. An sêt sik le an mulungrîl inngar sika han Pathien pêk ringna han rangtum dôn makngei.

¹⁹Inzak rietnagei murdi an minmanga, hurna le neinun innim murdi an nuom dôra tho rangin an inpêk zoi.

²⁰Khrista roi nin inchu ha chu ma anghan nimak.

²¹Ama roi nin riet zoia, ama nûkjûipungei anghan Jisua chongtaka aom hah minchu nin ni zoia.

²²Masikin nin mi nina muruo a, milak ôina saloia, nin lei om lam muruo asietsai hah nûksong ta roi.

²³Nin mulungrîl ngei le nin mulungbôk ngei sin mintharin aom ngêt rang ani,

²⁴male mi nina thar, Pathien angna dôna sin ringna dik minlang le ânthienga han invo ngêt roi.

²⁵Hanchu milak om khâi nonia, mitinin a iempuipu kôma chongtak ril an tih zoi, Khrista takpuma mingei eini chit sikin.

²⁶Nin taksi khomin ma nin taksina han nunsie tieng nangni tuonglût no senla, sântuonin taksi pumin om no roi.

²⁷Diabol hah zorânychum pêk no roi.

²⁸Inru ngâipu han inru tho khâi no senla, ama rang le inriêngngei a san theina rangin sin hah tho ta rese.

²⁹Mi siet thei chong mang no unglâ, nin chong rangâi ngeiin satna an man theina rangin akâmom chong mi sinminding ngâi le an nâng a pêk ngâi moroina chong vai hah mang roi.

³⁰Pathien Ratha Inthieng hah min ngûi no roi; asikchu Ratha hah Pathien nangni mojôk rang Nikhuoa ama ta nin nina sînthona ani.

³¹Mulungkhana, ngalna, taksina, êrona, innumâkna ngei murdi hah mâk ngêt ta roi.

³²Manêkin, lungkham inlômin le mulungbôk minmun unglâ, Pathien'n Khrista sikin nangni ngâidam angin inkhat le inkhat in ngâidam inlôm roi.

Ephesi 5

Avâr taka om

¹Pathien nâi moroitakngei nin ni sikin ama phuo rangin nin pût ngêt rang ani.

²Khrista'n mi lungkhama, eini rangin a ringna a pêka, inbôlna neinunpêk anga mirimhoi Pathien'n a râisân anghan, nin ringna hah lungkhamnân jêk ngêt rese.

³Pathien mingei nin ni zoi sikin, nin lâia inditnasaloi ngei, inthiengloina ngei aninônchu inruôkna ngei, nin bâia nin ril luo hih adikloi ani.

⁴Bâingal ngei, chongkâmboi ngei, tusiem porinche ngei khom nin mang rangin inhoi mak; ha ngei ril nêkin Pathien kôm râisânchongril roi.

⁵Tutên hurindit song le inthiengloi le inruôkngei (inruôk hih mirmil biek ani) murdi'n, Khrista le Pathien Rêngrama rangtum man noni ngei ti nin riet minthâr sikin.

⁶Tutên chongkâmboi leh nangni huong no rese ngei; ma neinunngiei sikin kêng Pathien taksina hah ama chongdonloipungei chungâ ajuongtung rang ani.

⁷Masikin ma anga mingei lehan ite inzomkhômna dôn rangin tho no roi.

- ⁸Nangni nanâkin ijînga lei inmangin nin om ngâia, hannirese Pumapa mingei nin hongni zoia, masikin avâra om ngâi mingei anghan nin om ngêt rang,
- ⁹satnangei, diknangei le chongtak jâttin mara tamtak musuok hih avâr chu ani.
- ¹⁰Pumapa râisâna ngâi hah imo ani riet rangin pût roi.
- ¹¹Mingei an sin ngâi kâmnângloi neinunngiei hah ite tho no roi, ijîng ta neinunngiei hah. Manêkin avârna hongtuong pai ngei roi.
- ¹²(Inrûka an tho ngâi neinunngiei chungroi hih chu amisîr khom inzakupui aom sabak tatak ani.)
- ¹³Male neinunngiei murdi hi avâra hong tuongin aomin chu, an nina diktak hah ânthârin ânlang ngâia;
- ¹⁴i-ih neinun khom ânthârlaka inlanga omngiei ngân chu avâr ani sikin. Ma sika han kêng, “Nangma a in meng inla, Thina renga inthoi roh, Hanchu, Khrista'n nu chung a juong êlminvâr atih,” a ti hah.
- ¹⁵Masikin mi inmôl ngei angin om loiin, mivâr ngei anga omin, nin om lama singthei roi.
- ¹⁶Nikhuongei hih asa khâi loi sikin, zorânchum nin dôn ngei hah mang mindik ta roi.
- ¹⁷Masikin moh no unglâ, Pumapa'n nin sin ranga a nuomngiei hah riet rangin pût ta roi.
- ¹⁸Ju inrûiin om no roi, nangni vai kêng nangni asiet rang; manêkin Ratha'n sip roi.
- ¹⁹Lapuingei chongbâingei, minpâkna lângei, male la inthiengngiei leh inrokôk unglâ; minpâkna lângei lapuingei lehan nin mulungrilngeia Pumapa kôm minpâkna lâtho roi.
- ²⁰Neinunnâm chung a ei Pumapa Jisua Khrista rimingin, zoratin Pa Pathien kôm ngêt han râisânchongril roi.

Lômnungei le lômpangei

- ²¹Khrista taka nin inthieng sikin inkhat le inkhat inpêklût inlôm roi.
- ²²Lômnungei, Pumapa kôm nin inpêklût anghan nin lômpangei kôm inpêklût roi.
- ²³Khrista chu ama takpum, koiindang sanminringpu ania, koiindang chung a racham a nei anghan pasal khomin a lômnu chung a racham a nei ani.
- ²⁴Koiindangin Khrista chung a ân pêklût anghan lômnungei khomin an lômpangei chung a an inpêkrip rang ani.

²⁵Lômpangei, nin lômnungei lungkham roi. Khrista'n koiindang a lungkham sikin a ringna a pêk anghan.

²⁶Koiindang hah tuia rusûk minsâia, ama chong sika han Pathien kôm a pêk theina ranga maha a tho ani.

²⁷Innimna koploi, demnaboi, minchâinaboi, kôknaboi le jûrnaboi le chukloina reng omloia, ama kôm nanâka koiindang hah a pêk theina rangin.

²⁸Ma anghan, pasalngei khomin an takpum angtakan an lômnungei an lungkham rang ani. A lômnu lungkham kai chu ama ânlungkham ani.

²⁹(Tutên ama takpum heng ngâi mak, a vâiin a donsûi ngâi; Khrista'n koiindang a donsûia a vâi ngâi anghan,

³⁰a takpum abâkngai eini sikin)

³¹Pathien lekhabu'n, "Masikin pasalin a nû le a pa mâk a ta, a lômnu leh inpumkhat an ta, inik hah inkhat chang an tih," ati anghan.

³²Ma Pathien Lekhabua han chongtak inthup inthûk minlanga om aom, maha keiman chu Khrista leh a koiindang a misîrnân ki rietthei.

³³Aniatachu nangni tieng khom mang thei ania; pasal nâmin anni angin, an lômnungei an lungkham rang ani, lômnungei nâm khomin an pasalngei mirit an tho rang ani.

Ephesi 6

Nulepangei le nâingei

¹Naipangngai, Pumapa taka han nin nulepangei chongdon roi, maha nin Khristien sintum tak, le neinun dik tak ani.

²"Nin nû le pa ngei mirit tho roi," ti hih chongpêk masataka lei khâm ani:

³"Masikin ninta rangin sâng a ta, rammuola nin dam sôt atih."

⁴Nulepangei, nin nâingei ningthik rang lamin tho pe no unglâ. Manêkin, Khristien rilna le minchuna han kairuoi ngei roi.

Suokngai le pumangei

⁵Suokngai, Khrista sintho anghan ichi le innîk pumin mulungrîl diktakin taksa tienga nin pungei chongdon roi.

⁶Nangni an modômna rangin, an mitmu kêrin vai sin no unglâ, Khrista suokngai anghan Pathien'n a nuomna hah nin mulungrîl murdi'n jôm roi.

⁷Miriem sin vai niloia, Pumapa sintho asa anghan nin sin hah suok angin tâihiein sin roi.

⁸Mitinin suok khom suok niloi khom sin asa an tho lam angtakin Pumapa'n râisânman pêk atih, ti hih riëttit roi.

⁹Suok pumangei, nin suokngei tieng khom ha ang nanâk han tho unglâ, misi ngei khâi no roi. Nangni le nin suokngei puma hah, invâna aoma, mi murdi chungâ ân-angsâra roijêkpu ta nin ni, ti riëttit roi.

Pathien râlrovo pumpui

¹⁰Anûktaka chu, Pumapa taka sinthotheina lien lehan nin ranak minding roi.

¹¹Diabol huongvâr saloingei nin doi zoi theina rangin, Pathien'n nangni a pêk râlrovo murdia han invo roi.

¹²Ei inbuonpui ngei hih taksa le thisen nimak ngeia, invânrama ranak, ratha saloingei, roijêkpuingei, rachamneipungei, hi ijîng chungâ rammuola ratha saloi ranakngei hi an ni.

¹³Masikin atûn Pathien râlrovo invo ta roi. Hanchu, nikhuo saloi ahong tungin, râlngai ranak song hah nin khap zoia, among dêna nin insuolpui ngei suonûk khomin lânding thei tit nin tih.

¹⁴Masikin, indingdet unglâ, chongtak hah kongkhit angin nin kongâ khit unglâ, dikna hah rôpphoa mangin,

¹⁵inngêina Thurchi Sa misîr ranga inthokna hah kekok angin mang roi.

¹⁶Zoratin taksônna hah pho angin mang unglâ, mahan Saloi Inkhatpa renga thal kâp meichuong murdi ngei hah that thei nin tih.

¹⁷Sanminringna hah thîr tapor angin lâk unglâ, Ratha'n nangni a pêk Pathien chong hah khandai angin lâk roi.

¹⁸Ha ngei murdi hah chubaithoa Pathien kôm ngên pumin tho roi. Khotiklâi khomin, Ratha'n nangni aruoi lam takin chubaitho ngâi roi. Masika han mâk tet loiin inning tit unglâ, zoratin Pathien mingei ta rangin chubaitho sa ngâi roi.

¹⁹Hâitakin thurchi ki misîra, thurchisa taka inthup hah ki min riet theina ranga phuong ranga kên ding tika, Pathien chong mi pêkna rangin keima rang khomin chubai ni tho pe sa ngâi roi.

²⁰Atûn intâng ina om khom inlang, ha thurchisa palâi hah ki ni. Masikin thurchisa misîrna lama ka hâi rang lam angtaka ka hâi theina rangin chubai mi tho pe sa ngâi roi.

Azoina chibai

²¹Ku chungroi nin riet theina rangin Tychicus, lâibung moroitak le Pumapa sinthona taka tîrlâm taksônontakpu han, ku thurchi anrêngin nangni lei ril a tih.

²²Masik taka hin ama hah ko hongtîr ani, kin rênga kin chungroi nangni ril rang le nangni mohôk rangin.

²³Khristien sungsuokngei nâm chung, Pa Pathien le Pumapa Jisua Khrista'n taksônna lehan, inngêina le lungkhamna, nangni pêk rese.

²⁴Lungkhamna thiloï leh ei Pumapa Jisua Khrista lungkham titpu ngei murdi kôm han Pathien moroina hah om rese.

Philipi

Philipi 1

¹Paul le Timothy, Khrista Jisua târlâmngei renga, Philipi khopuiliena Pathien mi Khrista Jisua taka inruol ngei, le koiindang ruoipungei le sintho sanpungei:

²Pathien, ei Pa le Pumapa Jisua Khrista'n moroina le inngêina nangni pêk rese.

Aporepungei ta ranga Paul chubaithona

³Nangni ki mindon racham ka Pathien kôm râisânchong ki mintung ngâia;

⁴nin rênga rangin chubai ko tho zora racham, kên zongna ngeia mulung râisânin asip ngâi ania

⁵asikchu sùn motontak renga atûntena thurchisa phuong minzar sinthona hin mi nin la thop tit sikin.

⁶Male nangma taka sin sa, Pathien'n nang a phutpui anghan, Khrista Jisua Nikhuo, nikhuo mongni dênin nang ruoi tit atih, tiin khom ki iempam ani.

⁷Ku mulunga nin om tit ngâia! Hi anga nin chungroia adiktaka ki mindon rang piel khom ani. Atûna intâng ina ko om sângin le thurchisa rung rang le adettaka ki minding lâi ngei han khom Pathien mi pêk zora sa ngei khom nin chang sa.

⁸Ku mulungrîl tataka nangni ki ti ngei hih khom Jisua Khrista mulung renga nanâk ani, ti hih Pathien hih rietpuipu ani.

⁹Nin lungkhamna hah, rietna diktak le roijêkna diktak leh ahong pung u-uol theina rangin chubai ko tho ngâi,

¹⁰masikin asatna nin thang thei ani. Hanchu, Khrista Nikhuoa han inthieng le demnaboi hongni nin tih.

¹¹Jisua Khrista vaiin a pêk thei, nin ringna hah satna diktakin nangni minsip atih, Pathien roiinpuina rang le minpâkna rangin.

Khrista ranga ring

¹²Ku sungsuokngei, ku chungna neinun hongtung ngei hah thurchisa minzarna taka mi san tatak ani ti nin riet rang ku nuom.

¹³Khrista târlâm ki ni sikin intâng ina minkhum ti hih munpui rungungei nâm le midang hitaka om ngei nâmin an riet zoi

¹⁴Male intâng ina kên tâng sika ei khristien champui tamtak ngeiin Pumapa taka phûkdâiin an oma, an ngam teteta chiloï riekni Pathien thurchi an misîr zoi.

¹⁵Ani, senkhatin chu Khrista thurchi hih keima mi narsana sika le mi makhalna sikin an misîra, aniatachu adangngeiin chu mulungbôk diktakin an misîr ngâi.

16Hi ngei hin chu thurchisa muphuong rang piela Pathien'n sintum mi pêk ani ti rietpumin, lungkhamna sika misîr ngâi an ni.

17Senkhat ngeiin chu Khrista thurchi hih, ranghuolna mulungbôk ratha mangin, jêlina ko om sângin mi minjêl sabak rangin an mindon ani.

18Hannisenla ite injêl mak! asikchu, asa khomin, asie khomin, ikhomnirese Khrista thurchi an misîr sikin ka râiasân ani. Ma angdên han râiminsân tit ki tih,

19nin chubaithona sika le Jisua Khrista renga Ratha sanna sikin mojôkin la om ki tih, ti ki riet ani.

20Masikin ko ôina inthûktak le sabeina chu ki sintum châi tet loiin, aliekin atûn lâitak le zoratina khom hâina sipin ko om theia, ringna nirse, thina nirse, ka takpumpui leh Khrista kôm miritna ki mintung theina rangin.

21Aring hih imo ania? Ka ta rangin chu Khrista ani. Hanchu, thi hih inlâpna mintung uol atih.

22Aniatachu ka la ringin chu chuonsin kâmom la sin uol thei ki tih, aniatachu kho tak hi mo ka thang rang riet thei mu-ung.

23Kâng inikin kaiphirînin ko om ani. Hi ringnun hih mâkin Khrista leh om ta rong chu ko jôt tataka, ma neinun ha asa uol ok ani;

24aniatachu nangni jâra aringa ka la om hi kâmnâng uol ok ani.

25Mahi tak ko sônchêt sikin ka la om rang ti ki rieta, nin taksônna han masônna le râisâna nangni bôk pe rangin nin rênga nin kôm ka la om bang rang,

26masikin nin kôm ko hong tika, Khrista leh inzoma ring nin ni, tiin mi nin minpâkna abi nin dôn uol theina rang ani.

27Atûna, nin ringnunna neinun kâmnâng tak chu Khrista thurchisa'n anânglam angtak hah nîng atih, masikin nangni ko hong en theiin khom, en theiloiin khoma, thurchisa taksônna rangin neinunkhîn munkhat le ôina munkhata inding deta doi nin ni, tiin lei riet thei ki tih.

28Nin râlngei chi no unglâ; zoratin hâitakin om roi, male mahi an ta rangin dokna rang ani tiin minlangna nîng a ta, nin rât rang ania, mahi Pathien'n menêna nangni pêk sikin ani.

29Khrista sin tho ranga zora sa pêkin nin oma, ama nin iem vai niloiin, tuongsa rang khom phal nin ni.

30Atûn indoina takah ko kôm nin kop thei zoi. Zora vunsaia indoina kên doipui nin mu ngâi angdên ha, atûn tena khom ka lân doipui bang nin riet anghan.

Philipi 2

Khrista rangâinchîna le inlalna

¹Khrista taka nin ringna han nangni a min râta, male a lungkhamna han nin ratha a minngama. Ratha leh inlopkhômna nin dôna, inkhat le inkhat inriengmuna le inkan inlômna nin dôn ani.

²Hanchu mindona munkhat dônin, lungkhamna munkhata insem suom rangin, mulungrîl le ratha munkhata omin ka râisâna mikhipphar rangin nangni ke ngên ani.

³Ranghuolna oîna renga aninônchu insongna ôinangei renga ite sin no ungla, inkhat le inkhat chungâ rangâiinchîna dônin zoratin nangni nanâk nêkin mi dangngei asa uolin be roi.

⁴Male nangni nin nuomlam vai en loiin mi dangngei an nuomlam khom en sa roi.

⁵Hi mulungbôk nin dôn rang hih Khrista Jisua'n a dôn hah ani:

⁶Ama chu zoratin Pathien nina a dôna, aniatachu rangrâtin Pathien leh inangbanga ombang rangin pût rang mindon mak.

⁷Hima nêkin, ama lungdôn a dônngai murdi a mâk rieia, male târlâm nina hah a lâk zoi. Miriem angin a juong oma male miriem mêl angin ânlang zoi.

⁸Ama chu rangâiinchînin chongjômna lampuia a lôna, thina lampuingei dênrakin, khros chungâ a thina hah.

⁹Masika han Pathien'n ama chu mun insângtak chungâ a domsânga male riming dang dangngei nêkin riming inchungtak a pêk zoi.

¹⁰Masikin, Jisua riming miritnân invâna omngei murdi, pilchungâ omngei, le rammuol nuoia omngei khûk an inbilna rangin,

¹¹male mitinin Jisua Khrista hih Pumapa ani tiin ânlangin Pa, Pathien roiinpuina rangin phuong an tih.

Vârngai anghan rammuola vâr rang

¹²Masikin, ruol moroitakngei, nin kôm ko om lâia zoratin ko chong nin don ngâi anghan, atûn nin kôm ko om loi kâr hin vâng chu nin don uol rang anâng ani. Chi le innîk pumin nin sanminringna minzoi rangin sintho tit ungla,

¹³a neinunkhîn nin jôm theina rang le nin sin nuomna rangin Pathien'n zoratin nin sûnga sin a tho sikin.

¹⁴Neinuntin chierna le inkhalna boiin tho roi,

¹⁵han kêng hi rammuola mi nungsiengi le murûkmeret tho ngei lâia Pathien nâi diktak, sietnaboi le inthienghieia om anghan nin ni duoi thei, ârsingeiin invân an êlminvâr angin an lâia nin vâr ngêt rang,

¹⁶an kôm ringna chongbe nin pêk ngei anghan. Ha anghan nin thôn chu, Khrista Nikhuo han ke dengtheina le sinthona ngei murdi mâkana chang mak, tiin minlang theiin nangni minpâk theina rang abi dôn thei ki tih.

¹⁷Ani, ki ringna thisen hih nin taksônna inbôlna ngei Pathien kôm nin pêk angin, bunpai rang nikhom rongka ka râiasâna male ka râisâna nin rêngin nangni kên sempui sa ani.

¹⁸Ma angdên han, nangni khom nin râiminsân ngêt unglâ, kei khom nin râisâna mên sempui sa roi.

Timothy le Epaphroditus

¹⁹Masikin nin roi ki rieta mohôkin ko om theina rangin Pumapa lungdo anînchu, Timothy hih nin kôm hongtîr lai thei rangin kên sabei ani.

²⁰Ama vai hih ki mindona mên sempui ngâi le nin chungroi adiktaka donsûi ngâi ani.

²¹Adangngei nâm chu an siksika rang vai an mindona Jisua Khrista rangin chu mindon mak ngei.

²²Male ama chu alut tie minsina aom hah nangni rengin nin rieta, ama le keima hih kho angin mo kin ni, nâipasal le a pa angin kin nia, thurchisa rang jâra munkhata sintho ngâi kin ni.

²³Masikin keima rangin neinunngai kho angin mo a hong inhei ki riet lehan nin kôm hongtîr kelen rangin ka sabei ani.

²⁴Male keima reng khom nin kôm ânrange hong thei rangin Pumapa han iemna ko dôn ani.

²⁵Ki sinthopui le ki tienga mi doipui ngâi, nin tîrton anga sintho, mi san ngâipu ei lâibungpa Epaphroditus hih nin kôm hongtîr rang anâng tiin mindona ko dôn ani.

²⁶Ama hih nin rêngin nangni mu rang a jôt sabaka, a damloi nin riet sikin ânngûikhak ani.

²⁷Ataktakin ama chu damloiin a thi vânga. Aniatachu Pathien'n inrieng a mua, ama chung vai niloiiin, keima khom inngûina lien uola ko om lina rangin mi thop sa ani.

²⁸Masikin ama nin mu tika nin râisân nôkna rang le ka inngûina ânmanng theina rangin nin kôm hongtîr rang ka ngâklal sabak ani.

²⁹Pumapa jârin ama hah lâibungpa anghan râisânin lei modôm roi. Ama anghan mingei murdi kôm miritna minlang unglâ,

³⁰nangni'n sanna mi nin pêk thei loi, mi pêk rangin Khrista chuonsina jâra a thi vâng dôr a ringna phalin alei inpêk sikin.

Philipi 3

Dikna tatak

¹Chongkhârân, ka lâibungnei le sarnungei, Pumapa leh nin inzomna han nin râiminsân roi. Motona ke lei mizieksai avêla miziek hih kei rangin ningchiel om nimaka, ma anga ko tho hah nangni rangin ânlap uol ani.

²Neinun saloi tho ngei, uingei, taksa mortan lunghâng tho mingei renga han indin roi.

³Anni ngei niloiiin, eini ngei hih ama Ratha jâra Pathien chubaimûk ngei le Khrista Jisua leh inzoma ringna râisâna man ngei hih kêng sertan diktak eini. Eini chu pêntieng neinuna ei taksônna minngam mak me.

⁴Nuom rongu chu kei khom ma anga neinunnei chungu taksônna minngam thei kêng ki ni. Mi dang ngeiin pêntieng neinuna an taksônna minngam theiin an mindonin chu, keima vâng chu ma lampui han ma nêkin abi ko dôn uol ani.

⁵Haptakhat ki ni han sertan ki ni. Israelmia inzir ki nia, Benjamin jât mi, Hebrew thisen inthienghie ki ni. Juda Balam jûina tieng chu Pharisee ki nia,

⁶male koiindang nuomlona tieng asân ningsiet ngâi ke lei ni. Miriemin Balam chongpêknei jôma adik chang theina tieng chu demnaboi ki ni.

⁷Aniatachu inlapna ranga ke tel thei neinunnei murdi hah atun hin Khrista jârin machânin ke be zoi ani.

⁸Ma neinunnei vai hah niloiiin; ku Pumapa Khrista Jisua rietna luttak jârin neinun murdi khom machân rieiin ke be zoia; ama jârin neinun murdi ko vârpai leta, Khrista ka man theina rangin mangei nâm hah ânnim, ânok anghan ke be zoia,

⁹male ama leh inpumkhat tatakna rangin. Balam jôm sika man thei ngâi jât dikna hah keima hin dôn khâi mu-ung. Atun chu taksônna chungu ânngam, Pathien renga hongsuok ngâi dikna, Khrista taksôn sika pêka om ngâi hah ko dôn zoi ani.

¹⁰Anrênga ku nuom tak chu Khrista rieta, ânthoinôkna sinthotheina riet mindika, a tuongnangei tuongpuia, a thina angin thi rang hih ani.

¹¹Keimanânk khom thina renga inthoia, ring rangin insabei ki ni.

Tenkung tienga tân

¹²Keima chu ko zoisai ke ani zoi, aninônchu achukphar ko hongni zoi ki tina khom nimak. Khrista Jisua'n ama nanâkin mi lei mansaina râisânman hah ka man thei duoi mo tiin ku rujul ani.

¹³Ani, ka lâibungngei le sarnungei, adiktakin ka man saiin la mindon muung nikhomrese, neinun khat ko tho ngâi chu, ku nûktienga om neinunngei mingilin motontienga om neinunngei phâk rangin ka pharidôr ko tho ani.

¹⁴Masikin râisânman man rangin tenkung tieng ânjîkzatin ka tâna, hima hih Khrista Jisua sika chungtienga ringna Pathien koina ani.

¹⁵Eini ratha taka mitungsuo ngeiin ei rêngin hima anga mulungrîl munkhat hih ei dôn rang ani. Aniatachu mi senkhatin mulungrîl dang nin dôn duoiin chu Pathien'n nin kôm la minthâr atih.

¹⁶Maha kho angin khom nirse, atûn tena ei lei jûisai balamngei dungjûiin motontieng panin se ei ti u.

¹⁷Ka champuingei, ku nunchan inchupungei ni roi. Nangni ranga minenna dik kin dar ajûipungei hah lunghâng tho ngei roi.

¹⁸Mi tamtak ringnun hah Khrista khros chung a thina râlin a sin ngeia, tiin motona vêltamtak nangni ke lei ril angin, atûn khom avêlin mitrithi tâkpumin: nangni ki ril ani.

¹⁹Anningei sêna hah amongna chu meidil ania, an pathien hah an taksa ôinangei ani sikin. An inzakna rang hah an inpâkpuia, male hi rammuol neinunngei vai hih an mindon ngâi ani.

²⁰Nikhomrese, eini chu invân mingei einia, ei Sanminringpu Pumapa Jisua Khrista invân renga a juong rang ôtlaltakin ei ngâk ani.

²¹A sinthotheina mangin neinun murdi ama racham nuoia hongchôi thei han, ei takpum thithei adokngei hih thûlin ama takpum roiinputak angin minchang ngei atih.

Philipi 4

Rilnangei

¹Masikin, ka lâibungngei le sarnungei, keima rangin idôra moroiom le ka rangâi ngei mo nin ni zoi! Nangni jâra idôrmo ka râisân le minpâka om mo ki ni zoi! Hanchu mahi, moroiomtak lâibungngei le sarnungei, Pumapa taka han nin ringna nin minding det rang ani.

²Euodia le Syntyche, rangâihoitakin, Pumapa han zuorpuisa anghan jôt inruol rangin nin pût rangin nangni ke ngên.

³Nangma, ka champui taksônom tak khom, hi nupangngei hih na san ngei rangin ko jôt sa; thurchisa phuong minzarna sinthona han Clement le ki sintho champui adadangngei, Pathien ringna lekhabua an riming chuongngei lehan munkhata intaktakin sin min thopui ngâi sikin.

⁴Zoratin Pumapa leh nin inpumkhatna han nin râiminsân roi. Ti nôk ki tih; nin râiminsân roi!

⁵Mitin chung a nin nuninnêmna minlang roi. Pumapa chu a juong lai rang kêng.

⁶Ite chungroia nin kângmindoi no unglâ, hannirese nin chubaithona murdia imo nin nâng Pathien kôm zong unglâ, mulung râisântakin a kôm zong tit ngâi roi.

⁷Hanchu Pathien'n inngêina, munisi ngeiin an riet phâk ngâiloi, Khrista Jisua leh nin inzomnân nin mulungrîlgei le nin mulungbôkgei hah aringin nangni a dar pe rang ani.

⁸Chongkhârân, ka ruolngei, asa le minpâkna manrangrohoi neinunngei lehan nin mulungbôkgei hah minsip unglâ: hima neinunngei hah, atak, misang asa nina, adik, ânthieng, miditruoi, le miritom ngei hah an ni.

⁹Keima renga anruona, ko chongbâingei renga le ki sinthongei renga nin inchu le nin manngei hah tho rangin inchu ngâi roi. Male inngêina mi pêkpu Pathien hah nangni ompui rang ani.

Neinunpêk sika râisânchongrilna

¹⁰Ki ringnun hin Pumapa leh inzomin zora sôtak suonûkin keima ranga nin mindona vêl khat hong minlang nôk thei rangin zorânchum nin dôn sikin kei rangin râisâna lientak ani. Mi nin mindona hah nin mong zoi ki tina nimaka, a minlang rang zorânchum nin dôn loa kêng ani.

¹¹Mahi lunghâng nin tho loi sika ki ti nimaka, ko dôn chung a mulungchuka om rang kêng chusai sika ani.

¹²Imo ahong nâng rang, imo ahundôr nêka atam dôn rang khom ki riet. Hi omlam inthup hih kêng chua, masikin, kho muna khom, kho zora khom, khopin mo aninônchu vonchâmin mo, dôn mintam okin mo, atômte ko dôn khomin ku mulung achuk ani.

¹³Khrista'n mi pêk, sinthotheina han intaknangei nâm hah tong theina ranak ko dôn zoi.

¹⁴Aniatachu ke dengtheina ngeia mi nin san hih nin tho minsa sabak ani.

¹⁵Nangni Philipi mingei, Thurchi Sa misîra aom phut nikhuo ngeia Macedonia ram ka mâk lâihan nangni nin koiindang vai ke mi san nin ni; nangni inkhat vai kêng ka âikalnangei le ki insûmnangei mên sempui ngâi ninni, tiin nin riet minthâr sabak ani.

¹⁶Thessalonica sûnga ko om lâia, voikhat nêka tam sanna ka nâng han, mi nin hong muthuona.

¹⁷Neinunpêk man rang ko jôt vai niloiin; manêk han, nangni tienga âikalna molopa aom mu rang ko jôt ani.

¹⁸Hanchu, mahi, neinun mi nin pêk ngei murdi ka manna lêkha ani, male ahundôr nêka tam aom zoi! Epaphroditus'n nin neinunpêkngai anrêngin mi hongchôi pea, atûn chu ka nâng nâm ko dôn zoi. Mangei hah mirimhoi Pathien kôma pêk, inbôlna a pomtheiruo le a lungdo angin an ni.

¹⁹Ka Pathien'n nin nângngai murdi Khrista Jisua renga, a neina ânniengrakin nangni a pêk bang rang ani.

²⁰Ei Pathien le Pa kôm han tuonsôt tuonsôtin roiinpuina om rese! Amen.

Azoina chibaimûkna

²¹Jisua Khrista taka, Pathien mingai murdi hah chibai mi mûk pe roi. Hi taka keima leh om ei lâibungngai le sarnungei chibai nangni an hong muthuon ani.

²²Hi taka Pathien mingai murdi'n chibai an hong muthuona, aliekin Rêng ina ompu ngei hin.

²³Pumapa Jisua Khrista moroina hah nin rênga nin kôm om rese!

Kolossa

Kolossa 1

¹Paul, Pathien lungdoa Khrista Jisua tîrton le ei lâibungpa Timothy ngei renga han,

²Kolossa sûnga Pathien mingei kôm, Khrista leh inzoma taksônontak kin lâibungngei le sarnungei: Pathien ei Pa'n moroina le inngêina nangni pêk rese.

Râisânchongril chubaithona

³Nin ta ranga chubai kin tho racham, zoratin Pathien, ei Pumapa Jisua Khrista Pa kôm han râisânchong kin misâr bang ngâi.

⁴Khrista Jisua taka nin taksônna le Pathien mingei murdi ranga nin lungkhamna hah kin lei riet sikin.

⁵Thurchi Sa, chongtak nin kôm ahong phut masa lâihan, sabeina a pêk ngâi thurchi hah nin riet zoi. Masikin nin taksônna le lungkhamna ngei hah nin sabeina chungâ ânngama, ma hah nangni rangin invâna hôiin dar ani zoi.

⁶Nin lâia thurchisa ahong tung masa nia Pathien moroina roi nin lei riet mindik anghan rammuol pumpuia satvurnangei hong mintungin le phuong minzarin aom zoi ani.

⁷Epaphras, kin tîrlâm champui moroitak, kin ruthûla Khrista sinthopu taksônontak renga Pathien moroina nin inchu ani.

⁸Ama han Ratha'n lungkhamna nangni pêk hah khom mi ril zoi ani.

⁹Masika hin, nin chungroi kin riet renga chu zoratin ninta rangin kin chubai ngâi. Ama Ratha'n vârna le riettheina murdi nangni pêka, ama lungdo rietna leh nin hong sip theina rangin Pathien kôm kin ngên ngâi ani.

¹⁰Hanchu Pumapa nuomlam anghan nin om theina rang le zoratina a râisânruo nin tho theina rangin. Nin ringnun han sin asa ngei murdi musuokin, male Pathien nin rietna han nin insôn rang ani.

¹¹⁻¹²Masikin neinin murdi diertaka nin tuongdier theina rangin a sinthotheina roiinputak renga hong râtnangei lehan a râtin nangni sin rese. Male rêngram avârna han Pathien'n a mingei ta ranga rangtum a hôi pe ngei hah nin chang theina ranga ânhoiin nangni sinpu Pa kôm mulung râisântakin râisânchongril roi.

¹³Ama'n ijîng sinthotheina renga mi kêlsuoa, a Nâipasal moroitak rêngrama han mi sanminjôkin mi hong tuong lût zoia,

¹⁴ama'n mi mojôka, maha, ei sietnangei hah mi ngâidam zoi ani.

Khrista sintho le anina

¹⁵Khrista muthei hih mutheiloi Pathien in-angpui ani. Ama hih Nâipasal masatak ania, neinun sinngei murdi nêka ânchungtak ani.

¹⁶Ama jârin Pathien'n invâna neinunngei murdi le pilchunga neinunngei murdi a sina, muthei le mutheiloi neinunngei; le ratha sinthotheinangei, pumangei, roijëkpungei, rachamneipungei khom minlûtsa ani. Rammuol pumpui hih Pathien'n ama jârin a sin ania, ama ta rang ani.

¹⁷Khrista chu neinunngei murdi om mân a lei omsai piel ania, ama leh inzomin neinunngei murdi an omna mun diktaka an om ani.

¹⁸Ama hih a takpum, koiindang lu ania; ama hih takpuma ringna bulpui ani. Ama hih Nâipasal masa, neinunngei murdi chung a vai hih mun masatak a chang theina rangin thina renga kaithoiin aompu hah ani.

¹⁹Pathien nina akipdira Nâipasal sûnga om hah Pathien'n ama nanâkin a lungdoa roimasat ani.

²⁰Hanchu, Nâipasal jârin Pathien'n rammuol pumpui ama tieng nanâk hong tuong nôk rangin a masat zoi. Pathien'n a Nâipasal khros chung a thisen jârin inngêina a sina, masikin pilchung le invâna om neinunngei murdi ama nanâkin anruonin a kôm ahong tuong mikhîr nôk ngei zoi ani.

²¹Zora khat chu nangni khom neinun saloingei nin sin sik le nin mindon sikin Pathien renga alazanna omin a râlgei nin lei ni.

²²Aniatachu atûnhin, a Nâipasal taksa thina sikahan a malngeiin nangni sinin a makunga ânthieng, demnaboi le minchâinaboia nangni tuong theina rangin.

²³Hannirese nin indingna han taksônomin le dettakin nin om bang ngêt rang ani. Thurchisa nin rieta sabeina nin manna renga han nangni nanâkin inthînpai rangin nin inphal tet rang nimak. Hi thurchisa hih rammuola mitin kôm misîr ani zoia; keima Paul hih ma thurchisa tîrlâm ko hongni zoi ani.

Koiindang tîrlâm anga Paul sinthona

²⁴Atûn nangni ranga ku dûktongnangei roia hin ka râiasân. Taksân ku dûktongnangei sika hih Khrista'n a takpum koiindang ruthûla a dûktongnangei aminieng alaomngei zoi ranga ka sanna ani.

²⁵Nin satna ranga sin minlang ranga mi pêkpu Pathien'n koiindang tîrlâmin mi sin zoi ani. Hi sin hih a thurchisa misîr mikhip rang hih ania,

²⁶ma Pathien chong hah zora vunsai ngei han chu munisi jâtngai renga thupin aom ngâia, aniatachu atûnhin chu a mingei kôm a minlang zoi.

²⁷Mi murdi ta ranga chonginthup anei le roiinputak a dôn hih a mingei min riet hih Pathien mintuo ani. Ma chonginthup ha chu Khrista nangnia a om sika Pathien roiinpuina nin chang sa rang hah ani.

²⁸Masikin mimal tinin Khrista leh inzomin Pathien makunga mitungsuo anghan kin hong tuong theina rangin vârna murdia rilin, minchûn, mitin kôm Khrista thurchisa kin misîr ngâi ani.

²⁹Ma sintho rang han Khrista râtna inchungtak mi pêk ngâi le ku sûnga sintho ngâi hih mangin asân ranak songin ki sin ngâi ani.

Kolossa 2

¹Nangni le Laodikea sûnga omngei rang le midang ki misanga mi la rietloingei nâm rangin idôrtak mo sintho ranak ko songtie hih nangni ril rong.

²Hima hih ko thona abi chu mulungrîl hâinân an hong sipa, male lungkhamnân munkhatin an inchunna, riettheina adikin an dôn ngâi rietminthârna akipdir an dôn theina rangin ani. Ma anghan Pathien chonginthup hah hong riet an ta, ma Khrista nanâk hah ani.

³Ama hih Pathien vârna le rietna rochon inthupngei mo-ongna châbi ani.

⁴Hanchu, nangni ki ril, tutên inkhalna dikloiin nangni huong no rese ngei, idôra asa angin khom inlang rese ngeia ite nimak ngei.

⁵Taksân nin kôm om khom no rong, hannom ratha'n chu nin kôm ko om tit ngâi, male Khrista taksônna lehan munkhatin nin inding detna inruol hah ku mu anghan ka râiasân ani.

Khrista taka ringna akipdirna

⁶Khrista Jisua hah Pumapa'n nin lei pomsai anghan, ama leh inzomin om tit roi.

⁷Ama han ruzung inthûk mathâk unglâ, nin ringna hah ama chungâ sinminding unglâ, male nin taksônna han hong râtt uol roi, minchua nin om anghan. Râiasân chongrilna leh sip sa roi.

⁸Hanchu, tutên Khrista renga niloiin miriem kuta pêk, minchunangei renga le rammuol ratha saloingei roijêkna renga miriem vârna sika huongna kâmnângloi suokin nangni an sin loina rangin indîn roi.

⁹Khrista, miriem nina sûnga han Pathien nina akipin aoma,

¹⁰male nangni khom ama leh nin inzomna han ringna akipin pêkin nin om zoi. Ama chu rathatienga roijêkpungei le rachamneipungei nâm chungâ Rachamneipu lientak ani.

¹¹Khrista leh nin inzomna han sertan nin ni zoi, miriemngei sertan an tho anghan niloiin, Khrista sertana leh hi taksa nunsie sinthotheina renga sanminjôkna lehin.

¹²Baptis nin chang han Khrista leh phûmin nin om zoia, male ma baptisma nanâk han thina renga a kaithoipu Pathien sinthotheina hah taksônna nin dôn sikin Khrista leh kaithoiin nin om sa zoi.

¹³Moton han chu nin sietnagei sikin le Jentail Balam boi nin ni sikin rathatienga thi nin lei ni. Aniatachu Pathien'n atûn chu Khrista leh nin inzomna han nangni a minring zoi. Pathien'n ei sietnagei murdi mi ngâidam zoia;

¹⁴ei lâkâi intângngei lungkhamna chang phâkloi ranga mizieka omngei leh balam mikhit ngâi ngei hah khâi paiin Khrosa peret leh jêmdelin a minhek suozoi ani.

¹⁵Ma khros chung a han Khrista'n ratha roijêkpungei le rachamneipungei sinthotheina renga ama nanâkin jôkpaiin; ma a menênagei hah mitin mu rangin a minlang zoi ani.

¹⁶Masikin nin sâk, nin nêk roia, aninônchu nikhuo inthieng ngei roia aninônchu Tha Thar Khohoia aninônchu Sabbathni roia mini, tutên roineina nangni dôn pe no rese ngei.

¹⁷Ma anga neinunngai murdi hah chu sûnmotona neinun hongom rang ngei rilîm vai kêng an nia; atatak chu Khrista ani.

¹⁸Tukhom inlârna adangviek ngei mu sikin ânchungtak ni ranga, misîra, nunnêmna dikloi dôn rang le vântîrtonngei chubaimûk rang ti ngei han theiloi nangni minchang rangin nangni nanâkin inphal no roi. Mangei hah ite ni uol makngei, ma anga mingei hah chu an miriem mindonân ânphâk an nia

¹⁹male mangei han takpum lu Khrista hah mutu khâi mak ngei. Khrista enkolna nuoia takpumpui hah asân donsuiin, rolo le ratharûi inchunna ngei le ânzomna ngei hah munkhata minchunin, Pathien'n ânsôn ranga a nuom anghan ânsôn ngâi ani.

Khrista leh thina le ringna

²⁰Khrista leh nin thia hi rammuol rathangei renga nin jôksaipiel hah, ithomo rammuol mingei anghan nin la om bang? Ithomo hi balamngei,

²¹“Mang no roh,” “Sâk no roh,” “Tôn no roh,” ti ngei hih nin jôma?

²²Mangei hah chu miriemngei an sin balamngei le minchunangei an nia; vêlkhat mang suonûkin chu kâmnângloi neinunngai kêng an ni.

²³Hi rangrâta vântîrtonngei chubaimûk rang ti mo, nunnêmna dikloi dôn rang ti mo, takpum dûkmintong rang ti ngei mo hi vârna chung a ânngamin inlang khom rese ngeia; taksa ôinangei enkolna rangin chu alutna diktak dôn mak ngei ani.

Kolossa 3

¹ Khrista leh aringin kaithoiin nin om zoi, masikin Pathien kut changtienga Khrista insungna rêngsukmuna neinunngai chung a khin nin mulungngai dar roi.

² Hi pilchunga neinunngai chung a niloiin, chungtienga neinunngai khin nin mulungrîlngai minngamphar roi.

³ Nin thi zoia, nin ringna hah Khrista leh Pathien kôm thupin aom zoi.

⁴ Nin ringna tatak chu Khrista ania, a juong inlâr tika chu nangni khom ama leh inlâr nin ta, a roiinpuina chang sa nin tih.

Ringna muruo le thar

⁵ Hanchu, nin pilchung ôinangai nin sûnga sinthongai, inditnasaloingai, ominthiengloi, ôinasaloingai, hurporinchengai, inruôknangai (inruôknangai ti hih mirmil biek ani), ma anga ngei hih nin that ngêt rang ani.

⁶ Ma neinunngai sikin kêng Pathien taksina a chong donloipu ngei chung a juong tung rang ani.

⁷ Nangni nanâk khom moton han chu ma ôinangai han nin chung a roi ajêk lâihan chu ma dungjûiin nin om ngâia.

⁸ Aniatachu, atûn hi neinunngai murdi: taksina, ngalna, inmûmâkna ngei hih nin mâk ngêt rang ani. Inêronangai, chongbâingalngai hih nin bâingai renga suok khâi no rese.

⁹ Inkhat le inkhat inhuong inlôm no roi, miriem muruo leh a thobaisingai hah nin khekpaia,

¹⁰ miriem tharin nin invo zoi sikin. Ama rietna akip nin dôn theina rangin ma miriem thar hah Pathien, a Sinpu, rimil angin sinminthar bangin aom ngâi ani.

¹¹ Ma ringna thara han chu Jentialngai le Judangai, sertan le sertanloingai, amolmangai, pentienga mingai, suokngai le suokniloi ateina reng om khâi mak, Khrista chu anrêngin anileta, anrênga sûnga aom let ani.

¹² Pathien mingai nin ni zoia; nangni lungkhama, male ama ta ni rangin nangni a thang zoi ani. Masikin inkaninlômna, inriengmuna, nunnêmnangai, rangâiinchînangai, tuongdiernangai leh nangni nanâkin nin invo ngêt rang ani.

¹³ Tukhomin tu chung a makhat roi bâiinkham nin dôn zora khomin tuongthai roi, Pumapa'n nangni a ngâidam anghan inkhat le inkhat inngâidam inlôm ngêt roi.

¹⁴ Ma nina ngei murdi chung a han lungkhamna bôk sa roi, maha neinunngai murdi inruolna achuka khitolmpu ani.

¹⁵Khrista inngêina nangni pêk hah inruolna nin sinna han nangni kairuoi rang ani; Ma inngêina chang rangin Pathien'n takpum inkhata munkhata om rangin nangni a koi ani. Nin râiminsân roi.

¹⁶Khrista chong chu aneinangei nâm leh nin mulungrîngeia om rese. Vârna murdi ngei leh inril inlômin, inchû inlôm roi. Nin mulungrîla Râisânchongril pumin Pathien minpâkna Lapuingei, minpâkna lângei, lâ inthiengngei tho pe roi.

¹⁷Male nin sinna le nin tina ngei nâma, Khrista jâra Pa, Pathien kôm râisânchongril pumin Pumapa Jisua rimingin nin tho ngâi rang ani.

Ringna thara misang inkainangei

¹⁸Lômnungei, nin lômpangei kôm inpêklût roi, maha Khristienggei nin ni anghan nin tho rang piel ani.

¹⁹Lômpangei, nin lômnungei lungkham ngei unglâ, an chungâ nin nunminsie no roi.

²⁰Nâipangngei, zoratin nin nulepangei chong don roi, maha nin Khristien sintum ranga Pathien nuomlam ani.

²¹Nulepangei, nin nâingei min nuor no roi, jâmzalin hong om ni ngei.

²²Suokngei, neinunnggei murdia taksa tienga nin pungei chongdon roi, nangni an pomna rang nuomin an mitmu kê vai jôm no unglâ; Pumapa mân nin thona sikin mulungrîla takintâitakin don roi.

²³I-ih khom nin tho ngei murdi chu miriem ta rang anghan sin loiin, Pumapa ta rang anghan nin mulungrîl murdi'n sin roi.

²⁴Khrista hih Puma tatak ani tia, sin nin tho sikin a mingei ta ranga râisânman a darsai hah Pumapa'n nangni a pêk rang tiin riettit roi.

²⁵Neinun dikloi thopu ngei chu an neinun dikloi thona aman man an ta, Pathien'n mitin chungâ ân-angsarin roi a jêk ngâi sikin.

Kolossa 4

¹Pumangei, nangni khom invâna Puma nin dôn ti rietitin, suokngei nin dôna han asadimin le adiktakin dôn ngei roi.

Rilnangei

²Chatloiin chubaiho ngâi unglâ, male chubai nin tho anghan inningchienin, Pathien kôm râisânchongril ngâi roi.

³Ma angdên han Khrista chonginthup misîrna rangin Pathien'n zorânchum mi pêk theina rangin keini rang khom chubai mi tho pe sa roi. Atûna intânga ko om sika hin.

⁴Hanchu, ki misîr rang anghan ânthârtaka ki misîr theina rangin chubai mi tho pe sa roi.

⁵Iemloipungei chungu nin singinsana han vârtakin om unglu, zorânchum nin dôn murdi asadimin mang roi.

⁶Mitin kôm chong diktaka nin thuon theina rangin zoratin nin chongbâisuok hah chonghoi le mulunglût om ni tit rese.

Azoina chibaimûknangei

⁷Pumapa sinthona taka taksônontak le kin târlâm champui, kin lâibungpa moroitak Tychicus, hin ku chungroi murdi nangni ril a tih.

⁸Hima sik taka hin ama hih nin kôm ko hongtîr ani, kin rêngin kho angin mo kin omlam nangni a rila nin tâi theina rangin.

⁹Ama leh lâibungpa moroitak le taksônontak, nin pâla mi Onesimus khom a hong sa. Anni ngei han hi tienga neinun hongtungngei murdi nangni ril an tih.

¹⁰Keima leh intâng ina ompu Aristarchus hin chibai nangni a hong muthuon; male Mark, Barnabas lâibungpa khom hin chibai nangni ahong muthuon sa. (Lamdon ranga rilna nin mansai anghan ahongin chu lei phâm roi.)

¹¹Joshua, Justus tiin khom an koi sa ngâi, ama khomin chibai nangni a hong muthuon sa. Juda iempungei lâia chu hi mi inthum ngei vai kêng keima leh Pathien Rêngrama sintho an ni, male anni ngei hin min san tatak ngâi ani.

¹²Nin pâla midang inkhat Epaphras, Khrista Jisua târlâm renga khom chibai nangni a pêk. Ama hin Pathien lungdo nin jôm mikhipa mitungsuo le Khristien dingmuna nin inding detna rangin zoratin Pathien kôm chubaithôn nangni a ngên pe bang ngâi ani.

¹³Nin ta rang le Laodikea le Hierapolis mingei ta ranga a sintho ranak songtie hih keima misang rengin ki rietpui ani.

¹⁴Ei moroitak doctor Luke, le Demas ngeiin chibai nangni an hong muthuon ani.

¹⁵Laodikea sûnga lâibungngei le sarnungei, nupangnu Nympha le a ina koiindang inkhôm ngâi ngei hah kin chibai satak pêk ngei roi.

¹⁶Hi lekhamuthuon hih nin pore suole chu Laodikea koiindanga khom pore sa ngêt nirse duo. Ma angdênin, Laodikea sûnga lâibungngei le sarnungei, lekhamuthuon nangni an muthuon rang khom hah nin pore sa rang ani.

¹⁷Male Archippus kôm han, “Pumapa sinthona taka sinruo nang pêka om hah no zoi ngêt rang kêng,” tipe roi.

¹⁸Mahi keima ku kut lelên ki miziek ani: Paul renga chibaimûknangei. Ku kut khitna zingjirûi hih mingil no roi duo! Pathien moroina hah nin kôm om rese.

1 Thessalonika

1 Thessalonika 1

¹Paul, Silas le Timothy ngei renga, Pa Pathien le Pumapa Jisua Khrista ta Thessalonika koiindang sũa mingei kôm: Moroina le inngêina ninta nirese.

Thessalonika mingei ringnun le taksônna

²Kin chubaithonangeia han nin riming ralaman, nin rênga rangin Pathien kôm râisânchong kin misâr tit ngâi.

³Pathien le Pa mitmua, taksônna sika nin sintho tie ngei, lungkhamna sika nin sinrât tie ngei, ei Pumapa Jisua Khrista nin sabeina chungu nin det ngei hah mingil loiin kin riettit sikin.

⁴Kin ruolngei, Pathien nangni lungkham ngâia male ata ni rangin nangni a thang zoi ani ti kin riet.

⁵Thurchi Sa hah chongbâingei vaiin hong mintung mak mea, sinthotheina leh Ratha Inthieng leh a chongtak iemna dettak leh kin hong mintung ani. Nin kôm kin om lâia kin nunchan hah nin riet; nangni nin satna rang rokin kin om ngâi ani.

⁶Keini le Pumapa entonin mi nin dôna; male intak nin tuong sabak lâi khomin Ratha Inthieng renga râisânna thurchi ajuong ngâi ha nin lei modôm ani.

⁷Masikin Macedonia le Achaia rama iempungei murdi ta rangin minenna nin hongni zoi.

⁸Pumapa thurchi hah nangni renga Macedonia le Achaia rama ânthang vai niloiin, Pathien chungu nin taksônna thurchi khom muntina ânthang sa zoia; hanchu, kei nin ite kin misâr uol nâng khâi mak.

⁹Ha mingei han nangni kin hongpan zorân mi nin lei modôm ngâi ngei le mirmilngei renga Pathien tieng nin hônheia, Pathien adiktak le aring sin tho rangin

¹⁰le a Nâipasal Jisua thina renga a kaithoia, taksina juongtung rang renga mi kêlsuo ngâipu hah invân renga a juong rang nin lei ngâk tie khom an misâr ngâi.

1 Thessalonika 2

Thessalonika taka Paul sintho

¹Kin ruolngei, nangni kin hongpan hah akorong chang mak ti nangni rengin nin riet ani.

²Thessalonika taka nin kôm kin hong motona Philippia min lona anatie le êroa kin omtie ngei hah nin rieta. Male mi doina tamtak om khom senla ngeia, kin

Pathien'n ama renga juong ngâi Thurchi Sa nangni ril thei rangin hâina ha mi pêk ani.

³Nangni kin ngêna hih dikloina mini, aninônchu bôknangei inthiengloi ngei chung a ânngam nimaka, tute huong rang khom pût ngâi mak me.

⁴Manêkin, zoratin Pathien'n mi nuomlam anghan thurchi kin misâr ngâia, Thurchi Sa enkol ranga achukin mi bê zoi sikin. Miriem râiminsân rang pût mak mea, kin bôknangei minsinpu, Pathien râiminsân rang kin pût ani.

⁵Nin kôm milak lêngminlôi chongti mini, aninônchu, inruokna mukhûna chongngei mini mangin hong mak me tiin nangni rengin nin riet minthâr anghan Pathien hah mi rietpuipu ani.

⁶Tute mi minpâkna man rangin pût ngâi mak me, nin kôm khom, aninônchu midangngei kôm khom.

⁷Khrista tîrtonngei kin ni sikin nin kôm zong thei khom ni unglang. Aninâkachu nin lâia kin om lâihan kin nun ânêmma, nu'n a nâingei a donsûi anghan kin om ani.

⁸Nangni kin lungkhamna sikin Pathien renga Thurchi Sa vai niloiin kin ringna tena khom nangni pêk rang kin inthok ani. Mi nin moroi sabak ani!

⁹Adiktakin, kin malngei, idôra sintho le sôltie ngei mo kin ni hah nin la riettit duo! Pathien renga Thurchi Sa nangni kin misâr pe lâihan tute intak nangni kin mintong loina rangin sîn le jân sin kin tho ngâi ani.

¹⁰Nangni a iemngei chung a ânthieng, adik, le demnaboia kin nunchan ngei hah nangni le Pathien hih mi rietpuipungei nin ni.

¹¹nulepangeiin an nâingei lelê chung a an tho ngâi anghan nin rênga nin chung chita kin tho ani tiin nin riet ani.

¹²A Rêngam le a roiinpuina chang ranga nangni koipu Pathien râisân rang lama nin lêng theina rangin nangni mohôkin, ratha'nngam nangni shakin nangni kin ngên rît ngâi ani.

¹³Male Pathien kôm ithomo râisânchong kin misâr bang ngâi, abi mahin aoma. Keini renga Pathien chong nin rieta nin pom lâihan miriem chong anghan niloiin Pathien chong ani angtakan nin pom ani, nangni a iemngei sûnga han Pathien'n sin a tho sikin.

¹⁴Kin malngei, Judea rama Pathien koiindangngei, Khrista ta ngei chung a neinunngai atung anghan nangni nin chung a khom atung ani. Anni ngeiin Judangei renga nunuomlona an tuong anghan nangni khomin nin mingei lelê renga nin tuonga,

¹⁵ma Judangei han Pumapa le dêipungei an thata, keini khom an nunuom min lo ani. Kho angbaka Pathien nuom loi lam mo an ni! Kho angbaka mitin rangin ânkâl mo an ni zoi!

¹⁶Sanminringna an man theina ranga Jentailngei kôm thurchi kin misîr tena mi khap rangin an pûta. Ma angdên han sietnangei an lei tho bang ngâi hah an tho thangsuo ani. Male atûn amongnatak chu Pathien taksina an chung a atung zoi ani!

Paul'n vapan ngei nôk rang a nuomna

¹⁷Keini rangin chu, malngei, chomolte rangin nangni le mindonnangei tieng insen loa, takpum tieng vaia insena kin om sikin idôr mo nangni rangâiin nangni mu nôk rang kin pût tatak ani!

¹⁸Nin kôm hong kîrsir rang kin nuom ani. Keima reng voikhat nêka tam hong rang ku pûta, aniatachu Soitan'n mi min hong mak.

¹⁹Mangei murdi suole, nangni ngêt hah nangni, midangngei niloiiin! kin sabeipu ngei, kin râisâna, le ei Pumapa Jisua juong tika amakunga kin motorna sika kin insongna rang abi khom nin ni.

²⁰Ataktakin, kin inpâkna le kin râisâna chu nangni ha nin ni!

1 Thessalonika 3

¹Azoinataka chu, tuong zoi khâi mak mea. Masikin Athens khuoa ke thenin lei om rangin kin masata

²Timothy kin lâibungpa, Khrista Thurchi Sa misîrna tienga keini leh Pathien sintho ngâipu hi kin hongtîr ani. Kin hongtîrna abi chu nangni min râta, nin taksônna tienga nangni sanna,

³masikin nan lâia tutên hah nuomlonangei sika nûkkîr nin tho lina rangin ani. Ma anga nuomlonangei hah ei tuong ranga Pathien lungdo ani sa ti khom nangni lelên nin riet ani.

⁴Nin kôm kin om lâihan, nunuomloa ei om rang nangni kin lei ril sai ania; male nin lei riet minthâr anghan ahongtung tatak ani.

⁵Maha mapêna chu tuong zoi khâi mu unga, masika han Timothy ko hongtîr ani. Adikin, Soitan'n nangni a huong mathâk duoia male kin sinsôlna asenaboi achang lina rangin, masikin nin taksônna chungroi ha ke lei riet theina rangin ama ko hongtîr ani!

⁶Atûn chu Timothy a juong kîrnôk zoia, male nin taksônna le nin lungkhamna thurchi râisân omtak mi juong chôl pe zoi. Nangni mu rang kin nuom angin nangni khom mi mu rang nin nuoma mi nin mindon tit ngâi ti khom mi ril sa.

⁷Masikin, kin lâibungnei le sarnungei, kin intakna le dûktongna murdia khom nin thurchi sikin mohôkin kin oma. Mi mohôk chu nan taksônna hah ania,

⁸asikchu atûn nin ringna han Pumapa leh inzomin nin indingdet ngânin chu kin ring tatak zoi ani.

⁹Atûn chu nangni rangin ei Pathien kôm râisânchong kin misîr thei zoi. Nangni sikin ei Pathien makunga râisânna kin dôn sika hin a kôm râisânchong kin misîr ani.

¹⁰Nin mêl kin mua nin taksônna tienga nin insamna nangni kin pêk bang theina rangin sùn jânin mulungrîl murdi'n kin ngên ngâi ani.

¹¹Ei Pathien le Pa amananâk male ei Pumapa Jisua khomin nin kôm kin misangin hong theina rang lampui mi sinsiem pe rese!

¹²Nangni inkhat le inkhat nin inlungkhamna le mi murdi nin lungkhamna hah Pumapa'n nangni min pung pe u-uol senla, nangni rangin kin lungkhamna le min-ang rese.

¹³Ma angdênin nangni min rât a ta, male ei Pathien le Pa makunga achukphar le ânthiengin ei Pumapa Jisua ama ta ngei murdi leh a juong tika inlang thei nin tih.

1 Thessalonika 4

Pathien râiminsân ngâi ringnun

¹Azoinataka chu, kin lâibungnei le sarnungei, Pathien râi nin minsân theina ranga nunchan keini renga nin inchu, ma hih, atûna nin om anghan nin om u-uol theina rangin le atûn hin Pumapa Jisua rimingin nangni kin ngêna male kin invui ani.

²Pumapa Jisua rachamneina taka rilnangei nangni kin pêk hah nin riet sikin.

³Pathien'n inthienghie rang le hur le ngal mâkphar rangin nangni a nuom ani.

⁴Pasal tinin nin dôngma ngei leh inthiengtak le miritomtaka om rang lam nin riet rang ania,

⁵Pathien riet loi sonongnei angin hurna tieng ngâituinasip ôi leh nilooin.

⁶Hanchu ma roia han, tukhomin nin khristien champui dangnei chung a tho minchâi no roi aninônchu inlâpna tho no roi. Ma ang a thopu ngei chu Pumapa'n dûkmintong ngei atih, tiin nangni kin lei rila, male inningna lientak nangni kin pêksai ani.

⁷Pathien'n nunchan ânthiengloia om rangin mi koi maka, ânthienga om rangin kêng mi koi ani.

⁸Masikin tukhom hi minchuna heng ngei chu miriem heng nimak ngeia, Pathien ama Ratha Inthieng nangni pêk ngâipu heng kêng ani.

⁹Nin iempu champuingei nin lungkham rang roi chu miziek pe rang nâng mak chei. Inmo inkhat le inkhat nin inlungkham rang chu nangni reng Pathien'n nangni a minchu zoi ani.

¹⁰Male nangnin, atatakin, ma angtak han Macedonia rama lâibungngei le sarnungei murdi chungu nin tho ngâi zoi ani. Masikin ruolngei tho nôk uol rangin nangni kin ngên ani.

¹¹Nangni kin lei ril anghan, dâiriema ringnun mang rangin khîna sin unglâ, nin sin chit lunghâng thoa, male nin ringna rang chit lo suok rangin bôk roi.

¹²Ma anghan anînchu iemloipungei nangni jâ an ta, male nin nâng ngei hah tute chungu nin inngam nâng no nih.

Pumapa juong nôkna

¹³Kin lâibungngei le sarnungei, midang sabeina reng dônloi ngei anghan nin inngûi lona rangin alei thisai ngei chongtak chungroi hah nin riet kin nuom ani.

¹⁴Jisua a thia male ânthoinôk zoi ti ei iem ani, masikin Pathien'n ama iema lei thi ngei chu Jisua leh munkhatin tuong ngei nôk atih, ti ei iem ani.

¹⁵Atûna nangni kin minchu hih Pumapa minchuna ania: eini Pumapa juong ni dêna aringa lei omngei hin alei thisai ngei hah khêl thei ngei tet no ih.

¹⁶Chongpêka iniek miring ngei, vântîrton inchungtakngei rôl, Pathien bekul miring ngei om a ta, male Pumapa lelên invân renga juong chum atih. Khrista iema thi ngei hah aringin inthoi masa an ta;

¹⁷hanchu eini aringa lei om ngei hih sômungei lâia Pumapa don rangin anni ngei leh phâivuo kêra khin munkhatin juong lâkin om ei ta. Male chu Pumapa kôm om tit ei ti zoi.

¹⁸Masikin hi chongngei lehin inkhat le inkhat inmohôk inlôm ngâi roi.

1 Thessalonika 5

Pumapa juong nôkna ranga insiemna

¹Lâibungngei le sarnungei, ha neinunungei juongtung rang zora le nikhuo chungroi chu nangni miziek pe rang nâng mak.

²Pumapa Nikhuo chu jâna inru hong ngâi anghan juongtung atih, ti nangni rengin nin riet minthâr ani.

³Mingeiin, "Ningbeiriem le jôkna," zorân an bê lâitakin inningloiin an chungu sietminmangna juong dê ngei a ta! inningloia nupang chungu nâiha ahong tung anghan nîng atih, male mingei hah rotpai thei noni ngei.

⁴Aniatachu, lâibungngei le sarnungei, nangni chu ijînga om mak choia, male ma Nikhuo han inru angin nangni dêrak no nih.

⁵Nin rêngin avâra mi le sûna mi nin ni. Jâna mi le ijînga mi nimak me.

⁶Masikin midangngei anghan in no u; meng ei ta, male hangvangin om ei ti u.

⁷Jâna kêng mingei an in ngâi; jâna kêng ju khom an inrûi ngâi.

⁸Hannirese eini chu sûna mi eini sika hin taksônna le lungkhamna rôppho hakin, male sanminringna sabeina hah lukhuma mangin hangvangin om ei ti u.

⁹Pathien'n a taksina tuong rangin mi thang maka, ei Pumapa Jisua Khrista jâra sanminringna chang rangin mi thang ani,

¹⁰a juong tika ei lei ring innom, ei lei thi innom ama leh munkhata ei om theina rangin ei ruthûlin ama a thi ani.

¹¹Masikin inkhat le inkhat in mohôk ngâi ungla, inkhat le inkhat insan inlôm ngâi roi, atûna nin tho ngâi anghan.

Azoina rilnangei le chibaimûknangei

¹²Ka lâibungngei le sarnungei, nin lâia sin dûktonga khristien ringnuna nangni ruoi ngei le nangni minchu ngei hah asadima nin jâ ngei rangin nangni kin ngên ani.

¹³An sintho sika han lungkham ngei ungla, jâna lientak pêk ngei ungla. Nin lâia inngêirin om roi.

¹⁴Kin lâibungngei le sarnungei, mithaboi ngei hah rokôk ungla, mulungchîn ngei hah mohôk ungla, mirâtloi ngei hah san ungla, mi murdi chungâ nin phûk min-uoi roi.

¹⁵En roi, tukhom asaloï chu asaloï nanâkin thvon no ungla, zoratin inkhat le inkhat chungâ sin sa tho pe inlôm rang le mi murdi chungâ khom tho rangin khîna sin roi.

¹⁶Râiminsân tit ungla,

¹⁷zoratin chubaitho ungla,

¹⁸i-ih chungâ khom râisânchong misîr ngen roi. Ma hih Khrista Jisua leh nin inzoma nin tho ngâi ranga Pathien'n nangni a nuom ani.

¹⁹Ratha Inthieng khan no roi;

²⁰in mohôkna thurchingei mumâk no roi.

²¹Neinunngai murdi en minsin ungla: asa kai chu pom tit ungla

²²male asaloï murdi renga chu inkêm roi.

²³Inngêina mi pêk ngâipu Pathien han lam tina nangni minthieng senla, ei Pumapa Jisua Khrista a juong tika nin ratha, nin mulungrîl, takpum le theiloina ngei murdi renga le nin pumin nangni mojôk rese.

²⁴Nangni koipu hah taksônom ani sikin, tho khom thông atih.

²⁵Lâibungngei le sarnungei, keini rang khom chubai mi tho pe roi.

²⁶Iempungei murdi hah intum inthiengin leh chibaimûk ngei roi.

²⁷Hi lekhamuthuon hih iempungei murdi kôm pore rangin Pumapa rachamneinân nangni ke ngên ani.

²⁸Ei Pumapa Jisua Khrista moroina hah nin kôm om rese.

2 Thessalonika

2 Thessalonika 1

¹Paul, Silas, le Timothy ngei renga, Pathien ei Pa le Pumapa Jisua Khrista ta, Thessalonika koiindanga mingei kôm:

²Pathien ei Pa le Pumapa Jisua Khrista'n moroina le inngêina nangni pêk rese.

Khrista juong tika roijêkna

³Kin lâibungngei le sarnungei, nangni rangin zoratin Pathien kôm râisânchong kin ril ngêt rang ani. Hi anga tho hih keini rangin adik ani, nin taksônna hah asân ânsôna, midangngei nin lungkhamna khom ahong lien uol sikin.

⁴Masika han keini nanâkin Pathien koiindangngei lâia nin chungroia nangni kin song ngâi ani. nuomlonangei le dûktongnangei nin tuonglâi khomin iemnân nin dier tit ngâi sikin nangni kin song ngâi ani.

⁵Ma nin tuongnangei nâm hah Pathien roijêkna diktie riet minthâr theina le ama Rêngam mi nin hongni theina ranga ani.

⁶Pathien chu adik hih tho a ta: dûk nangni mintong ngei chung a dûktongna juong chôl atih,

⁷male ama'n nangni le keini dûktong ngei hih hoina mi pêk atih. Maha Pumapa Jisua'n râtinchung a vântîrtonngei leh invâna a juong inlang tika thông a ta,

⁸Pathien pomloipu ngei le ei Pumapa Jisua Khrista Thurchi Sa jômloi ngei hah meidon leh dûk tho ngei atih.

⁹Mangei han Pumapa makung renga le a râtna roiinpuetak renga sensâiin kumtuong in mangna dûktongna tuong an tih,

¹⁰a mingei kôm renga roiinpuina chang rang le ama iempu ngei murdi renga miritna chang ranga a juong Nikhuo lehan. Nangni khom thurchi nangni kin misîr pe hah nin iem sikin nangni khom anni ngei lâia inchel sâng nin tih.

¹¹Masika han nin ta rangin zoratin chubai kin tho bang ngâi. Nangni a koi lam anghan pomtheiruo ringnun nin dôn theina rang le i-ih asana rang le taksônna nin sin zoina ranga nin ôina murdia a sinthotheinân tuon nangni mintung pe theina rangin Pathien kôm kin ngên ngâi ani.

¹²Ma angdênin ei Pathien le ei Pumapa Jisua Khrista moroina jârin nangni renga ei Pumapa Jisua riming hah roiinpuina chang a ta, male nangni khomin a kôm renga chang thei nin tih.

2 Thessalonika 2

Puoloipa inkhat

- ¹Ei Pumapa Jisua juong nôkna rang le a kôm ei hong intûpna rang roia han: ka lâibungngei le sarnungei, nangni ke ngên ani,
- ²Pumapa Nikhuo chu atung zoi tiin ratha chongphuongin mini, thurchi misîrin mini, kin lekhamuthuon sikin mini, abairalin nin mindonna minjêlin le nin jâminzal kelen no roi.
- ³Kho anga lampuia khom tutên nangni huong no rese ngei. Inhelna nûktak le Puoloipa Inkhat, meidîla paia om rangpu hah ahong inlang mâka chu ha Nikhuo hah tung no nih.
- ⁴Ama han pathiena ân bê murdi aninônchu biekna neinun murdi doi a ta, male amananâkin an chung a omin inpâk atih. Pathien Biekin tena luo sên insung a ta, Pathien'n in bê atih.
- ⁵Nin lâia ko om lâihan ma roi ngei murdi hah nangni ki ril ngâi ti nin riettit khâi loi mini?
- ⁶Atûn ala hongtung loina rangin imini ala khapa, maha nin riet. Hanchu azora taka Puoloipa Inkhat hah hong inlang atih.
- ⁷Misîrtheilo Puoloina ha chu atûn hin khom inthupin sin a tho tir zoi ani, aniatachu asûrmintang ngâipu ha a lampui renga lâkpaiin aom mâka chu ahongtung rang hah hongtung no ni.
- ⁸Hanchu Puoloipa Inkhat hah hong inlâr a ta, hannirese Pumapa Jisua a juong nôk tena chu a bâiruhu ân têt lehan ama hah that a ta, male minmang atih.
- ⁹Ma Puoloipa Inkhat hah Soitan ranak râtna leh hong suok a ta, sininkhêlungei le kamâmruoingei arothol jât tamtak sin a ta,
- ¹⁰male ân mangrip rang ngei chung a huongna siettak jât dadang mang atih. An in mangripna rang abi chu sanminringa an omna rang chongtak hah an modôm loi sik le lungkham an mu loi sika ani.
- ¹¹Masikin chongnôk an iemna rangin Pathien'n dikloina sinthotheina ranak an kôm a tîra.
- ¹²Asikchu tutu khom chongtak iem loa, sietna tienga râisâninshak uol ngei han theilo an chang theina rangin ani.

Sanminringna chang ranga thangsai nin ni

- ¹³Pumapa'n a lungkham ngâi nangni, lâibungngei le sarnungei, nangni rangin zoratin Pathien kôm râisânchong kin misîr ngêt ngâi ani. Ratha sinthotheinân a mi inthieng ni rang le chongtaka nan taksônna sika sanminringna chang masa rangin Pathien'n nangni thang ani.

¹⁴Pathien'n ma nin kôma Thurchi Sa kin misîr sai renga han nangni a koia; ei Pumapa Jisua Khrista kôma roinpuina nin man rangtum hah chang rangin nangni a koi ani.

¹⁵Masikin, kin lâibungnei le sarnungei, inding det unglâ, thurchi misîr le lekhamuthuona chongtak nangni kin minchu ngei hah anruonin mutu mindet tit roi.

¹⁶Ei Pumapa Jisua Khrista nanâk le Pathien ei Pa, mi lungkhamna le mi moroina inthûlngâiloi hâina le sabeina det mi pêkpu han,

¹⁷sin asa tho bang rang le asa ti rangin nangni mohôkin nangni man rât rese.

2 Thessalonika 3

Keini rangin chubaito roi

¹Azoinataka chu, kin lâibungnei le sarnungei, kin ta rangin chubai mi tho pe roi, Pumapa thurchi hih nin lâia aom anghan ânrangtakin ânzar tita, miritna leh poma aom theina rangin.

²Mitinin thurchi hah an iem khâi loi sikin mipuoloi ngei le misaloi ngei renga Pathien'n mi kêlsuo rang khomin chubai mi tho pe roi.

³Aninâka Pumapa chu taksônom ania, male nangni min râtin Puoloipa Inkhat renga nangni mojôk atih.

⁴Male Pumapa'n nin chungâ ngamriemna mi pêk ngâi, male nangni kin ril ngei hah tho nin ta, male tho mozom bang ngêt nin tih, tiin takinsônchêt ani.

⁵Pumapa han Pathien lungkhamna riethina lien uol le tuongdierna Khrista'n a pêk ngâi tieng nangni ruoi rese.

Takintâia sintho rang

⁶Kin lâibungnei le sarnungei, kin rilnangei jûi nuom loia rathaboi taka om iempungei renga inkêm rangin Pumapa Jisua Khrista rimingin chongpêk nangni kin pêk ngei ani.

⁷Kin sin lam angtakin nin sin rang ani ti nangni rengin nin riet minthâr ani. Nin kôm kin om lâihan kin rathaboi ngâi mak.

⁸Tu sanna te aman pêk loiin lâk pe ngâi mak me. Manêkin, nan lâia tute ta ranga thâmna kin niloina rangin sîn le jân sinthôn kin sôl ani.

⁹Mi san rangin nangni sîngtheina racham kin dônloi sika, maha kin tho nimaka, nin jûi rang piela minenna ranga maha kin tho ani.

¹⁰Nin kôm kin om lâihan, "Tukhomin sin a tho nuom nônchu sâk khom sâk no rese," ti chong hih kin ti ngâi ani.

¹¹Nin lâia mi senkhat chu rathaboi takin, midangei sintho chungu chier pêna chu ite tho riek loiin an ringnunngai mang an om ti kin riet sikin maha kin ti ani.

¹²Ha mingai hah ringnunngai satak dôna, sinthoa, an ringna rang chit lo rangin Pumapa Jisua Khrista rimingin chong kin pêk ngei ani.

¹³Aniatachu, kin lâibungngai le sarnungei, nangni chu sin asa tho nin sôl rang nimak.

¹⁴Tukhomin hi lekhamuthuona kin chongbê nangni kin minpêl hih a jôm nôncu ânzak theina rangin mindang unglâ, inloppui no roi.

¹⁵Aniatachu nan râl angin chu tho no unglâ; manêkin, iempu-champui angin inningna pêk ngei roi.

Azoina chongbâingai

¹⁶Pumapa ei inngêina bulpui lelên, zoratin lam tina inngêina nangni pêk rese. Pumapa hah nin rênga nin kôm om rese.

¹⁷Mahi ku kut lelên ki miziek ani: Paul renga chibaingai. Ma hih ke lekhamuthuon nâma suoikai ko tho ngâia; ma anghin ki miziek ngâi ani.

¹⁸Ei Pumapa Jisua Khrista moroina hah nin rênga nin kôm om rese.

1 Timothy

1 Timothy 1

¹Paul, Pathien mi Sanminringpu Khrista Jisua ei sabeina chongpêka Khrista Jisua tîrton renga han,

²Taksônna jâra ka nâipasal diktak, Timothy kôm: Pathien ei Pa le ei Pumapa Khrista Jisua han moroina, inriengmuna le inngêina nang pêk rese.

Minchuna dikloi doia inningangei

³Macedonia rama ke se rang lâia Ephesus taka om ranga nang ke ngên anghan atûn khom nang ke ngên nôk. Mi senkhat chongrin dikloi ngei minchu an oma, male an mong ngêt rangin chongpêk ngei roh.

⁴Thurchimuruongei le suizoijât niloi richibulngei thurchi hah mâk rangin ril ngei roh; ma ngei han taksônna min rieta om, Pathien mintuo hih sin minsâ nêkin inkhalnangei vai kêng an musuo ngâi.

⁵Machongpêkin a neinunkhîn tak hih chu mulungrîl inthieng, sielesarietna ânthâr le taksônna diktak renga hong suok ngâi lungkhamna hah an dôn theina rangin ani.

⁶Mi senkhatngei chu mangepi lampui renga hah an pêta, amo ngei injêknangei tieng lam an invâi zoi ani.

⁷An chongngei aninônchu ngamtaka an thurchi misâr nanâk luo hah riettheina dôn loiin Pathien balam minchupungei ni rang an nuom ngâi.

⁸Balam hih mîn ani rang anghan a mangin chu asa ngâi ti ei riet.

⁹Mahi riettit rang ani, balamngei chu misa ngei ranga sin nimaka, hanirese, balampalpungei le mipuoloingei rang, pathien dônloingei le mi nunsiengei rang, sakhuotienga mi niloingei aninônchu rathatienga mi loingei rang, pangei mo nûngei mo athatngei rang, mithatngei rang,

¹⁰nunchan saloingei rang, pinkuohurngei rang, mimurukpungei rang, milak thoa an thurchi dikloi taka misâr ngei rang, chongrin dik minchuna aletiengei ti le sintho murdi ngei ranga sin ani.

¹¹Pathien roiinputak le satvura ompu renga Thurchi Sa phuon ranga, mi minkolpu renga ha minchuna hah man ani.

Pathien inriengmu chungâ râisânachong

¹²Ki sinthona râtna ni pêkpu, Khrista Jisua ei Pumapa kôm han râisânachong ki misâr. Achuk angin mi bêa, male a sinthopu'n mi phun sikin a kôm râisânachong ki misâr sa ani,

¹³tiena han chu a rokôk minnapu le a nunuomlopu le a êropu lei ni khom rong. Aniatachu taksônna ka la dôn mâna riet loia ko tho ani sikin Pathien'n inrieng mi la mu ani.

¹⁴Male ei Pumapa'n a moroina tamtak hah taksônna le lungkhamna Khrista Jisua leh inzoma eita hah ku chung a bun zoi.

¹⁵Khrista'n mi nungsiengi sanminring rangin rammuola hin a juong ti hih iem a omin pomthei tatak ania: mangei lâia nunsie tak chu keima ki ni,

¹⁶hannirese hi sika hin ani, inrieng mi mua, Jisua Khrista'n mi nunsie tak keima hin a diertie murdi minlang a nuom ani, atûn renga kumtuong ringna man ranga ama la hong iem rang ngei minenna rangin.

¹⁷Kumtuong Rêngpa, thitheilo le mutheilo, Pathien kôm vai—han miritna le roiinpuina tuonsôt tuonsôtin om rese! Amen.

¹⁸Ka nâi, Timothy, tiena nu chungroia chongphuong lei ti sai chongbâingei dungjûia hi chongpêk hi nang ki minkol ani. Indoina no doi minsa theina rangin hi chongbâingei hi ralrovongein mang inla,

¹⁹male na taksônna le sielesarietna ânthâr hah dôn tit roh. Mi senkhat ngein an sielesarietna rangâi loiin an oma, an taksônna an siet ngâi.

²⁰Ma ngei lâia han Hymenaeus le Alexander ngei hah an nia, Pathien rilsiet an bângna rangin; Soitan sinthotheina kuta pêkin dûk ko tho ngei ani.

1 Timothy 2

Koiindang inkhômna chang

¹Hanchu, amotontaka, ngênna chubaithonangei, invûinangei, le râisânchong rilnangei hih mingei murdi ta rangin Pathien kôm pêk pe ngei rangin nangni ke ngêna;

²rêngngei le adangngei rachamnei ngei ta rang khom, dâiriam le inngêitaka Pathien tienga mân thona murdi le nunchan diktak leh ei om theina rangin.

³Mahi asa, le Pathien mi Sanminringpu râisân ruo piel ania:

⁴ama'n mi murdi sanminringa an om rang le chongtak an riet rangin a nuom ngâi ani.

⁵Pathien hih inkhat vai aoma, male Pathien le miriemngei minchunpu inkhat vai aom nôka, miriem Khrista Jisua hah,

⁶miriem jât pumpui ratanna ranga ân pêkpu hah ani. Maha Pathien'n mi murdi sanminring rangin a nuom ti azora taka riet minthâr ani,

⁷male masika han kêng keima hi taksônna le chongtak thurchi phuong rangin, Jentialngei kôm tîrton le minchupua tîr ki ni. Milak tho mu unga; chongtak kêng ki ril!

⁸Koiindang inkhôm tina pasal Pathiena ânpêk ngeiin an kut inthieng ngei pharin, takminsi loiin le inkhal loiin chubaitho senla ngei ku nuom ani.

⁹Ma angdênin, nupangngei khom sillebomngei ahundôr le satak le balam takin invo senla ngeia, samphierin mini, rângkachakin mini, lungmantamin mini, rovo mantamin mini invo no rese ngei ku nuom sa,

¹⁰hannirese, nupang sakhuotienga mi inti ngei ha chu an inhoi lam takin sin sân invo rese ngei.

¹¹Nupangngei chu dâirekin le rangâinchîna murdi'n an inchu rang ani.

¹²Mi minchu rangin mini, aninônchu pasal chung a rachamnei rangin mini phal mu unga; an dâirek ngêt rang ani.

¹³Asikchu Adam hah sin bak ania, male kêng Evi hah sin ani.

¹⁴Male huonga om hah Adam nimaka; nupang ha ke huongin aoma, Pathien balam a siet ani.

¹⁵Aniatachu nupang hah nâingei a neina sikin sanminringin om atih, taksônna le lungkhamna male inthiengna ngei leh inpâkpuiloiin duoiloiin a tuongdier ngâiin chu.

1 Timothy 3

Koiindanga ruoipungei mizie

¹Tukhom koiindang ruoipu chang rang a nuomin chu, sin satak tho a nuom ani: ti chong hih adik ani.

²Koiindang ruoipu chu demnaboi ani ngêt rang, lômnu inkhat vai dôn ani ngêt rang, mi harvang, indînthei, le balam taka om mi; a ina khuolmingei min tung ngâi; mi minchu thei;

³ju inrûi ngâiloi aninônchu mi leh insuol ngâiloi, phûkinchuol le mi leh inngêi mi; sum midit mi ani tet rang nimak;

⁴a insûng jêk thei mi le a nâingei a chong an jôm mi le an jâ ngâi mi ani ngêt rang ani.

⁵A insûng luo jêk theiloi mi han inmo Pathien koiindang a enkol thei ranga?

⁶Taksônna tienga mitungsuo ani ngêt rang ani, masikin inpâknân a sipa Diabol theiloi a chang anghan, theiloi a chang lolina rangin.

⁷Koiindang pêntienga mingei khomin an jâ ngâi mi ani rang ani, masikin mâimôkinsakin le Diabol chângan an ôk lona rangin.

Koiindanga sanpungei

⁸Koiindanga sanpungei khom nunchan sa le takintâi mi an ni ngêt rang ania; ju mudu ngâi loi le suma inruok mi an ni rang nimaka;

⁹sielesarietna ânthârtak le taksônna chongtak hah an mutu mindet tit rang ani.

¹⁰Amotona minsin bak nisenla ngeia, male minsina han an kaiin chu, sin min tho ngei nirse.

¹¹An lômnungei khom nunchan sa mi ani ngêt rang ani, mi mûrtam an ni rang nimaka; neinuntina mi harvang le mi indik anni ngêt rang ani.

¹²Koiindang sanpu chu lômnu inkhat vai dôn ngêt, male a nâingei le a insûng asadima jêk thei mi ani rang ani.

¹³Ha sanpungei lâia an sin sataka thopu ngeiin chu anninanâk rangin dingmun asa changin Khrista Jisua an taksônna roi hah hâitakin an misîr thei ngâi ani.

Chonginthup ânlal

¹⁴No kôma hi lekhamuthuon ki miziek anghin, hongang nang hong mu lai rangin ka sabei.

¹⁵Aniatachu ko hong innu duoiin chu, Pathien insûngmi ngei kho angin mo eininanâkin ei om rang, hi lekhamuthuon hin nang min riet atih, ma hih Pathien ring koiindang, chongtak chopui le ânngamna hah ani.

¹⁶Ei sakhuo chonginthup ânlal tie hih tutên dem thei no ni ngei: Ama hah miriemin a juong inlanga, Ratha'n adik ti a minlanga, male vântîrtonngeiin an mua. Ama hah namtinngai lâia phuong ani zoia, rammuol pumpuia mingeiin an iema, male invân tieng khin lâkpaiin aom zoi.

1 Timothy 4

Minchupu dikloingei

¹Nûka chu mi senkhatngei chu an taksônna la mâk an tih tiin Ratha'n ânthârtakin a misîr ania; ratha milakngei chong la jôm an ta, male ramkhoringei minchuna la jûi an tih.

²Ma anga minchunangei hah milakngei mi huongna renga hônjôt ania, an sielesarietna hah athi ani, thîr inling bel anghan ani.

³Ma anga mingei han innei le i-ih mini sâk hih dikmak tiin mi an minchu ngâia. Aniatachu ha sâkngai hah a iem ngei lâia chongtak rietsai ngeiin râisânchongril suole sâk thei rangin Pathien'n a sin ani.

⁴Neinuntin Pathien sin ngei murdi hi asa; chubaithoa râisânchong misîra sâk ani ngânin chu, ite pai rang reng om mak,

⁵Pathien chong le chubaithona han Pathien kôm pomtheiin a sin sikin.

Khrista Jisua tîrlâm asa

⁶Ma rilnangei hah iempungei kôm ne pêkin chu, Khrista Jisua tîrlâm satak nîng ni tih, taksônna chongngei le minchuna dik nu jûi sai rathatienga nêh vâi tit anghan.

⁷Aniatachu pathienboi thurchimuruo misîrna ngei hah nûksong roh. Ni ringnun hah Pathien'a inpêk rangin inchu roh.

⁸Taksatienga insepna hin a lekti chu asena aoma, rathatienga insepna vâng chu lam tina asena aom ok ani, asikchu atûnlâia ringna le sûnmotona ringna pêk ranga inkhâmangei aom ani.

⁹Hi chong hih adikin, iem aoma pomthei tatak ani.

¹⁰Ranak ei songa male sin ei tho tatak ani, Pathien ring chung a han ei sabeina ei bâng sikin, mi murdi le aliekin iempu ngei Sanminringpu chung a han.

¹¹Ma rilnangei le minchunangei hih pêk ngei roh.

¹²Nâipang na ni sikin tutên nang enminnuoi no rese ngei, no chonglam, nu nunchan, nu lungkhamna, na taksônna, le nêh thiengna ngeia iempungei minenna ni roh.

¹³Ko hong mâka chu, mipui makunga Pathien Lekhabungei porên, thurchi misîr le mi minchunân no zora le na ranak mang roh.

¹⁴Dêipungei thurchi an misîra male upangei nu chung a an kutngei minngama rathatienga neinunpêk na chang hah itên bê loiin tho no roh.

¹⁵Mi murdi makunga na masôna ânlang theina rangin hima neinunngei nâm hi inpêk lakin tho roh.

¹⁶Nangma le ni minchuna han indîn inla, ma neinunngei ha tho tit roh, asikchu ma neinunngei hah no thôn chu nangma le no chong rangâi ngei hah anruonin sanminring ni tih.

1 Timothy 5

Iempungei tienga roipêlnangei

¹Pasal atar uol ngei chu ngo nôhla, na pa angin en inla ngênin ngên roh. Pasal ânnoi uol ngei hah na lâibungngei angin bê inla,

²nupang atar uol ngei hah nu nungei angin bê inla, male nupang ânnoi uol ngei hah inthiengna murdi leh na sarnungei angin bê roh.

- ³Meithâingei anthei vaia omngei hah jâ ngei roh.
- ⁴Aniatachu meithâi han nâingei mini, tungei mini, a dônin chu ha ngei hah sakhuotienga an sintumngei hah an insûngmi ngei chung a sinin inchu bak rese ngei, ma anghan sinin an nulepangei le pilepungei khom donsûi thei an tih; maha Pathien râisân lam khom ani sikin.
- ⁵Meithâi athei mamanga om, a donsûi rang boitet ngei ha chu Pathien kôm an sabeina bângin, sùn le jân chubaitho le a sanna zongin an om tit ngâi.
- ⁶Aninâkchu meithâi amananâkin hoina tieng riempeta ânpêk ngâi chu la ring bang khom senla, athisai piel kêng ani zoi.
- ⁷Masikin tutên an minchâina an man loina rangin, ma rilnangei hih pêk ngei roh.
- ⁸Tukhom a sûngsuokngei, aliekin an insûngmingei an donsûi nônchu taksônna hah an minlêma iemloipu nêkin asiet uol an ni.
- ⁹Meithâi kum sômruk ânlei loi le voikhat inneia pasal dôn sir khâiloi ngei chu meithâi ngei riming mintângna han minchuong no roh
- ¹⁰male sin sa thona lama minpâk lei lo sai, a nâingei asadima lei donsûi sai, a ina khuolmingei lei mintung ngâi, a khristien champuingei ta ranga ngâihoi sin lei tho sai, mi intak ngei lei san sai, sin sa tho ranga ân pêksai ani rang ani.
- ¹¹Aniatachu meithâi nâipang uol ngei ha chu riming mintângna han minchuong no roh; an ôinangei han innei rang amin nuom ngei lehan chu Khrista nûk an song ngâi,
- ¹²motona a kôma an chonginkhâm hah an sieta theiloi changin an om ngâi.
- ¹³In tiin lôrrin zora minhek an inchu ngâia, manêka sie uol an tho ngâi chu, mûrtamngei le mi sintho dem an inchua, an misîr loiruo khom an misîr sa ngâi.
- ¹⁴Masikin ei râlngeiin asaloi ti theina rang zorâncum an man loina rangin, meithâi nâipang uol ngei han innei rese ngei, nâingei dôn rese ngei, male an inngei hah donsûi rese ngei ku nuom uol ani.
- ¹⁵Asikchu meithâingei senkhat chu Soitan jûi rangin an pêt sai ke ani zoi.
- ¹⁶Aniatachu khristien nupangin a insûnga meithâingei a dônin chu, ama'n a donsûi ngêt rang ania, koiindang chung a puokrik bâng no rese, masikin meithâi anthei vaia omngei hah an donsûi theina rangin.
- ¹⁷Koiindang upangei sin sa thona tienga ruoipu chang ngei ha chu thalo bâknik man ranga ânhoia bê rang an nia, aliekin thurchi misîr le mi minchuna tienga ranak song ngei hah.

¹⁸Pathien lekhabu'n, "Serâtchal hah bu ni minchîl lâitak a mûr khít pe no roh," male "Sinthopungei chu an thalo pêk rang ani," ati sikin.

¹⁹Koiindang upa chung a nônna hah adik ti rietpuipu inik chung tieng an om nônchu rangâi no roh.

²⁰Midang ngei khom an chi sa theina rangin, nunsie tho ngei chu mipui makunga ngo ngei roh.

²¹Pathien le Khrista Jisua le vântîrton inthieng ngei mitmua hi rilnangei hih tute chung a zenuol aninônchu lungkham uol minlang loiin, ni sinthona tina tute thop nâng uol loa, mulung lût takin no jôm rangin inngartakin nang ki min riet ani.

²²Pumapa sintho ranga mi inpêkna han nu kutngei an chung a minngam rangin innot no roh. Midangngei sietnangei an sinna han kop nônla; ânthiengin om tit roh.

²³Tui vai nêk ngâi no roh, na damthei ngâi loi sikin na sâkjôina san rangin uain alektiti nêk sa ngâi roh.

²⁴Mi senkhat sietnangei chu ânlang-iema mu theiin aoma, male an motona roijekna atung bak ngâia; hannirese midangngei sietnangei rêk chu nûka kêng mu theiin aom ngâi.

²⁵Ma angdên han sintho asa ngei ânlang-iema mu thei aoma, ânlang-iem loi ngei khom thup thei ni ngâi mak.

1 Timothy 6

¹Pathien riming le ei minchuna tutên an êro lona rangin suokngeiin an pumangei hah lam tina an jâ ruo pielin bê rese ngei.

²Suokngei Khristien puma dôn ngei han an pumangei enminnuoi no rese ngei, asikchu, anni ngei hah khom an iempu champungei an ni sikin. Manêkin, an sin asa uolin tho pe rese ngei, an sinthona renga âikalna an man ngei hah an lungkham iempungei an ni sikin.

Minchuna dikloi le neinangei adik

Hi neinunngai hih ni misîra ni minchu ngei ngêt rang ani.

³Tukhom chongrin dang a minchua, ei Pumapa Jisua Khrista chong dikngei leh ei sakhuo tienga minchuna dik hah a pom jôt nônchu

⁴ama hah inpâknân a sipa ite riet loi ani. Ama han insuolna le inkhalna chongngei tieng nuomna saloi a dôn ani, male ma renga han narsanangei, bâiinkhamnangei, inêronangei, sietna taksôn zoiloinangei,

⁵male mulungbôkngêi sêttak le chongtak mindonna reng dôn khâiloi mingei han inkhal râtna ngei an musuo ngâi. Anni ngei han sakhuo hih hong neina lampui ani tiin an mindon ani.

⁶Ani, sakhuo hin mi min nei sabak ngâi, ei dôn chungâ han ei mulungachukin chu.

⁷Imo rammuola hin ei juong chôi lût? Ite nimak! Imo rammuol renga ei jôkpui thei rang? Ite nimak!

⁸Masikin, sâknêk le sillebomngêi ei dônin chu eini rangin ahun.

⁹Aniatachu nei rang bôk ngei chu huongna han an tâka, ôinangei saloitak le mi sietthei chângâ han an inôk ngâi, mahan sietna le ramna tieng akaithâk ngei ngâi.

¹⁰Asikchu sum miditna hi saloi ngei murdi bulpui ani. Maha senkhatin an râivala, taksônna renga an invâia, ngâisietnangei tamtakin an mulungrîlgei asunkhoi ngâi ani.

Misang rilnangei

¹¹Aniatachu, nangma Pathien mi, ma neinunngêi murdi hah lôi inla, dikna, Pathien angna, taksônna, lungkhamna, tuongdierna, le nunnêmna ngei hah rujûl tit roh.

¹²Taksônna tâninsietna han ranak songin tân inla, male nangma rangin kumtuong ringna hah man roh; maha chang rangin Pathien'n nang a koi ani, rietpuipungei tamtak mitmua hâitaka na taksônna nu phuong lâihan.

¹³Pathien makunga, neinunngêi murdi ringna pêkpu le Khrista Jisua, Pontius Pilat, makunga a taksônna hâitaka a phuongpu mitmua han chong nang ke pêk

¹⁴ei Pumapa Jisua Khrista a juong inlâr nôkna Nikhuo dêna chongpêkngêi hah taksônomtaka jôma male dar rangin.

¹⁵nlârna ha chu azora taka Pathien satvura ompu le Roijêkpu vai han, rêngngêi Rêng le pumangei Pumapa han mintung atih.

¹⁶Ama vai ke athitheiloi ania; tute nâi theiloi vâra han a om ngâi. Ama chu tutên la mu mak ngeia; tute khomin mu thei mak ngei. Ama kôm han miritna le kumtuong sinthotheina chu om rese! Amen.

¹⁷Hi rammuola anei ngei hih inpâk loi rang le rochon inthîkloia hin an sabeina minngam loia, ei râisânna ranga neinun murdi manartetloia mi pêk ngâipu Pathien chungâ han minngam rangin chong pêk ngei roh.

¹⁸Sin sa tho rangin chongpêk ngei inla, sin sa thoa nei rangin, manarloia midangngêi sem sa rangin.

19Ma anghan thôn, anta rangin rochon mintûp an ta, maha sônmotona rangin lungphûm dettak nîng atih. Hanchu ringna hah chang thei an tih, ringna tatak hah.

20Timothy, no kôma minkola om hah hôih roh. Pathien ngikloina chongti le amo inkhalnagei, mi senkhatin dikloi taka “Rietna” an ti hah lôih roh.

21Maha senkhat ngeiin an dôn mini intîn, male an taksônna lampui hah an minmang zoi. Pathien moroina hah nin rênga nin kôm om rase.

2 Timothy

2 Timothy 1

¹Paul, Khrista Jisua taka ringna om inkhâmna thurchi misîrna lama Pathien lungdoa Jisua Khrista tîrton renga han,

²Ka nâipasal moroitak, Timothy kôm: Pathien ei Pa le Khrista Jisua ei Pumapa han moroina, inriengmuna le inngêina ngei nang pêk rese.

Râisânchongrilna le mohôkna

³Ki richibulngei renga sielesarietna inthiengtak dôna a sin ko tho pe ngâi Pathien kôm râisânchong ki misîr ngâi. Sûn le jân ku chubaithonangeia zoratin nang riettitin a kôm râisânchong ki misîr ngâi.

⁴Ni mitrithingei khom ki riettit ngâi, male râisânân ka sip theina rangin nang mu rang ku nuom sabak ani.

⁵Taksônna, takintâina no dôn hah ki riettit, ma taksônna hah aphut han ni pi Lois kôm le nu nû Eunice kôm khom aom, nangma no kôm khom aom sa ti ki riet minthâr ani.

⁶Ma sika han nu chungu ku kutngei ki minngam lâia Pathien'n neinunpêk nang a pêk hah minring tit rangin nang ka minrietnôk ani.

⁷Pathien Ratha mi pêk han ei thâimindôp maka; manêkin, ama Ratha'n sinthotheina, lungkhamna le indîntheinân mi min sip ngâi ani.

⁸Hanchu ei Pumapa rietpuipu nina ha inzakupui nônlâ; keima Khrista jâra mi intâng khom hih mên zakpui uol no roh. Manêkin, Pathien'n Thurchi Sa sika tuong theina ranak nang a pêk ngâi anghan nu tuong rangtum hah tuong roh.

⁹Ama han ei sintho ngei sika niloii, ama neinunkhîn le a moroina sikin mi sanminringa, a mingei ni rangin mi koi ani. Hi moroina hih Khrista Jisua han rammuol insieng mân mi pêk zoia,

¹⁰aniatachu maha mi Sanminringpu Khrista Jisua juongna sikin atûn chu ei kôm minlangin aom zoi ani. Ama han thitheina ranak hah a min monga, male thurchisa renga han thitheiloina ringnun a minlang zoi.

¹¹Thurchi Sa phuong rangin Pathien'n tîrton le minchupu'n ni phun zoi ani,

¹²male ma sika han kêng hi neinunngei khom hi ku tuong ani. Hannirese atûn tena khom ngammnân ka la sippuia, ka taksônpu hah tumo ani ti ki riet sikin, male ko kôma ni minkol hih ma Nikhuo ha atung mâka a rung thei ti ki riet mindik ani.

¹³Chong dik nang ki minchu ngei hah sêr mindet tit roh, nu jûi ranga minenna ani anghan, Khrista Jisua leh inzoma eita, taksônna le lungkhamna han omtit roh.

¹⁴Ei kôma om ngâi, Ratha Inthieng sinthotheinân neinun asa ngei no kôma minkola om hah vong minsa roh.

¹⁵Asia ramhuola om murdi'n min mâk ti ni rieta, Phygelus le Hermogenes ngei khom an inchel sa.

¹⁶Pumapa'n Onesiphorus insûngmi ngei inriengmu ngei rese, ama han vêl tamtak mi minhar zoi sikin. Intangna ina ko om khom hi mên zakpui maka,

¹⁷aniatachu Rom a hong tung lehan mi roka, ni mu mâka ni rok titir ani.

¹⁸Pumapa'n ha Nikhuo han a inriengmuna pêk rese! Male Ephesus taka keima rangin idôrmo sin a tho khom ni riet minthâr sabak ani.

2 Timothy 2

Khrista Jisua râlmi iemom

¹Ka nâipasal, nang chu Khrista Jisua leh inzoma moroina eita han rât takin om roh.

²Rietpuipungei tamtak makunga ku phuong, minchunangei ni riet hah mi taksônno, midangngei khom minchu thei nôk rang ngei kôm minkol roh.

³Khrista Jisua râlmi iemomtak anghan intak nu tuong rangtum hah tuong roh.

⁴Râlmi chang ranga thanga ompu hah an ulienpu a râiminsân theina rangin, râlmi tutên indoi lâiin hi ringlai hoinangei hih minpol ngâi mak.

⁵Tân innsietna ânhelpu khom balamngei jômin a tân nônchu râisânman man ngâi mak.

⁶Loia sintho ranak songpu ngêt hah amara ât masatak rang ani.

⁷Ko chong ti hi mindon roh, asikchu Pumapa'n riettheina nang pêk let atih.

⁸Jisua Khrista, David richisuonpâr, Thurchi Sa misîra nang ki ril sai, thina renga inthoinôkpu hah riettit roh.

⁹Thurchi Sa sika mipuoloi angin khitbelin intakna ngei khom ku tuong ngâia. Aniatachu Pathien chong chu khitbelin om ngâi maka,

¹⁰male Khrista Jisua renga juong ngâi sanminringna le kumtuong roiinpuina mintung ngâi hah an man sa theina rangin Pathien thangsai mingei jârin intakna ngei murdi ku tuongdier ngâi ani.

¹¹Hi chong hih adika ti ani: "Ama leh ei thîn chu, ama leh ring nôk sa ei ti u.

12Ei tuongier bangin chu, ama leh roijêk sa ei ti u. Ama ei ipdelin chu, ama khom mi ipdel atih.

13Eini hih taksônom no khom ila, ama chu taksônomin a omtit ngâi ani, amananâkin adikloiin a om theiloi sikin.”

Pomthei sinthopu

14Hi chong hih ni mingei minrietnôk roh, male chong kâmnângloia an inkhal loina rangin Pathien mitmua inningna ngartak pêk ngei roh. Ma inkhalna hah ite asatna om maka, arangâi ngei kai asiet ngei ngâi ani.

15Sinthopu, Pathien chongtak diktaka mi minchu ngâipu, a sintho inzakupui loi anghan Pathien mitmua pomna tatak na chang theina rangin ranak song roh.

16Pathien ngikloina le amo injêknangei renga inkêm roh, mahah mingei Pathien renga amin la tetet ngâi.

17Ma anga minchuna ha chu pânsie ânong taksa asâk minhek ngâi ang hah ani. Mi inik ma anga mi minchu ngâi chu Hymenaeus le Philetus ngei hah an ni.

18Ha mingei hah chongtak lampui ha an mâka, ei inthoinôkna chu atung suo zoi, tiin iempu senkhat ngei taksônna an min duoi ngâi.

19Aninâkachu Pathien lungphûm dettak ha chu min nîk thei maka; male ma chung han hi chongngei hih miziekin aom: “Pumapa'n ama ta ngei chu a riet ngâi,” male “Tukhom Pumapa ta ki ni ti kaiin chu asaloi thona renga an inhei ngêt rang ani.”

20In lienpa hin bêlbûrngei le khuriâingei jât tamtak an oma: senkhat chu rângkachak le sumdâra sin an nia, senkhat ngei chu thing le pilpoka sin an nia; senkhat ngei chu zora dang uola mang rangin a sina, senkhat ngei chu mang papai rangin a sin ani.

21Tukhom amapa mini, amanu mini hah asaloi neinunngiei murdi renga ânthienga anîn chu, zora dang uol ngeia mang nîng an tih, asikchu anni ngei hah an Pu ta ranga inpêk sai le kâmom an nia, sin sa ngei murdi thona rangin mang ranga om sai an ni.

22Vânglâi ôinangei mâk inla, mulungrîl inthienga Pumapa ralam ngei kai kôm dikna, taksônna, lungkhamna le inngêina ngei rujûl sa roh.

23Aniatachu amo le iterietloi inkhalnangei renga inkêm inla; ma ngei hah insuolnangeiin kêng among ngâi ti ni riet sikin.

24Pumapa tîrlâm ni ni anghan mi leh nêl suol tet rang nimaka. Mi murdi chung sing inla, minchupu sa le tuongthei ni roh,

25nang doipungei nunnêm taka mindikpu ni roh, asikchu Pathien'n insîrna zorânchum pêk ngei a ta chongtak la hong riet an tih.

²⁶Hanchu hôn rietsuok an ta, a lungdo min sin ngei ranga anni ngei sùrpu Diabol chong min jômna rang châng renga hah la jôkpai an tih.

2 Timothy 3

Sûn nûktak ngei

¹Sûn nûktak ngeia chu zora intak ngei la hong om atih, ti riëttit roi.

²Ama rang vai satna rok mingei, rôl inruokngei, ânsongngei, male ama le ama ân-pâk jôt ngei; mi êro ngei, nulepangei chongdonloi ngei, râisâna dônloi ngei le sakhuo mi niloi ngei;

³a singloi ngei, inriengmunaboi ngei, adikloia mi chongsietipu ngei, mi tukdullien ngei, le kerengboi ngei; asa reng nuom loi ngei;

⁴mi huongngâi ngei, mulungrât ngei, male rangâiinluta inpâk ngei; Pathien lungkhamna dôn nêkin an taksa hoina vai midit ngei la suok an tih;

⁵pêntieng en rangin chu sakhuo mi phuozêk an ta, hannirese a sinthotheina tatak chu hêngpai an tih. Ma anga mingei hah nûksong roh.

⁶Ha mi senkhat ngei ha kêng mi insûnga lûta, an sietnangei puokrik pêla ôinangei jât tamtak dôn nupang amo uol ngei sùrmintang ngâi,

⁷ma nupangngei hah zoratin inchu rang pûta aniatachu chongtak reng riet thei tet loi ngei hah an ni.

⁸Jannes le Jambres ngeiin Moses an doi anghan, ha mingei khom han chongtak hi an doi ngâi, mulungbôkngei kâmtho loi le taksônna tieng khom Pathien nuom loi lam mi an ni.

⁹Aniatachu idôr sôt te se noni ngei, mitinin an mo tie an la mu rang sikin. Ma angtak han Jannes le Jambres ngei chung a khom atung ani.

Anûktaka rilnangei

¹⁰Aniatachu nang chu ki minchuna nu jûia, ku nunchan, ki ringnuna ke neinunkhîn; ka taksônna ni minlanga, ku tuongtheina, ku lungkhamna, ki dierna,

¹¹nuomlonangei ku tuong, le ku dûktongnangei. Antioch, Iconium le Lystra taka ku chung a neinun ahongtung, nuomlona chi omtak ku tuong murdi ngei khom hah ni riet! Hannirese ma ngei murdi renga hah Pumapa'n ni kêlsuo zoi.

¹²Tukhomin Pathien lungdoa Jisua Khrista leh inzoma ringnun mang rang nuom ngei chu nuomlona tuong an tih;

¹³male mi saloingei le mi huongngâi ngei chu midangngei huongin le anninanâk khom inhuong sân omin asalo i renga asalo i oul tho an tih.

¹⁴Aninâka nangma rangin chu, chongtakngei nêncu ngei le ni iemna det sai ngei han om tit roh. Nang minchupungei hah tumo an ni, ni rieta,

¹⁵male nâipangte ni lâi renga Pathien Lekhabu Inthiengngei ni riet sai hah, vârna nang pêk thei ngei Jisua Khrista taksônna jâra sanminringna tienga ruoi ngâi hah ni riettit sikin.

¹⁶Pathien Lekhabungei murdi hi Pathien phûksân khuma miziek ani sikin chongtak minchuna rang ngei, adikloi rokôkna rang ngei, achâi mindikna rang ngei, le adiktaka lêngna ranga rilnangei rangin mangmunomtak ani,

¹⁷masika han Pathien sintho ngâipu chu sin asa ngei murdi tho ranga achuk tatak le intuo-ira aom theina rangin.

2 Timothy 4

¹Pathien le Khrista Jisua makunga, aring le athi ngei roijêk rangpu mitmûn le ama hah roijêk rangin Rêng angin ala juong rang sikin inngartakin nang ke ngêna,

²thurchi chu misîr tit rangin (azora le azora niloi khomin) tuongdier taka ni minchu ngâi anghan an theiloina min riet ngei inla, rokôk ngei inla, male mohôk ngei roh.

³Mingeiin chongrin dik an rangâi jôtloi zora om a ta, rangâi ranga an kuor ânthak pe ngei anghan an ôinangei jûi ranga misîr pe ngei rangin minchupungei anninanâkin an mintûp zora la om u-uol atih.

⁴Chongtak rangâina tieng an kuor min sêt an ta, thurchimuruongei rangâi nuomna tieng pêt an tih.

⁵Aniatachu nang chu i-ih chungâ indîn det inla; intakna tuongdier inla, Thurchi Sa misîrpu sinthôn la, Pathien târlâm anghan ni sintum murdi no zoi rang ani.

⁶Keima rangin chu, inpêk rang zora atung zoia; hi ringnun hih ka mâk rang zora ani zoi.

⁷Tân insietna han asân ranak ko songa, tenkung lampui ku suo zoia, male taksônna hah ka dar tit zoi.

⁸Male atûn chu Pathien kôma adik changna motorna râtman hah ka ta rangin dar saiin aom zoi, maha Pumapa Roijêkpu diktak han ma Nikhuo han ni pêk atih, male keima kôm vai niloiin, ama lungkhama a juong nôk rang lei ngak ngei murdi kôm khom pêk sâng atih.

Misang chongngei

⁹Ko kôm hong lai rang pût roh.

¹⁰Demas chu hi damlâi rammuol a kan sikin mi mâksana, Thessalonika a se zoi. Crescens chu Galatia a se zoi, male Titus khom Dalmatia a se zoi.

¹¹Luke vai kêng ko kôm aom zoi. Mark hah siel inla hong tuong roh, ki sinthona hin mi san thei sikin.

¹²Tychicus chu Ephesus taka ki tîr zoi.

¹³No hong tika, Troas taka Carpus kôma ka kâncholi chunghak ka mâk hah hongchôi roh; lekhabungei ha khom hongchôi sa roh, male aliekin savunlekha hah, hongchôi ngêt roh.

¹⁴Alexander thîrsukpa han ku chung a asaloï a tho sabaka; Pumapa'n a sintho dungjûiin thun atih.

¹⁵Ama renga han nangmananâk inrung thei roh, asikchu ei thurchi misîr hih a doi tatak ngâi kêng.

¹⁶Ki dikna thurchi ki misîr masa lâihan tute ni san mak ngeia; anrêngin min mâksan riei. Maha Pathien'n anni doinân tel pe ngei no rese!

¹⁷Aniatachu Pumapa'n mi ompuia male râtna ni pêka, masikin Jentailngei murdi rangin thurchisa ki misîr mikhip theia; male thina rang mun renga khom ni kêlsuo zoi ani.

¹⁸Male Pumapa'n saloina ngei murdi renga ni kêlsuo a ta, male invâna a Rêngrama khin hoitakin mi tuong atih. Roiinpuina chu tuonsôt tuonsôtin a ta ni rese! Amen.

Azoina chibaimûknangei

¹⁹Priscilla le Aquila, male Onesiphorus insûngmi ngei hah chibai ko hong muthuon.

²⁰Erastus chu Korinth taka ala oma, male Trophimus chu a damloi sikin Miletus taka ka mâk.

²¹Phalbi mân hong rang pût ngêt roh. Eubulus, Pudens, Linus, le Claudia ngei le Khristien dang ngei murdi'n chibai nang an hong muthuon.

²²Pumapa chu na ratha kôm om rese. Pathien moroina hah nin rênga nin kôm om rese.

Titus

Titus 1

¹Paul, Pathien tîrlâm le Jisua Khrista tîrton renga han. Pathien a mi thangngei an taksônna san rang le sakhuo lama dikna tieng ruoi ngei rang le sanngai rang le,

²kumtuong ringna sabeina chung a ânngam hah minriet ranga thang ki ni. Pathien, milak tho ngâiloi han, zora hônphut mân renga ma ringna hih ni leikhâm pea,

³male ama han azora diktaka han a thurchi a juong minlang zoi ani. Sanminringpu Pathien chongpêk anghan phuông minzar rangin sintum pêk ki ni zoi.

⁴Ei rêngin munkhat ei nina taksônna sika ka nâipasal diktak, Titus rang ki miziek ani. Pa Pathien le mi sanminringpu Khrista Jisua moroina le inngêina nangni pêk rese.

Crete tuihuola Titus sintho

⁵Neinunngai jêk ranga ala nângngai jêk rangin le khopui tina koiindang upangei phun pe ngei rangin, Crete tuihuola nang ka mâk ani. Nang ki rilnangei hih riettit roh:

⁶Upangei chu demnaboi ngêt; lômnû inkhat dônpu ngêt, a nâingai khom Pathien taksôn mi le hoiinhôkna lama dem theiloi le chongdonloi mi niloi ani ngêt rang ani.

⁷Koiindang upa chu Pathien sin enkolpu ani sikin, demnaboi ani ngêt rang ani. Theiintum mi aninônchu ningthik bai, ju inrûi mi aninônchu rahangrât mi, aninônchu sum inruôk mi ani rang ni tet nimak.

⁸Mi donsûi thei le neinun sa midit mi, indînthei mi, mi diktak, mi inthieng le mi omchan dik ani ngêt rang ani.

⁹Ama han, minchuna dik taktak lehan mingai a mohôk theina rang le adoipungei khom an dikloina a min mu theina rangin, thurchi taksôn omtak, chongrin leh injûipui ngei sûrngit ngâi mi ngêt ani sa rang ani.

¹⁰An omphuoloi han, midangngai hah adikna minjûiloi le huongna tieng an tuong ngâi ani, aliekin Juda sakhuo renga hong inheipu ngei hah an ni uol.

¹¹An bâi hîp pe ngei rang anânga, asikchu inzakpuiruoitak sum rujûlin, an minchu loi rang ngei minchûn, an insûngmingai nâm mulungjîng an mintong ngei zoi ani.

12-13 Crete mingei lâia nanâk, an dêipungei inkhatlam, chongdik misîr ngâipu han “Crete mingei chu milakkok, rama sarângngei, thaboi rôlruokngei,” a ti lehan, ngo bit ngei roh, taksônna dik an dôn theina rangin le

14 Juda thurchimuruongei renga hong, chongtak hengpai ngâi miriem chongpêkngai jôm khâi no rese ngei.

15 Mi inthieng ngei ta rangin chu neinun nâm hih ânthieng ania; hannirese, mi innim ngei le iemloipu ngei ta rangin chu ite hih ânthieng reng om maka, an mindona le asielesarietna ten khom ânnim ani.

16 Pathien riet mi kin ni an intia, aniatachu an sintho han an saloina aminlang pe ngei ngâi ani. Mangei hah ennuôm pêlloi le chongdonloi mi, asa sin rang ti reng inhoiloi an ni.

Titus 2

Chongrin adik minchuna

1 Aniatachu, nangma'n chu chongrin adik vai kêng ni minchu ngêt rang.

2 Putarngei chu hangvanga oma, roijêkthei, le indînthei; taksônna diktak dôn mi, lungkham, le tuongdierna dôn mi ni rangin minchu ngei sabak roh.

3 Ma angdên han pitarngei khom an nupang nunchan rieta, ringnun inthienga om rangin minchu ngei roh. Mi êro ngâi le ju suok nitet no rese ngei. Asa ngêt hah minchu rese ngei,

4 nuvengte avâng uol ngei hah an lômpa le an nâingei lungkham rang, ti rilminchu theina rangin,

5 indîntheina le inthârna, le insûng cherêlno satak, an lômpangei chong nuoia omngei, hanke tutên Pathien chongngei misîr minsiet noni ngei.

6 Ma angdên han ruothartengei khom indînthei rangin mohôk ngei roh.

7 Nangma vâng chu neinun nâma nunchan minenna satak ni ni ngêt rang. Ni minchuna ngei han khom miritomtak le takintâitakin tho roh.

8 Chongbâi thum tak, dem theiloi chong hah mang roh, hanke na râlngai han ei chungroia ite asie ti rang dôn noni ngeia, inzak an tih.

9 Suokngei chu an pungei rachamtakin om rang le neinunnâma an pungei râiminsân rang ani. An pungei an makhal ngei rang reng nimaka,

10 an pungei neinun khom an muruk rang nimak. Manêkin chu, an satna le an taksônoma minlang tit ngêt rangin minchu ngei roh, hanke mi Sanminringpu ei Pathien minchuna roi luttie hih an sinthona nâma an minlang rang ani.

11 Mi nâmin sanminringna an man theina rangin Pathien moroina hah minlang ani.

¹²Ma moroina han, Pathien minlut jôtloi le rammuol ôinangei mâkraka, hi rammuola hin indîntaka om le diktak le Pathien minlut jôta ringnun mang rangin mi rila,

¹³ei lei ngâk ei Pathien roiinputak le Sanminringpu Jisua Khrista chôiminsânga, a juong inlâr rang satvur Nikhuo ei sabei anghan.

¹⁴Ama nanâkin eini rangin ânpêka, phuoloinangei nâm renga mi mojôka, male ama ata tatak vai ni rangin mi minthienga, sin sa tho rangin mi nuom tatak ani.

¹⁵Ma neinunngai hih minchu ngei inla, no chong rangâi ngei hah na rachamneina nâm mangin mohôk ngei inla, ngo ngei roh. Tutên nang enminnuoi no rese ngei.

Titus 3

Khristien nunchan

¹Ni mingei hah roijêkpungei le rachamneipungei jâ ngei rang, chongdon rang, le lamtina asa tho rangin inningchien tit rangin minrietnôk ngei roh.

²Tute êro loia, inngêidîl le insûk-irin, le mi nâm chung a nunnêmtakin om tit rangin ril ngei roh.

³Eini nanâk khom zora khat chu amotak, chongdonloi le dikloi tak ei lei nia. ôina saloi le hoiinhâinangei nâma suok changin ei lei om ani. Ei ringnun ngei hih narsasie le nunsien ei manga; mi enjôt makmea, mingeiin khom mi enjôt mak ngei.

⁴Hannirese, mi Sanminringpu ei Pathien inriengmuna le lungkhamna a juong minlanga han,

⁵mi mojôk zoi. Mahih eini ei rachama sin sa ei tho sika nimaka, ama mi moroina han mi mojôka, Ratha Inthieng jârin, mi rusûka suoktharna le ringna thar mi pêk zoi ani.

⁶Pathien'n, Sanminringpu Jisua Khrista jârin ei chung a hin Ratha Inthieng hah a bun ok zoi.

⁷A moroina sika Pathien kôm midik mi minchanga, ei lei sabei kumtuong ringna rochonluopungei ei ni thei zoi.

⁸Mahi adiktaka ti ani. Hi chongngai hih aliekin, lunghâng thorîtin ni misîr tit rangin nang ku nuom ani, hanke Pathien iempungei chu an zora mang han, sintho asa le mitin ta ranga mangruo sa ngei hah, tho rangin an bôk duoi thei.

⁹Hannirese amo inkhal, richibulngei sûinangei, inkhalnangei, Balam roia insuolnangei chu nûksong roh; mangmunboi le kâmnângloi ani.

¹⁰Insenna sin ngâipu hah vêlnik dôr chu inningna chong pêk inla, masuole chu ite tho pe ngei nâng khâi mak.

¹¹Ma anga mingei hah chu mi saloi mulungkôitak ani ti ni rieta, an sietnagei han an dikloina a minlang ngâi ani.

Azoina rilnagei

¹²Artemas aninônchu Tychicus mini no kôma ko hongtîr tika chu Nicopolis taka ko kôm juong rang bôk tatak roh, asikchu ma muna han phalbi zora kai chu om rangin ko bôk ani.

¹³Balamtheipu Zena le Apolos hah, an chaina ngeia ite an insam loina rangin ne theidôr chu san ngei roh.

¹⁴Ei mingei hah sin sa thonân an ringnun mang ngêt rese ngei, anâng tatak ngei hah sem theia aomna rangin; ringnun kâmboiin an om rang nimak.

¹⁵Ko kôma omngei nâmin chibaimûknangei nang an hong muthuon. Taksônna taka ei malngei hah chibai pêk ngei roh. Pathien moroina chu nin chung a om rese.

Philimon

Philimon 1

¹Paul, Khrista Jisua jâra mi intângpu le ei lâibungpa Timothy renga, Kin mal le kin sinthopu champui Philimon kôm,

²le ni insûnga koiindang intûp ngâi ngei le kin sarnu Apphia le kin râmi champui Archippus:

³Pathien ei Pa le Pumapa Jisua Khrista'n moroina le inngêina nangni pêk rese.

Philimon lungkhamna le taksônna

⁴Lâibungpa Philimon, chubai ko tho racham ni riming dênin ka Pathien kôm râisânchong ki ril ngâi ani.

⁵Pathien mingei murdi chungu lungkhamna le Pumapa Jisua han taksônna no dôn tit ke lei riet sikin.

⁶Ku chubaithona tak chu iempungei anghan nangma leh kin inlopkhômna chungroi hin Khrista leh inzoma ei ringnuna satvurna murdi ei dôn ngei hih rietheina inthûk uol amintung theina rangin ani.

⁷Lâibung moroitak, nu lungkhamna han râisânna lientak le mohôkna tamtak mi mintung pe ani! Pathien mingei mulunggei murdi ni mintâi ani.

Onesimus ranga ngêna

⁸Masika hin Khrista han na lâibungpa anghan imo ni sintho rang ruo chong nang pêk hih ngam bâk rang khom ni rongu.

⁹Aniatachu, manêkin nang ku lungkhamna sikin, keima Paul nikhom rongu, hima hih thôn Khrista Jisua palâi, male atûn hin khom ama jâra mi intângpu nikhom rongu ngêna ko dôn ani.

¹⁰Intângna ina ko om sûngin Khrista taka han ka nâipasal lelê; rathatienga a pa ko hongni, masikin Onesimus ruthûlin no kôm ngêna ko dôn ani.

¹¹Ama hih moton han chu nangma rangin mangmunboi ania, aniatachu atûn hin chu aruonin nang rang le kei rangin mangmunomtak ani zoi.

¹²Atûn hin no kôm ko hongtîr nôka ama lehin ku mulungrîl khom ahong sa ani.

¹³Masikin, ama hih nu ruthûla ni san theina rangin thurchisa jâra intângna ina ko om sûngin ko kôm hin la dar rang ku nuom ani.

¹⁴Nikhomrese, mi san rangin nang dânderit nuom mu unga; manêkin, ma ha chu nu lungdo angin no tho rangin ku nuom ani. Masikin, no jôtna boiin ite tho noning.

¹⁵Masikin Onesimus'n nangma renga chomolte a rot hih zoratin no dôn nôk kelen theina rang sika khom ani thei.

¹⁶Atûn hin ama hih suok papai niloîn suok nêka sa uol ok: ama hih Khrista taka han lâibung moroitak ani zoi. Keima ta rangin khodôr tak mo ani rang ni zoi! Male nangma ta rang vângin chu ala ni uol rang, aruonin suok anghan le Pumapa han lâibung anghan ani rang ani zoi!

¹⁷Masikin no lôm anghan mi ni mindonin chu, keima lamdon mi ni lei tho rang anghan ama hih lamdon lei tho nôk roh.

¹⁸Nu chung a tho minchâina tete aoma, ân tângna tete aom lekhom keima ka lakaiin minsâp roh.

¹⁹Mahin, ku kut lelên hima hih ki miziek rang:Keima, Paul'n nang thun nôk ki tih. (Ko kôma nên tâng khet ti nang ki min rietnôkna chu ni oul mak.)

²⁰Masikin, ka lâibungpa, rangâihoitakin Pumapa jârin mahi ni tho pe inla; Khrista taka han lâibung anghan, mi mathâi roh!

²¹Tak ko sônchêt, anghan nang ke ngên hih tho na ta, mapêna khom tho ni tih, tiin ki riet mindik sikin no kôm mahi ki miziek ani.

²²Mapên han, ku tungna rang khâltan mi lei mintuo pe roh, Pathien'n nin renga nin chubaithonangei a khôka nin kôm mi hongtîr nôk atih, tiin ka sabeï sikin.

Azoina chibaimûknangei

²³Epaphras, Khrista Jisua jâra keima leh intângna ina ompu hin a chibaingei nangni a hong muthuon,

²⁴male ki sintho—champuingei Mark, Aristarchus, Demas, le Luke ngei khomin chibai nangni an hong muthuon sa ani.

²⁵Ei Pumapa Jisua Khrista moroina hah nin renga nin kôm om rese.

Hebrew

Hebrew 1

Pathien'n a Nâipasal renga chong a misîrna

¹Tienlâi han Pathien'n ei richibulngei kôm a dêipungei mangin zora tamtak le lam tamtakin chong a lei misîr ngâia,

²aniatachu sùnnûktieng ngeia hin chu ei kôm a Nâipasal mangin thurchi a misîr zoi. Ama taka han Pathien'n vânuoi hi a sina, ama hah sùn nûktaka chu neinunngai murdi chang let rangin a thang ani zoi.

³Ama han Pathien roinpuina vâra min êla Pathien angna tatak dônin rammuol pumpui ama sinthotheina chongin a minding ani. Miriemngai sietna renga ngâidamna a sin pe suonûkin, Pathien Ânsângtak sinthothei kut changtieng invâna a hon sung zoi.

Pathien Nâipasal roinpuina

⁴Pathien'n Nâipasal hah vântîrtonngai nêka riming roinpui uol a lei pêk anghan ama ha vântîrtonngai nêka inlal uola sinin a hong om zoi.

⁵Hi chong hi Pathien'n vântîrtonngai tute kôm ti tet ngâi mak, “Nangma ka Nâipasal ni ni; aviensùn hin na Pa ko hongni zoi,” Mapên han Pathien'n tu vântîrton chungroi khom misîrin, “Keima hi a Pa nîng ka ta, Male ama hah ka Nâipasal nîng a tih,” ti chong hi ti ngâi mak.

⁶Aniatachu Pathien'n a Nâipasal lutîr hah rammuola a juongtîr rang lâiin, “Pathien vântîrtonngai murdi'n Ama chubai an mûk ngêt rang ani,” a ti ani.

⁷Aniatachu vântîrtonngai chungroi chu Pathien'n hi anghin a ti, “Pathien'n a vântîrtonngai mantha a sin ngâia, male a tîrlâmngai chu meidonin a sin ngâi.”

⁸Nâipasal chungroi rêk chu Pathien'n a tia, “O Pathien ne Rêngam chu kumtuong kumtuongin om tit a tih! Ni mingai chungai satnân roi ne jêk ngâi ani.

⁹Adik ni midita male, adikloi chu nu mumâk ngâi. Masikin Pathien, na Pathien han nang thangin na champuingai nêkin miritna le râisâna nang a pêk uol ok zoi ani hi,”

¹⁰“Nangma, Pumapa, aphut han pilchung ni sina, male invânngai khom nu kut ngêtin ni sin ani a ti sa.

¹¹Ma ngei hah lân mang an ta, aniatachu nangma chu om tit ni tih; anni ngei ha chu puonsilngai angin la lîmpai an tih.

¹²Kâncholinchuol anghan la thep ngei na ta, male anni ngei ha pounngai angin la thûl nîng an tih. Aniatachu nangma chu zoratin ni ni ngâiin ni nia, male ni ringna khom hek tet no nih.”

¹³ Pathien'n a vântîrtonngei tute kôm hi chong hi ti tet ngâi mak: “Na râl ngei ne ke sirpha darnân ka dar mâka chu Ka changtieng hin insung roh,” ti hi.

¹⁴Nônte, vântîrtonngei hi imo an ni? Anni ngei ha chu ratha, Pathien sintho ngei an nia, sanminringna man rang ngei san ranga ama'n a tîr ngei an ni.

Hebrew 2

Sanminringna roiinpui

¹Masikin tuong minmanga ei om loina rangin chongtak ei riet ngei hah ei sâr mindet tit rang ani.

²Vântîrtonngeiin ei richibulngei kôma chongbe an lei mintung luo ha adika, tukhom a jômloi le a jûiloi chu dûk an manruo ngei chu an man kelen ngâi ani.

³Hima dôra sanminringna roiinpui vang hite lunghâng tho loiin om ila, kho angin mo ênthup thei ranga? Hi sanminringna hi aphut han Pumapa'n a phuonga, masuale ama riet ngeiin adik ani ti min minthâr pe ani.

⁴Ma angdên han Pathien khomin sininkhêl jât dadang le kamâmom neinun sinin le ama lungdoa Ratha Inthieng neinunpêkngai semin ma ngei hah rietpuipu a bôksa ani.

Sanminringna tienga mi ruoipu

⁵Pathien'n vântîrtonngei hah rammuol thar la hong om rang ei misâr chung a roijêkpu rangin dar mak.

⁶Manêkin chu, khomuna mini Pathien Lekhabua lei ti anghan: “Miriem hih imo ania, O Pathien, ni mindon tit ngâi; Miriemngei khom hi imo no donsui tit ranga?”

⁷Anni hah chomolte rangin vântîrton ngei nêkin ânnooi uolin ni sina, roiinpuina le miritnân ni minkhuma,

⁸male neinunngai murdi chung a roijêkpu rangin ni sin zoi.” Pathien'n miriem, “Neinunngai murdi chung a roijêkpu'n a sin” a ti sikin lam tina ahuom let ti ânthâr. Hannoma, atûn chu neinun murdi chung a roijêk mi la mu mak me.

⁹Aniatachu Jisua, chomolte ranga vântîrton ngei nêka innuoi uola sin hah ei mu ani, Pathien moroina jâra mitin ta ranga thi rangin. Thina a tuongna sika han roiinpuina le miritna inkhumin atûn hin ei mu zoi ani.

¹⁰Pathien, neinun ngei murdi sinpu le hôipu ta rangin chu, a roiinpuina changsa ranga nâingai tamtak a hong tuong theina rangin Jisua hah tuongna sika achukphara sina om le adik ani. Jisua hah sanminringna tienga mingai ruoipu ani sikin.

¹¹Ama'n mingei an sietna renga a min thieng ngâi, male ama le a mi inthieng ngei hah an Pa munkhat ani. Masikin Jisua'n ma ngei hah suongsuok ngei tia koi inzakupi mak.

¹²Pathien kôm, “Ki mingei kôm ni sintho ngei misâr ka ta; An intûpna nang minpâk ki tih,” a ti.

¹³“Pathiena ka taksônna minngam ki tih,” a ti nôka. Male “Pathien'n nâipang mi pêk ngei leh hin kin om,” a ti nôk sa.

¹⁴Jisua'n nâipang a koi ngei hah taksa le thisen dôn mi anni sikin ama ngêt khom anni ngei anga juong omin an miriem nina a juon sempui ngei sa ani. Ma hah a juong thona abitak chu thina chung a rachamneipu Diabol hah a minmang theina rang le,

¹⁵ma angdên han athi rang chia damsûnga suoka om murdi ngei hah a sanminjôk theina ranga ani.

¹⁶A san ngâi hah vântîrtonngei nimak ngei ti ânthâr. Manêkin, “Abraham suonpârngei a san ngâi.”

¹⁷Masika han Pathien sin a thona han miriemngei Ochai Inlaltak, taksônno le lungkhamna sip a hong nia, an sietna ngâidam an ni theina rangin lam tina a sûngsuokngei anghan a om anâng piel ani.

¹⁸Male ama ngêtin huongna tongin a lei tuong zoi sikin, atûn chu huongna tong ngei a san thei zoi ani.

Hebrew 3

Jisua chu Moses nêkin aroiinpui uol

¹Ki khristien sûngsuokngei, Pathien'n a koi ngei! Ei taksônna lama Ochai Inlaltak ni ranga Pathien'n a tîr Jisua hah mindon roi.

²Pathien insûngmingei lâia Moses taksôn oma a om anghan ama khom hi sin tho ranga a thangpu Pathien kôm taksôn a om ani.

³In sinpu'n a in sin nêkin miritna achang uol anghan Jisua hih Moses nêkin roiiinpui achang uol ok rangin ânhoi ani.

⁴In tiin hi tu sin mini chu ani ngêta, male neinun murdi chu Pathien sin ani.

⁵Pathien insûngmingei lâia suok chu Moses hah taksôn omtak ania, Pathien'n sûnmotona la ti rang ngei hah a lei misâr ani.

⁶Aniatachu Khrista rêk chu Pathien insûngmingei chung a taksônno le donsûipu Nâipasal ani. Ei hâina sûr mindetin ei sabeina hin ei minngam titin chu a insûngmingei chu eini ngei hih ei ni.

Pathien mingei ta ranga inngamna

- ⁷ Masika han Ratha Inthiengin “Aviensûn Pathien rôl nin rietin chu,
⁸ nin richibulngei ramchâra Pathien an minsin lâia, ama doia an inhel anghan
 nin mulung minngar khâi no roi.
- ⁹ Pathien'n, ramchâra han nin richibul ngeiin mi minsin rangin an pûta, kum
 sômminli sûnga ki sintho an mu suonûk khomin, a ti.
- ¹⁰ Masikin ha mingei chung a han ka takasia,
 ‘Khotiklâi khomin iemomin om ngâi mak ngeia, male Ko chongpêkngai khom
 jôm ngâi mak ngei.’
- ¹¹ Ka taksi sikin chonginkhâm ngartak ki sina: Ki minngam ngeina rang rama
 han lût tet noni ngei!” ki tia a ti anghan.
- ¹² Ki iempu champui ngei, Pathien ring hah nûksong rangin nin lâia tutên
 iemloina mulungrîl saloi nin dôn loina rangin indîn roi.
- ¹³ Manêkin, nin lâia tute sietna methêmna sika mulung ngarin nin om loina
 rangin Pathien Lekhabun “Aviensûn” ti mi mang pe kêr chu anîngtin inkhat le
 inkhat insan inlôm tit roi.
- ¹⁴ Ei iem phutna ngamna hah among dênin ei sûr mindet ngânin chu Khrista leh
 munkhata changsa rang ngei ei ni zoi.
- ¹⁵ Ma hih Pathien Lekhabu'n ati: “Aviensûn Pathien rôl nin rietin chu, nin
 richibulngeiin Pathien doia an inhel lâia anghan, nin mulung minngar khâi no
 roi.”
- ¹⁶ Tu miriemngai mo Pathien rôl riet suonûka ânhelngai hah? Egypt ram renga
 Moses'n a ruoi suok ngei hah an ni.
- ¹⁷ Tu ngei chung a mo Pathien'n kum sômminli sûnga a taksi hah? Sietna sina
 ramchâra athia ânlet ngei chung a han ani.
- ¹⁸ Tu ngei mo Pathien'n chonginkhâm ngartak dônin, “Ki minngam ngeina rang
 rama han lût tet noni ngei,” a ti hah? Ânhelngai murdi hah an ni.
- ¹⁹ Ma anghan, an iemloi sikin ma rama han lût thei mak ngei tiin ei mu ani.

Hebrew 4

- ¹ Atûn hin Pathien'n ha inngamna roi a misîrna hah ei man theina rangin
 chonginkhâm mi pêk ani. Masikin nin lâia tute ha inngamna lei khâmna taka lût
 theiloia nin om loina rangin indîn roi.
- ² Thurchi Sa chu an riet angtaikin eini khomin ei riet. Chong chu an rieta,
 aniatachu an chong riet han ite satna manpui mak ngei, asikchu chong an riet
 lâi han taksônân an pom loi sikin ani.

³ Eini ama iem ngei chu, Pathien'n a chonginkhâm inngamna han ei lût bang ani. “Ka taksina sikin chonginkhâm inngartak ki sina:

‘Inngamna rang ram ke pêk ngeina han lût tet no ni ngei!’” a ti anghan. A sintho ngei hah rammuol a sinphut zora a zoisai nikhomrese ha chong hah a la ti ani.

⁴ Pathien Lekhabu'n kho muna mini sûnsarini roi, hi anghin a ti: “Pathien'n sûnsarini chu a sintho murdi renga ânngam zoi.”

⁵ Ma roi zom nanâk hah “Inngamna rang ram ke pêk ngeina han lût tet no ni ngei,” a ti nôk ani.

⁶ Thurchi Sa lei riet masa ngei han iem lolina sika an lût thei khâloi sikin midang ngei la lût rangin phalna a la om ani.

⁷ Ma anghan, Pathien'n “Aviensûn” tiin nikhuo dang ânkhâm nôk ani. Kum tamtak suonûkin David mangin motona a lei rilsai: “Aviensûn Pathien rôl nin rietin chu, nin mulung minngar khâi no roi,” ti hah a ti nôka.

⁸ Joshua'n mipui ngei hah Pathien chonginkhâm inngamna hah a lei pêk ngei thei nisenla chu, Pathien'n nûka han nikhuo dang roi misîr khâi no nih.

⁹ Ma angdên han, Pathien mingei ta rangin chu sîn sarinia Pathien'n a sintho renga ânngam anghan inngamna hah a la om tit ani.

¹⁰ Tukhom Pathien chonginkhâm inngamna taka lût chu Pathien'n a sintho renga ânngam anghan ama khom a sintho renga inngamna man a tih.

¹¹ Tho, masikin anni ngei angin taksôn lolina sika chukloia om loiin inngamna hah ei chang theina rangin ranak song ei tih u.

¹² Pathien chong chu aringa, sin a tho theia, khandai beniknei ngaidak nêkin khom angai uol ani. Ringna le ratha inchunna ngei, rolo le rithingngei dênin a sunkhoi theia. Miriem mulungrîla ôina le mindona khom a riet let ngâi ani.

¹³ Pathien renga chu neinun ite ânthup thei ommak; neinunsin ngei murdi khom a mitmua chu ânlarphangin an ong-iem ani. Male ama kôm han ei sika ei thurchi chit ei la misîr let ngêt rang ani.

Jisua Ochai Inlal Roiinputak

¹⁴ Pathien omna lele invâna lei sesai, Ochai Inlal roiinputak Jisua, Pathien Nâipasal hah ei dôn sikin ei taksônna hi sûr mindet tit ei ti u.

¹⁵ Ochai Inlaltak ei dôn hih ei râtloina mi rietpui phâkloi ni maka, eini anghan lam tina huongna tong sai ani, aniatachu, sietna chu tho loi mi ei dôn ani.

¹⁶ Tho, masika han lungkhamna jâra moroina le sanna ei nâng tika ei man theina rangin Pathien moroina rêngsukmun hah hâitakin pan ei ti u.

Hebrew 5

¹Ochai Inlaltak ngei ngân chu sietnagei sika inbôlna le neinunpêkngai pêk ranga miriemngai ruthûla Pathien sintho ranga a miriem champuingei renga thangin phun an ni.

²Ma ngei khom hah lam tamtaka an râtloina sikin, ite rietloi ngei le an sietnagei chung a han an phûk ânoui thei ngâi ani.

³Male ha an râtloina sika han sietnagei sika inbôlna hah mingei ta rang vaia pêk loiin anni ngei ta rang khom an pêk sa anâng ani.

⁴Miritna chang rang nuomin tute atheiin ochai inlaltak chang thei ngâi mak ngei. Aaron anga Pathien koi ngei vai kêng ochai inlaltak an chang thei ngâi.

⁵Ma angdên han, Khrista khomin ochai inlaltak ani sika miritna hah ama ta rangin lâk mak. Manêkin, Pathien'n a kôm, “Nangma ka Nâipasal ni ni; aviensûn hin na Pa ko hongni zoi,” a ti ani.

⁶Mun danga, “Nangma chu Melchizedek angin kumtuongin ochai nîng ni tih,” a ti sa.

⁷Pilchunga a ring lâi han Jisua'n thina renga ama sanminring theipu Pathien kôm inringtaka iniekin le mitrithi tâk pumin chubaithona le ngêna a neia. Rangâichîn taka ân pêkna sikin Pathien'n a rangâi pe ani.

⁸Aniatachu Pathien Nâipasal tatak nikhomsenla a tuongna ngeia han chongjômna ânchu ani.

⁹Achukphar a hongni tena chu a chongjôm ngei ta rangin kumtuong sanminringna nâr a hongni zoi.

¹⁰male Pathien'n Melchizedek angin kumtuong ochai inlaltak ni rangin a phuong zoi.

Taksônna mâk loina ranga inningna

¹¹Ma chungroia hin misâr rang tamtak ei dôn, aniatachu a misâr minthâr ântak nin rietthei loi sikin.

¹²Azora mindonin chu minchupu nithei rak ta unglâ ânhoia, hannirese Pathien chongbul tak la minchu nin nâng nôk zoi ani. Burum nêk nêkin runutui nêk kêng nin la nâng rêk.

¹³Tukhom runutui nêk a la nâng chu nâipang, adik le adikloi ite la riet loi ani.

¹⁴Burum rêk chu ulienngai an thôn zong sika asalesie sensâi thei ngei ta rang ani.

Hebrew 6

¹Tho, masikin Khristien chongbul misîr khâiloiin moton tieng sên, mitungsuo minchuna lam pan ei ti u. Sin kâmnângloi ngei le thina mintung ngâi renga inheia Pathien iem rang tie ngei,

²baptisma le kut minngamna chungroia minchuna ngei; thina renga inthoinôkna roi le kumtuong roijêkna ngei lungphûm chu phûm nôk khâi no u.

³Tho, moton tieng pan ei tih u! Male Pathien'n mi phal pea anin chu mahah ei tho rang ani.

⁴Kho angin mo an taksônna mâka om ngei hah an honsîr thei nôk rang? Voikhat chu Pathien vâra oma; invân neinunpêk temsai le Ratha Inthieng khom changsaia;

⁵Pathien chong asa tie le zora la hong om ranga sinthotheina om rang ngei khom riet saia.

⁶Male an taksônna amâk nôk ngei chu! insîr nôka hongkîr nôk theiruo ni khâi mak ngei. Anni ngei han Pathien Nâipasal hah jêmdel nôkin mâimôk anshak sikin.

⁷Pil, a chungu ruotui tâk ngâi lei methêpa, a sin ngei ta ranga chimu kâmom musuo pe chu Pathien'n sat a vur ngâi.

⁸Aniatachu ma pil han rilingngei le chiekngei a mônga nîn chu maha kâmnângloi ania; Pathien khomâksâm chi omtakin a oma, male nûka chu meia hâl minmangin om atih.

⁹Hannirese, ruol moroi om ngei, ma anghan ti khom unglang, nangni chu satvurna sa uol sanminringna nin dôn ti kin riet minthâr ani.

¹⁰Pathien chu adikloi nimak. Ama ta ranga sin nin tho ngei, lungkhamna nin minlang ngei, nin khristien champui ngei nin lei san ngei le atûntena khom nin la san tit ngei hah mingil tet no nih.

¹¹Nin sabei a hong tung dik theina rangin nin sika nin takintâina hah amongna tena nin musuo chit rangin kin nuom tatak ani.

¹²Nin ratha minboi loiin, iemna le tuongdierna sika Pathien chonginkhâm a man ngei om anghan nin hong om rangin kin nuom ani.

Pathien chonginkhâm adik

¹³Pathien'n Abraham kôm chonginkhâm a sin lâihan ama nêka roiinpui uol tute an omloi sikin ama riming sâmin khomâk ânsâma.

¹⁴A kôm, "Sat nang vur ka ta male suonpâr tamtak nang pêk ki tih," a tia.

¹⁵Abraham a tuongdier sikin Pathien chonginkhâm hah a man ani.

¹⁶Miriamngeiin khomâk an insâmin anni nêka roiinpui uol ngei riming sâmin khomâk an insâma, an inkhalna murdi khom an mong ngâi.

¹⁷Pathien'n a chonginkhâm man rang ngei kôm han a neinun khîn thûl tet no nih; ti minthâr pe ngei uol nuomin a chonginkhâm hah khomâk insâmin a mindet ani.

¹⁸Masikin Pathien'n neinun inik a chonginkhâma thûl theiloi le milak tholoi rang mangin eini a kôma jôkna man ngei hin ei motona sabeina om hih sûr mindet tit rangin mi mohôk tatak ani.

¹⁹Ma sabeina hah ei ringnun rangin thirkuoirikit anghan ani. Maha adet tak le ânthârlak ania, invân biekin puondûng sunga mun inthienga khom a lûta.

²⁰Mahan Jisua'n ei ruthûlin ei motona a lei lût zoia, male Melchizedek angin kumtuong ochai inlaltak a lei hongni zoi.

Hebrew 7

Ochai Melchizedek

¹Hi Melchizedek hi Salem rêng le Pathien Inchungtak ochai ani. Abraham'n rêng minli ngei a mene suole râlbûol renga a hong tieng Melchizedek han ân tongpuia, sat a vura,

²male Abraham'n a lâk ngei murdi sômakhat a pêk zoi. (Melchizedek riming omtie motontak chu, “Dikna Rêng” ania, male Salem rêng ani sikin “Inngêina Rêng,” khom ani sa.)

³Melchizedek pa mo, nu mo, ani nônchu a richibulngei mo, ânziekna reng om mak; a suokna le a thina khom ânziekna khom om sa mak. Ama chu Pathien Nâipasal anghan; kumtuong ochaiin a om bang ani.

⁴En ta u, khodôra roiinpui mo ani. Ei richibul inthangtak Abraham luon a râlâk neinunngei murdi sômakhat a pêk hah.

⁵Male Levi richisuonpârngei lâia ochai chang ngei hah Israelngei kôm renga sômakhat rusuong rangin Balamín chong a pêk ani, ma hah an ramsungmingei nanâk kôm renga ani, an ram mingei hah Abraham richisuonpâr ngei nanâk nikhomrese ngeia.

⁶Melchizedek hah Levi richisuonpâr renga chu ni maka, aniatachu Abraham kôm renga sômakhat a rusuonga, Pathien chonginkhâm manpu hah sat a vur ani.

⁷Ti nâng loiin satvura ompu nêkin a vurpu chu a roiinpui uol ani.

⁸Ochainingei chungroia chu athi thei miriem ngeiin sômakhat an rusuonga; aniatachu Melchizedek rangin chu Pathien lekhabu'n, aring titin sômakhat a rusuong ati ani.

⁹Male, Abraham'n sômakhat a pêk lâihan, Levi (a richisuonpârngei sômakhat rusuong ngâipu) khom a pêk sa ti thei ani.

¹⁰Melchizedek'n Abraham ân tongpui lâihan Levi hah la suok maka, aniatachu a richibul Abraham takpum sênga a om zoi ani.

¹¹Israel mingei kôm han levirûi ochai nina nuoia Balam pêk ani. Atûn, ha ngei sintho hah achukphar aninte, Aaron anga niloiin Melchizedek anga ochai dang hon lang rang ite anângna omak.

¹²Asikchu Ochai nina hah ahôn thûlin chu balam khom a hon thûl rang anâng ngâi ani.

¹³Male hi neinunngai misîra om ei Pumapa chu nam dang ania, a jâtngai lâia tute ochai chang ngâi mak ngei.

¹⁴Ei Pumapa chu Juda nam renga inzir ani ti riet minthâr ani; male Moses'n Ochaingai chungroi a misîr lâihan hi nam hih dênphâk mak.

Melchizedek anga Ochai dang

¹⁵Ei roi misîr hah ahon thâr uol zoi; Melchizedek anga ochai dang ahong inlang zoi.

¹⁶Ama hah miriem balama sin ni loiin mong ngâiloi ringna sinthotheinân ochaia sin ani.

¹⁷Pathien Lekhabun, "Melchizedek anghan nangma kumtuong ochai nîng ni tih," a ti angin.

¹⁸Balam muruo hah râtloi le amangnaboi ani sikin khâipai ani zoi.

¹⁹Moses Balam han ite achukpharin a sin thei khâiloi sikin. Male atûn chu sabeina sa uol pêkin ei om renga, Pathien ei nâi thei zoi.

²⁰Maruolin, Pathien inkhâmna khom a om sa zoia, midang ngei ochai an chang lâihan chu hi anga inkhâmna hih om ngâi mak.

²¹Aniatachu, Jisua chu Pathien'n a kôm: "Pumapa hah khomâk insâmin chonginkhâm a sina male lâk mikhîr khâi no nih;

'Nangma kumtuongin ochai nîng ni tih,'" tiin khomâk insâmin ochaiin a sin ani.

²²Hanchu ha atei uolna han Jisua chu chonginkhit sa uol inkhâmpûn a sin zoi ani.

²³Atei uolna dang a la om sa: midang ngei ha chu thina sikin an sintho ngei hah an zomtit thei loi sikin ochaia sin hah mi tamtak an ni.

²⁴Aniatachu Jisua chu kumtuongin a ring tit sikin a ochai sin hah tutên thûl mak ngei ani.

²⁵Masikin ama taka Pathien kôma hong ngei chu atûn le khotiklâi khomin a sanminring thei, anni ngei ta ranga Pathien kôm ngên pe ngei rangin tuonsôtin a ring tit sikin.

²⁶Hanchu Jisua hah Ochai Inlaltak ei nângngei murdi minchukpu ani. Ama chu ânthienga, minchâinaboi, sietna dônloi, misiengei lâi renga athei piela om, invângei nêka ânchung uolpu ani.

²⁷Ama chu ochai inlal dang ngei anghan ni maka; ama rangin chu anîngtin a sietna inbôlna pêk bak rang nâng maka, masuole midang ngei sietna rang khom nâng mak. Ama voikhat ânpêk lâihan, voikhat rengin inbôlna inkhatin anrêngin ânzoi let ani.

²⁸Moses Balam han miriem achukpharloi ngei ochai inlalin a phun ngâia; aniatachu Pathien inkhâmna chonginkhâm, Balam nûka juong om han chu Nâipasal hah, kumtuonga achukphara a phun ani.

Hebrew 8

Jisua ei Ochai Inlaltak

¹Ei misîr lâia abipuitak chu mahi ani, Ochai Inlaltak invâna Rêng Inchungtak rêngsukmun changtienga hong insung ei dôn ani.

²Miriam kutsin niloi, Pumapa sin puon-in tatak Mun Inthieng taka Ochai Inlaltak angin sin a tho ani.

³Ochai Inlaltak ngei murdi'n neinunpêk le sa inbôlna Pathien kôma pêk rangin phun an nia, Masikin ei Ochai Inlaltak khom hin imini chu pêk rang a dôn ngêt rang anâng ani.

⁴Ama hah pilchunga om senla chu, ama chu ochai reng ni tet no nih, Juda Balama neinunpêk anâng ngei pêk ngâi ochaingei an om sikin.

⁵Ochaingei sintho ngâi hah chu invâna neinunngai rimil le rilîm tatak vaike ani. Moses'n Chonginkhitna Puon-in a sin rang lâia phuozekin Pathien'n a kôm, "Ni sin rang tie chu muola a rimil min mua no om ngei angta kin sin rangin mindon roh," tia a ril anghan.

⁶Aniatachu, atûn chu, anni ngei nêka ânchung uol ochai sin hah Jisua pêkin a om zoi, Pathien le a mingei kâra chonginkhit a minsûk hah asa uola, ma chonginkhâm hah neinun asa uol ngeia minding ani sikin.

⁷Chonginkhitna masa hah dikloina om no senla chu, a inik changna hah hong om rang nâng no nih.

⁸Aniatachu Pathien'n a mingei dikloina a man lâihan a tia, "Nikhuo ngei ahongtung rang ani zoi, Israel mingei le Juda mingei chonginkhitna athar ki sin pe ngei rang nikhuo ngei hah, Pumapa'n a ti.

⁹An richibulngei Egypt renga hong tuong ngei ranga an kuta ku sôr nia Chonginkhit ki sin anghan chu ni khâi no nih. Anni ngei leh Chonginkhit ki sina han taksôn omin om mak ngeia, masikin anni ngei hah lunghâng tho ngei khâi mu-ung ani.

¹⁰Atûn, nikhuo hong tung rang ngeia Israel mingei leh chonginkhit ki sin rang chu mahih ani, Pumapa'n a tia: An mulungsûnga ka balam ngei dar ka ta male an mulungrîl ngeia miziek sâng ki tih. Keima an Pathien nîng ka ta, male anni ngei hah ki mingei nîng an tih.

¹¹Tutên, 'Pumapa hah riet roh,' tiin an miriem champui mini aninônchu an ramsûng miriem champui minîn an minchu ngei nâng khâi noni ngei. Achîntak renga alientak tena min riet let rang anni zoi sikin.

¹²An sietnagei ngâidam ka ta, an minchâina ngei riettit khâi no ning."

¹³Chonginkhit thar a ti sikin, Pathien'n amotona ha chu a muruon a sin zoi; male neinuntin amuruo hong changa mangsaloi ngei chu inmang lai atih zoi.

Hebrew 9

Pilchung le invân chubaimûkna

¹Chonginkhit masa khom chubaimûkna balamngei le miriem sin chubaimûkna mun a lei dôn ani.

²Puon-in an sina, khâltan pêninta hah Mun Inthieng an tia. Ma sûnga han meiserdarna le dosâng leh Pathiena an pêksai vâipôlngei hah an oma.

³Puondûng inikna nûktieng han Mun Inthiengtak an ti hah aom.

⁴Asûnga han mirimhoi hâlna mun rângkachak mâichâm le rângkachaka minluon Chonginkhit sumduk a oma, Ma sûnga han "Manna" omna rângkachak sungkola ngei, Aaron sunrol abuo hôn cher ngei le chongpêkngai a chungga ânziek lungpêk inik ngei hah an om.

⁵Ma sumduk chungga han Pathien roiinpuina minlangin iringparân mantha dôn ngei hah sietnagei ngâidamna muna an mantha pharin an om sa. Aniatachu, atûn chu ma thurchi ha chu akip akôiin rilsensâi zora la ni mak.

⁶Ha neinunngai hah hi anghin an lei minsûk ani. Ochai ngei hah anîngtin apêninta puon-in sîng han an sintum sin rangin an se ngâia,

⁷aniatachu asûnginta Puon-in han chu Ochai Inlaltak vai kêng akuma voikhat thisen chôi ngêtin a lût ngâi. Ma thisen a chôi hah ama rang le mipui ngeiin an riet loi kâra sietna an sinngai ruthûlin Pathien kôm an pêk ngâi.

⁸Hi minsûkna ngei murdi renga hin Ratha Inthiengin ânthârtakin a minchu ngâia; apêninta Puon-in hah a la omsûng kêr chu Mun Inthiengtak lampui hah lân ong mak.

⁹Maha atûnlâi mintêkna ani. Aomtie chu neinunpêkngêi le sa inbôlnangei Pathien kôma pêk han a bieku ngei mulungrîl min chukphar thei maka,

¹⁰sâk rang, nêk rang le minthieng-minthârna balam tamtak roi ngei vai ani sikin. Mangei murdi hah pêntienga balam korong an nia, Pathien'n chongpêk athar a pêk mâka mang rang ani.

¹¹Aniatachu Khrista chu neinun sa ngei hi taka lei omsai piel Ochai Inlaltakin a juong ani. Puon-ina sin a thona ngâi ha a roiinpui uol le achukphara; miriem sin puon-in nimak, ma hih rammuola sinngêi lâia nimak tina ani.

¹²Khrista hah Mun Inthiengtaka voikhatin a lûtpat lâihan, inbôlna rangin kêl ngei le siel ngei thisen chôi maka, ama thisen nanâk chôiin eita rangin kumtuong sanminringna a man zoi ani.

¹³Kêl ngei le sechal ngei le setuoi ngei hâlminvâmin mi innim chung a an rethe luon an taksa innimna a minsâi pe ngei theia a minthieng thei ngeiin te,

¹⁴Khrista thisen vangin te athei uol ok rang na! Kumtuong Ratha ruoinân Pathien kôm ama nanâkin inbôlna achukpharin ânpêk zoi sikin, Pathien ring sin ei tho theina rangin a thisenin thina mintung ngâi ngei sin renga ei sielesarietna minthieng a tih.

¹⁵Hi sika hin Khrista hih chonginkhit athar minsûkpu ani, Pathien'n a koi ngei hah kumtuong satvurna ânkhâm an man theina ranga ani. Maha anitheina chu chonginkhit masa a la om sûnga miriemngêi minchâina renga kelsuoa, thina a lei omsai sikin ani.

¹⁶Chongmâk roi chu a mâkpu hah athi le thiloi enmindik bak anâng,

¹⁷chongmâkpu a la ringsûngin chu ite amangna la om loiin a thi suonûkin kêng amangna a la om ngâi.

¹⁸Ma sika han chonginkhit masa khom hah thisen an mang tena kêng mang a la chang ani.

¹⁹Amotona Moses'n Balam Chongpêkngêi hah mipui ngei kôm a phuong baka. Masuole chu sechal ngei le kêl ngei thisen hah tui leh minpolin, hyssop machang le samul sen mangin Balam Lekhabu le mipui ngei murdi hah a thika.

²⁰An kôm, "Mahi Pathien'n nin jôm ranga nangni a pêk Chonginkhit nammindetpu thisen hah ani" a tia.

²¹Ma angdên han Moses'n Puon-in Inthieng le bieku mangruongêi murdi khom hah thisen a thik sa.

²²Adiktakin, Balam dungjûiin neinunngêi murdi hih thisenin a minthieng thei leta, male sietnangei chu thisen suok vaiin kêng ngâidam ani thei.

Khrista inbôlnân sietnangei a lâkpai

²³Ma neinunngai, invâna a taktaka a om rimilngai hah ma anghan minthieng an ni rang ani. Aniatachu invâna neinunngai ha chu inbôlna sa uol ok an nâng ani.

²⁴Asikchu Khrista chu miriem sin Mun Inthieng atak rimila han lût mak. Atûna Pathien makunga ei ruthûla ân dingna invân khin a lût kelen ani.

²⁵Juda Ochai Inlaltak han sa thisen chôiin Mun Inthiengtak han kumtin a se ngâia. Aniatachu Khrista chu ama nanâk inpêk rangin voi tamtak lût maka,

²⁶ma anghan nino senla chu rammuol sinphut renga voi tamtak a tuong rang ani zoi. Manêkin, atûn zora mong rangtoa hin ân bôlna sika sietna a minhek theina rangin voikhatin a juon lang ani.

²⁷Mitin voikhat chu thi ngêt an ta, masuole Pathien'n an chungroi jêkin om an tih.

²⁸Ma angdên han Khrista khom ha mi tamtakngai sietna min hek rangin voikhat inbôlnân pêk ani zoi. Sietna min hek rang ni khâi loiin ama lei ngakngai sanminring rangin avoi nikhân juon lang nôk atih.

Hebrew 10

¹Juda Balam hah neinunngai atak phuozek dūr akip le taksônom nimaka; neinun sa juon lang rang rimil minenna vai kêng ani. Kumtin inbôlna ngâi deden hah kumtuongin an pêk ngâi ani. Kho angin mo Balam han ma anga inbôlna ngai sika han Pathien kôma hong mingai hah achukpharin asin thei ranga?

²Pathien chubaimûk ngai hah an sietnangai renga a minthieng ngai tatak nisenla chu, sietnân theiloi an intum bangin inriet khâi noni ngeia, male inbôlna ngai hah inngam atih zoi.

³Ma anghan, nikhomrese ma inbôlna han kumtin mingai an sietna a min rietsuok nôk ngai ngâi ani.

⁴Sechalngai le kêlngai thisenin sietnangai hah alâk pai thei tet loi sikin.

⁵Ma siktak han, Khrista'n rammuola a juong rang lâihan Pathien kôm: "Nangman inbôlna ngai le neinunpêkngai nuom mak chea, Keima rangin takpum mi ni minsûk pe zoi.

⁶Mâichâm chungsa pumpui hâminvâmngai le sietnangai lâk pai ranga inbôlna ngai hah na râiminsân tet mak che.

⁷Male Keiman,

'O Pathien, Balam lekhabua ku thurchi mizieka lei om anghan nu lungdo sin rangin hin ko om,'" ki tia.

⁸Motontaka ama'n, "mâichâm chungsa inbôlna ngai le neinunpêkngai aninônchu sa pum hâminvâmngai le sietnangai lâk paina ranga inbôlna ngai hah nuom

khom nuom mak che, na rai khom minsan mak che a tia." Hima inbolna ngei murdi hih Balam dungjuiin pek nikhomsenla ma anghin a ti ani.

⁹Hanchu, "O Pathien, nu lungdo sin rangin keima hin ko om," a tia. Masikin Pathien'n inbolna muruo ngei hah a min hekleta, mangei ruthula han Khrista inbolna hi a dar zoi ani.

¹⁰Jisua Khrista'n Pathien lungdo a sina, ama takpum ngat hah voikhatin anrenga rangin appek phar sikin ei rengin sietna renga enthieng zoi ani.

¹¹Juda ochai tinin ngingtin an sintum sinin inbolna ngai deden hah voi tamtak an pek ngai; aniatachu ma inbolna ngei han sietnangei lak pai thei tet mak.

¹²Nikhomrese, Khrista chu sietnangei inbolna rangin voikhat appeka, maha kumtuonga omtit rang ani zoia, masuole chu Pathien kut changtieng a hon sung zoi.

¹³Atun chu Pathien'n a rai ngei a kepha nuoia a dar pe maka chu mahan a ngak tit ani.

¹⁴Hanchu, voikhat inbolna leh an sietna minthienga omngei ha chu kumtuonga rangin achukpharin a sin ngei zoi.

¹⁵Hanchu Ratha Inthieng khomin ama rietpuipu mi pek sa. Amotona,

¹⁶ "Nikhuo hong tung ranga anni ngei leh chonginkhit ki sin rang chu mahi ani, Pumapa'n a ti: An mulung sunga ka balamngei dar ka ta, male an mulungrila miziek ki tih."

¹⁷Masuole chu, "An sietnangei le an tho minchaina ngei riettit khai no ning," a tia.

¹⁸Masikin ma anga ngaidamna omna taka han chu sietnangei min boina rangin neinunpek nang khai no nih.

Pathien nai ei ti u

¹⁹Hanchu, ka laibungngei le ka sarnungei, Jisua thina sikin Mun Inthiengtaka han phukdairiemin ei lut thei zoi ani.

²⁰Ama'n puondung (a takpum) renga lam thar le lam ring ei ta rangin mi mong pe zoi.

²¹Pathien insung donsuipe ochai roinputak ei don ani.

²²Masikin mulungril indin le taksonna adiktak donin, sie le sa rietna dikloi renga ei mulungrilngei minthiengin le ei takpumngei tui inthieng leh minsain Pathien nai ei ti u.

²³Ei sabeina phuong hih sur mindet tit ei ti u, Pathien chu a chonginkhama taksôn aom sikin.

- 24**Inkhat le inkhat inlungkhamna minlang inlômin, inkhat le inkhat insan inlômin, sin sa inthope inlôm rangin mindon pak ei ti u.
- 25**Mi senkhatngei an thônzong anghan ei intûp inkhom mâk no u. Manêkin Pumapa Nikhuo hah ahong nâi uolin nin mûn chu inkhat le inkhat inmohôk inlôm u-uol ei ti u.
- 26**Chongtak ei riet suonûkin nunsie ei la tho bangin chu nunsie ngei lâk pai nôkna rangin inbôlna om khâi no nih.
- 27**Manêkin, aom rang chu chi puma Roijêkna le mei inthang Pathien doi ngei kâng inmangna rang ngâkna vai kêng ani zoi!
- 28**Tukhom Moses Balam jômloi chu, ama theiloi nina rangin rietpuipu inik mini, inthum mini an omin chu moroina boiriekina that ani ngâia.
- 29**Pathien Nâipasal mumâka, Pathien chonginkhitna thisen ama minthiengna neinun itea be loia, moroina Ratha êro mi hah khodôra dûkmintongna sietuol mo tuong rangin nin minhoi?
- 30**“Phuba chu keiman lâk ka ta, Keiman thuon ki tih” a tipu le “Pumapa'n a mingei roijêk a tih,” ti hah ei riet sa.
- 31**Pathien ring kuta chul chu neinun chi omtak ani!
- 32**Zora vunsiaia kho angin mo neinun nin chungang hong om ngei hah riettiti roi. Pathien vârin nangni a êl suonûkin ma sûnngai han dûk tamtak nin tuonga, hannoma injêlna han nangni mene mak.
- 33**Zora khat chu mipui makunga nangni erôn an nuom nangni an loa, zora danga chu ma anga an lei mintuonngai leh munkhatin nin tuonga.
- 34**Mi intângngai tuongna hah nin tuongpuia, male nin neinun dôn murdi nangni an sûr pe lâi khom han, kumtuonga sôl rang neinun sa uol nin la dôn ti nin rietin ma nin machâna khom hah râisântakin nin tuong ani.
- 35**Râisânman roiinpuitak a mintung rang sikin nin hâina hah minmang no roi.
- 36**Pathien lungdo nin sina, a chonginkhâmngai hah nin man theina rangin dierna nin nâng ani.
- 37**Pathien Lekhabu'n, “Chomolte suole chu, a juong rangpu hah juong a tih zoi; ama hah innu no nih.
- 38**Hannirese, ki midik chu iem a ta male ring a tih; aniatachu an lâia tu mini nûktieng an tolin chu, a chungang ka râisân no nih,” a ti anghan.
- 39**Eini chu nûktieng ântola ânman rang mi nimak me. Manêkin, taksônna dôna sanminring ni rang mi kêng ei ni.

Hebrew 11

Taksôna

- ¹Taksôna dôn ti chu neinunngêi ei sakei ngei hah adik ngêt ti le neinun ei mu theiloi ngei a om ngêt ti minthâr hih ani.
- ²An taksôna jârin kêng zora muruoa mingei han Pathien pomna an lei chang ngâi.
- ³ Taksôna jârin kêng vânnuoi hih Pathien chonga sin ani ti ei riet, masikin neinun ei mu thei ngei hih neinun mu theiloi renga sin an ni.
- ⁴Taksônnân kêng Abel han Cain nêka inbôlna sa uol Pathien kôm a pêka. A taksôna sikin a neinunpêk hah pomin aoma, midik tiin Pathien pomna a chang ani. A taksôna jârin Abel hah a thi suonûk khomin thurchi a la misîr bang ani.
- ⁵Taksônnân Enoch hah thiloiin dar ani. Manêkin, ama chu Pathien kôm chungtieng tuongin a oma, Pathien'n ama hah chungtieng a tuong zoi sikin tutên mu khâi mak ngei. Pathien Lekhabu'n Enoch hah chungtieng tuonga aom mân han Pathien râi a lei minsân ngâi, ati ani.
- ⁶Taksôna boiin chu tutên Pathien râiminsân thei ngâi mak ngei, Tukhom Pathien kôma hong kai chu Pathien aom ngêt ti takansôna male ama rokpu ngei kôm han râisânman a pêk ngâi.
- ⁷Taksônnân kêng Noah han sîn motona a la mu ngâiloi neinunngêi Pathien'n inningna a ril lâihan, Pathien chong jômin rukuong a sina, ama leh a insungmingei sanminringin an oma. Ma sika han rammuol hah theiloi a minchanga, taksôna sika dikna Pathien kôma om hah a man ani.
- ⁸Taksônnân Abraham han, Pathien'n pêk ranga ram a khâm pe muna se rangin a koi lâihan Pathien chong jômin a sena rang luo riet loiin a ram mâkin a se ani.
- ⁹Taksôna jârin Pathien'n ram pêk ranga ânkhâm pena han ramdangmi angin a oma, Pathien renga chonginkhâm mansai Isaac le Jacob anghan puon-inngei han a om ani.
- ¹⁰Abraham'n khopuilen lungphûm adet, Pathien minvo le sin, khopui hah a ngâk bang ani.
- ¹¹Taksônnân Abraham hah atar ok suonûkin le Sarah khom aching nâi dôn thei khâiloi rang nikhomsenla, Pathien chu a chonginkhâma taksôn aom sikin pa a la chang ani.
- ¹²Abraham hah athi angdôra om nikhomsenla, ma mi inkhat renga han richisuonpâr tamtak, invâna ârsi ngei dôr, tuiptui kôla sietsai telsuoloidôr an inzir ani.

13Taksônna dônin ha mingei murdi hah an thi ani. Pathien'n a khâm pe neinunngai man phâk khom no rese ngeia, ala tak renga mûn an lei phâma, pilchunga hin ramdangmi ngei le mi invâingei an ni tiin ânlangiemîn an lên riet zoi.

14Ma anga neinun ti ngei ha chu an ram an thîr ani ti ânthâr ani.

15An ram hong mâk ha chu mindon tit khâi mak ngeia; mindon senla ngei chu kîrnôkna Zorânchum dôn an tih.

16Manêkin, ram sa uol invâna ram om hah kêng an rangâi ani. Masikin Pathien'n an Pathien ânti hah inzak maka, anta rangin khopuilien tena a lei mintuo pe ngei zoi.

17Taksônân Abraham hah Pathien'n a minsin lâihan a nâipasal Isaac hah inbôlnân a pêk ani. Abraham hah Pathien'n a kôm chonginkhâm a sinpuipu nikhomsenla, a nâipasal inkhat mamang khom nirse inbôlna rangin a la pêk nuom ani.

18Pathien'n a kôm, "Isaac renga hin ni richisuonpârngai kêk khâmngai hah nei ni tih," a tipe.

19Abraham han, Pathien'n Isaac hah thina renga khom a kaithoi thei ti a rieta, masikin Isaac hah Abraham'n thina renga a man nôk ti rangin a om ani.

20Taksônân Isaac han sûnmotona rangin Jacob le Esau hah chongkhâmin sat a vur ngei ani.

21Taksônân Jakob han a thi rang totôn Joseph nâingai hah sat a vur ngei ruruoia. A sunrol mong chungga inngamin Pathien chubai a muk ani.

22Taksônân Joseph a thi rang lâihan Israelnâi ngei Egypt ram renga an inphêt rang roi a misîra, male a ruok an dar rang chang rilna chong a mâk pe ngei ani.

23Taksônân Moses hah a suok lâihan, nâipang mêlsa takin an mu sikin a nulepan rêng chongpêk donloi hah chi loiin thântum an thup ani.

24Taksônân Moses han a honglien tena chu, rêng (Pharoah) nâinupang a nâipasal inti rang hah nuom khâi maka.

25Chomolte sûnga sietna le hoinân, mang nêkin Pathien mingei leh dûktongna tuong rang a thang uol zoi ani.

26Messiah sika mumâkna tuong hah Egypt rama rochon murdi ngei nêka rochon lût uolin a bea, sûn motona râisânman a man rang hah a mitin a thîr tit sikin.

27Taksônân Moses hah rêng taksi hah chi loiin Egypt ram a mâka. Mutheiloi Pathien hah a mu sikin nûkkîr tho rang nuom khâi mak.

28Taksônnân Kalkân Kût a minsûka, male thisen hah inkhâr luchunga rethe rangin chong a pêka, masikin Thina Vântîrton han Israelngei nâipasal lutir ngei a that loina rangin.

29Taksônnân Israelngei han tâng châra lôn angin Tuipui Sen hah an rakân theia; Egypt mingei chu rakân rang an tho lâihan tuiin a melem ngei let ani.

30Taksônnân kêng Jericho kulpui hah Israelngeiin sîn sari anhîl suolechu achim zoi.

31Taksônnân kêng Rahab notizuornu hah Pathien chong jômloi ngei leh thata an om rang renga an jôka, Israel enrichikpungei hah malngei angin a lei phâm ngei sikin.

32Ka la misîr sa rang mo? Gideon, Barak, Samson, Jephthah, David, Samuel le dêipungei thurchi misîr rang lakinte keima rangin zora mi hun pe mak.

33An taksônna jârin ram pumpui an doia, an menea. Imo adik, hah an sina male Pathien'n imo chong ânkhâm hah an mana. Ekeibaknei bâikoungei an hîppe ngeia,

34mei inthangngei an thata, khandaia thata an om rang hah an rotpai ani. Râtloi an lei nia, aniatachu an hong râta; râlbuola râtak an nia ramdang râlmingei an motorsar ngâi.

35Taksônna jârin nupangngeiin an sîngsuok lei thi ngei inthoia ring nôk an man ani. Adangngei khom hoiriema om nuomloin, inthoinôkna sa uol an man theina rangin dûktuonga thi rangin an om ani.

36Senkhat chu munuoijnja sinnân an manga male an vîk ngeia, Adangngei chu Jîngzirûia thungin intângna ina an khuma.

37Lunga dêngin an oma, bongnika âtin an oma, khandaia thatin an oma. Belri vunngai aninônchu kêl vunngai insilin an invâia inriengin, dûkmintongin le nunuomlôn an oma.

38An ta rangin chu rammuol hih ommun hoiloi tak ani! Mi invâingei angin ramchâr ngeia le tângngeia an invâka, lungkuo ngei le khurngeia an om ngâia.

39An taksônnân mangei murdi hah riettitna an mana! Hannoma Pathien chonginkhâm chu man phâk mak ngei.

40Pathien'n ei ta rangin manêka neinun mintuo sa uol mindonna a nei sikin. Eini ngei leh vai kêng achukphara sinin an om rang ti hi Pathien neinunkhîn ani.

Hebrew 12

Pathien ei Pa

- ¹Eini rangin chu, rietpuipungei mipui tamtak huolin ei om sika hin, mikhap ngâi neinin murdi lampui renga le sietna einia koprap hi ei thenin pai ei ta, ei motona tân insietna a oma hin ranak songin tân ei ti u.
- ²Jisua ei taksônna minngamna phutna le mongna tieng ei mitin enngit ei ti u. Khros sika han mong uol maka! Ama han a motona râisânnân a lei ngâk sika han khros chung a intemtaka a thi rang hah itên mindon maka, male atûn chu Pathien rêngsukmun changtieng a hon sung zoi.
- ³Masikin, nin thenin nin inzala nin mâk lolina rangin nunsie ngei esêlna-natak tuongpu lei palna hah mindon roi!
- ⁴Sietna nin doina hin thi ngam rak rang dôrin la song mak chei.
- ⁵Pathien'n a nâingei anga nangni a mohôkna chong ngei hah nin mingil mo zoi? “Ka nâipasal, Pumapa nang a mindik lâihan lunghâng thôn la, male nang a ngo lâi khomin inzal no roh.
- ⁶Asikchu Pumapa'n a lungkham ngei kai chu a mindik ngâia, male nâi anga a pomngei kai chu a sepngei ngâi.”
- ⁷Pân sepna anga nangni a mintuong hi dier roi; nin tuongna hin Pathien'n nâingei anga nangni a bena hih ânlang ani. Pa'n a nâingei a sep ngâiloit tu mo a oma?
- ⁸A nâingei murdi'n sepna an tong ngâi anga nin tong nôn chu, nâi tatak ngei ni mak cheia, jâinâi kêng nin ni, tina ani.
- ⁹Ei munisi nina tienga ei pa ngei khom min sep ngâia male ei jâ ngei ngâi ani. Khodôr tak mo, nonte, ei Ratha tienga Pa kôm vangte inpêklûtin ei om rang anâng ni zoi!
- ¹⁰Ei munisi tienga pa ngeiin chu chomolte, asa an ti lam takin min sep ngâia; aniatachu Pathien'n chu ei satna rang le ânthiengna ei chang theina rangin kêng mi sep ngâi.
- ¹¹Sepna ei tuong lâiin chu râisâna ni loiin, khoi mini inngûinân ma zora han chu ei ta rangin ânlang ngâi. Nikhomsenla, nûka chu, ma anga sepna tuonga nunchansôia omngeiin chu rathanggamom ringnun diktak ha râisânman an ân ngâi.

Rilna le inningna ngei

- ¹²Nin kut khamngei hah lêng unglâ, nin minkhûk ânrik ngei hah minngîr roi.
- ¹³Kholrangei hah lôntheiloia an omloina rangin, mindama an om theina rangin lam tâna lôn roi.
- ¹⁴Mi tiin leh inngêia lêng rang pût unglâ, inthiengna dôn rangin pût sa roi, asikchu maha boiin tutên Pumapa mu thei noni ngei.

¹⁵Tute Pathien moroina renga kîr nôka, thingkung kha hônchera, a tûr sika baiinkhamna tamtak suok anga mi omloi rangin inrung roi.

¹⁶Tute indit song mi mo nôncu Esau anga ratha mi niloia, om anghan hong om no roi. Ama hah nâipasal ulien nina hah voikhat bunêkna rangin a juor ani.

¹⁷Nûka han, a Pa satvurna la chang rang nuomin mitrithi tâkpumin zong khomresea, a sin lei tho hah thûl rangin ite lampui dang reng a man khâiloi sikin hengin aom zoi, ti nin riet.

¹⁸Nangni chu nin rietphâk thei Israel mipui ngei hong anghan Sinai Tânga hong nimak cheia, mahan meichuongngei, ijîngngei le sûmdukngei, phâivuopuingei,

¹⁹bekul miring inringtak ngei, le rôl miring ngei a oma. Mipui ngeiin ma rôl hah an riet lâihan, chongbâi dang riet nôk khâiloi rangin an ngêna.

²⁰“Sâ tena luo khom tâng hah a tônin chu lunga dêng that ngêt rang ani,” ti chongpêk hah an tuong theiloi sika ani.

²¹An mu hah chi a om sabaka, Moses luon, “Ki chia kên nîknat!” a ti ani.

²²Manêkin, nangni chu Zion Tâng, Pathien Ring khopuilien, invân Jerusalem leh vântîrtonngei isâng tamtak ngei omna hong nin ni.

²³Nangni chu Pathien nâilutîr ngei invâna an riming chuongsai ngei râisâna an intûpna hong nin ni. Mi murdi ngei roijêkpu le misa ngei ratha achukphara sinpu Pathien kôm hong nin ni.

²⁴Nangni chu Jisua, chonginkhit thar minsûkpu thisen rethe, Abel thisen nêka neinun sa uol chonginkhâmpu kôm nin hong ani.

²⁵Hanchu, thurchi misîrpu hah lei rangâi nuomloia nin om lona rangin singthei roi. Tukhom pilchunga pathien thurchi misîrpu lei rangâi nuomloi ngei chu rotpai thei mak ngei. Eini invân renga thurchi misîrpu nûksongngei vang hinte kho angin mo ei rotpai thei ranga!

²⁶Ma zora han, a rôl han pilchung ânnîka, aniatachu atûn chu, “Voikhat chu pilchung vai niloiin invân khom ka la min nîk sa rang tiin chong ânkhâm ani.”

²⁷Masikin, “Tûn voikhat” ti chongbâi hin neinun sinngei hah min nîkin thonpai la nîng an ta, neinun ânnîk theiloingei chu om bang an tih, tiin ânthârin a minlang ani.

²⁸Hanchu, rêngram innîk theiloi ei man sika hin ei râiminsân ei ti u. Râisânin, a lungdo lamin leh rintak le chipumin Pathien chubaimûk ei ti u;

²⁹asikchu ei Pathien hi adiktakin mi kângminmang ngâi mei ani.

Hebrew 13

Inmo Pathien râiminsân rang

- ¹Inkhat le inkhat Khristien sungsuokngei anghan inlungkham inlôm roi.
- ²Nin ina khuolmi ngei modôm rang riëttit roi. Mi senkhatin ma anghan lei thôn an riet loi kârin vântîrton ngei an lei mintung zoi kêng.
- ³Intângna ina omngei hah, nangni khom anni ngei leh ântâng sa anghan riëttit roi. Intak tuongngei hah nangni khom nin tuongpui ngei sa anghan riëttit roi.
- ⁴Inneina hi mi murdi'n an minlut rang ania, lômpa ngei le lômnu ngei khomin taksôn omin an om inlôm ngêt rang ani. Inditnasaloi songngei le inrê songngei chu Pathien'n a jêk rang ani.
- ⁵ Nin ringnuna han sum miditna inchel no rese, nin dôn chung a han nin mulung minchuk roi. Pathien'n, "Nang mathân tet no ninga; nang mâkrak no ning," a tia.
- ⁶ Masikin hâitakin, "Pumapa chu mi sanpu ani, chi no ning. Miriemin imo minlo thei ranga?" tîng ei ti u.
- ⁷Pathien chong nangni lei misîr pe nin ruoipu masa ngei hah riëttit roi. An lei hong omlam le an thitie ngei hah mindon nôk ungl a, male an taksôn lam inchu roi.
- ⁸Jisua Khrista chu majân, avien le kumtuongin aningâiin ani tit.
- ⁹Minchuna dang ngeiin lampui dik renga nangni tuong minvâi no rese ngei. Pathien moroina renga sângtienga râtna man hi asa, sâknêk roia balam jômin chu ni no rese; ma balam jômpu ngei han ite asena-om man mak ngei.
- ¹⁰Judangei chubaimûkna muna ochai sin tho ngei hah ei mâichâm chung a inbôlna ite sâk rangin racham nei mak ngei.
- ¹¹Juda Ochai Inlaltak han nunsie inbôlna rangin sa thisenngai hah pêk rangin Mun Inthieng Tak sûnga han a lûtpui ngâia; aniatachu sa takpumngai hah chu rubuk pênthieng han an hâl ngâi ani.
- ¹²Masik taka han, Jisua khomin ama thisen nanâk leh mingei an nunsiena renga a minthieng theina rangin khopuiliën pênthieng a thi ani.
- ¹³Tho, masikin ama kôm khopui pênthieng sêng ei ta a mâimôkna va tuongpui sa rei u.
- ¹⁴Pilchung a hin eini rangin khopuiliën adet dôn mak me; khopuiliën la hong om rang hah ei thîr bang ani.
- ¹⁵Tho, Jisua jâra ei inbôlnân Pathien kôm minpâkna pêk tit ei tih u, maha meilingei inbôlna an pêk, Pumapa ani, tia ama an thopna ani.
- ¹⁶Asa sin le inkhat le inkhat insan inlôm hi mingil tet no roi, asikchu ma ngei hi inbôlna Pathien râiminsân ngâi an ni.

¹⁷Nin ruoipungei chong jôm unglâ, an chongpêk murdi jûi roi. Pathien kôm an sintho ngâi ngei hah an la misîr ngêt rang sikin inngam loiin nin ratha ngei an enkol ani. An chong nin jômîn chu râisân takin an sintho an ta; nin tho nôncu inngûi pumin tho an ta, ninta rangin sa no nih.

¹⁸Kin ta rangin chubai mi tho pe tit roi. Zora tiin neinun dik sin rang kin nuom tit sikin sielesa rietna inthieng kin dôn, ti kin riet mindik ani.

¹⁹Nin kôm tieng Pathien'n mi hong tîrlai nôk theina rangin chubai tho rangin nangni ke ngên tatak ani.

Khârna chubaithona

²⁰⁻²¹Ei Pumapa Jisua, a thina sika kumtuong chonginkhit min deta om, belri ranga Belrihôlpu Roiinpuetak, thina renga a kaithoinôkpu inngêina Pathien han a lungdo nin sin theina rangin neinun sa nin nâng murdi nangni pêk senla, Jisua Khrista jâra ei sînga hin ama'n a lungdo sin rese. Male Khrista kôm roiinpuina chu kumtuong, kumtuongin om rese! Amen.

Azoina chongngei

²²Ka lâibungngei le sarnungei, nin kôma ke lekhamuthuon hi aseï bak loi sikin hi mohôkna chongbe ngei; hi lunghâng thôn nin rangâi rangin nangni ke ngên ani.

²³Ei lâibungpa Timothy hah intângna in renga mojôk ani zoi ti nin riet rangin ku nuom. A hong laiin chu, nangni ko hong mu tena hongtuong ki tih.

²⁴Nin ruoipungei murdi le Pathien mingei murdi chibai mi pêk pe roi. Italy renga lâibung le sarnungeiin chibai nangni an hong muthuon.

²⁵Pathien moroina chu nin rênga nin kôm om rese.

Jakob

Jakob 1

¹Jakob, Pathien le Pumapa Jisua Khrista tîrlâm renga: Rammuol pumpui chungu Pathien mingei chekinchâingei murdi kôm chibai a mûk ani.

Taksôna le vârna

²Ka lâibungngêi le sarnungêi nin lampuia huongnangêi jât tamtak nin tong khomin nangninanâkin vânsân inbê roi,

³ma anga huongnangêi ha nin taksônân atuong zoiin chu tuongdierna asin ngâi tih nin riet sikin.

⁴Lampui tina ite insamloiin akip le chukphara nin om theina rangin tuongdierna han ite châina boiin nangni ruoi rangin minthâr êt roi.

⁵Aniatachu nin lâia tukhom vârna ân samin chu Pathien kôm chubaitho senla, ama han pêk atih; Pathien'n mitin kôm manarloi le mulungchuktakin a pêk ngâi sikin.

⁶Aniatachu chubai nin tho tika, mulunglâiinlakna boitetin iemtakin nin tho ngêt rang ani. Tukhom mulunglâiinlakna a dônnin chu tuipui ânsôna phâivuopuiin asêm minlêngpai le atompiei angin ani.

⁷⁻⁸Hima anga mingei hah, mulungrîlbulbâl dônlô, an sintho murdia detloi mingei han Pumapa renga ite man rangin mindon tet no rese ngei.

Inriengna le neinangêi

⁹Khristien inrieng mingei han Pathien'n a domminsâng ngeiin chu an râiminsân ngêt rese ngei,

¹⁰male khristien mineingêi khom Pathien'n a juong minnuoi ngeiin chu an râiminsân ngêt rese ngei. Minei ha rama sûl pâr achuoi angin alân mangpai rang ani.

¹¹Nisa alumnatak ruhu leh ahong suoka, sûl akânga; apâr atâka, male a enhoina ân mangpai ngâi. Ma angdênin mineingêi khom sadâi sinthona chungroia an sepui ngâi hah minmangin ala om rang ani.

Minsinna le methêmna

¹²Methêmna an tong lâi khoma taksônoma om bang ngei chu an vâna asa, minsinna hah an zoitena chu Pathien'n ama lungkham ngei kôma pêk ranga ân khâmsai ringna hah râisânmanin an man rang sikin.

¹³Mîn hima anga methêmna hah an tongin chu, "Hi methêmna hih Pathien renga hong kêng ani," ti tet no rese ngei. Pathien chu asaloiin methêm thei ngâi maka, male ama khom tute methêm ngâi mak.

¹⁴Aniatachu ei ôina saloingei nanâkin mi tuong minmanga ei inôkin chu methêmna ei tong ani.

¹⁵Hanchu ei ôina saloingei hah an vonga, sietna an neia; male sietna hah tuon-ahongtung tena chu thina anei ngâi ani.

¹⁶Huongin om no roi, ko moroitak lâibungngei le sarnungei!

¹⁷Neinunpêk asa murdi le neinunpêk achukngei chu invân renga juong ngâi ania; mahi Pathien invâna vârngei Sinpu inthûl ngâiloi le ijînga inhei ngâiloi renga juong chum ngâi ani.

¹⁸Masikin iring parân a sinngei murdi lâia mun masâtak ei chang theina rangin ama lungdon chongtak thurchi renga miriem ring mi minchang zoi ani.

Chong rangâina le jômna

¹⁹Ko moroitak lâibungngei le sarnungei, mahi riettit roi! Mitinin chong rangâi inchu ngêt rese ngei, thurchi misîr le taksi chu inchu no rese ngei.

²⁰Miriam taksinân Pathien neinunkhîn diktak hah tuon-mintung thei ngâi mak.

²¹Masikin thobaisi inthiengloi le nunchan saloingei renga inkêm roi. Pathien kôm inpêklûtin, nin mulungrîngeia a chong tuhngai ha pom unglâ, ma hah nangni sanminring thei atih.

²²A chong rangâi ririemin nangninanâk inhuong no unglâ; manêkin, chu atakin tho roi.

²³Tukhom a chong rangâia, ataka tho loi chu lîmena inena ama mêlnanâk adiktaka mupu angin ani.

²⁴Asadimin amananâk ân ena, a se nôkin chu kho angin mo a mêl omtie hah a mingil nôk kelen ngâi angin ani.

²⁵Aniatachu, tukhom balam akip mingei phûkdâia mojôk ngâi tieng en tita, lunghâng thorîta, a rangâia mingil nôk kelen ngâipu niloia, ataka sintho mingei chu Pathien'n an sinthona han satvur ngei atih.

²⁶Tukhom sakhuo tienga mi ki ni tia a mindon mo nin om? Nin melel nin donsûi minsa nôncu nin sakhuo mi nina hah kâmnângloi ania, nin thethena ân huong nin nih.

²⁷Ei Pathien le Pa'n sakhuo ânthieng le diktaka a bê ngâi chu mahi ani: nupaboingei le meithâingei an dûktong zora donsûi le rammuol sietna renga inkêm hih ani.

Jakob 2

Zenuol dônngei ranga inningna

- ¹Ka lâibungngei le sarnungei, ei Pumapa Jisua Khrista iempungei nin ni anghan, roiinpuina Pumapa mingei pêntienga ânlang dungjûiin nin mi zenuolna lamngei ha adadangin nin tho tet rang nimak.
- ²Chongkhatin nin intûpna ina han minei rângkachak kutsabi buna puon satak insilin hong senla, male mi inriengte puonchetnar insilin hong lût sa senla.
- ³Puon satak insilpu kôm nin jâna nin minlang uola, a kôm, “Hi mun satak hin insung roh,” nin tia, aniatachu mi inriengte kôm han chu, “So son vân dîng roh, aninônchu ka ke kôla chuonglâia hin insung roh,” nin tiin chu,
- ⁴nangni nanâkin nin lâia ateinangei nin sin sik le nin roijêknangei hah nun saloingei chung a anngam sikin theiloi nin chang ani.
- ⁵Rangâi roi, ko moroitak lâibungngei le sarnungei! Pathien'n hi rammuola mi inriengngei hih taksônna tienga nei rangin le ama lungkhamngei ta ranga ân khâmsai Rêngam ha luô rangin a thang ngei zoi ani.
- ⁶Aniatachu nangnin chu inriengngei mân tho ngâi mak chei! Tu ngei mo an zojôt nangni loa, roijêkpungei kôm nangni kainâl ngâi ha? Aneingei an ni!
- ⁷Riming asa nangni pêka om, arilsiet ngâi khom anni ngei hah an ni.
- ⁸Pathien lekhabua, Rêngam balam nin man, “Nangma nêl lungkham anghan nu bungangei lungkham roh,” ti chong hih nin jômîn chu neinun asa nin tho nîng atih.
- ⁹Aniatachu mi apêntienga ânlang dungjûiin nin enin chu, sietnân theiloi nin chang ani, male Balam khomin balamsietpu anghan nangni a minchang ani.
- ¹⁰Tukhom Balam chongpêk inkhat a sietin chu anrêngin a siet let ani.
- ¹¹“Inrê no roh,” tipu dên han, “Mi that no roh,” a ti sa sikin. Inrê tho no khom inla, mi na thatin chu balam sietpu dên no hongni.
- ¹²Mi min zalenna balama roijêka om rang mingei anghan chong unglâ, sin khom tho roi.
- ¹³Mi chung a mulungjûrpuina dônloi chu Pathien'n mulungjûrpuina minlang loiin a chung a roijêk pe a ta; aniatachu mulungjûrpuinân roijêkna chung a mene ngâi ani.

Taksôna le sinthonangei

- ¹⁴Ka lâibungngei le sarnungei, mi inkhatin taksôna ko dôn ti unglâ, sinthôn nin minlang nôlchu imo asatna aoma? Ma anga taksôna han nangni sanminring thei rang mo?
- ¹⁵Chongkhatin lâibungngei mini, sarnungei mini puonsil boiin le sâknêk hunloiin om senla ngei.

¹⁶Nangnîn an kôm, “Pathien'n sat nangni vur rese! Alum-îrin om unгла khop takin sâk roi!” ti unгла, ringna ranga an nângngei ha pêk no unгла, imo asatna aom ranga?

¹⁷Ma angdênin taksôna hi athenin aoma: sintho akopsa nônchu athi ani.

¹⁸Aniatachu tumakhatin, “Mi inkhatin taksônna a dôna, mi dangin sintho a dôn,” a ti thei, keima ku thuonna chu, “Kho-angin mo mîn sintho boiin taksônna a dôn thei ni min mu roh. Keiman taksônân ki sinthongei nang min mu ki tih.”

¹⁹Pathien chu inkhat vai kêng aom tih ni iem mo? Asa! ramkhoringei khomin an iema male chîn an innîk ngâi ani.

²⁰Nangma amopa! Sintho boia taksônna chu kâmnângloi ani tih mu rang nu nuom mo?

²¹Kho angin mo ei richibul Abraham'n Pathien kôm adik a chang? Ma ha a nâipasal Isaac mâichâm chung a pêka a sintho sika kêng ani.

²²A taksôna le sintho ha munkhatin sin a thoa; a taksônna hah a sinthôn ahong mikhip ani, tih nu mu loi mo?

²³Pathien lekhabu'n ati hah ahong dika, “Abraham'n Pathien a iema, a taksônna sikin Pathien'n mi diktak anghan a bê ani.” Masikin Abraham hah Pathien mal tiin koi ani zoi.

²⁴Hanchu mingeiin an taksônna atheivaiin niloiiin, sintho sikin kêng Pathien kôm adik an chang ngâi tih nin mu zoi ani.

²⁵Ma angdênin Rahab notizuornu khom han Israelnâingei enrichikpungei lamdon lei thôn, lam dang tieng rotpai rangin a lei san ngeia, a sintho sikin Pathien kôm adik a chang ani.

²⁶Masikin ratha boiin takpum athi ani, anghan taksônna khom sinthongei boiin chu athi ani.

Jakob 3

Melei

¹Ka lâibungngei le sarnungei, mi tamtak minchupungei chu hong chang no roi. Nin riet anghan eini minchupungei hih chu midangngei nêkin ânngar uolin ei chungroi jêkin aom rang ani.

²Ei rêngin ei tho minchâi bang ngâi. Aniatachu mîn a chong tina han a minchâi tet nônchu, ama hah achukphar ania, a takpumpui khom a donsûi thei ani.

³Sakor hih chong ei min don theina rangin a bâia lakam ei min muomin chu ei jôtna titieng min se rangin ei mehei thei ngâi ani.

⁴Aninônchu rukuong hih mindon ta u: alienpa aninâka chu phâivuo râtin a sêmmînлъng khomin rukuongpu'n ameherna chînte leh meheiin a nuomna tiengtak a min se ngâi ani.

⁵Masikin melei khom hih: achînte khom nirese, neinun lienngai chungroia âsongpam thei ani. Mindon ngân ta u, kho-angin mo meirisi chînte hin rampumpui akâng thei ngâi hi!

⁶Melei hih mei angin ani. Ma hih rammuol dikloina sip, ei takpumngai sũaga mun a luoa, male ei pumpuia saloina aminzara. Meidîl renga juong akôma mei lehan ei ringnun pumpui hih mei chungga adar ngâi ani.

⁷Miriemin iring parân dangngai murdi ram sângai, vângai, ânvâkngângai le ngângai a vâimintep theia, a vâi ngâi zoi.

⁸Aniatachu melei chu tutên vâimintep thei tet ngâi mak ngai. Melei hih chu asaloi le donsûitheijât niloi, thitheina tûra sip ani.

⁹Ei nin ma hih ei Pumapa le Pa kôm râisânchongrilnân ei manga, midang ngai Pathien anga sina ompu ngai khomâksâmna khomin ei mang sa ngâi ani.

¹⁰Ma bâi renga nanâk han râisânchongrilna chongngai le khomâksâmna ngai ahong suok ngâi ani. Ka lâibungngai le sarnungai, ma anghan chu ani rang nimak!

¹¹Tuinâr inkhat nanâk renga han tuithum le tuikha hong suok ngâi mak.

¹²Ka lâibungngai le sarnungai, theichang kunga olive inra thei ngâi mak; graperânga theichang inra thei ngâi mak, michi khura khom tuithum musuo thei ngâi mak ani.

Chungtieng renga vârna

¹³Nin lâia mi vâ le rietna dôn an om mo? Nuninnêm tak le vâ takin an sintho sa le an nunchan sân minlang rese ngai.

¹⁴Aniatachu nin mulungrîl sũaga narsanangai, mulungkha le ranghuolna nin dônchin chu nin vârna hah songin chongtak kalin nunsie tho no roi.

¹⁵Ma anga vârna hah chu invân renga juong chum nimaka; rammuol ta, rathatienga niloiin ramkhorin renga ani.

¹⁶Innarsana le ranghuolna omna nâma chu bâiinkhamna le asaloi jât murdi khom aom ngâi ani.

¹⁷Aniatachu chungtieng renga vârna chu motontaka ânthienga; inngêi a nuoma, a nunânnêma, chongpui a hoia, lungkhamna le sintho sa amarân asipa, zenuolna le asarothol dôn ngâi mak ani.

¹⁸Satna hih inngêina mara, ma hih inngêina sinpu ngeiin chimungai an tuhna renga hong musuo ani.

Jakob 4

Rammuol leh malinchangna

¹Nin lâia insuolnangei le inkhalnangei murdi hah kho renga hong suok mo? Nin sũaga insuolna sin bang ngâi ha nin taksa hoina ôinangei renga hong suok ani.

²Neinun dôn ranga nin nuomngei man thei mak choia, masikin mi that rang inthoksaiin nin oma; neinunngai nin ôi sabaka, aniatachu man thei mak choia, masikin inkhalin nin insuol ngâi ani. Man ranga nin nuomngei hah Pathien kôm nin ngên loi sikin man ngâi mak chei ani.

³Nin ngên zora khomin, nin mulungbôkngai asaloi sikin nin hoiinhâina mang rang neinunngai kêng nin ngên ngâia; masikin nin man ngâiloi ani.

⁴Taksônomloi mingei! Rammuol malinchangpui nuomna hih Pathien râl nina ani tih nin riet loi mo? Tukhom rammuol malinchangpui nuom ngeiin chu anninanâkin Pathien râlngai an chang ngâi ani.

⁵Pathien lekhabu'n, "Ei sũaga Pathien'n ratha a dar hin ôinangei râtak leh asipa," ti hi dikloi rangin nin mindon mo?

⁶Hannirese Pathien moroina a pêk ngei hih chu manêkin arât uol ani. Pathien lekhabu'n, "Pathien'n ânphâkngai chu a khanna aniatachu rangâiinchinngai chu moroina a pêk ngei ngâi," ati anghan.

⁷Masikin, Pathien kôm inpêklût roi. Diabol hah khan ungla, male ama chu nangni renga rotpai atih.

⁸Pathien kôm hong nâi ungla, ama khom nangni juong nâi atih. Mi nunsiengei nin kutngai hah rusûk minsâi roi! asarotholngai nin mulungrîlngai minthieng roi!

⁹Beimindong ungla, iniekin chap roi; nin innuina hah chapnân thûl ungla, nan râisâna hah innguinân thûl roi!

¹⁰Pumapa makunga nin rangâiminchîn ungla, male nangni a domsâng rang ani.

Khristien-champui jêkngâi doia inningna

¹¹Ka lâibungngai le sarnungei, inkhat le inkhat inrilsiet no roi. Ni khristien champuingai ni rilsiet, aninônchu an roi ne jêkin chu balam ni rilsieta ne jêk ani. Hanchu Balam ne jêkin chu balam jôm ngâipu nikhâi mak chea, Balam jêkpu kêng ni ni.

¹²Pathien hih vai kêng balampêkpu le roijêkpu ani. Ama vaikêng sanminring thei le minmang thei ani. Nangni nin miriem champui senkhatngai roijêk ngâipu ngei, tumo nin ni angin nan mindon?

Insongna doia inningna

¹³Atûn hin ke he rangâi ta u, nangni, “Aviensûn aninônchu nangtûka mini, ma khopuilien han va sêng ei ta, mason kumkhat va omin sadâi va tho ei ta, sum va minpung ok rei u,” ti ngâi ngei.

¹⁴Nin ringna hah nangtûka kho angin mo ahong ni rang luo riet mak chei! Nangni ngei hah meikhu-lit chomolte rangin ahôn langa male ân mang nôk ngâi angin nin ni.

¹⁵Imo nin ti rang ei tiin chu mahi ani: “Pumapa lungdo anîn chu, damin om ei ta, male ma hih aninônchu maso tho ei tih, nin ti rang ani.”

¹⁶Aniatachu atûn hin nin inpâka, nin insong ani; ma anga insongnagei murdi hah chu adikloi ani.

¹⁷Masikin, tukhom asa tho rang riet ngonga tholoipu ngei chu sietna han theiloi an chang ani.

Jakob 5

Aneingei kôma inningna

¹Atûn, nangni mineingei, ke he rangâi roi! Nin chung a dûktongnagei ahong tung rang sikin chapin inrum roi!

²Nin rochonngei hah asiet suo zoia, nin puonngei khom leidân asâk suo zoi.

³Nan rângkachak le nin sumdârngei hah thîr êkin a pholom suo zoia, ha thîr êk hah nangni doia rietpuipu nîng a ta, nin taksa hah meikâng angin sâk min mang atih. Hi sîn nûktakngeia hin rochon nin bûm ani.

⁴Nin loia sintho ngâi mingei an rathamangei pêk ngâi mak chei. An chiernangei hah rangâi roi! Nin bu mintûppu ngei, chapnagei hah Pumapa Râtinchung, Pathien kuorngeia atung zoi ani.

⁵Hi pilchunga nin ringnun hin inchêktak le hoiinhâitakin nin om ani. Thatni sûna rangin nangni nanâkin lêngvâi minmar nin ni.

⁶Minchâinaboi mingei asiemintumin nin thata, nikhomrese anni chu nangni khan mak ngei.

Tuongdierna le chubaithona

⁷Hanchu, ka lâibungngei le sarnungei, Pumapa juong nôk mâka tuongdiertakin om roi. Vêng ta u, loithopungei hah idôra tuongdiertie mo an ni, an loia han mara lûtak amusuo pe ngei mâka chu sâl ruotui le zar ruotui tuongdiertakin an ngâk tit ngâi ani.

⁸Nangni khom nin tuongdier ngêt rang ani. Nin sabeinangei hah dar minsâng roi, Pumapa juong nôkna rang nikhuo hih anâi zoi sikin.

⁹Masikin, ka lâibungnei le sarnungei, Pathien'n nin chungroi a jêk loina rangin inkhat le inkhat indoiin inchiarkhum inlôm no roi. Roijêkpu hih anâi zoi, inlang rangin ânzoisai kêng ani zoi.

¹⁰Ka lâibungnei le sarnungei, Pumapa rilinga thurchi misîr ngâi dêipungei hah riettit roi. An dûktuongna le tuongdierna hah dierna chang minennangei anghan lâk roi.

¹¹An lei dier sikin satvurna an chang tiin ei koi ngei ani. Job tuongdiertie hah nin rieta, male amongnataka kho angin mo Pumapa'n satvurna a pêk khom nin riet. Pumapa chu mulungjûrpuina le lungkhamna sip ani sikin.

¹²Mangei chung nâma han, ka lâibungnei le sarnungei, chonginkhâmna nin tho zora khomin, invân dênin mo, philchung dênin mo, aninônchu neinun dangnei dênin mo, khomâkinsâmna mang no roi. Anin chu “Ani” vai ti unglâ, aninôn chu, “Nimak” vai ti roi, hanchu Pathien roijêkna nuoia hong om no tunui.

¹³Nin lâia intak tuong mo nin om? Chubaitho rese ngei. Arâisân mo nin om? Minpâkna lâtho rese ngei.

¹⁴Mi damloi mo an om? Koiindang upangei koi senla ngei, anni han Pumapa rilingin an chungâ olive sariék polin anni rangin chubaitho pe rese ngei.

¹⁵Ma taksônna chubaithona han damloi ngei hah dam an ta; Pumapa'n taksa damna pêk nôk ngei a ta, male nunsie an lei tho ngei khom hah ngâidamin om an tih.

¹⁶Masikin, dama nin om theina rangin inkhat le inkhat kôm nin sietna phuong inlôm ngâi unglâ, inkhat le inkhat rang chubaitho pe inlôm ngâi roi. Mi sa chubaithona chu sinthotheina ranak adôn ok ngâi ani.

¹⁷Elijah hah eini ngei jâtdên anghan miriem ani. Ruo juong loina rangin ningsietakin chubai a thoa, male philchunga kum thum inang chu ruo juong mak.

¹⁸Voikhat chubai a tho nôka, invânin a ruo aminjuong nôka hanchu pilchungin amarangei a musuo nôk zoi ani.

¹⁹Ka lâibungnei le sarnungei, nin lâia tumakhatin chongtak renga ânvão inmanga, midang inkhatin a hong tuong mikhîr nôkin chu,

²⁰mahi riettit roi: tukhom mi nunsie a lampui dikloi renga amapa hah aninônchu amanu hah a hong mehei nôkpu han ma mi nunsie ratha hah thina renga sanminring a ta, sietna tamtak chungroia ngâidamna mintung atih.

1 Peter

1 Peter 1

¹Peter, Jisua Khrista tîrton renga, Pathien ithang, Pontus ram, Galatia ram, Cappadocia ram, Asia ram le Bithynia ram murdia chekinchâia om ngei.

²Pa Pathien mintuo dungjûiin nangni ngei hah thang nin nia, male Jisua Khrista chong jôm rang le a thisena minthiengin a Ratha'n mi inthiengin nangni sin ani zoi. Nin chungâ moroina le inngêina asipmatin om rese.

Sabeina ring

³Ei Pumapa Jisua Khrista Pathien le pa chu minpâkin om rese. Ama han a moroina lien sikin thina renga Jisua Khrista kaithoiin ringna thar mi pêka, sabeina ring leh mi minsip zoi.

⁴Masikin Pathien'n a mingei ranga rochon satvurna ngei ai dar hah chang rangin ei mântieng ei thîr ani. Ha ngei hah ama'n asiet thei khâiloi, achuoi thei khâiloi le ân mang thei khâlôina invâna Pathien'n nin rangin a dar ani.

⁵Sanminringna zora nûktaka inlang ranga a darchiena om hah man rangin taksônna sika Pathien sinthotheinân dar nin ni.

⁶Masikin râiminsân roi, atûna hin dûk tamtak nin tuong sikin inngûiin la om khom unglâ.

⁷Nin taksônna adik mo itia nangni minthâr hah an khîn tak ani. Asiet thei rângkachak luo mana meia an minthâr ngâia, nin taksônna rângkachak nêka lut uol ok vang chu asôi theina rangin minsinin ai om rang ani. Hanchu Jisua Khrista ânlar nikhuo han minpâkna, roiinpuina le chôiminsângna man nin tih.

⁸Ama hah la mu tet ngâi no khom unglâ nin lungkhama, atûn la mu no khom unglâ nin iema, masikin râisâna misîr zoiloi roiinpui takin nin sip ngâi ani,

⁹asikchu nin ratha ngei sannminringna nin mana, mahah ama nin taksônna abitak chu ani.

¹⁰Ma sanminringna hah dêipungeiin asadimin an roka an phuola, ma neinunpêk Pathien'n nangni ai pêk rang hah an lei phuong sai ani.

¹¹Anni han kho zora mo ai tung rang le i-angin mo ai tung rang iti an zong ngâia. An sînga Khrista Ratha a om han, Khrista tuong rang tie le roiinpuia a om rang hah chongphuongna an lei dôn ngâi ani.

¹²Ma dêipungei kôma han Pathien'n, an sin hah anni inlâpna rang ni loiin, nangni ranga an isin ani iti a min riet zoi. Ha chong hah Ratha Inthieng sinthotheina invân renga thangthei juongtîr, atûna nin iriet Thurchi Sa nangni misîr pe ngei hih an ni. Ma neinunngiei hah vântîrtonngiei luo khomin riet an nuom ngâi ani.

Inthienga om ranga koina

¹³Masikin nin mindonna hah sintho ranga inthoksaiin inningchienin om roi. Khrista a juong inlâr tika satvurna nangni pêk rang hah sabei phar roi.

¹⁴Pathien chong jôm unglâ, male ite rietloia nin om lâia nin ôina ngei han nin ringnunngai ajêk rangin inphal no roi.

¹⁵Manêkin, nangni koipu Pathien ânthieng ang han nin thona murdia inthieng roi.

¹⁶Pathien lekhabu'n, "Keima kên thieng sikin inthieng roi," ai ti ang han.

¹⁷Hanchu mi murdi an sintho dungjûia ân-angnata roijêk ngâipu Pathien kôm chubai nin thôn, O Pa, nin ti ngâiin chu rammuola nin lêng kêr chu ama rangin mân inthieng thôn om roi.

¹⁸Nin richibulngeiin nangni an pêk, nin nunchan mangmunboi renga hah, neinun asiet thei sumdâr le rângkachaka minjôk ni mak chei ti nin rieta;

¹⁹belrite demnaboi aninônchu achâina boitêt anga, Khrista inbôlna manlutaka ratan nin nih.

²⁰Ama hah rammuol insieng mân renga Pathien'n a lei thangsai, le hi sùn nûktak ngeia hin nangni sikin inlangin ai om ani.

²¹Ama sikin thina renga a kaithoipu le roiinpuina pêkpu Pathien hah nin iema; maleh masikin nin taksônna le nin sabeina ngei hah Pathien chungâ mindetin ai om ani.

²²Atûn chu chongtak nin jômna sikin nin champui iempungei lungkham tatak rangin nangni nanâkin nin inthieng zoi sikin nin mulungrîl murdi'n inkhat le inkhat inlungkham inlôm roi.

²³Athithei ni loiin, athitheilo nulepa renga nâingei anghan, Pathien chong ring kumtuong chongbâi renga suok nôk nin nih.

²⁴Pathien lekhabu'n: "Miriem murdi hih sûl angin an nia, an roiinpuina ngei khom rama pârngei angin an ni. Sûl ngei chu athêma, male a pârngei atâka,

²⁵aniatachu, Pumapa chong chu tuonsôtin aom tit ani," ai ti anghan. Hi chong hih, Thurchi Sa nin kôma an phuong hah ani.

1 Peter 2

Lung aring le nam inthieng

¹Hanchu, nangni nanâkin asaloï murdi ngei renga inkêm unglâ; milak aninônchu asarothol aninônchu narsana aninônchu inêrona chongngei om khâi no nih.

²Nâite asuok thar ngei angin ratha tienga nenetui ânthieng liei hah inrâl tit unglâ, ha nenetui hah nin nêka anin chu insôn nin ta, sanminjôkin om nin tih.

³Pathien lekhabu'n, "Pumapa satie hah ninthenin nin riet zoi" a ti anghan.

⁴Pumapa kôm hong roi, lung aring mingeiin mangmunboia an heng, nikhomrese, Pathien'n manlutak angin a ithang ngei.

⁵Lung aring anghan hong unglâ, rathatienga Pathien in sinna mangin om unglâ, Jisua Khrista jâra Pathien pom theiruo ratha tienga inbôlna ipêk ranga ochai inthieng nin ni theina rangin.

⁶Asikchu, Pathien lekhabu'n, "Lung luttak ka thanga, Zionah akila lungin ka dar ani; male tukhom ama iem kai chu mâimôkinshakin om tet ni no nih ngei," a ti.

⁷Nangni a iem ngei rangin chu manlut tak ani; nikhomrese, a iemloi ngei rangin chu: "In sinpungeiin lung mangmunboia an hengpai, An kêra kamomtak achang zoi."

⁸Male Pathien lekhabu danga, ati: "Ma lungpui hah mingei minpalna rang le, Mi inletna rang ani," ai ti anghan. Chong hah an iemloi sikin an inpal ani, mahah Pathien'n anni ranga a nuomna piel ani.

⁹Ania nangni chu Pathien nam ithang, Rêng ochaingei, nam inthieng, Pathien a mingei, ajîngna renga avâr roiinputitaka nangni koisuokpu Pathien sintho kamâmruoingei phuon ranga nangni thangsuok ani.

¹⁰Zora voikhat chu Pathien mingei nimak cheia, aniatachu atûn chu ama mingei nin ni zoi; Motona han chu Pathien moroina lei riet mak cheia, ania atûn chu a moroina nin chang zoi.

Pathien suokngei

¹¹Ka malngei, hi rammuola hin khuolmi le mi invâingei angin nangni ki ngên ani! Ratha leh râl indoi tit ngâi, taksa ôina ngei mâk rangin.

¹²Sonongngei lâia nin nunchan sa ok rese; hanchu saloi tho ngei tiin nangni an nôn khomin nin sin asa an riet sika han ama juong Nikhuo han Pathien minpâk thei an tih.

¹³Pumapa jâra han miriem rachamneipungei murdi kôma inpêklût roi, rachamneina insângtak dônpu Rêng le,

¹⁴râiôtngai, asaloi sin ngei dûk min tuong rang le asa sin ngei minpâk ranga ai phun ngei kôma khom.

¹⁵Nin neinun sa tho ngei sika han amo ngei chong inmôl min dâirek rang hi Pathien nangni a nuomna ani sikin.

¹⁶Zalên mi anghan lêng unglâ; nikhomrese nin zalêna hah saloi mukhunân mang loiin, Pathien suokngei anghan om roi.

¹⁷Mitin mirit unglâ, nin iempu champuingei lungkham unglâ, Pathien jâ unglâ, Rêng mirit pêk roi.

Khrista tuongna minenna

¹⁸Nangni suokngei, nin pungei kôma inpêklût unglâ akippharin jâna pêk roi, mi asingngei le nunhoi ngei kôma vai ni loiin mi nunminsie ngei kôm khom.

¹⁹A lungdo ani iti rietin ana tuongloiruo nin tuongin chu Pathien'n sat nangni vur a tih.

²⁰Nin tho minchâi sika jêmna nin tuongin, imo nin man ranga? Aniatachu, adik nin tho sika nin tuong chu, Pathien'n sat nangni vur a tih.

²¹Ha anga ranga Pathien'n nangni ai koi kêng; Khrista khom han nin ta rangin a lei tuonga, a kenûk nin jûi theina ranga minenna rang nangni a mâk pe ani.

²²Ama hah nunsie reng sin ngâi maka, a bâi renga milak chong asuok reng tutên riet ngâi mak ngei.

²³An êro lâiin ama'n chu thvon maka, dûk a tuong lâiin ama'n chu min tuongna rangin misina chong ti ngâi mak, aniatachu roijêkpu diktak Pathien kôm a sabeina ngei a dar ani.

²⁴Nunsiena tieng ei thia dikna tieng ei ring theina rangin Khrista lelên a taksân khrosa ei sietnangei ai pêl ani. Ama sabê ngei sikin mindam nin ni zoi.

²⁵Nangni hih belri lam ânvaî angin nin lei ni, aniatachu atûn chu nin ratha ngei Hôlpu le Enkolpu jûi ranga hong tuong nôk nin ni zoi.

1 Peter 3

Lômnungei le lômpangei

¹Ma angdên han nangni lômnu ngei, nin lômpa ngei kôma nin inpêklût ngêt rang ani, hanke an lâia mi Pathien chong iemloi an om le khoma nin nunchan han mene ngei a ta, iem an tih. Chongin nin ti rang nâng no nih,

²nin nunchan inthieng le mirit hah an mu rang sikin.

³Nin invona hah pêntienga nin mêlsana rangin nin invona sam mini, aninônchu rângkachak invona ngei mini, aninônchu silbomngei mini nin mang rang nimak.

⁴Manêkin, nin mulungrîla mêlsana hah, nin mulungrîla ratha dâiriam le nunnêmna invona dik tar ngâiloi nirese, mahah Pathien mitmua chu alut tak ani.

⁵Zora lei vunsiaia nupangngei, Pathien kôma inpêka ama chungâ an sabeina bâng ngâi ngei han an lômpa ngei kôma enhoitakin an inpêklût ngâi ani.

⁶Sarah hah ma anghan ania, Abraham chong a jôma, ka puma, tiin a koi ngâi ani. Atûn khom asa nin sina, ite china reng nin dônin chu Sarah nâinupangngei nin ni.

⁷Ma angdên han nangni lômpangei khom, nin lômnungei hah nangni ranga râtloi uol anni iti riettheiin nin lêngpui ngei rang ani. Jana dôn pumin ompui ngei unglâ, asikchu anni khom nangni leh munkhatin Pathien manboipêk ringna hah an man sa rang ani. Nin chubai tho ânkalpui loina rangin mahah tho roi.

Adik sin sika tuongna

⁸Chongkhârna rangin: mulung munkhatin om ngêt unglâ, lâibungngei le sarnungei anghan inkhat le inkhat inlungkham unglâ, inkhat le inkhat inuoina dônin inlungkham inlômin om roi.

⁹Saloi hah saloiin thvon no unglâ, khomâksâm hah khomâksâmin thvon no roi; manêkin satvurnân thvon roi, asikchu Pathien'n nangni a koi lâia han sat nangni vur rangin kêng ânkhâm.

¹⁰Pathien lekhabu'n; "Tukhom ahoitaka ringna mang anuom le zora sa ngei mu a nuomin chu chongsie ril mâkin milak tho mong rese.

¹¹Sietna renga inheiin asa an sin ngêt rang ani; Inngêina rangin an mulungrîl murdi'n an putrît ngêt rang ani.

¹²Asikchu Pumapa'n midik ngei chu a ensuia male an chubaithona khom a rangâi pe ngei ngâi. Aniatachu, saloi sin ngei chu adoï ngâi," ai ti anghan.

¹³Asa sin rang nin jôta anin chu tumo dûk nangni tho ranga?

¹⁴Hannirese asa nin sin sikin chu tuong ta ngân khom unglâ, satvur nin ni. Tute chi no unglâ, nin kângmindoi no roi.

¹⁵Aniatachu, Khrista hah nin mulungrîla mân inthiengin Pumapa mirit tho roi. Male tukhomin nin sabeina chungroia chong nangni an rekelin zoratin thvon rangin inthok titin om roi,

¹⁶nikhomrese, innêmtak le miritin thvon roi. Asielesarietna inthâr nei unglâ, hanchu nangni an êrona tienga han, Khrista nûkjûi ngei nin nina nin nunchan asa rilsiet ngei hah an chong ti han inzak an tih.

¹⁷Saloi sin sika tuong nêkin chu Pathien nuomlam anîn chu asa sin sika tuong chu asa uol.

¹⁸Asikchu Pathien kôm nangni a tuong theina rangin Khrista midik han nungsiengi murdi ruthûlin minunsie ngei sikin voikhatin ai thi ani. Taksatieng thatin a oma, hannirese rathatieng chu minringin a oma,

¹⁹ma ratha hong om sika han intâng ina ratha omngei kôm khom chong a juong misîr ani.

²⁰Ma ratha ngei hah Noah nikhuoa rukuong a sin lâia Pathien'n tuongdiertaka a ngâk sũaga chongjôm nuomloi hah an ni. Ma rukuonga han mi tômte, anrêngin mi iriet vai tui renga minringin an om ani.

²¹Maha chu baptisma akhîn minenna ania, atûna hin Jisua Khrista inthoinôkna sikin nangni a minring ani. Ma hah takpuma ânnim minsâina ni maka, asaleasierietna diktak Pathien kôma chongkhâm hah ani.

²²Jisua Khrista hah invâna a sea, Pathien changtienga insungin vântîrtonngei, rachamneinangei le sinthotheinangei, ama racham takin a jêk zoi ani.

1 Peter 4

Ringna inthûl

¹Khrista'n taksân a tuong zoi sikin nangni khom ha anghan minrâtin nin mulungrîla mindon ngêt sa roi; asikchu tukhom taksân a tuong zoiin chu nunsie an inchel khâiloi ani.

²Hanchu, atûn renga chu nin rammuol ringnunngai a la om kai chu miriem ôinangeiin om khâi loiin Pathien lungdôa jêkin nin om ngêt rang ani zoi.

³Zora leivuna han sonongngeiin an tho nuom ngâi ngei hah asôtzan nin lei manga. Nin ringnunngai hah hurna ngei, taksa ôina ngei, junrûina ngei, jumun hoiinhâinangei, junêk ruolhoi ngei le mirmil bieknâ porinche ngeiin nin mang ok ngâi zoi.

⁴Male atûn chu sonongngei hah porinche le ringnun saloi an mangna han nin kop khâiloi sikin nangni an kamâma, masikin nangni an êro ngâi ani.

⁵Hannirese ha ngei han, Pathien, aring le athi roijêk ranga ânthoksaipu kôma han an thurchi chit la misîr an tih.

⁶Masika han kêng ithi ngei lâia khom Thurchi Sa misîr ani, mitin taksa roijêka an hong om anghan an ratha ringna roijêka om ngei kôma han; an ratha ringna han Pathien anga an om theina rangin an kôma chong misîr ani.

Pathien manboipêkngai enkolpu sa

⁷Neinun murdi mongna anâi zoi, masikin chubai nin tho theina rangin indîntheiin intûng roi.

⁸Neinuntin chungâ, mulungrîl takin inkhat le inkhat inlungkham roi, lungkhamnân nunsiena tamtak a mukhu thei sikin.

⁹Chier loiin nin in inmo-ong inlôm chit roi.

¹⁰Mi tinin Pathien manboipêkngêi adadangngêi enkolpu sa anghan, Pathien renga manboipêk alieka ai man ngei hah midang ngei satna rangin a mang ngêt rang ani.

¹¹Tukhomin thurchi a misîrin chu, Pathien chongbe a misîr ngêt rang ani; Tukhomin mi sin a thôn chu Pathien'n râtna a pêk anghan a tho ngêt rang ani. Jisua Khrista jâra neinunngêi murdi Pathien minpâka a om theina rangin, roiinpuina le sinthotheina chu tuonsôt tuonsôtin ama ta ani sikin. Amen.

Khristien sika tuongna

¹²Ka mal moroitak ngei, minsinna natak nin tuonga atung ngâi loi nin chungga atung hih nin jâmminzal no roi.

¹³Khrista roiinpuina a juong inlang tika râisâna nin sip theina ranga Khrista tuongna ngei nin tuongpui ai ni anghan râiminsân roi.

¹⁴Khrista nûkjûipu ngei nin ni sika êroa nin omin chu satvur nin ni; Ratha roiinpui, Pathien Ratha hah nin chungga a om sikin.

¹⁵Nin lâia tumakhatin nin tuongin chu, mi that sika mini, inru tho sika mini, neinun tho minchâi sika mini, midang ngei chungroi jêk pe sika mini chu ni tet no rese.

¹⁶Nikhomresea, Khristien nin ni sika nin tuong chu inzak no unglâ, Khrista riming nin pêl ai ni anghan Pathien kôm râisânchong ril roi.

¹⁷Roijêkna phut rang zora ahong tung zoi, Pathien ama mingêi jêk masa nîng an tih. Mahah einia phut aninte, Pathien renga Thurchi Sa iemloi ngei kôma han kho-ang takin mo ai mong rang ani zoi.

¹⁸Pathien lekhabu'n; "Mi sa ngei sanminring an ni rang luo antakin chu, pathienboi mi nunsie ngei hah imo an chang rang ani zoi?" ai ti anghan.

¹⁹Masikin Pathien lungdoa an nia, an tuongin chu sin asa thôn a Sinpu ânkhâmna tho ngâipu kôma inbâng phar rese ngei.

1 Peter 5

Pathien belripângei

¹Keima, nin lâia koiindang upangei hah, keima an upa champui, Khrista tuongna rietpuipu, roiinpuina juong inlang ranga rangtum man rangpu hin nangni ki ngên ani.

²Pathien'n nangni ai pêk belri pâl donsûi rang le jôtloiin ni loiin, Pathien nuomlama jôttaka donsûi rangin. Lo ririem sik ni loiin sintho ranga nuomna tak dônin nin sintum hah tho roi.

- ³Nin donsûngei chung a inlal rangin pût no unglâ, hannirese belripâlgei enton rang chang roi.
- ⁴Male Belrihôlpu Inlaltak hah a juong inlâr tika chu Rênglukhum roiinputak, avârna in mang ngâloi hah man nin tih.
- ⁵Ma angdên han, nangni nâipanguol ngei, uliengei kôma inpêklût roi. Sin nin inthope inlôm theina rangin, nunnêmnân invo roi; Pathien lekhabu'n, "Pathien'n mi ânpâkgei chu adoia, aniatachu mi nunnêm ngei chu a midit ngâi," ai ti anghan.
- ⁶Masikin azora taka nangni a chôiminsâng theina rangin Pathien kut râttak nuoia han nuninnêm takin om roi.
- ⁷Nangni a donsûi ngâi sikin nin kângdoinangei murdi ama chung a bâng riei roi.
- ⁸Intûng chienin en chak roi! Nin râlpâ Diabol hah ikeibaknei ânram anghan a sâk rang rokin a chaititîr ngâi kêng.
- ⁹Rammuol pumpuia nin iempu champui ngei khomin ma angdên han an tuong sa iti nin riet sikin nin taksônna mindet titin ama hah doi roi.
- ¹⁰Hannirese chomolte nin tuong suole chu, moroina murdi Pathien, Khrista leh inzoma a kumtuong roiinpuina chang ranga nangni koipu lele han nangni sinmikhippin detna, râtna le lungphûm adet nangni pêng a tih.
- ¹¹Ama kôma han sinthotheina chu tuonsôtin om rese! Amen.

Azoina chibaimûknangei

- ¹²Hi lekhamuthuon abongte hih Khristien champui taksônôm Silas, sanna jâra ki miziek ani. Nangni mohôka, ma hih Pathien moroina diktak ani iti ko chungroi nangni min riet ka nuom ani. Mahin inding dettit roi.
- ¹³Babylona, om nin sarnu Pathien'n ai thang koiindang le ka nâipasal Mark khomin chibai nangni an mûk sa.
- ¹⁴Khristien lungkhamna intum inthiengin chibai inmûk inlôm ngâi roi. Nin lâia Khrista ta ngei murdi kôm han inngêina om rese.

2 Peter

2 Peter 1

¹Simon Peter renga, Jisua Khrista tîrlâm le tîrton, Han Jisua Khrista kin Pathien le Sanminringpu dikna sika kin chang anghan iemna luttak achang ngei:

²Pathien le ei Pumapa Jisua nin rietna han moroina le inngêina tamtak nin ta ni rese.

Pathien koina le inthangna

³A roiinpuina le asatna chang ranga mi koipu ei rietna sika sakhuo diktak ringnuna ei om theina ranga neinuntin ei nâng murdi Pathien sinthotheina ânhieng mi pêk zoi.

⁴Ma anghan, neinunpêk roiinpui le luttak ânkhâm hah mi pêk zoi, ha neinunpêkngai sika han rammuola ôina saloi ngei renga rotpai, mi nina inthieng hah hong chang thei nin tih.

⁵Masika han nin theidôr songin nin taksônna han satna bôk unglâ, nin satna han rietna bôk unglâ,

⁶nin rietna han indîntheina bôk unglâ, nin indîntheina han tuongdierna bôk unglâ, nin tuongdierna han pathien angna bôk unglâ,

⁷nin pathien angna han lâibung inmoroina bôk unglâ, nin lâibung inmoroina han inlungkhamna bôk roi.

⁸Hi mi nina neinun ngei hih nin inâng ani, hi ngei hih nin dôn tam ok inchu, ei Pumapa Jisua Khrista nin rietna han nangni min râtin, malam nangni min pan a tih.

⁹Aniatachu tukhom ha ngei dônloi chu a kôlrevêl vai amua, mitcho ania, a sietna muruo renga minsâi ani hah ai mingil ani.

¹⁰Masikin ka lâibungngai le sarnungei, Pathien'n a lungdoa nangni koina le thangna hah asôia omtit rangin ningsiet uol roi, ma anghan nin thôn chu nin taksônna hah mâk tet no tunui.

¹¹Ma anghan, ei Pumapa le Sanminringpu Jisua Khrista ringinlon Rêngrama lût theina akipin dikna pêk nîng nin tih.

¹²Masikin, hi chong ngei hih zoratin rietmintharna nangni pêk bang ki tih, nin lei rietsai piel nikhomsenla, maleh chongtak nin changa han lei phun mindet ngit lei ni ta khom unglâ.

¹³Ki ringkâr chu hima roi ngei hih nin riettitna hah mohôk minhar tit inlang sâng atih, tiin ki mindon ani.

¹⁴Ei Pumapa Jisua Khrista'n ânthârlaka mi lei ril anghan, hi thithei takpum hih chomolte suoleh chu khekpai ki tih, iti hih ki riet.

¹⁵Ki thi suoleh khomin hi roi ngei hih zora tiin nin riëttit theina rang lam nangni pêk rangin ke theidôr tho ki tih.

Khrista roiinpuina rietpuipungei

¹⁶Ei Pumapa Jisua Khrista juong nôkna roiinpui a roi nangni kin min riet hah kin rachama kin phuotot thurchi ngeia inding mak meh, kin mit lelên ânlalna kin mu ani.

¹⁷Ama hah Pa Pathien'n inlalna leh roiinpuina a pêka, a kôma Roiinpuina Ânchungtak renga rôl ajuon ringa “Ma hih ka Nâipasal moroitak, ka râisân tatak hah ani” a ti lâia han kin om ani.

¹⁸Ha rôl hah a kôma muol inthienga kin om lâiin invân renga ajuonga, keini lelên kin iriet ani.

¹⁹Masikin dêipungei chongphuong hah adet uolin ei rietminthâr ani. Ama chong nin rangâia anin chu tho minsa nin ta, khuo avâra, sikhovâr hah nin mulungrîla avâr mâka chu, ajîngna châti vâv angha ani sikin.

²⁰Adadang nêkin Pathien lekhabua chongphuong ngei hih tutên atheiin rilminthâr thei ngâi ni mak iti riëttit roi.

²¹Dêipuchong chongbe hih miriem jôtna sika suok ngâi ni maka, aniatachu miriemngei hah Ratha Inthieng jêka omin Pathien renga juong suok chong hah an iril ngâi ani.

2 Peter 2

Minchupu dikloingei

(Jud 4-13)

¹Zora leivunsai han mingei lâia dêipu rotholngei an inlanga, ma anghan nangni lâia khom minchupu dikloi ngei la suok an tih. Anni han rilna dikloi la hongchôi an ta, anni khôkpu Pumapa lele khom minlêm an tih, masikin anni chung a inningloia sietminmangna tung atih.

²Hanchu, mi tamtakin indit inthiengloina lama han jûi an ta, ha ngei sintho sika han midang ngeiin chongtak lampui hah rilminsiet an tih.

³An inruokna sikin ha minchupu dikloi ngei han an rachama an iphuo thurchi ngei nangni rilin an inlâpna sin an tih. An Roijêkpu rang hah ânzoina asôtzan zoia, anni minmang rangpu hah alên thoi zoi ani.

⁴Pathien'n, nunsie tho vântîrtonngei hah hoi maka, dûkmuna a paia, Roijêkna nikhuo ngâk rangin jîngzirûia thungin ajîngna ai dar ani.

- ⁵ Pathien'n tienlâi rammuol khom hôi maka, pathienboi rammuola han tuisâng a minlien ani, ai hôi chu Noah, dikna chong misîrpu le midang sari anni.
- ⁶ Pathien'n Sodom le Gomorra khopuiliengnei hah theiloimintumin mei leh a minmanga, pathienboi ngei chung a hongtung rang minenna ai tho ani.
- ⁷ Lot, midik, mi nunsie ngei balamboia hur sika beidong taka om ngâi hah a sanminjôk ani.
- ⁸ Ha midik hah an lâia omin an sintho saloi ngei hah a mua, a rieta, anîngtin mulung natna a tuong ngâia.
- ⁹ Masikin Pumapa han ama riet ngâi ngei minsinna an tongna renga a kelsuo chang a rieta, misaloi ngei Roijêkna Nikhuo ngâk ranga dûktong puma dar chang khom a riet,
- ¹⁰ aliekin, an taksa ôina innim jûi ngei, Pathien rachamneina a enkhum ngei hah. Ha minchupu dikloi ngei hah mihâi le tukdullien an ni, chungtienga roiinpuina ngei khi mirit tho loia, an êro ngâi an ni.
- ¹¹ Hi minchupu dikloi ngei nêka rât uol le alien vântîrtonngnei luon ha ngei hah Pumapa makunga êron, nôn ngâi mak ngei.
- ¹² Aniatachu, hi mi ngei hi chu ramsa isûra that ranga ânzir ngei anghan an rietna mangin sin an thoa, an riet theilo kai chu rilsietin an doi ngâi. Ramsa ngei anghan minmang nîng an tih,
- ¹³ dûktongna an musuo lam ang takin dûk mintuong ngei nîng an tih. An râisâna chu an taksa ôina minhoina ranga súnkhovâra râisâna mang ani. Anni hah inzakupui om le mâimôk ompui tak an ni, nin bunêkna an honchel rachamin an milakna an song kelen ngâi ani.
- ¹⁴ Nupang angal tiloi chu ite en nuom ngâi mak ngeia, nunsie tho an ôina hah khotiklâi khomin bângpe ngâi mak ngei. Miriem râtloi ngei hah châng a an min ôk ngâia. An mindonna hah ranghuolnan asipa. Pathien khomâksâm nuoia an om ani.
- ¹⁵ Lampui injîk hah an mâka, lam an invâi zoia, Beor nâipasal Balaam saloi a sin sika sum man rang nuompu lampui hah an jûi zoi ani.
- ¹⁶ Ama hah a nunsie sikin ngôn a oma, a sakuording hah miriem chongin a hong chonga, dêipu achâng sintho hah ai khap ani.
- ¹⁷ Ha mingei hah chu tuipûtsuonngnei achâr le sôm phâivuopuiin ai sêmpai angin an ni. Pathien'n ha mingei ta rangin mun ajîngna inthûktak ahôi pe ngei zoi.
- ¹⁸ Inpâk chong le invêt chong ngei an manga, nunsiea om ngei lâi renga hongjôk rang a bôk ngei hah an min ôk theina rangin hurna ngei an mang ngâi.

¹⁹Anni nunsie suoka omchien ngei han, mi zalêna apêk rangin an inkhâm ngâi, tu miriem khomin ama menêpu suoka chu aom ani.

²⁰Ei Pumapa le Sanminringpu Jisua Khrista an rietna sikin rammuol tho minchâina ranak renga jôka, ama nanâka lût nôka, menêa om nôk mingei kai chu aphuta nêkin a dingmun nûktak hah chu ai siet uol ani.

²¹Dikna lampui hah an rieta, chongpêk inthieng pêk an ni suonûka, nûk an inhei nôk nêkin chu ariet reng an rietloi ni rese chu an ta rangin sa ôk atih.

²²An chung neinin hongtung ngei hih, Vârchong, “Ui a muluok tieng a kîr nôk” ti le “Vok minthiengliei sai dieldôka inbuol rangin akîr nôk” iti hih adik ani iti a minlang ani.

2 Peter 3

Pumapa juong nôkna rang leikhâm

¹Atûn ku ruol moroi ngei, ma hih ke lekhamuthuon avoinikna ani. Ke lekhamuthuon anruonin hi chong hih rietmintharna nangni pêka nin mulungrîla mindona inthieng, mintharna rangin ko bôk ani.

²Tienlâia Dêipu inthieng ngei chongphuong le ei Pumapa le Sanminringpu chongpêk nin tîrtongei nangni pêk hah nin riet minthar rangin ku nuom.

³Amotontaka, nin riet ngêt rang chu sîn mongnatak ngeia han mi senkhat ngei chu an ringnun hah an ôina jêk mi lân lang an tih. Tusiem nangni thona an ta,

⁴male “Juong nôk rangin chong ânkhâm ni mak mo? Ama hah khonmo aom zoi? Kin richibulngei an thi suo zoia, nikhomrese, rammuol insieng phut renga neinuntin ani ngagâiin an la om tita?” la tîng an tih.

⁵Hi chongdikngei hih an riet ngôngin an nôngpai ngâi. Pathien chongpêkin invân le pilchung hih isin ani. Pilchung hih tui renga tui sikin a hong oma,

⁶male tui nanâkin ani, tuisânglienin rammuol muruo hah sietminmang ani.

⁷Nikhomrese, atûna invângei le pilchung aom ngei hi chu meia sietminmang theina rangin Pathien chongpêk nanâka hôi ania. Anni ngei hah pathienboi mingei roijêkna le sietminmangna nikhuoa ranga dar an ni.

⁸Hannirese, hi neinin inkhat hih mingil no roi, ka mal moroi ngei! Pathien mitmua chu sînkhath le kum isângkhat hih ateina om maka; ama rangin chu ân angbang ani.

⁹Mi senkhatngei an mindon anghan Pumapa chu a chongkhâma innu mak. Ânno niloiiin, tute inmang loa, mi murdi an nunsiena renga an hong insîr rang nuomin nangni tieng a tuongdier ani.

10 Aniatachu Pumapa Nikhuo chu inru angin juong atih. Ha nikhuoa han chu rahang inringtak le invâna neinunngai kângin in mang a ta, pilchung le asûnga neinunngai murdi khom in mangrip atih.

11 Ma neinunngai murdi hah ma anghan sietmin mang ani rangin te, kho anga mi mo nin ni rang ani zoi? Nin ringnun hah ân thieng le Pathien kôma pêkruo ani rang ani.

12 Pathien Nikhuo nin ngâk atung in rang theina rangin nin theidôr ranak song roi, invânngai akânga sietmin mang rang Nikhuo le invâna neinunngai alum sika ajôina rang Nikhuo hah.

13 Aniatachu eini chu Pathien chongkhâm anghan invân thar le pilchung thar, asûnga dikna hah ei omna in rang ei ngâk ani.

14 Masikin ka mal moroi ngei, ha Nikhuo hah nin ngâk anghan Pathien mitmua in thieng le demnaboia oma, ama leh inngêia om rangin nin theidôr ranak song roi

15 Ei Pumapa'n nangni sanminring ranga zoranchum nangni a pêka a tuongdier hah en roi, ei lâibungpa moroi Paul khomin Pathien vârna pêk mangin nin kôm a miziek anga han.

16 A lekhamuthuon murdia ha chonglupui hah a miziekin chu mahah ai ti ngâi ani. A lekhamuthuona neinun senkhat ngei chu a riet ân taka mahah vârlai le detloi mingei Pathien lekhabua rachang dang an itho ngâi anghan dikloitakin an rilminthâr ngâia, masikin an chung a sietna anni nanâkin an mintung ngâi.

17 Aniatachu, ku ruol moroi nangni ngeiin chu mahah nin lei rietsai ani. Masikin balamboi mingei minchâina han nangni ruoi min mangin nin dingmun adetna renga nin inlet lina rangin singthei roi.

18 Hannirese, ei Pumapa Jisua Khrista moroina le rietna han insôn tit roi. Roiinpuina hah atûn le kumtuongin ama kôma om tit rese! Amen.

1 John

1 John 1

Ringna chong

¹Ringna chong aphuta om hah nin kôm kin miziek ani. Kin rieta, male kin mitin kin mu ani; ani, kin mua, male kin kutin a tôn ani.

²Hi ringna hih a juong inlanga han kin lei mua; masikin ha roi hah kin misîra, Pa kôma kumtuong ringna om hah ei lâia a juong inlang hah nangni kin ril ani.

³Pa le a Nâipasal Jisua Khrista leh inlopin kin dôn hi mi nin zom theina rangin kin mu le kin riet hi nin kôm kin phuong ani.

⁴Kin râisân akip theina rangin hi roi hi kin miziek ani.

Pathien chu vâi ani

⁵A nâipasal renga chong kin riet nin kôma kin phuong chu mahi ani: Pathien chu vâi ania, ama kôm chu ajîng reng om tet mak.

⁶Hanchu, ajînga lêng titin, ama leh ênlop ei tiin chu ei chong le ei sinthôn milak ei ni rang ani.

⁷Aniatachu, ama avâra a om anghan eini khom avâra ei lêngin chu inkhat le inkhat inlopkhomna ei dôn ani, a Nâipasal Jisua thisenin ei nunsie ngei murdi renga mi minsâi ngâi ani.

⁸Nunsie dôn mu-ung ei tiin chu ei thethenin ênhuong ani, male chongtak ei kôm a om loi ani.

⁹Aniatachu, ei sietna ngei Pathien kôm ei phuongin chu, a chonginkhâm anghan ei sietna ngei mi ngâidam a ta, ei sin dikloina murdi renga mi minsâi a tih.

¹⁰Nunsie tho mu-ung ei tiin chu, Pathien milakin ei sina, male a chong khom ei kôm hin aom loi ani.

1 John 2

Khrista eini mi sanpu

¹Ka nâingei nunsie nin tho loina rangin hi chong hih ki miziek ani; aniatachu tukhom nunsie a thôn chu, Pa kôm ei ruthûla mi ngên pepu Jisua Khrista, mi dik hah ei dôn.

²Male Khrista hih ei nunsie ngei ngâidama ei omna ani; eini nunsie vai ni maka, mi murdi nunsie khom ani sa.

³Pathien chongpêkngai ei jômin chu ama ei riet ti ei riet minthâr ani.

⁴Einin ama ki riet tiin a chongpêkgei jôm no ila, eini hah milak ei nia, eini han chongtak a om loi ani.

⁵Tutu khom a chong jômputa ngei chu Pathien lungkhamna hah an mikhip tatak ani. Pathien leh inzomin ei om ti mahin ei riet minthâr thei ani:

⁶tukhom Pathien leh inzomin ko om ei tiin chu Jisua Khrista om anghan ei om sa rang ani.

Chongpêk athar

⁷Ka mal moroitak ngei, hi chongpêk nin kôma ki miziek hi athar ni mak; chongpêk muruo aphut renga nin dôn hah ani. Ma chongpêk muruo hah nin lei riet sai thurchi ani.

⁸Hannoma, chongpêk atûna nin kôma ki miziek hi chu athar ani, asikchu chongtak hah Khrista taka le nangni ngeia hin ânlang. Ajîng hah ahek tira male avâr tatak hah a juong vâz zoi ani.

⁹Tukhomin avâra kin om tiin an lâibung ngei le sarnu ngei an la mumâk titin chu, atûn tena hin ijînga an la om bang ani.

¹⁰Tukhomin an lâibungngei le sarnu ngei an lungkhamin chu avâra an om tita, annia han sietna inpalna rang reng om mak.

¹¹Ania tukhom ei lâibungngei le ei sarnu ngei la mumâkpu chu ajînga ei oma; ajînga ei lôn banga, ajîngin ei mit a mincho zoi sikin ei sena khom riet ngâi mak me.

¹²Ka nâingei, Khrista jârin nin nunsie ngei ngâidamin a om zoi sikin nin kôm ki miziek ani.

¹³Pa ngei, ama hah aphut renga a omtit hah nin riet sikin nin kôm ki miziek ani. Vânglâingei, Saloi Inkhat hah nin mene zoi sikin nin kôm ki miziek ani.

¹⁴Ka nâingei, Pa hah nin riet sikin nin kôm ki miziek ani. Pa ngei ama hah aphut renga a omtit hah nin riet sikin nin kôm ki miziek ani. Vânglâingei, nin râta; Pathien chong nin sûnga a om tita, male Saloi Inkhat hah nin mene zoi sikin nin kôm ki miziek ani.

¹⁵Rammuol hi midit no unglâ, hanchu rammuola neinun ngei khom ite midit no roi. Rammuol nin miditin chu Pa nin lungkham loi ani.

¹⁶Rammuola neinun a omngei murdi taksa ôina ngei, miriem mita mu theingei le anâng ngei, male miriem damsûng insongpuina ngei hi khote Pa renga juong nimak ngei; hima ngei murdi hi rammuol renga korong an ni.

¹⁷Rammuol le a sûnga neinunngei murdi miriemin an ôingei hih ânman tir ani; aniatachu Pathien lungdo sinngi chu tuonsôtin om tit an tih.

Khrista râi

¹⁸Ka nângei, zora mongna anâi zoi! Khrista Râl la hong om atih, tia rila nin om anghan; Khrista rângei tamtak an inlang zoi, masikin zora mongna anâi zoi tiin ei riet ani.

¹⁹Hi mingei hih ei pâla mi reng ni mak ngei, masika han min mâksan ani; ei pâla mi nisenla ngei chu, ei kôm om tit an tih. Aniatachu min mâksan sikin ei pâla mi ni tatak mak ngei ti chu ânthâr thei ani.

²⁰Hannirese Khrista'n Ratha Inthieng nin chung a vur zoi sikin nin rêngin chongtak nin riet ani.

²¹Hanchu chongtak riet mak chei ti sika nin kôm ki miziek ni maka; manêkin, chongtak nin riet sik le chongtak renga milak reng suok ngâi mak ti khom nin riet sika ani.

²²Nôte, tumo milak ani? Tukhom Jisua chu Messiah ni mak tipu hah ani. Ma anga mi ngei hah Khrista Râlgei an nia Pa le Nâipasal anni innikin an heng ani.

²³Tukhom Nâipasal hengpu chu Pa khom a heng ani; tukhom Nâipasal pom chu Pa khom a pom sa ani.

²⁴Nangni chu aphut renga nin chong riet hah nin mulungrîla vong tit rangin mindon roi. Hanchu ma chong hah nin vong titin chu Nâipasal le Pa leh inzomin om tit nin tih.

²⁵Male mahi ani Khrista lelên kumtuong ringna mi pêk ranga ânkhâm hah.

²⁶Ma nangni huong ranga bôk ngei thurchi hah nin kôm ki miziek ani.

²⁷Aniatachu nangni chu, Khrista'n ama Ratha nin chung a vur zoia, ama Ratha hah nin sunga a om tena chu, tute minchu rang nâng mak chei. Ama Ratha han neinun murdi nangni a minchua, male nangni minchu ngei khom adika, adikloi nimak. Ratha minchuna hah jôm ungla, male Khrista leh inzomin omtit roi.

²⁸Ani, ka nângei, ama leh inzomin omtit roi, hanchu ama a juong inlâr Nikhuo han inzaka inthup loiin hâitakin om thei nin tih.

²⁹Khrista chu midik ani; ti nin riet sikin tukhom adik sinpu chu Pathien nâi ani ti nin riet rang ani.

1 John 3

Pathien nângei

¹En ta u, khodôr tak mo Pa mi lungkham hi! Mi lungkhamna lien rai sikin Pathien nângeiin mi be zoi ani, male ma anghan a nângei eini zoi. Hima sika hin rammuolin mi riet loi ani: Pathien a riet loi sikin.

²Ka mal moroitak ngei, atûn hin Pathien nângei ei ni zoi, aniatachu, imo ei hongni rang ti chu lân thâr tak mak. Aniatachu, Khrista a juong inlâr tika chu

ama angin om ei tih, ti chu ei riet, ama chu anina anghan adiktakin ei mu rang sikin.

³Tukhomin Khrista taka sabeina dôn kaiin chu Khrista ânthieng anghan an inthieng ngâi ani.

⁴Tutu khom nunsie ngei tho kai chu Pathien Balam a siet ani, asikchu nunsie hih balam sietna ani.

⁵Khrista hah nunsie ngei lâk pai rangin a juong inlâr zoi ti nin riet, male ama kôm han chu nunsie reng om mak.

⁶Masikin tukhom Khrista leh inzomin a om tittin chu nunsie tho ngâi khâi mak; aniatachu tukhom nunsie a la tho bangin chu ama hah mu maka aninônchu riet khom riet tet mak ani.

⁷Ka nâingei, tutên nangni huong no rese ngei! Tukhom adik sinpu chu midik ania, Khrista hah adik anghan.

⁸Tukhom nunsie a la tho bangin chu Diabol ta ani, Diabol chu aphut renga nunsie a tho sikin. Pathien Nâipasal a juong inlangna abitak chu, Diabol sintho ngei minmang rang hih ani.

⁹Tukhom Pathien nâingei chu nunsie tho ngâi khâi mak ngei, Pathien nina tatak hah an nia han aom tita, male Pathien hih an Pa ani sikin, nunsie tho thei ngâi khâi mak ngei.

¹⁰Mahin Pathien nâingei le Diabol nâingei an teina ânthârna ani: adik sin loi ngei murdi le midang lungkham loi ngei chu Pathien nâingei nimak ngei.

Inkhat le inkhat inlungkham

¹¹Aphut renga chong nin riet ha: inkhat le inkhat ên lungkham inlôm ngêt rang tih hi ani.

¹²Eini chu Cain anghan chu om tet no u; ama chu Asaloi Inkhatpa ta ania, male a nâipa lele Abel a that ani. Ithomo Cain'n a thata? A sintho ngei ha chu asaloi ania, a nâipa sintho ngei ha chu adik sikin ani.

¹³Masikin ka lâibungngei le sarnu ngei, rammuol mingeiin nangni an mumâkin chu kamâm no roi.

¹⁴Ei lâibungngei le sarnu ngei ei lungkham sikin thina renga hong jôkin ringna han ei lût zoi tiin ei riet ani. Tukhom lungkhamna dôn loi chu thina sinthotheina nuoia a la om tit ani.

¹⁵Tutu khom a lâibungngei mumâkngai chu mithatngai an ni, male mithatngai kumtuong ringna man ngâi mak ngei iti nin riet.

¹⁶Ma hin lungkhamna hih imo ani ti chu ei riet: Khrista'n eini rangin a ringna a pêka. Hanchu, eini khom ma anghan, ei lâibungngei le sarnu ngei rangin ei ringna pêk rang hi êntâng ani!

¹⁷Minei ngeiin lâibung mini sarnu mini ânsamin mu senla, hannoma anni ngei doiin an mulungngei khâr senla ngeia, Pathien kin lungkham inti thei no ni ngei.

¹⁸Ka nâingei, ei lungkhamna hih chongbâingei le mûra ti vaiin ni no senla; lungkhamna diktak, sinthôn minlang ngâi nirse.

Pathien makunga hâina

¹⁹Hanchu, ma anghin, eini chu chongtak ta eini ti riet thei ei ta; ma anghin Pathien makunga ngamin ei om rang ani.

²⁰Ei sielesarietnân asie mimintumin chu, Pathien chu ei sielesarietna nêkin a roiinpui uola neinuntin a riet let ngâi ei riet ani.

²¹Masikin ku ruol midit om ngei, ei sielesarietnân asie mimintum nôn chu, Pathien makunga hâina ei dôn ani.

²²A chongpêkngai ei jôma, a râisân rang lam ei sin ngâi sikin ei ngên murdi a kôm renga ei man ngâi ani.

²³A chongpêkngai chu a Nâipasal Jisua Khrista ei iema, Khrista chongpêk mi pêk anghan inkhat le inkhat ên lungkham inlom hih ani.

²⁴Tukhom Pathien chongpêkngai ajômpu chu Pathien leh inzomin an oma, Pathien khom anni leh inzomin aom ngâi ani. Male Pathien'n Ratha mi pêk sikin Pathien leh inzomin ei om ti ei riet ani.

1 John 4

Ratha adik le adikloi

¹Ku ruol moroitak ngei, Ratha ko dôn ti ngei murdi iem pai no roi, aniatachu an ratha dôn hah Pathien renga ani le niloi minsin roi. Asikchu dêipu adikloi tamtak muntina an suok zoi.

²Pathien Ratha ani le niloi chu ma anghin riet nin tih: tukhom Jisua Khrista munisi'n a juong iti rietminthâra muphuongpu ngei chu Pathien renga Ratha dôn an ni.

³Hannirese Jisua chungroi adem kai chu Pathien renga Ratha dôn ni mak. Ama ratha dôn ha chu Khrista Râl renga kêng ani; la hong om a tih, ti nin rieta, male atûn hin rammuola a om sai piel ani zoi.

⁴Aniatachu, ka nâingei, Pathien ta nin nia, male dêipu dikloingei hah nin mene zoi, nin kôma om Ratha hah rammuol mingei kôma om ratha nêkin chu sinthotheina a dôn uol sikin.

⁵Ma dêipu dikloingei han rammuol roingei an misîra, rammuolin an chong a rangâi ngâi, rammuol ta an ni sikin.

⁶Aniatachu eini chu Pathien ta ei ni. Tukhom Pathien riet ngeiin chu ei chong an rangâia; tukhom Pathien mi ni nônchu ei chong rangâi ngâi mak ngei. Hanchu, mahi, Ratha diktak le dikloi sensâi theina kin misîr thei chu ani.

Pathien chu lungkhamna ani

⁷Ruol midit om ngei, inkhat le inkhat inlungkham inlôm ei tih u, lungkhamna hi Pathien renga suok ani sikin. Tukhom lungkhamna dôn chu Pathien nâi ania, Pathien khom a riet.

⁸Tukhom lungkhamna dôn loi chu Pathien khom riet mak, Pathien chu lungkhamna ani sikin.

⁹Ama jâra ringna ei man theina rangin Pathien'n a Nâipasal khat mamang rammuola juongtîrin a lungkhamna ei chung a minlang ani.

¹⁰Mahi lungkhamna chu ani: ei nîn Pathien ei lungkham bak ni maka, aniatachu ama'n kêng mi lungkhama, ei sietnagei renga ngâidam ei chang theina rangin a Nâipasal a juongtîr ani.

¹¹Ruol midit om ngei, Pathien'n ma angta kin mi lungkhamin te, eini khom inkhat le inkhat ên lungkham rang ani.

¹²Khotiklâi khomin tutên Pathien mu ngâi mak ngei, aniatachu, inkhat le inkhat ên lungkham inlômin chu Pathien eini leh inzomin aoma, a lungkhamna khom eini hin mikhipin aom ngâi ani.

¹³Pathien'n ama Ratha mi pêk zoi sikin ama leh inzomin ei oma, male ama eini leh inzomin aom ti ei riet minthâr ani.

¹⁴Male Pa'n a Nâipasal rammuol Sanminringpu ni rangin a juongtîr ti ei mu zoia, midangngei khom ei ril sa ani.

¹⁵Tukhom Jisua hi Pathien Nâipasal ani tia muphuong chu, Pathien leh inzomin a oma Pathien khom ama leh inzomin a om ngâi ani.

¹⁶Pathien'n eini ranga lungkhamna a dôn hah ei rieta, male ei iem ani. Pathien chu lungkhamna ania, tukhom lungkhamna taka om chu Pathien leh inzomin an oma, Pathien khom anni leh inzomin aom ngâi.

¹⁷Roijêkna Nikhuo han hâina ei nei theina rangin lungkhamna hah einia hin mikhipin a om zoi; male hi rammuola ei ringna hih Khrista om anghan ei om sikin maha la dôn ei tih.

¹⁸Lungkhamnân chu china om maka; lungkhamna akippin china a rujûlpai ngâi. Masikin, tukhom china la nei chu ama han lungkhamna akippin a la om loi ani, asikchu china han dûktongna aom ani.

¹⁹Pathien'n mi lungkham bak sikin ei lungkham ani.

²⁰Pathien ku lungkham tiin ei lâibungngei le sarnu ngei mumâk ila, milak kêng eini rang ani. Mîn a lâibungngei le sarnu ngei a mu bang ngei luo a lungkham thei nônte, Pathien a mu loi vâng hate kho angin mo a lungkham thei ranga?

²¹Khrista'n chongpêk mi pêk hah mahi ani: Tukhomin Pathien a lungkhamin chu a lâibungngei le sarnu ngei khom a lungkham ngêt sa rang ani.

1 John 5

Rammuol chung a ei menena

¹Tukhom Jisua hi Messiah ani tia iem chu Pathien nâi ani; tukhom Pa lungkhampu chu a Nâipasal khom a lungkham sa ngâi.

²Ma hin Pathien nâingei ei lungkham iti ei rieta: Pathien ei lungkhama a chongpêkngai ei jôma hin.

³Pathien ei lungkhamna chu a chongpêkngai ei jôm hih ani. A chongpêkngai chu eini rangin inngar mak,

⁴asikchu Pathien nâi nâmin chu rammuol an mene ngâi. Male ei taksônna sikin rammuol ei mene ani.

⁵Tumo rammuol a mene thei rang? Jisua chu Pathien Nâipasal ani iti iempu vaiin kêng.

Jisua khrista rietpuipu

⁶Jisua Khrista hih a bapisma tui le a thina thisen leh juongpu hah ani. Tui vaia niloiin tui leh thisen inlopa juong ani. Male Ratha han amananâk adik iti a minriet ani, Ratha chu chongtak ani sikin.

⁷Rietpuipu ngei inthum an om:

⁸Ratha, tui le thisen; male ma inthum ngei minrietna hah munkhat ani.

⁹Munisi minrietna luo mana ei iema; Pathien minrietna vângte arât uol ok kêng, male a Nâipasal minrietna chungroi chu a pêk zoi ani.

¹⁰Masikin tukhom Pathien Nâipasal a iem ngei murdi'n chu mania inrietna hi an mulungrîla an dôna; aniatachu a iemloipu ngei chu Pathien milakin an minchang ani. Pathien'n a Nâipasal chungroi a ti hah an iemloi sikin.

¹¹Ma minrietna hah mahi ani: Pathien'n kumtuong ringna mi pêk zoia, male ma ringna nâr hah a Nâipasala aom ani.

¹²Tukhom Nâipasal hah a dônin chu ringna hah a dôna, Pathien Nâipasal dônloi chu ringna dôn mak ani.

Kumtuong ringna

- 13**Kumtuong ringna nin dôn ti nin riet theina rangin nangni Pathien Nâipasal iem ngei kôm hi chong hih ki miziek ani.
- 14**Neinun murdi a lungdo angin ei ngênin chu mi rangâi pe ngâi ti ei rietminthâr sikin Pathien makunga ei hâi ani.
- 15**Khotiklâi khom ei ngên kai chu mi rangâi pe ngâi; male mahah adik iti ei rietin chu a kôm ei neinun ngên hah mi pêk ngâi ani, ti khom ei riet sa ani.
- 16**Nin lâibung mini, nin sarnu mini thi theina tatak niloi sietna a sinin chu Pathien kôm chubai tho pe unglâ, Pathien'n ringna pêk ngei a tih. Mahi thi theina tatak niloi sietna sin ngei ranga ani. Ania thi theina tatak sietna khom a oma, ma rang han Pathien kôm chubaitho pe roi ki ti nimak.
- 17**Adikloi tho murdi hi nunsie ani, aniatachu thi theina tatak niloi sietna khom a om sa.
- 18**Tukhom Pathien nâingei chu nunsie tho bang ngâi khâi mak ngei iti ei riet, Pathien Nâipasal han a rung ngei tita, Puoloipa siet thei ngei khâi mak.
- 19**Rammuol pumpui hih Puoloipa roijêkna nuoia om nikhomsenla, Pathien mingei ei ni iti ei riet ani.
- 20**Pathien diktak hah ei rietna rangin Pathien Nâipasal a juonga, masikin riettheina mi pêk ani, Pathien diktak leh inzomin ei oma a Nâipasal Jisua Khrista leh inzomin. Mahi Pathien diktak ania, male mahi kumtuong ringna ani.
- 21**Ka nâingei, pathien dikloi ngei renga inrung roi!

2 John

2 John 1

¹Upa renga han, A nupang lungkham le a nâingei; atataka nangni ku lungkham ani; keima vai ni maka, chongtak a riet ngei murdi khomin nangni an lungkham sa.

²Chongtak ei kôma om bang, kumtuonga khom ei kôm a om bang rang sika hin.

³Pa Pathien le Pa Nâipasal Jisua Khrista renga lungkhamna, moroina le inngêina ngei mi pêk hah chongtak le lungkhamna ei ta nirese.

Chongtak le lungkhamna

⁴Pa chongpêk anghan na nâingei senkhat chongtaka an om ku mu sikin ka râisân tatak ani.

⁵Male nupang lungkham no kôma chongpêk athar niloiiin aphut renga ei dôn hah lungkham ênmu thei chitna rangin nangni ke ngên ani.

⁶Lungkhamna ki ti omtie chong chu Pathien chongpêk jômin ei om ngêt rang ani. Chongpêk aphut renga nin rênga nin riet khom hah, inlungkhamin om roi, ti hi ani.

⁷Mi huong ngâi ngei rammuol pumpuia an suok zoi, Jisua khrista munisi'n a juong inzir ti pom nuom loi mingei hah. Ha anga mingei ha chu milak le Khrista Râl an ni.

⁸Masikin nin sin sai ngei hah inmang loa, râisânman a kipa nin man theina rangin asadimin inrung roi.

⁹Tukhom Khrista minchuna taka om loiin a khêlin chu, Pathien dôn mak. Tukhom minchuna taka a om titin chu Pa le Nâipasal a dôn ani.

¹⁰Masikin, tukhomin hi minchuna chong hongchôi loiin nin kôm amapa mini, amanu mini a hongin chu, nin ina mintung ngei no unglâ; nin chungâ "Ratha'ngamna om rese" luo tipe ngei no roi.

¹¹Tukhomin he hoiin an mathânin chu an neinun saloi an thona han an inchel sa ani.

Chong mongna

¹²Chong tamtak nangni ril rang ko dôna, aniatachu lekha leh pentuiin miziek loiin, ei râisâna akip theina rangin nin kôm hongin mêl inmua chong rangin ka sabei ani.

¹³Nu Juorpui lungkhamnu nâingeiin chibaimûknangei nang an hong muthuon ani.

3 John

3 John 1

¹ Upa renga han, Ko moroitak Gaius, ku lungkham tatakpu kôm,

² Ka mal moroitak, ratha han na dam ti ki riet anghan, neinunngai murdi asadima alônna taksa han na dam theina rangin ku chubai ngâi.

³ Khristien champuingei senkhat an juonga, taksonoma no omtit ngâi anghan, chongtaka iem no omtit tih min rila, ka râisân tatak ani.

⁴ Ka nâingei chongtaka an om ti ki rieta ka râisân nêka râisâna lien uol reng dôn mu ung.

Gaius minpâkin aom

⁵ Ka mal moroitak, khuolmingei anni lâi khomin Khristien champuingei chungga taksonomtakin sin no tho ngâia.

⁶ Hi taka koiindangngai kôm khom nu lungkhamna chungroi an misîr zoi. An khuolchaina mozomtita Pathien a râisân theina rangin rangâihoitakin lei san ngei roh.

⁷ Khrista sinthoa an khuolchaina han iemloingei renga sâna lâk loiin an nin thok sikin.

⁸ Masikin eini Khristienngaiin, chongtaka sin an thona han ênchelsa theina rangin hi mingei hih ei san ngêt rang ani.

Diotrephes le Demetrius

⁹ Koiindang kôma lekhamuthuon bongte chu ki mizieka; aniatachu, an ruoipu chang nuom ngâipu Diotrephes han chu ko chong ite lunghâng tho noni.

¹⁰ Hanchu ku juong tika chu a sintho murdi lunghâng tho ka ta; kin chungroia neinun ichiruoingei a ti ngâi le milak a ril ngâi! Aniatachu maha khom ahunin la riet maka; ei Khristien champuingei an hong khomin mintung ngâi maka, mi mintung rang nuomngai khom a khap ngâi male koiindang renga rujûl pai ngei rang a pôut ngâi!

¹¹ Ka mal moroitak, asaloj jûi nônlâ, asa jûi roh. Tukhom asa sinpu ngei chu Pathien ta an nia; tukhom asaloj sinpu ngei chu Pathien la muloi an ni.

¹² Demetrius hah mitinin asa an ti ngâia; chongtak han amananâkin asa a ti ngâi. Male keini khomin kin thurchi kin bôk sa, male khoimo kin ti hih adik ti ni riet.

Azoina chibaimûknangei

¹³ Chong tamtak nangni ril rang ko dôn, aniatachu maha pen le pentuiin no kôm miziek nuom mu ung.

¹⁴Nang mu lai rang ka sabeia, hanchu intongin la chong rei.

¹⁵Rathangamin om roh. Na malngei nâmin chibai an hong muthuon. Ei malngei hah an misang zeta chibai mi mûk pe chit roh.

Jude

Jude 1

¹ Jude, Jisua Khrista târlâm, le Jacob lâibungpa renga, Pathien'n a koi pungei, Pa Pathien lungkhamna sũanga omngei le Jisua Khrista rungna ngei han:

² Mulungjũrpuina, inngêina le lungkhamna ngei ha ninta rangin asipmatin om rese.

Minchupu dikloingei

³ Ko moroitak ka malngei, ei renga ei chang inruol Sanminringna chungroi hih nin kũa miziek rangin ke theidôr ku pût lâiin, Pathien'n a mingei taksũana voikhata a pêsai ngei le anrêngin nin doi rangin nangni mohũana miziek rangin anângin ki riet ani.

⁴ Mi senkhat Pathien dũanoi mingei inrũaka ei lâia lût an oma, ha mingei han ei Pathien moroina chungroi hah hurna lampui an minchanga, ei Puma le Pumapa. Jisua Khrista ei dũante khom an hengpai ani, Ha mingei han theiloi an chang rangtie chu tiẽnlũa renga Pathien lekhabu'n alei muphuong sai kêng ani zoi.

⁵ Hima ngei murdi hih nin lei riet sai nikhomsenla, nangni min riet nũaku ku nuom Pumapa'n Isrealngei ha Egypt ram renga a kũasuo ngeia, aniatachu a iũanoi pungei chu nũaka ala minmang ngei nũaku ani.

⁶ Vũatũartonggei khom an rachamneina sinthotheina azotodor sũanga omloia, an omna mun mũaku ngei chu Pathien'n Nikhuo inlaltaka theiloi minchang rangin kumtuong zingjirũaia thungin ijũang nuoia, a dar ngei ani tih riئتit roi.

⁷ Sodom le Gomorrah le akũa revũa khopuingeia mingei khom ha vũatũartonggei sintho angdũana tho hur le ngala nunchan saloia an inpũak sikin mitin inrimna rangin kumtuong meia dũakmintongin anlangiemn aom tih riئتit roi.

⁸ Ma angdũana han, ha mingei han inlũarnangei an mua, mangei sika han an takpum an min nima; Pathien rachamneina an mumũaka, male chungtienga roiinpuitaka aom ngei khom an êro ani.

⁹ Vũatũarton anchungtak Michael luon mahi tho mak, Diabol le Moses ruok tumo achang rang an inchua an inkhal lũaihan, Michael'n Diabol hah chongsien rokũak ngam maka, "Pumapa'n nang la ngo rese!" a ti pe ani.

¹⁰ Aniatachu hi mingei hin i-ih khom an riet theiloi chu doiin an êro ngũaia; male mindona dũanoi ramsa ngei angin an suokpui neinunnggei rietna han anni ngei hah asietminmang ngũaia.

¹¹ Anni rangin idũara chi-om mo ani zoi! Cain lampui hah an jũaia, sum sikin Balaam sietna a lei thona tieng anninũakin an inpũak zoi. Korah anhel anghan an inhela, male ama angin an inmang zoi ani.

¹²Anni ngei hah nin inlopkhômna bukhalâi ôtna han an inzakloina hah sabe annim angin anni. Anninanâk rang vai mindon ngâi an ni. Anni ngei ha ruotui pomloi sômngei phâivuon a sêmpai angin an ni. Anni ngei hah thingkung inra zora luo inra ngâiloi, thingkung rujungngei phôi paia oma athiphar angin an ni.

¹³Anni ngei hah tuikhangliena tuidârinsok angin, an sintho inzakpui omngei hah tuihuon minlang angin an ni. Anni ngei hah ârsingei chaititir angin Pathien'n ijîng inthûktak sûnga tuonsôta om ranga mun a hôih pe ngei ani.

¹⁴Maha Enoch, Adam renga richisuonpâr sarina hi tienlâi han dêipu chongin alei misîr sai: “Pumapa ha a vântîrton inthieng isâng tamtak ngei leh a juong rang

¹⁵Mi murdi chungâ roijêkna juong min tungin, Pathien dônloingei sintho murdi le Pathien dônloi mi nungsiengi ama dôia chonghoiloitak an ti sika theiloi minchang rangin!”

¹⁶Hi mingei hi chu zoratin an chiera, midangngei theiloi an mintuma; an ôina saloingei an jûia, an thethenin an insonga male an man rang aomin chu midangngei an minpâk tatak ngâi ani.

Inningnangei le rilnangei

¹⁷Aniatachu, Ku ruolngei, zora vunsâia ei Pumapa Jisua Khrista tîrtonngeiin nangni an rilngei hah riëttit roi.

¹⁸“Sûnnûktak ngei ahong tung le chu, Pathien dônloi mingeiin an ôinangei innimngei jûiin, nangni phengsan rang mi an la hong inlang rang,” nangni an tipe hah.

¹⁹Hi mingei hin insenna sin ngâi, an taksa ôinangei jêka om pungei, Ratha dônloipu ngei an ni.

²⁰Aniatachu, nangni ku ruolngei, nin taksônna inthiengtak chungâ han nin thethenin sin inding roi. Ratha Inthieng sinthotheina han chubaitho roi,

²¹male ei Pumapa Jisua Khrista inriengmuna han kumtuong ringna nangni a pêk rang hah ngâkin Pathien lungkhamna sûnga han om roi.

²²Mulung okchana dônpuengei chungâ han inriengmuna minlang unglâ;

²³midangngei hah mei renga kailitin sanminjôk unglâ; ichi pumin lungkhamna minlang unglâ, aniatachu an sietna ôina saloi kop puon innimngei hah chu heng roi.

Minpâkna chubaithona

²⁴Nin inlet loina ranga nangni donsui theipu le roiinpuitaka amakunga demnaboia râisântaka nangni dar theipu

25mi Sanminringpu Pathien kôm vai han Jisua Khrista ei Pumapa jâra zora vunsai murdi, atûn le tuonsôt tuonsôtin roiinpuina, inlalna, ratna, sinthotheina, le rachanneina ngei om tit rese! Amen.

Chongphuông

Chongphuông 1

¹Hi lekhabu hih Jisua Khrista chongphuông, Pathien'n a tîrlâmngêi min riet ranga a pêk, neinun hong tung kelen rang thurchi hah ani. Khrista'n ma chong ngei hi a vântîrton juongtîrin a tîrlâm John kôm a juong min rieta,

²male John'n a mu murdi ngei hah a misîra. Mahi Pathien chong le Jisua Khrista'n chongtak a phuônga a misîrna ani.

³Hi lekhabua ânziek porepu ngei, le asûnga lei rilmasana chongngei rangâia male ajômpu ngei chu satvur an ni! Hi neinunngêi murdi tungna rang zora hih anâi zoi sikin.

Koiindang sari ngei chibaimûknangei

⁴John renga Asia ramhuol sûnga koiindang sari ngei kôm: Pathien renga moroina le inngêina hah nin ta nirese, A om tit, A om sai le A la hong om rang, le a rêngsukmun makunga ratha sari ngei kôm renga,

⁵male Jisua Khrista renga, rietpuipu taksônom, thina renga inthoi masatak le ramhuol rêngngei roijêkpu khom ani sa. Ama'n mi lungkhama, male ama thina ân pêkna sikin ei sietnangei renga mirtan zoia,

⁶male a Pathien le a Pa sintho rangin a Rêngrama ochaingeiin mi sin zoi. Jisua Khrista kôm han roiinpuina le sinthotheina tuonsôt tuonsôtin om rese! Amen.

⁷En roi, ama hih sômngêi lâia khin a juong rang ani! Mitinin mûng an tih, ama lei sunngêi khom mu sa an tih. Pilchunga mi murdi'n ama châ an tih. Ma angtak han nîng atih!

⁸“Keima hi amotontak le anûktak ki ni,” Pumapa Pathien Râtinchung, A om tit, A om sai le A la hong om rangpu han a ti.

Khrista inlârna

⁹Keima John, nin lâibungpa, le Jisua nûkjûipu a Rêngram mingêi chungu dûktongna hong tung, diertaka tuongna tienga nin champuipa ki ni, Pathien chong le Jisua'n chongtak a phuông thurchi ki misîrna sikin Patmos tuihuola intângin ko oma.

¹⁰Pumapa nikhuo han Ratha'n ku chungu sin a thoa, male ku nûktieng rôl inringtak, bekul inring angin ki rieta.

¹¹Ma anghin a tia, “Neinun nu mu ngei hi miziek roh, male ma lekhabu hi khopuilien sari ngei sûnga koiindang sari ngei kôm muthuon ngei roh: Ephesus, Smyrna, Pergamum, Thyatira, Sardis, Philadelphia le Laodicea.”

¹²Tumo mi rokôk en rangin ko hônheia anîn chu, rângkachak châtidarnangei sari ku mua,

¹³male ma châtidarnagei lâia han munisi aphuozek, a kephangei dênin kâcholiin chuol a haka, a rôpa rângkachak kongkhit a khit ku mua.

¹⁴A sam chu belrimul, aninônchu rodokang dôra chek, male a mitngei chu meichuong angati;

¹⁵a kephangei chu sum-eng meia hâlminvâr le nôtminvâr angin aoma, a rôl miring chu tuitâk rasa angin ani.

¹⁶A kut changtieng ârsi sari ngei a chôia, male a bâi renga khandai beniknei angaidak ahong suoka. A mâi chu sunchimripa nisa râtlâitak angin ani.

¹⁷Ama hah ku mu lehan, a kebula athi angin kên let raka. A kut changtieng ku chung a minggamin, “Chi no roh! Keima hih amotontak le anûktak ki ni, a tia.

¹⁸Keima hi aring hah ki ni! Ki thia, aniatachu atûn chu tuonsôta rangin ki ring nôk zoi ani. Thina chung a le thina rammuol chung a khom rachamneina ko dôn ani.

¹⁹Hanchu, neinun nu mu ngei, atûna aom ngei le nûkka ahong om rang ngei hih miziek roh.

²⁰Ma hih ku kut changtienga ârsi sari nu mu ngei, le rângkachak châtidarna sari ngei omtie inthup chu an ni: ârsi sari ngei chu koiindang sari ngeia vântîrtonngei an nia, male châtidarna sari ngei chu koiindang sari ngei hah an ni.

Chongphuong 2

Ephesus koiindang kôma chongmuthuon

¹Ephesus koiindanga vântîrton kôm hi anghin miziek roh: “Hi chongmuthuon hih a kut changtienga ârsi sari ngei chôia, rângkachak châtidarna sari ngei lâia ânloi bang ngâipu renga ani.

²Ni sinthongei murdi ki rieta; ni sin ranak songtie ngei le ni diertie ngei ki riet. Mi saloingei narngâi theiloi tie ngei le tîrton niloia tîrton inti ngei hah ni minsina, milak anni tih ni riet tih ki riet.

³Ni diera, keima rang jârin nu tuonga, inzal mak che.

⁴Aniatachu mahi nang ke demna ani: atûn hin chu motona anghan chu mi lungkham khâi mak che.

⁵Kho tena ânlet mo na ni zoi mindon roh! Ni sietna renga inhei inla motona ni sintho hah tho nôk roh. Ni sietna renga nê sîr nônchu juong ka ta na châtidarna hah amun renga ki thînpai rang kêng.

⁶Aniatachu ma hih na satna chu ani: Nicolaitanngai sintho hah ke enjôtloi anghan ne enjôtloi sikin.

⁷“Hanchu, kuorngei nin dônin chu, Ratha'n koiindangngei kôm chong a ti ngei hih rangâi roi! “Amenepu kai chu Pathien Ruhuona ringna thingkung linga om hah amara sâk rangin rachamneina pêk ki tih,” tiin.

Smyrna koiindang kôma chongmuthuon

⁸“Smyrna koiindanga vântîrton kôm hi anghin miziek roh: “Hi chongmuthuon hi amotontak le anûktak, a thia hong ring nôkpu renga ani.

⁹Nên taknangei murdi ki riet; nên rieng tih ki riet aniatachu ne nei tatak! Juda tak niloia, Juda inti ngei neinun saloi nang an ti ngei hah ki riet; anni ngei hah Soitan pâla mi an ni!

¹⁰Nu tuong rang ngei hi ite chi no roh. Rangâi roh! nin lâia mi senkhat intângna ina khumin Diabol'n nangni minsin a ta, male sùn sôm tena intaknangei tong nin tih. Thina dênin, keima rangin taksônomin om roh, male ne menena râisânman ringna rênglukhum nang pêk ki tih.

¹¹“Hanchu, kuorngei nin dônin chu, Ratha'n koiindangngei kôm chong a ti ngei hih rangâi roi! “Amenepu ngei kai chu thi inikna han ite minna ngei thei no nih.

Pergamum koiindang kôma chongmuthuon

¹²“Pergamum koiindanga vântîrton kôm hi anghin miziek roh: “Hi chongmuthuon hih khandai beniknei angaidak dônpu renga ani.

¹³Khonmo no om, Soitan rêngsukmun omna hah ki riet. Kei rangin ni dika, male ki rietpuipu taksônomin, Antipas Soitan omna muna an that lâihan khom ku chungna na taksônominna hih mâk mak che.

¹⁴Aniatachu neinunngai alekti chungna demna nang ko dôn: nin lâia mi senkhatin Balaam minchuna chong an pom sikin. Ha mi han mirmilngai biekna neinun an pêk ngei hah an sâkna rang le inditnasaloi an songna rangin Balak hah Israel mingai sietna tieng tipuiraia minjôtna chang a minchu ani.

¹⁵Ma angdên han Nicolaitanngai minchuna chong jûipungei nin lâia no dôn ani.

¹⁶Atûn ni sietnangei renga inhei roh! Nên hei nônchu, no kôm juong lai ka ta, ka bâia hong jôk khandai ngâi lehan ha mingai hah ku juong doi rang kêng.

¹⁷“Hanchu, kuorngei nin dônin chu, Ratha'n koiindangngei kôm chong a ti ngei hih rangâi roi! “Amenepu ngei kai chu manna inthup senkhat ngei pêk ki tih. Lung ngoi achunga riming thar ânziek a changpu ti nônchu tutên an riet ngâi loi hah khom pêk ngei chit ki tih.

Thyatira koiindang kôma chongmuthuon

¹⁸“Thyatira koiindanga vântîrton kôm hi anghin miziek roh: “Hi chongmuthuon hih Pathien Nâipasal, a mitngai mei anga chuong, a kephangei sum-eng anga nôtminvâr renga han.

¹⁹Imo no tho ki riet. Nu lungkhamna, na taksônomna, ni sinthongei, le ni diertie ngei ki riet. Motona nêkin atûn hin sin no tho uol ti khom ki riet.

²⁰Aniatachu ma hih nang ke demna chu ani: nupang Jezebel, Pathien thangtheipu inti ngâinu hah na rangâi thei sikin. Amanu han ki tîrlâmngai inditnasaloi tho minchûn le mirmilngai kôma neinun an pêk ngei sâk rang minchûn aletiang a ruoi ngei ngâi.

²¹Amanu hah a sietnangai renga insîr rang zora ke pêka, aniatachu amanu han a hurna renga inhei nuom mak.

²²Masikin natna jâlmuna pai ka ta, ânrepui ngâi ngei khom asaloi neinunngai an thona renga an insîr nôncu atûn dûktongna chi omtaka pai ngei sâng ki tih.

²³Amanu nûkjûingai khom that pe ka ta, hanchu keima hi mulungrîlngai le mindonnangai riet ngâipu ki ni ti koiindangngai murdi'n riet an tih. Nin mijôn chita nin sintho dungjûiin nangni pêk ki tih.

²⁴“Aninâka nangni Thyatira sûnga omngai kai hi minchuna saloi jûi loa; ‘Soitan chonginthupngai inthûk’ mi dangngaiin an ti inchu loi ngei chungu chu puokrik dang ite nangni bôk pe no ning ki ti ani.

²⁵Aniatachu, ku juong mâka chu, nin dônsai hah nin mutu mindet ngêt rang ani.

²⁶⁻²⁸Amenepu ngei kai, among dêna ku lungdo sin ngei chu, ka Pa renga rachamneina ka man dên hah pêk ki tih: jâtin chungu thîr tôkmol le roijêka pil bêlngai anga ahârhâra tôkkhoi chit rangin rachamneina pêk ngei sa ki tih. Jîng sikhovâr khom pêk ngei sâng ki tih.

²⁹“Hanchu, kuorngei nin dônin chu, Ratha'n koiindangngai kôm chong a ti ngei hih rangâi roi!

Chongphuong 3

Sardis koiindang kôma chongmuthuon

¹“Sardis koiindanga vântîrton kôm hi anghin miziek roh: “Hi chongmuthuon hih Pathien ratha sari ngei le ârsi sari ngei dônpu han a misîr ani. Ni sinthongei murdi ki riet; thi chienin aring riming nu rupert ani!

²Masikin inthoi inla, na la dônte athi vavâng hah a thi let mân min rât roh. Ni sinthongei murdi hih ka Pathien mitmua la chukphar mak ti ki riet.

³Hanchu minchua no om le ni riet ngei hah riittit inla; jôm inla ni sietnangai renga inhei roh. Na har nôncu, inru angin no kôm juong ka ta, male khotik zora mo ku juong rang luu riet no ti nih.

⁴Hannirese mi tômtê Sardis taka han nin puonngai ânthiengin nin dara. Puon ngoi insilin, keima leh munkhatin lôn nin ta, ma anga tho rang piela ânhoi nin ni sikin.

⁵Amenepu ngei kai chu ma anghan puon ngoi insil an ta, male ringna lekhabu renga an rimingngei pai no ning. Ka Pa le vântîrtonngei makunga anni ngei hah ka ta an ni tiin ânthârlakin ku phuong rang ani.

⁶“Hanchu, kuorngei nin dônin chu, Ratha'n koiindang ngei kôm chong a ti ngei hih rangâi roi!

Philadelphia koiindang kôma chongmuthuon

⁷“Philadelphia koiindanga vântîrton kôm hi anghin miziek roh: “Hi chongmuthuon hih mi inthientak le diktak renga ani. Ama hah David chabi dôn, male inkhâr a mo onga anîn chu tutên khâr thei mak ngeia, male a khâra anîn chu tutên mo ong thei mak ngei ani.

⁸Ni sintho murdi ki riet: Sinthotheina likti no dôn tih ki riet; ki minchuna nu jûia male keima rangin taksôn no oma. Na makunga inkhâr ko mo onga maha tutên khâr thei noni ngei ani.

⁹Rangâi ta! Soitan pâla mi senkhatngei, Juda niloia, milak thoa Juda inti ngei ha hongtîr ka ta, ne ke bula chubai nang hong min mûk ki tih. Nang ku lungkham tiin anrêngin riet an tih.

¹⁰Diernân ko chongpêk no jôm sikin, pilchunga mingei minsin ranga rammuol pumpui chungu misinna intakna zora juong tung rang renga khom nang mojôk ki tih.

¹¹Ku juong lai rang kêng ani zoi. ne neinun dôn hah hôih roh, masikin tutên ne menena râisânman ha nang an sut lolina rangin.

¹²Amenepu ngei kai chu ka Pathien biekina chopuiin sin ka ta, male anni ngei han maha mâk khâi noni ngei. An chungu han ka Pathien riming le ka Pathien khopuilien riming, Jerusalem thar, invâna Pathien renga ajuong chum rang ani. Ki riming thar khom an chungu miziek sâng ki tih.

¹³“Hanchu, kuorngei nin dônin chu, Ratha'n koiindangngei kôm chong a ti ngei hih rangâi roi!

Laodicea koiindang kôma chongmuthuon

¹⁴“Laodicea koiindanga vântîrton kôm hi anghin miziek roh: “Hi chongmuthuon hi Amen renga, taksônontak le rietpuipu diktak, Pathien neinun sin ngei murdi bulpui han a misîr ani.

¹⁵Ni sintho murdi ki riet; adâi khom nimak che alum khom nimak che ti ki riet. Na dâiin nom, nu lumin nom ku nuom ani!

¹⁶Lum takloi, dâi takloiin, nu lumchichil sikin ka bâi renga nang michil pai ki tih!

17“Ke nei, neinunsampâr ko dôn; ka nâng murdi ko dôn zoi’ ni tia. Aniatachu nangman idôra ngâisietom le inriengom mo na ni inriet mak che! nêñ rieng, dierkaiboi, le mitcho ni nih.

18Hanchu, ne nei theina rangin ko kôm rângkachak rochôk roh, rângkachak inthienghie. Dierkaiboi inzakpuiom nêñ thomna rang le nêñ sil rang puon ngoi rochôk sa roh. Nu mu theina rangin mitnaloi nu buok rang khom rochôk sa rangin nang ki ril ani.

19Ku lungkham ngei ngân chu ko ngoa ke sep ngâi. Ningsiet inla male ni sietnagei renga inhei roh.

20Rangâi ta! mokota indingin inkhâr ko tok hih; tukhomin ko rôl an rieta male inkhâr an mo ongin chu, insûnga juong ka ta anni ngei leh munkhatin bunêk ki tih, male anni khom keima leh nêk sa an tih.

21Amenepu ngei kai chu ke rêngsukmun kôla min sung ki tih, kei khom ke menea ka Pa rêngsukmun kôla atûna kên sung anghin.

22“Hanchu, kuornei nin dônin chu, Ratha'n koiindangnei kôm chong a ti ngei hi rangâi roi!”

Chongphuong 4

Invâna Pathien chubaimûkna

1Masuole chu inlârna dang ku mua, ko hong ena, invân inkhâr inong ku mua. Male bekul miring angati rôl ki riet masa han ni chongpui, “Hin hong inla, hima suole neinun hong om ngêt rang ngei nang min mu ki tih,” a tia.

2Voikhatrengin Ratha'n mi ompuia. Invân khin rêngsukmun le a chung a mi inkhat ânsung ahong oma.

3A mâi hah jasper le carnelian lungmantam angin ânlanga, male rêngsukmun rihîla han sûminsâng emerald lung rông anghan ânjâm sa.

4Rêngsukmun rihîla han rêngsukmunnei adang sômnikminli an om sa, ma rêngsukmunnei han upa sômnikminli ngei puon ngoi an insila, rângkachak rênglukhumnei inkhumin an insunga.

5Rêngsukmun renga han kôlinleka dapdaptnei, khuonri rahangnei le mechêk puok rahangnei ahong oma. Rêngsukmun motona han châti sari ngei mochokin aoma, mangei hah Pathien ratha sari ngei hah an ni.

6Rêngsukmun moton nanâk han crystal lung anga vâñ lîm-en tuikhanglien angati khom aom sa. Rêngsukmun rihîlin kangkhat tieng khom, kangkhat tieng khom iring parânnei minli motontieng le nûktieng amit sipmat an oma.

⁷Iring inkhatna hah chu ikeibaknei aphuo; inikna chu serâtchal aphuo, inthumna chu a mâi hah munisi mâi aphuo; male minlina chu minmu vuonglâi aphuo ani.

⁸Ma iring parân minli ngei hah manthangei uruk an dôn paka, male anni ngei hah amit sipmat an nia, sângtieng le pêntieng khom. Sûn le jân inngam loiin lâ an thoa: “Ânthieng, ânthieng, ânthieng, Pumapa Pathien Râtinchung, A om sai, a omtit, le a la hong om rangpu chu.”

⁹Iring parân minli ngei han rêngsukmuna ânsung ngâipu tuonsôt tuonsôta ring tit kôm han roiinpuina, miritna le minpâkna lângei an thoa. Ma anga an tho racham han,

¹⁰upa sômnikminli ngei han rêngsukmuna ânsungpu makunga inbokin tuonsôt tuonsôta ring titpu chubai an mûka. An rênglukhumngei hah rêngsukmun motona an dara:

¹¹“Kin Pumapa le kin Pathien! nangma chu roiinpuina, miritna, le sinthotheina man ruopiel ni ni. Neinunngei murdi nangman na sina, male nu lungdoa om le ringna pêk an ni.”

Chongphuong 5

Lekhazuot le Belrite

¹Rêngsukmuna ânsung ngâipu kut changtieng han lekhazuot ku mua; maha kangnika ânziek mohôr sari ngei mohôr ânnam leta ânthom ani.

²Vântîrton râtak ku mua, rôl inringtakin, “Tu mo aminpipna mo-onga, lekhazuot ha aphar thei rang ni zoi?” tiin tânghâi ku mu sa.

³Aniatachu invâna, pilchunga aninônchu rammuol nuoia khom tute lekhazuot mo-onga asûnga a en thei rang reng om mak ngei.

⁴Lekhazuot hah a mo-onga, asûnga a en theiruo tute an om loi sikin ka chap ngungûia.

⁵Hanchu upangei lâia inkhatin ko kôm, “Chap no roh. En roh! Juda jâta ikeibaknei, David richisuonpâra roiinpu han, a menea, male ama han aminpipna sari ngei hah akheka lekhazuot hah a mo-ong thei zoi,” a tia.

⁶Hanchu Belrite hah rêngsukmun alâitak han ânding ku mua, iring parân minli ngei le upangei hah arihîla an om ani. Belrite that sai anghan ânlanga. Maha rikingei sari le mitngei sari a dôna, ma ngei hah Pathien ratha sari ngei pilchung pumpuia tîra om ngei hah an ni.

⁷Belrite hah a sea male rêngsukmuna ânsung ngâipu kut changtieng renga lekhazuot hah ava lâk zoia.

⁸Ma anghan a thoa anîn chu, iring parân minli ngei le upa sômnikleiminli ngei han serânda le rângkachak khuriângei mirimhoia sip chôi pakin Belrite makunga han an inboka, ma ngei hah Pathien mingei chubaithonangei ani.

⁹Anni ngei han lâ thar an thoa: “Nangma chu lekhazuot lâk theiruo le a minpipnangei kheka mo-ong thei ni ni. Thatin no oma, male thina nêpêkna han Pathien ta rangin jâttina mingei, chongtina mingei, namtina mingei le ruitina mingei no rochôk zoi.

¹⁰Kin Pathien sintho rangin rêngrama ochaingei ni sin ngei zoi ani, male anni ngei han pilchunga roijêk an tih.”

¹¹Ko hong en nôka, male vântîrtonngei rôl ki rieta, isâng tamtak le isângrazasôm tamtak an ni! rêngsukmun rihîla han an indinga, iring parân minli ngei le upangei khom an om sa,

¹²male rôl inringtakin lâ an thoa: “Belrite thata omsai hih sinthotheina, neinunsampâr, vârna le râtna, miritna, roiinpuina le minpâkna man theiruo piel ani!”

¹³Male invâna, pilchunga, rammuol nuoia, le tuikhanglien sûnga iring parângei murdi vânnuoia iring murdi ngei le lâ an thoa: “Rêngsukmuna ânsung ngâipu le Belrite kôm han, minpâkna le miritna, roiinpuina le sinthotheina ngei, tuonsôt tuonsôtin om rese!”

¹⁴Iring parân minli ngei han, “Amen!” tiin an thuona, male upangei han inbokin chubai an mûk zoi.

Chongphuong 6

Mohôrngei

¹Hanchu Belrite han mohôr sari ngei lâia inkhat changna hah a mo-ong lâi ku mua, male iring parân minli ngei lâia inkhat han a rôl khuonri ang dôrin, “Hong roh!” a ti ki rieta.

²Ko hong ena male mahan sakor ngoi ku mua. Achunga chuongpu han thalsâili a chôia, male ama hah rênglukhum pêkin aoma. Amenepu'n mene rang angin a jôkpai zoi.

³Hanchu Belrite han mohôr inikna a mo-onga; male iring parân inikna han, “Hong roh!” ti ki rieta.

⁴Sakor dang asen inkhat ahong jôka. Achunga chuongpu kôm han miriemngei inkhat le inkhat an inthat inlôma pilchunga râl ahong suok theina rangin ranak an pêka. Ama hah khandai lienpa khom an pêk sa ani.

⁵Hanchu Belrite han mohôr inthumna a mo-onga; male iring parân inthumna ngei han, “Hong roh!” an ti ki rieta. Ko hong enin chu mahan sakor hâng aoma. Achunga chuongpu han neinun varhna bopkhat a kuta achôia.

⁶Iring parân minli ngei lâi renga rôl rahang angin, “Sukloibu tabong khat sînkhath rathaman, male barley tabong thum sînkhath rathaman. Aniatachu olive thingkungngei le theibilngei chu siet no roh!” ti ki riet.

⁷Hanchu Belrite han mohôr minlina a mo-onga; male iring parân minlina renga, “Hong roh!” ti rôl ki rieta.

⁸Ke enin chu, mahan sakor arông adôngzat ku mua. Achunga chuongpu riming hah Thina ania, male Mithi khuon anûk ajûi sa ani. Anni ngei hah pilchung hi phalminlin semin phalkhat chung a râlîn, maitâmin, ri-ngei le ram sângeiin that rangin rachamneina pêkin an om ani.

⁹Hanchu Belrite han mohôr rangngana a mo-onga. Pathien chong an misîr sika le Pathien rietpuipu an nina tienga taksônoma an om sika thata omngei ratha ha mâichâm nuoia ku mu ngei ani.

¹⁰Anni ngei han rôl inringtakin, “Râtinchung Pumapa, ânthieng le adik! Idôr sôt mo pilchung mingei chung a roijêk loiin le mi thatngei dûk tho loiin no om rang?” tiin an inieka.

¹¹Anni ngei hah puon ngoi an pêk ngei paka, târlâmngei le iempungei adang thata an lei om angdêna om rang ngei hah, an mijôn akip mâka chu la ngâktet rangin an rila.

¹²Male Belrite han mohôr urukna a mo-onga. Mahan ningnu râtak ahonga, male nisa hah samulpuon ahâng angin ahong hângjêta, male thâ khom thisen angin ahong sen zoi ani.

¹³Arsingei ha phâivuopuiin theichang kung anoknôia amara aselngei amathâkriil anghan pilchunga an tâk suo zoi.

¹⁴Invân hah lekhazuot angin ânzuota ân mangpai zoi, male muolngei le tuihuolngei murdi hah an omna renga thînpaiin an om zoi.

¹⁵Hanchu pilchunga rêngngei, roijêkpungei, râlmi uliengei, mineingei le ranak dôngei, le midangngei murdi, suok le zalengei murdi muolchungngeia rôlkuogeia, le lungnuoingeia an inthupa.

¹⁶Muolngei le lungpuingei kôm han, “Mi del unglâ, rêngsukmuna ânsung ngâipu mitngei renga le Belrite taksina renga mi thup roi!

¹⁷An taksina nikhuo chiomtâk ahong tung zoi, male tumo adoi rangin ânding thei ranga?” tiin an koisama.

Chongphuong 7

Israel mingei 144,000

¹Masuole chu, pilchunga le tuikhangliena aninônchu thingkungnei murdia phâivuo arâng khâi lolina rangin phâivuo sûra pilchung rikil minlia an inding vântîrton minli ngei hah ku mua.

²Male vântîrton dang Pathien ring mohôr ânnam nisuotieng renga ahong suok ku mua. Ama'n rôl inringtakin vântîrton minli ngei Pathien'n pilchung le tuikhanglien siet theina racham a pêk ngeia a koisam ngeia.

³Vântîrton han, “Ei Pathien tîrlâmngiei an machalngeia mohôr ei nam mâka chu pilchung, tuikhanglien le thingkungnei hih la siet hi no roh,” a tia.

⁴Male an machalngeia Pathien mohôr nama om ngei mijôn hah rilin ko oma, anni ngei hah 144,000 an ni. Anni ngei hah Israel jât sômleinik ngei renga an nia,

⁵⁻⁸ajât zeta isâng sômleinik an nia: Judah, Reuben, Gad, Asher, Naphtali, Manasseh, Simeon, Levi, Issachar, Zebulun, Joseph, le Benjamin.

Loko tamsabakngiei

⁹Masuole chu ko hong ena, male mahan loko tamsabakngiei an oma mipui tamtie chu tutên telsuoloi dôr an ni! Anni ngei hah namtina mingei, jâtina mingei, chitina mingei, le chongtina mingei puon ngoia invôn an kutngeia lepâibuongei chôiin rêngsukmun le Belrite makunga an inding ku mua.

¹⁰Anni ngei han rôl inringtakin, “Sanminringna hih ei Pathien, rêngsukmuna insungpu le Belrite renga hong kêng ani!” tiin an inieka.

¹¹Vântîrtonngiei murdi hah rêngsukmun, upangei le iring parân minli ngei rihîla han an indinga. Hanchu anni nanâkin rêngsukmun motona han an mâi nuoi mintônin an inboka Pathien chubai an muka,

¹²“Amen! Minpâkna, roiinpuina, vârna, râisânchongrilna, miritna, râtna, le sinthotheina ngei chu tuonsôt tuonsôtin Pathien ta ani! Amen!” an tia.

¹³Upangei lâia inkhatin ko kôm, “Hi puon ngoia invongei hi tu ngei mo an ni, kho renga hong mo an ni?” tiin ni rekela.

¹⁴“Pu, riet mu-ung. Nangman kêng ni riet” tiin ku thuona. Ama'n ko kôm, “Hi mingei hih nunuomlona chiomtak renga jôkriema hong ngei hah an ni. Anni ngei hih an puonngiei Belrite thisen leh rusûkminsâia ânthiengsai ngei hah an ni.

¹⁵Masika han, Pathien rêngsukmun motona indingin sùn le jân a biekina ama sin an tho ngâi ani. rêngsukmuna insung ngâipu han anni ngei hah amakunga rung ngei atih.

¹⁶An vonchâm tet khâi no nia, an tui khom inrâl tet khâi no ni; nisa lum khomin kâng ngei khâi no nia, alum dadang khomin kâng ngei khâi no ni,

¹⁷asikchu Belrite rêngsukmun alâitaka insungpu hih anni ngei Belrihôlpu nîng a ta, male ama'n ringna tuikuongngeia han ruoi ngei atih. Male Pathien'n an mitngei renga mitrithingei murdi hûiminsâi pe ngei atih.”

Chongphuong 8

Mohôr sarina

¹Belrite han mohôr sarina hah a mo-ong lehan konta in-ang dôr chu invân ânthem ngânga.

²Hanchu vântîrton sari Pathien makunga inding ngâi ngei hah ku mua, male an kôm bekul sari an pêk ngeia.

³Vântîrton dang a hongga, rângkachak mirimhoi hâlna kolla chôiin mâichâm kôla ândinga. Ama hah Pathien mingei murdi chubaithonangei le molopa rêngsukmun motona rângkachak mâichâm chungga pêk rangin mirimhoi tamtak an pêka.

⁴Mirimhoi khu hah Pathien mingei chubaithonangei le vântîrton Pathien motona indingpu kutngei renga akal zoi ani.

⁵Hanchu vântîrton han mirimhoi hâlna kolla hah a lâka, mâichâm renga mei le a minsipa, male pilchungga a vôrpaia. Ma han khuonringei le mechêk puok rahangngei, kôlinleka dadaptingei le ningnunggei ahong oma.

Bekulngei

⁶Hanchu vântîrtonngei sari bekul sari chôî ngei hah tum rangin an inthoka.

⁷Vântîrton inkhatna han a bekul a tuma. Iriel le mei, thisen leh inpol ahong oma, pilchungga bun paiin aom zoi. Pilchung munthuma semin munkhat chu akânga, thingkungngei khom munthuma semin munkhat chu akânga, sûlringngei murdi khom akâng sa zoi.

⁸Hanchu vântîrton inikna han a bekul a tuma. Muol lienpa meiin akâng lâitak angati tuikhangliena vôrpaiin aoma. Tuikhanglien ha munthuma semin munkhat chu thisen achang zoia,

⁹tuikhagliena iring parân munthuma semin munkhat chu an thia, male rukuongngei khom munthuma semin munkhat chu asiet sa zoi.

¹⁰Hanchu vântîrton inthumna han a bekul a tuma. Ârsi lienpa, meiser anga chuong, invân renga juong mathâkin tuidungngei le tuinârngei munthuma semin munkhat chungga atâka.

¹¹(Ha ârsi riming hah “Akhana,” ani). Tui munthuma semin munkhat chu ahong kha zoia, male tui hah ahong kha zoi sikin, mi tamtak chu ma tui hah nêkin an thi zoi.

¹²Hanchu vântîrton minlina han a bekul a tuma. Nisa munthuma semin munkhat, thâ munthuma semin munkhat, le ârsingei munthuma semin munkhat chu dêngkhoiin an oma, ma ngei vâh hah munthuma semin munkhat ajîng theina rangin; sîn le jân khom munthuma semin munkhat chu vâh om khâi mak.

¹³Hanchu ko hong ena, minmupui vanlâijôla insângtaka vuongin rôl inringtakin, “Vântîrton dang inthum ngei bekul la hong tum ngêt rang miring hong om rang renga pilchunga omngei chung a idôr mo la hong intak ta ni! O ântak! ântak!” ti ki riet.

Chongphuong 9

¹Hanchu vântîrton rangngana han a bekul a tuma. Invân renga ârsi pilchunga atâk ku mua, male a kôm han khurmongboi chabi an pêka.

²Ârsi han khurmongboi hah a mo-onga, khur renga han meikhu, meipui thi theiloi khuchit angin ahong suoka; khurmongboi renga meikhu han nisavâr le invânlâi amin thim zoi.

³Meikhu renga han khâingei pilchunga an juong tâka, male ainuvtngi sinthotheina an dôn angtakin anni ngei hah sinthotheina pêkin an om ani.

⁴Anni ngei hah sîlنگei, thingkungngi aninônchu sîlring dadangngi chu siet loiin; an machalنگeia Pathien mohôr ânnam loi mingei vai hah siet rangin an ril نگeia.

⁵Khâingei hah hi mingei hih that rangin chu phal nimak نگeia, tha rangnga sînga dûkmintong نگei rangin vai kêng phalna an pêka. Dûkmintongna anatie chu ainuvtin mi abela, ana ngâi angin ani.

⁶Ma tha rangnga sîngan chu thina zong an ta, aniatachu, man no ni نگei; anni نگei han thi rang nuom an ta, aniatachu thina hah anni نگei renga rotpai atih.

⁷Khâingei hah sakoringei râlboula se ranga ânthok نگei kêng an phuo; an lungeia han rângkachak rênglukhumngi phuozeke an khuma, an mâingei hah munisi mâingei kêng an phuo.

⁸An samngi hah nupang sam kêng aphuo, an hângi hah ikeibaknei hâ kêng aphuo.

⁹An rôpنگei hah thîr rôpphongei le thom kêng an phuo, male an manthangi rahang hah sakor tamtak râlboul pana sakorin bêlkaringei an kai rahang aphuo ani.

¹⁰Anni نگei hah ainuvt angin remeingi le beltheinangi an dôna, male an remeingi leh tha rangnga sînga mingei minna theina sinthotheina an dôn ani.

¹¹Khurmongboi enkolpu vântîrton hah an chung a roijêk rangin rêngin an dôn ani. A riming hah Hebrew chongin chu Abaddon ania; Greek rimingin chu Apollyon ania (aomzie chu “Asietpu” tina ani).

¹²Intakna inkhatna chu avun zoi; masuale hin intak oulnangei inik ahong tung rang ala om.

¹³Hanchu vântîrton urukna han a bekul a tuma. Pathien motona rângkachak mâichâm ânding rikil minli ngei renga han rôl ki rieta.

¹⁴Rôl han vântîrton urukna kôm, “Euphrates tuidung roiinpuia vântîrton minli khita omngei ha mojôk ngei roh!” a tia.

¹⁵Hi dârkâr, hi sîn, hi thâ le hi kum ranga inthoksai vântîrtonngei minli hah munisingei murdi munthuma semin munkhat that rangin an mojôk ngei zoia.

¹⁶Râlmingei sakor chung a chuong ngei hah an mijôn tamtie chu million razannik an ni ti rilin ko om ani.

¹⁷Male inlârna han sakorngei le an chung a chuongngei ku mua: rôpphonge me anga sen, sapphire anga dum le sulphur anga eng an dôn a. Sakor lunggei hah ikeibakneingei lu aphuo a, male an bângei renga han mei, meikhu le sulphur ngei ahong suoka.

¹⁸Ha dûk thona inthum ngei: mei, meikhu le sulphur ngei sakorngei bângei renga hong suok han munisingei munthuma semin munkhat chu an that zoi.

¹⁹Sakorngei sinthotheina hah an bângeia le an remeingeia han aoma. An remeingei hah murûngei, lu dôn angin ania, male mangei hah mangin mi an minna ngâi ani.

²⁰Munisi ngei hah dûk thona taka that suoloi ngei hah an kuta an sinngei renga inhei uol mak ngei. Ramkhoringei, rângkachak mirmilngei, sumtak mirmilngei, sumdâr mirmilngei, lung mirmilngei, thing mirmilngei, ite mu theiloi, ite riet theiloi le lôn theiloi biek hah mong uol mak ngei.

²¹An mi thatngei, an dôi mang ngei, inditnasaloi an thongei, aninônchu inru an thongei renga khom insîr uol mak ngei.

Chongphuong 10

Vântîrton le lekhazuot te

¹Hanchu vântîrton râttak dang invân renga juong chum ku mua. Ama hah sôm leh ân pholoma, a lua sûminsâng ânjâma; a mâi hah nisa angin aoma, male a kengei hah mei lungchopuingei angin aoma.

²A kuta han lekhazuot chînte pharsai a choia. A ke chang tieng tuikhangliena a sira, a ke voi tieng tânga a sira,

³male ikeibakneingei an inrâm angin rôl inringtakin ân ieka. Ân iek suole chu mechêk sari ngei hong inringin an thuona.

⁴Mechêk sari ngei an hong chong lehan, miziek rang ko bôka. Aniatachu, “Mechêk sari ngei chong an ti hah ip tit roh; miziek no roh!” tiin invân renga ahong chong rôl ki rieta.

⁵Hanchu vântîrton tuikhanglien le tânga ânding ku mupu han a kut chang tieng invân tieng a phara

⁶invân, pilchung le tuikhanglien male an sûnga omngei murdi sinpu Pathien tuonsôt tuonsôta om titpu rimingin khomâkinsâmin, “Mahan innuna rang reng om khâi noni! Vântîrtonin a tia.

⁷Aniatachu vântîrton sarina han a bekul a tum tena chu Pathien'n a mintuo inthup hah mikhip atih zoi, a tîrlâmngei, dêipungei kôma alei phuong anghan.”

⁸Hanchu invân renga hong chong rôl ki riet han mo rokôk nôka, “Tuikhanglien le tânga ânding vântîrton kuta lekhazuot pharsaia om so sên la va lâk roh,” a tia.

⁹Vântîrton kôm han ke sea male lekhazuot te hah ni pêk rangin ke ngêna. Ama han ko kôm, “Lâk inla male sâk roh; no von sûnga han hong thûr a ta, aniatachu na bâi sûnga han khuoilutui anghan hong thum atih,” a tia.

¹⁰Lekhazuot te hah a kut renga ka lâka male ka sâka, male ka bâi sûnga khuoilutui angin athuma. Aninâka ke melem suole chu ko von sûnga han ahong thûr zoia.

¹¹Hanchu “Namtinngai, chitinngai, chongtinngai le rêngngei tamtak kôm Pathien chong vêlkhat na la misîr nôk ngêt rang tiin rilin ko om ani.”

Chongphuong 11

Rietpuipungei inik

¹Hanchu tôkmol minkhina rotuon angati pêkin ko oma, “Sênla Pathien biekin le mâichâm hah va minkhi inla, asûnga Pathien chubaimûkpu ngei khom tel sa roh, tiin rilin ko oma.

²Biekin khalâi pêntieng ngei ha chu minkhi no roh, anni ngei hah chu sonongngei (chidang jât dangngei) kôm pêk ani zoi sikin, Khopuilien Inthieng chungga tha sômminlileinik sirdên rangpu ngei ha.

³Ki rietpuipungei inik thoilapuon insilin tîr ka ta, male sîn isâng khat razannik sômruk sûng han Pathien chong misîr an tih.”

⁴Ha rietpuipungei inik pilchung Pumapa motona ânding ngei hah olive thingkungngei inik le châtingei inik hah an ni.

⁵Tumakhatin anni ngei hah minna rang an pûtin chu an bâingei renga mei ahong jôka an râlنگei hah akâng minmang ngâi; ma angdên han tukhomin anni ngei hah minna rang an pûtin chu thatin om an tih.

⁶Anni ngei han Pathien chong an misîr sângin chu ruo juong lolina rangin invân khâr theina rachamneina an dôna. Anni ngei han tuinârنگei thisen minchang theina rachamneina khom an dôn sa, mapên han anni ngei hah rammuol hih an nuom dôr ripui murdi le dûkmintong theina rachamneina khom an dôn sa ani.

⁷Min rietna chong an misîr suole chu, khurmongboi renga sarâng hong jôk han anni ngei hah doi a ta. Ama han mene ngei a ta, male that ngei atih,

⁸male an ruokنگei hah an Pumapa an jêmdelna khopuilien roiinpui lamlien han inzamin om atih. Mintêkna rimingin chu ha khopuilien hah Sodom, aninônchu Egypt ani.

⁹Namtina mingei, jâtina mingei, chongtina mingei le chitina mingei han an ruokنگei hah sûnthum chomân en an ta, male phûm rangin phal ngei noni ngei.

¹⁰Ha dêipungei inik ngei han pilchunga dûktongna tamtak an hong mintung sikin, hingei inik thi sikin pilchunga mingei an râisân a ta, râisânân mang an ta male inkhat le inkhat neinunpêk inmuthuon inlôm an tih.

¹¹Sûnthum chomân suole chu Pathien renga ringna phûk an sûnga ajuong lûta, male an indinga; male amu ngei murdi han an chi sabak zoi.

¹²Hanchu dêipungei inik kôm han invân renga rôl inringtakin, “Hin hong roi!” ti chong an rieta. An râlنگei an enchungchakin sûm lâia invân tieng an kal zoi.

¹³Ma lâitak han ningnupui ahôn nîkka; khopuilien mun sôma semin munkhat chu achima, male mi isâng sari thatin an oma. Aringa la omنگei han an chi sabaka, male invâna Pathien roiipuina hah an manpâk zoi.

¹⁴Intakna inikna chu avun zoia, aniatachu intakna inthumna hah hong tung lai atih.

Bekul sarina

¹⁵Hanchu vântîrton sarina han a bekul a hong tuma, “Atûn rammuol roijêkna chu ei Pumapa le Messiah ta ahongni zoi, male ama han tuonsôt tuonsôtin roijêk atih,” tiin invâna rôl inringtakنگei ahong oma.

¹⁶Hanchu upangei sômnikminli Pathien motona an rêngsukmunngeia ânsung ngei han inbokin Pathien chubai an mûka,

¹⁷an ti chu: “Pumapa Pathien Râtinchung, aom tit le aom saipu! Ni sinthotheina roiinpui hah lâkin roijêk nu phut zoi sikin no kôm râisânchong kin misîr!

¹⁸Sonongنگei hah ningthiknân an sip zoia, na taksi zora khom ahong tung zoi sikin, athi ngei roijêk pe ngei rang zora ha. Ni tîrlâmنگei, dêipungei râisânman pêk rang zora ahong tunga, male ni mingei murdi, nangma ranga mân thona

dônpu ngei murdi, alien le achîn ân-angarin. Pilchung sietpu ngei sietminmang rang zora ahong tung zoi!” tiin Pathien chubai an mûka.

¹⁹Hanchu invâna Pathien biekin hah ânonga, mahan Chonginkhitna Kok hah mu theiin aoma. Hanchu kôlinlek dadaptingei, khuonringei mechêk puokngei, ningnungei le iriel inriktak ngei ahong om zoi.

Chongphuong 12

Nupangnu le Dragon

¹Hanchu misîrtheiloi neinun le roinpuitak invâna ânlanga. Mahan nupangnu aoma, ân vônâ hah nisa ania, male a ke nuoia thâ aoma male a lua han rênglukhum ârsi sômleinik kop aoma.

²Amanu han nâinei lai a ta, male nâihana tuongin chapin ân ieka.

³Misîrtheiloi neinun dang invâna ânlang nôka. Mahan Dragon sen lienpa lungiei sari dôn le rikingei sôm dôn, a lu zeta rênglukhum inkhum in an oma.

⁴A remei leh invâna ârsingei munthuma semin munkhat a jêma, pilchunga ajuong mathâk zoi. Nupangnu nâineisuo a sâk kelen theina rangin a moton tieng han ândinga.

⁵Hanchu amanu han nâipasal a neia, namtina mingei chungâ thîr tôkmol leh roijêk rangpu ha. Aniatachu Pathien le a rêngsukmun tieng rangin nâipang hah sutpaiin le lâkpaiin aoma.

⁶Nupangnu hah chu ramchâra, Pathien'n mun a minsuk pena, sùn isângkhat razannik sômruk sûnga donsûia a omna rang tieng han a rot zoi.

⁷Hanchu invâna râl aom zoia. Michael le a vântîrtonngeiin dragon hah doiin an inbuonpui, ama le a vântîrtonngei khom an inbuonpui dêna;

⁸aniatachu, dragon hah motorin aom zoi, ama le a vântîrtonngei hah chu invâna om rangin phal khâi mak ngei.

⁹Hanchu dragon lienpa, tienlâia murûl, Diabol aninônchu Soitan an ti ngâi, rammuol pumpui huongpu hah an mathâk pai zoi. Ama le a vântîrtonngei murdi khom pilchunga an juong mathâk pai ngei zoi.

¹⁰Hanchu invâna rôl inringtakin, “Atûn chu ei Pathien sanminringna le Rêngpa anghan a sinthotheina le a Messiah rachamneina ngei hah ajuong minlang zoi! Ei Pathien motona indinga sùn jâna ei lâibungngei le ei sarnungei nôn ngâipu hah invân renga an mathâk pai zoi.

¹¹Belrite thisen le chongtak an phuong sika han ei lâibungngei le ei sarnungei menena an changa, an ringna khom thi ngam rakin an phal sa zoi.

¹²Masikin nangni invânngiei le asûnga omngei, nin râiminsân ta roi! Aniatachu pilchung le tuikhanglien rangin idôra ântak mo ani zoi! Asikchu Diabol hah nin

kôm ajuong chum zoia, male ama hah taksinân a sipa, zora bongte vai ke a dôn zoi ti a riet sikin,” a ti ki rieta.

¹³Dragon han pilchunga juong mathâk paiin aom zoi tih ânriet lehan nâipasal nei nupangnu hah anûk a rujûl phut zoi.

¹⁴Amanu hah dragon'n a tôn phâk lolina rang kum thum in-ang donsûia a omna rang mun ramchâr tieng a vuong theina rangin minmupui mantha inik ngei hah pêkin aom zoi.

¹⁵Nupangnu hah tuiin achôipai theina rangin a nûka dragon'n a bâi renga tuilien angin aphîta.

¹⁶Aniatachu pilchungin nupangnu hah asana; a bâi a-âng a dragon'n tui aphît hah amelem zoi.

¹⁷Dragon hah nupangnu chung a ningthik sabaka, male a richisuonpârngei a la omngei Pathien chongpêk jômpu ngei le Jisua chongtak phuonga taksônom ngei murdi hah doia inbuonpui rangin a se zoi.

¹⁸Male dragon hah tuikhanglien panga han ânding zoi.

Chongphuong 13

Sarângngei inik

¹Hanchu sarâng tuikhanglien renga hong jôk ku mua. Rikingei sôm dôn le lungעי sari dôn ania; a riki zeta han rênglukhum aom leta, male a lu zeta han Pathien êrona riming aom sa.

²Sarâng ku mu hah ikeiarsi aphuo, a kengei hah ivom kengei aphuo male a bâi hah ikeibaknei bâi aphuo. Dragon han sarâng kôm a sinthotheina, a rêngsukmun le a rachamneina lientak ngei hah a pêka.

³Sarâng lungעי kâra inkhat hah thi theina dôra popin ku mua, aniatachu a sâbê hah ahong dam zoi. Pilchung pumpuia mingעי han an kamâma, sarâng nûk an jûi zoia.

⁴Sarâng kôm han a rachamneina a pêk sikin dragon hah mi murdi'n chubai an mûk zoi. Anni ngei han sarâng khom chubai an mûk sa, “Sarâng anga hi tumo aom? Tumo a doi thei rang?” tiin.

⁵Sarâng hah inpâk thei rang le Pathien êro thei rangin phal ania, male tha sômminlileinik sûnga rachamnei rangin phal ani sa.

⁶Pathien le a riming, aomna ngâi mun le invâna omngei murdi khomâksâm a phut zoi ani.

⁷Pathien mingעי doia mene rangin phal ani zoia, chitin, namtin, chongtin, le jâtin chung a rachamneina a kôm pêkin aom zoi.

⁸Rammuol insieng mâna Belrite that sai ta ngei ringna lekhabua an riming chuongsai ngei tilooin pilchunga omngei murdi'n ama chubaimûk an tih.

⁹“Hanchu, kuorngei nin dônin chu rangâi roi!

¹⁰Tukhom suoka om rang anîn chu suoka om tatak a ta, tukhom khandai that rang anîn chu khandai leh thatin om tatak atih. Pathien mingei chu an tuongdier rang le taksônoma an om ranga koi an ni.”

¹¹Hanchu sarâng adang pilchung renga ahong jôk ku mua. Belrite angin rikingei inik a dôna, male dragon angin a chonga.

¹²Sarâng inkhatna rachamneina lientak hah sarâng masa makunga a manga. Pilchung le a chung a miriem omngei hah sarâng masa thi theina dôra popsai, a dam nôk hah chubaimûk rangin a dânderîta.

¹³Ma sarâng inikna han sininkhêlgei roiinpui a thoa; invân renga pilchunga mi murdi mitmua mei a juong musuma.

¹⁴Male sarâng inkhatna mitmua sininkhêlgei tho ranga phalna a man sika han pilchung mingei murdi a huonga; an kôm, sarâng khandai pop sai la dam nôk miritna rangin ama rimil sin rangin chong a ril ngeia.

¹⁵Sarâng inkhatna rimil hah a chong theina rang le chubaimûk loi ngei murdi a that theina rangin sarâng inikna kôm han ringna phûk pêk theina rangin phalna pêk ani.

¹⁶Mingei murdi, achîn alien, anei ânrieng, suok le zalen mi khom an kut changtiengngeia aninônchu an machalngeia sînthona dôn pak rangin a dânderîta.

¹⁷Sarâng riming aninônchu a riming number sînthona dônloi ngeiin chu tutên ite rochôk theiloi le zuor theiloi rangin.

¹⁸Mahin vârna anâng. Tukhom riettheina dônin chu sarâng number hah aomtie ha sût rese, munisi riming number ani sikin 666 ani.

Chongphuong 14

Belrite le a mingei

¹Hanchu ko hong ena, male Belrite ha Zion Tâng chung; mingei 144,000 an machalngei han ama riming le a Pa riming ânziek leh an inding ku mua.

²Male invân renga rôl, tuitâk rahang angati le mechêk puok rahang inringtak angin ki rieta. Serânda âtpungeiin an serândangei an ât miringhoi angin ânringa.

³Rêngsukmun motona han mingei 144,000 iring parân minli ngei le upangei an indinga; anni ngei han lâ thar an thoa, anni ngei vai an inchu thei hah. Rammuola mi murdi lâia anni ngei vai hah ratan an ni.

⁴Anni ngei hah pasal an thethena ânthienga om, nupang leh inmannangei dônloi; ânthienghie i an ni. Belrite sênana an jûi ngâi. Anni ngei hah Pathien le Belrite kôma pêk masatak ni ranga munisi chitin lâi renga ratan an ni.

⁵Anni ngei hah milakngei ril tet ngâi mak ngeia; dikloina reng dôn mak ngei.

Vântîrton inthum ngei

⁶Hanchu pilchunga mi murdi, namtina mingei, jâtina mingei, chongtina mingei, chitina mingei kôm tânghâi rang Thurchi Sa dôn vântîrton dang invânlâia insângtaka vuong ku mua.

⁷Ama han rôl inringtakin, “Pathien mirit unglâ male ânâlana minpâk roi! Mingei murdi chungâ roijêk rangin a zora ahongtung zoi sikin. Invân, pilchung, tuikhanglien le tuinârngei sinpu hah chubaimûk roi!” a tia.

⁸Vântîrton inikna han vântîrton inkhatna a hong jûia, “Amanu hah ânlet zoi! Babylon roiinpui ânlet zoi! Amanu han a hurna uain rât mingei murdi min nêk ngâi hah ânlet zoi!” a tia.

⁹Vântîrton inthumna han vântîrton inkhatna le inikna a jûia, rôl inringtakin, “Tukhom sarâng le arimil chubaimûk ngâipu ngei le sînthona an machala aninônchu an kuta dôn ngei chu

¹⁰anninâkin Pathien uain, a ningthikna uain, a taksina kilâta a sung minsip hah nêk an tih! Ma anga thopu ngei murdi chu vântîrton inthieng ngei le Belrite makunga meia le kâta dûkphenêngin om an tih.

¹¹Anni ngei dûkphenêngna meikhu hah tuonsôt tuonsôtin chungtieng kal tit atih. Sarâng le arimil chubaimûkpu ngei le ariming sînthona dôn ngei ta rangin chu sîn le jân ahoina reng om pe ngei khâi no nih.”

¹²Mahin Pathien mingei, a chongpêkngêi jôma Jisua ta ranga taksônôm ngei chu tuongdierna an dôn rang ani.

¹³Hanchu invân renga rôl ki rieta, “Mahi miziek roh: atûn renga chu Pumapa sinthona taka thi ngei chu satvur an ni!” a tia. “Ani tatak!” tiin Ratha han a thuona. “An sinsôlna renga inngam an tih, an sinthona marangei han a jûi ngei sikin.”

Pilchung bu-ât zora

¹⁴Hanchu ko hong ena, male sôm ngoi aoma, male sôm chungâ ânsungpu hah munisi aphuoâ, a lua rângkachak rênglukhum a khuma, a kuta kôite ngaidak choiin ânsunga.

¹⁵Hanchu vântîrton dang Pathien biekin renga ahong jôka, sôm chung a ânsungpu kôm han rôl inringtakin, “No kôite mang inla bu hah ât roh, a ât zora ani zoi; pilchunga bungei hah an min zoi sikin,” a tia.

¹⁶Hanchu sôm chung a ânsungpu han pilchunga a kôite a vaia, male pilchung bungei hah âtin an om zoi.

¹⁷Hanchu vântîrton dang invâna Pathien biekin renga a hong jôk ku mua, male ama khom kôite ngaidak a dôn sa.

¹⁸Hanchu vântîrton dang, mei enkolpu hah mâichâm renga a hong a. Ama han kôite ngaidak dônpu kôm han rôl inringtakin, “No kôite mang inla, male pilchunga grapebil renga grapengei khu juong ât roh, grapengei khu amin zoi sikin!” tiin ân ieka.

¹⁹Masikin vântîrton han a kôite pilchunga a vaia, grapengei hah a âta, male Pathien ningthikna grape sômna khurpuia han a thun zoi.

²⁰Grapengei hah khopuilien pântienga grape sômna khura han a sôma, male ma khur renga han thisen tuilien ahong suoka, aseki kilometer razan thum, ânthûk meter inik dôr ani.

Chongphuong 15

Vântîrtongei leh anûktak ripuingei

¹Hanchu invâna misîrtheiloinei ninun dang, roiipuitak le kamâmom ku mua. Mahan vântîrtongei sari leh ripuingei sari an oma, maha anûktakna ania, Pathien taksina misîrna mongnatak ngei an ni zoi sikin.

²Hanchu mei leh ânpol lîm-en tuikhanglien phuozeke ku mua. Sarâng menepu ngei rimil le riming number dônpu ngei khom ku mu ngei sa. Anni ngei hah Pathien'n a pêk ngei serândangei chôiin lîm-en tuikhanglien kôla an indinga

³male Pathien tîrlâm, Moses lâ, le Belrite lâ hah an thoa: “Pumapa Pathien Râtinchung, ni sinthongei chu idôra roiinpui le kamâmom mo ani zoi! Namtingei Rêngpa, na lampuingei chu adikin asa tatak!

⁴Pumapa tumo nang rin loaia ânding loi rang? Tumo no roiinpuina phuong nuomloi rang? Nangma vai ke ânthieng ni ni. Namtingei hong an ta male chubai nang mûk an tih, ni sintho adik ngei hah mi murdi'n an mu sikin.”

⁵Masuale han invâna biekin ânong ku mua, asûnga han Puon In Inthieng aoma.

⁶Vântîrtongei sari ripuingei sari chôinei ngei hah biekin renga an hong jôka, puoninnêm ânthieng ânârdap leh invôn an rôpungei han rângkachak kongrûngei an khita.

⁷Hanchu iring parân minli ngei lâia inkhat han vântîrton sari ngei kôm han Pathien tuonsôt tuonsôta ring titpu taksina sip, rângkachak khuriâingei sari a pêka.

⁸Biekin hah Pathien roiinpuina leh sinthotheina meikhûn asip zoia, male vântîrton sari ngeiin ripuingei sari an hongchôi hah ahek mâka chu Pathien biekin hah tute lût thei mak ngei.

Chongphuong 16

Pathien taksina khuriâingei

¹Hanchu Pathien biekin renga han rôl inringtakin vântîrton sari ngei kôm han: “Se unglâ, Pathien taksina khuriâi sari ngei hah pilchunga juong bunpai roi!” tiin chongin ki rieta.

²Vântîrton inkhatna hah a sea, a khuriâi hah pilchunga ajuong bunpai zoi. Sarâng sînthona dônpu ngei le a rimil chubaimûkpu ngei chungâ han pânâsie natak asuok zoia.

³Hanchu vântîrton inikna han a khuriâi hah tuikhanglien sûnga a bunpaia; tui pumpui hah mithi thisen ahong om zit zoi, male tuikhangliena iring parângei murdi an thi let zoi.

⁴Hanchu vântîrton inthumna han a khuriâi hah tuidungngei le tuinârngei han a bunpaia, thisen ahong chang zit zoi.

⁵Vântîrton tuingei enkolpu han, “O Mi Inthieng, A om tit le A om sai piel! No roijêkna chu adik ani.

⁶Anni ngei han Pathien mingei le dêipungei thisen an mu suok sika thisen nêk rang ne pêk ngeia. An man rang rohoi piel an man ani!” a ti ki rieta.

⁷Hanchu mâichâm renga han rôl ki rieta, “Pumapa Pathien Râtinchung! No roijêknangei chu adikin asa tatak ani!” a tia.

⁸Hanchu vântîrton minlina han a khuriâi hah nisa chungâ a bunpaia, male nisa hah miriemngei kâng minlôngzit rangin phal ani zoi.

⁹Anni ngei hah nisa lum taka kâng minlôngin an om zoia, ha dûktongna ripuingei chungâ rachamneipu Pathien riming hah khomâk an sâma. Aniatachu an sietnangei renga inheiin ânâlâna minpâk uol mak ngei.

¹⁰Hanchu vântîrton rangngana han a khuriâi hah sarâng rêngsukmuna han a bunpaia. A rêngam hah ijîngin abômkhap zoia, miriemngei hah ana an riet rai sikin an meleingei an peta,

¹¹male an nangei sik le an pângei sikin invâna Pathien khomâk an sâma. Hannirese an sintho saloi lampuingei renga hah inhei uol mak ngei.

¹²Hanchu vântîrton urukna han a khuriâi hah Euphrates tuidung lien han a bunpaia. Nisuo tienga rêngngei a hong rang ngei ta rangin lampui sinsai ani theina rangin tuidung hah akangphar zoi.

¹³Hanchu dragon bâi, sarâng bâi le dêipu dikloi ngei bâi renga ratha inthiengloi ngei inthum uichokngei angati ku mua.

¹⁴Anni ngei hah ramkhoringei rathangei sininkhêl ngei sin ngâi an ni. Pathien Râtinchung Nikhuo roiinpuia indoina taka hong koi mintûp rangin ma ratha inthum ngei ha rammuol pumpuia rêngngei murdi kôm an se zoi.

¹⁵“Rangâi roh! Inru angin kêng ku juong rang! Masikin mipui kêra dierkaiboia lônin mâimôk an shak lolina rangin, tukhom inningchiena om ngâipu le a puonngei insilchienna om ngâipu chu satvur ani!”

¹⁶Hanchu rathangei han rêngngei hah munkhata Hebrew chongin Armageddon an ti muna han an koibûm ngei zoi.

¹⁷Hanchu vântîrton sarina han a khuriâi hah phâivuo kêra a bunpaia. Biekina rêngsukmun renga rôl inringtak ahong oma, “Ânthot zoi! a tia.

¹⁸Mahan kôlinleka dadaptingei, mechêk puokngei, le ningnupuingei ahong oma. Munisi ngei sinphut renga ma angdôra ningnupui hah chu la om ngâi maka; maha ningnupuingei lâia a siettak ala ni!”

¹⁹Khopuilien roiinpuui hah munthumin ânphala, male rampumpuingeia khopuiliengnei sietin an om zoi. Pathien'n Babylon roiinpuui hah a riettita, male a khuri le uain a min nêka—a ningthik sabakna uain hah.

²⁰Tuihuolngei murdi ân mang rieia, muolngei murdi khom ân mangrip zoi.

²¹Iriel lientatak ngei her sôm ranga dôra rik, invân renga miriemngei chung ajuong tâka, ha iriela dûktongna ripui an tong hah ana rai sikin Pathien khomâk an sâm zoi.

Chongphuong 17

Notizuor inthang

¹Hanchu vântîrton sari ngei khuriâi sari chôi ngei lâia inkhat a hong a, ko kôm, “Hong roh, tuidung tamtak kôla sin khopuilien roiinpuia notizuor inthang dûkmintonga om rang tie hah nang min mûng ki tih, a tia.

²Pilchunga rêngngeiin amanu leh an inrêpuui ngâia, pilchunga mingei murdi khom an inrêpuina uain nêkin an inrûi ngâi.”

³Ratha'n ni manga, male vântîrtonin ramchâra ni tuonga. Mahan Pathien êrona riming mizieka sip, lungui sari le rikingei sôm dôn, sarâng asen chung ajuong nupang ku mua.

⁴Nupangnu hah puon senduk le seninlârin ân voa, rângkachak retheingei, lungmantamngei le lungintêrngei leh ân voa. A kuta mitir om le a hurna porinchena neinunngeia sip rângkachak khuri a chôia.

⁵Amanu machala han riming, aomtie inthup, “Babylon roiinpui, rammuola notizuorngei murdi le pinkuohurngei nû,” tiin miziekin aoma.

⁶Male ha nupangnu hah Pathien mingei thisen le Jisua ranga iemom sika thata omngei thisen inrûiin ku mua. Amanu hah ku mu lehan, ka kamâm sabaka.

⁷“Itho mo na kamâm baka?” tiin vântîrton han mi rekela. Nupangnu le a chuongna sarâng lunggei sari le rikingei sôm dôn omtie inthup nang ril ki tih.

⁸Sarâng hah voikhat chu a lei ringa, aniatachu ring khâi maka; khurmongboi renga hong jôk a ta, in mangna han sêng atih. Pilchunga miriem omngei, rammuol insieng mâna ringna lekhabua an rimingngei mizieka omloi ngei han sarâng hah an mu tena chu anrêngin kamâm an tih. Voikhat chu a ringa; atûn chu ring khâi maka, hannirese la hôn lang nôk atih.

⁹Mahin vârna le rietheina anâng. Lu sari ngei hah nupangnu insungna muol sari ngei hah an ni. Anni ngei hah rêngngei sari ngei khom an ni sa:

¹⁰rangnga ngei chu an inleta, inkhat chu alân lala, inkhat chu la hong inlal maka, hong inlal khomrese chomolte vai roijêk atih.

¹¹Male sarâng voikhat alei ringa, aniatachu aring khâi loi khom hah sari ngei kâra inkhat rêngpa irietna ania, in mangna tieng a se tir zoi ani.

¹²“Riki sôm nu mu ngei hah rêngngei sôm ala hônlal loi ngei hah an ni, aniatachu sarâng le rêngngei anghan konta khat chu inlal rangin rachamneina pêk la nîng an tih.

¹³Ma sôm ngei hah anrêngin an neinunkhîn dôn munkhat ania, male an sinthotheina le rachamneina hah sarâng kôm pêk an tih.

¹⁴Belrite hah doiin inbuonpui an ta; aniatachu Belrite hah pumangei Pumapa le rêngngei Rêngpa ani sikin anni ngei hah mene ngei a ta, a menena hah a koi ngei, a thangsai ngei, le taksônoma ama nûkjûipungei khomin changsa an tih.”

¹⁵Ma vântîrton nanâk han ko kôm, “Notizuornu insungna ngâi tuingei nu mu hah, namtinngai, mingei, jâtngai le chongngai an ni, a tia.

¹⁶Rikingei sôm le sarâng nu mu ngei han notizuornu hah dem an ta; a neinun dôn ngei murdi lâk pe let an ta, akorongin mâkrak an tih; a meh khom sâk an ta, mei leh hâlminmang an tih.

¹⁷Pathien chongngai le a neinunkhînngai ahongtung adik theina rangin an sinthotheina sarâng kôm pêk rangin Pathien'n an mulungngai sûnga inruolna a dar pe ngeia.

¹⁸“Nupangnu nu mu hah khopuilien roiinpui pilchunga rêngngei chung a roijêk ngâipu hah ani.”

Chongphuong 18

Babylon ânletna

¹Masuale chu vântîrton dang invân renga juong chum ku mua. Ama han rachamneina lientak a dôna, male a roiinpuinân pilchung pumpui a êlminvâra.

²Ama han rôl inringtakin ân ieka: “Amanu hah ânlet zoi! Babylon Roiinpui hah ânlet zoi! Amanu hah atûn chu ramkhoringei omna le ratha innim ngei; mitir om jâtngai murdi le vâ innim ngei chekinbuolna a hongni zoi.

³Namngei murdi'n amanu uain hah an nêka a hurna uain rât hah. Pilchunga rêngngeiin amanu hah an inrêpui ngâia, male a hurna zotorboi renga rammuola sadâi mingei an neipui ngâi,” tiin.

⁴Hanchu invân renga rôl dangin: “Hong jôk roi, ki mingei! Amanu renga hah hong jôk roi! Amanu sietnagei han nin inchel tet rang nimak; Amanu dûktongna han khom nin tong rang ni tet mak!

⁵Amanu sietnagei hah invân insângtak ahong sunrak zoia, male Pathien'n a dikloina lampuingei khom a riëttit ngâi.

⁶Nin chung a tholam anghan a chung a khom tho unglâ; a tho ngei murdi hah bâknikin thun nôk roi. Ju nêk ranga nangni a mintuo pe anghan bâknika râtin a kilât minsip pe roi.

⁷Amanu hah dûktongna tamtak le ngâisietshak roi roiinpui an ti le hoiinhâia amanunanâk ânpek anghan. Amanunanâk mulungrîlin ân tia:

‘Mahin, rêngnûn kên sunga! Meithâi reng ni mu-ung, Ngâisietna reng tong tet no ning!’

⁸Hima sikin, sûnkhat sûngin amanu hah dûktongna leh ripuingei, natna, ngâisietna, le mâitâm hong tung pe atih. Male amanu hah mei leh hâlin om atih, asikchu amanu, a roijêkpu hah, Pumapa Pathien râtak ani,” tiin ki rieta.

⁹Pilchunga rêngngei amanu ânreipui ngâi ngei le hoiinhâipui ngâi ngei han ma khopuilien kângna khu hah an mu tika chu chapin la châ an tih.

¹⁰Amanu dûktongna hah tong sa ni-ung ti an chi sikin alazanna an indinga. Anni ngei han, “Babylon khopuilien roiinpui le det! Nu chungroi ântak! Nu chungroi ana! Konta khat sûngin te dûkmintongin no om zoia!” an tia.

¹¹Pilchunga sadâi mingei khom han amanu hah beidongin an châ zoia, tutên an neinunngai an rochôk khâi loi sikin;

¹²tutên an rângkachak, sumdâr, lungmantamngai, le lungintêrngai; an rosompun neinunngai, puonsendukngai, puoninnâlngai, le puonseninlârngai;

thing mirimhoi jât dadangngei le sâiha leh an sin ngei murdi le thing manluttak, sumdâr le thîr le sâilungvâra an sin ngei;

13 male thingruzungthumngei, sâkjât mirimhoi ngei, mirimhoi hâl jât ngei, murra le bero, uain le sariek, vâipôldi le bu, serâtte le belri, sakor le sakorkaringei, suokngei le munisi ringnangei an ni.

14 Sadâi mingeiin amanu kôm han, “Neinun asa ngei dôn ranga nu nuom murdi hah ân mang suo zoi, male ne neina le ne enhoina murdi ahek zoi, man nôk tet khâi no ti nih!” an tipea.

15 Sadâi mingei ma khopuiliena sadâi an thona sika hong nei ngei han, a dûktongna han tong sa ni-ung tih chi sikin alazanna inding an tih. Beidongin châ an ta,

16 male, “Khopuilien roiinpui rangin idôrmo ântak! Idôrmo ana! Amanu han rosompun, puonsenduk le seninlâr, male rângkachak retheingei, lungmantakngei le lungintêrngei leh ânvo ngâia!

17 Male konta khat sângin te a neinunsampâr murdi ân mang let zoi hi,” tîng an tih. Rukuonga ulienngei le a chuongngei, le rukuong chôipungei le adadangngei tuikhangliena ânloa ânvai ngei murdi khom alazanna indingin,

18 male amanu kângna meikhu hah an mûn chu: “Hi khopuilien roiinpui anga khopuilien hi chu la om reng ngâi mak!” tiin an inieka.

19 An lua phildi an phula, beidongin an chapa, “Khopuilien roiinpui rangin, idôra ântak! Idôra ana mo ani zoi! Amanu hah khopuilien a neina sika tuikhangliena rukuong dôn ngei khom lei nei sa thei! Konta khat sângin le neinunngai murdi ân mang let zoia!” an tia.

20 Invân le Pathien mingei nan râiminsân roi! tîrtonngei le dêipungei nin râiminsân roi! Nin chung a tholam ang takin Pathien'n a dem zoi sikin!

21 Hanchu vântîrton râttak hin bunôinalung lienpa dôra angha a lâka male tuikhangliena a vôrra, “Babylon khopui roiinpuien chu hima dôra nân vôr nîng a ta, tutên mu nôk tet khâi noni ngei, a tia.

22 Serânda miringngei, munisi rôlngei, theili miringngei le bekul miringngei nu sûnga riet nôk ni tet khâi no nih! Sin zongna lama a sin thei mi reng nu sûnga om tet khâi noni ngeia; male nu sûnga han sângsuk rahang khom riet nôk ni tet khâi no nih!

23 Nu sûnga han châti vâr khom mu nôk tet ni khâi no nia; mâk le moi rahang reng nu sûnga han riet ni tet khâi no nih. Na sadâi mingei hah rammuol pumpuia mi lienngai an nia, male no dôl dikloiin rammuol pumpuia mingei nu huong ani!”

²⁴Babylon hah dêipungei le Pathien mingei thisen suokna khopuilien ani sikin dûkmintongin aoma; ani, pilchunga thata omngei murdi thisen suokna ani.

Chongphuong 19

¹Masuole han invâna loko mipui tamtak ngei he rahang inringtak angati, “Pathien minpâk roi! Sanminnringna, roiinpuina, le sinthotheina ngei chu ei Pathien ta ani! ti ki rieta.

²A roijêknangei chu adikin asa ani! Ama han notizuor inthang, ânreña sika pilchung siet ngâi le a tîrlâmngei that ngâinu theiloi minchangin dûk a mintong zoi.”

³An iniek sira, “Pathien minpâk roi! Khopuilien roiinpui kâng minhekna meidonngei renga meikhu chu tuonsôt tuonsôtin chungtieng kal tit atih!”

⁴Upangei sômnikminli le iring parân minli ngei han inbokin, “Amen! Pathien minpâkin om rese!” tiin rêngsukmuna insungpu hah chubai an mûka.

Belrite inneina ruolhoitho

⁵Hanchu rêngsukmun renga han rôl ahôn ringa, “Ei Pathien manpâk roi, a tîrlâmngei murdi le mingei murdi, achîn alien, ama mirit tho ngei murdi'n!” a tia.

⁶Hanchu loko tamtak rahang, tuitâk rahang angati, mechêk puok rahang inringtak angati, “Pathien minpâk roi! Pumapa ei Pathien Râtinchung hih Rêngpa ani! an ti ki rieta.

⁷Ei râiminsân ei ti u; a roiinpuina minpâk ei ti u! Belrite innei zora ahong tung zoi, male a moi khom amananâkin ânthok zoi.

⁸Amanu hah puoninnêm ântêrdap insil rang pêkin aom zoi.” (Puoninnêm hih Pathien mingei sintho asa ngei hah ani).

⁹Hanchu vântîrton han ko kôm, “Mahi miziek roh: Belrite inneina ruolhoia siela omngei chu satvur an ni.” Male vântîrton han abôk sira, “Ma ngei hi Pathien chong dik ngei ani,” a tia.

¹⁰A ke bula chubaimûk rangin kên boka, aniatachu ama'n, “Ma anghan tho no roh! Keima khom ni tîrlâm champui le iempu champuingei, Jisua chongtak phuonga pompu ngei murdi na champui kêng ki ni. Pathien chubaimûk roh!” ni tia. Jisua chongtak a phuong hih dêipungeiin mohôkna chongngei an misîr ngâi hah ani.

Sakor ngoi chungu chungpu

¹¹Hanchu invân ânong ku mua, male mahan sakor ngoi aoma. Achunga chungpu hah Taksônom le Adik ani; ama han adiktakin roi a jêka a râlнгеi a doi ngâi.

¹²A mitngei hah meidon aphuo, male a lua rênglukhumngei tamtak ân khuma. A chung a riming ânziek amananâk pêna chu tutên imo aomtie an riet theiloi a dôna.

¹³Kâcholiin chuol thisen ân zozit ân haka. A riming chu, "Pathien Chong," ani.

¹⁴Invâna râlmingei han a nûk an jûia, puoninêm ngoi ân thieng leh invôn sakor ngoi ngei chung a chuonga.

¹⁵A bâi renga khandai ngaidak ahong jôka, ma lehan namtingei doiin mene atih. Thîr tôkmol le an chung a roijêk a ta, male Râtinchung Pathien taksina natak uain sômna khur sûnga han sirdên atih.

¹⁶A kâcholiin chuol le a keêla han, "Rêngngei Rêngpa le pumangei Pumapa," ti riming miziekin aoma.

¹⁷Hanchu vântîrton nisa chung a ânding ku mua. Phâivuo kêra vângei avuong murdi kôm han rôl inringtakin ân ieka: "Hong unglâ hântup roi Pathien ruolhoi roiinputaka rangin!"

¹⁸Hong unglâ, rêngngei meh, râlmi uliengei meh, le râlmingei meh, sakorngai meh le a chung a chuongngai meh, mingei murdi meh, suokngai meh le zalengngai meh, alien le achîn ngei meh, hong sâk roi!" a tia.

¹⁹Hanchu sarâng le pilchung a rêngngei le an râlmingei hah sakor chung a chuongpu le a râlmingei doia inbuonpui rangin an hântup ku mua.

²⁰Sarâng hah an sûra, dêipu dikloi a mitmua sininkhêl ngei sinpu hah khom an sûr sa. (Ma sininkhêl ngei a sin sika han sarâng sînthona dôn ngei le arimil chubaimûk ngâipu ngei hah a huong ngei ngâi ani.) Sarâng le dêipu dikloi ngei anruonin an ringchungin kêta kêng, meidîla han an vôrpa ngei zoi.

²¹An râlmingei hah chu sakor chung a chuongpu bâia hong jôk khandai lehan a that ngeia; male vângei murdi han an phari dodôrin an meh ngei hah an sâk zoi.

Chongphuong 20

Kum isâng ngei

¹Hanchu invân renga vântîrton juong chum a kuta khurmongboi chabi le Zingjirûi lienpa chôi ku mua.

²Dragon, tienlâia rûlpui, maha Diabol, aninônchu Soitan hah a sûra, kum isâng khat rangin a khitbel zoi.

³Vântîrton'n khurmongboia han a mathâk paia, a khâra, kum isâng ahok mâka chu namtingei a huong khâi loina rangin a kalrap zoi. Masuale chu ama hah chomolte rangin mojôk ngêt nîng atih.

⁴Hanchu rêngsukmungei ku mua, a chung a ânsungpu ngei hah roijêk thei rangin rachamneina pêkin an oma. Jisua'n chongtak a phuong le Pathien chong an misîr sika an lutana omngei rathangei khom ku mu sa. Anni ngei han sarâng le arimil chubaimûk mak ngeia, sarâng sînthona khom an machalngeia mo, aninônchu an kutngeia mo khom dôn uol mak ngei. Anni ngei hah an hong ringa, male Khrista leh rêngngei anghan kum isâng roijêk rangin an om zoi.

⁵(Mithi dangngei hah chu kum isâng ahek mâka chu la ring mak ngei.) Mahi thina renga inthoina masatak ani.

⁶Ma inthoinôkna masataka inchelpu ngei chu satvur le vânsatatak an ni. Thi inikna han an chung a rachamnei khâi maka; anni ngei hah Pathien le Khrista ochaingei nîng an ta, male ama leh kum isâng khat roijêk an tih.

Soitan menena

⁷Kum isâng ahek suole chu, Soitan hah ân tângna renga mojôk nîng a ta,

⁸male ama han namtinggei rammuol pumpui chung a chekinchâingei huong rangin sêng a ta, Gog le Magog. Soitan'n râlbuola rangin anni ngei hah hong mintûp ngei a ta, an tamtie chu tuikhanglien panga sietsai tamdôr nîng an tih.

⁹Pilchung pumpuia an inzara male Pathien minggei rubuk le khopuilien a lungkham ngâi hah an huola. Aniatachu invân renga mei ajuong chuma anni ngei hah akâng minmang ngei zoi.

¹⁰Hanchu Diabol, anni ngei huongpu, hah sarâng le dêipu dikloi an lei vôrpaia mei le kât dîla han an vôrpai zoia; male anni ngei hah tuonsôt tuonsôtin sîn le jân dûkphenêng bitin om an tih.

Roijêkna azoina

¹¹Hanchu rêngsukmun ngoi lienpa inkhat le a chung a ânsung ngâipu hah ku mua. Amakung renga han pilchung le invân an rotpaivinga, male mu nôk nikhâi mak ngei.

¹²Male mithi ngei, alien achîn ân-angсарin, rêngsukmun motona an indingin ku mua. Lekhabungei ânphara, male lekhabu dang ringna lekhabu khom ânphar sa. Mithi ngei hah an sin lei tho dungjûiin, lekhabungeia achuong anghan an roijêkin an om zoi.

¹³Hanchu tuikhanglien han asûnga mithi omngei hah ahong mojôk paia. Thina le thina rammuolin an sûnga mithi omngei hah an hong mojôk ngei sa. Male anrêngin an sin lei tho dungjûiin an roijêkin an om zoi.

¹⁴Hanchu thina le thina rammuol ngei hah meidîla vôrpaian an om zoi. (Hi meidîl hih thi inikna ani.)

¹⁵Tukhom ringna lekhabua an rimingngei mizieka omloipu ngei kai chu meidîla han an vôrpai ngei zoi.

Chongphuong 21

Invân thar le pilchung thar

- ¹Hanchu invân thar le pilchung thar ku mua; invân masa le pilchung masa ngei ha ân manga, male tuikhanglien khom ân mangrip zoi.
- ²Male Khopuilien Inthieng, Jerusalem thar hah, moiin a pasal don ranga ânthoka ân zoisai anghan Pathien kôm invân renga juong chum ku mu sa.
- ³Rêngsukmun renga rôl inringtakin ahong chongin ki rieta: “Atûn Pathien in chu munisingei lâia ajuong om zoi! Ama chu an kôm om a ta, male anni ngei hah a mingei nîng an tih. Pathien lelên an kôm om a ta, male ama hah an Pathien nîng atih.
- ⁴Ama'n an mitta mitrithingei murdi hûiminsâi pe ngei atih. Thina om khâi no nia, beidongnagei, chapnagei aninônchu natnagei khom om khâi no ni. Neinun muruo ngei hah ân mang suozoi.”
- ⁵Hanchu rêngsukmuna insung ngâipu han a tia, “Male atûn chu neinunngai murdi ki sin minthar zoi!” Ama han ko kôm, “Ma hih miziek roh, asik chu hi chongngei hih adik le taksônôm an ani, a ti sa.”
- ⁶Male ko kôm, “Ân zoi suozoi! Keima hih amotontak le anûktak, aphutna le amongna ki nih. Tukhom an tuiinrâl ngei murdi chu ringna tuikuong renga han amanboiin min nêk ngei ki tih, a tia.
- ⁷Amenepu ngei ngân chu hima ngei hih ko kôm renga man an tih: keima an Pathien nîng ka ta, male anni ngei hah ka nâingei nîng an tih.
- ⁸Aniatachu mithâidopngei, iemomloingei, pinkuohurngei, mithatngei, inditnasaloi thongei, dôichôngei, mirmil biekngei, le milakngei murdi—omna rang mun chu mei le Kât kângna dîl hah ani, maha thi inikna ani.”

Jerusalem thar

- ⁹Vântîrton sari ngei lâia inkhat khuriâi saria sip ripuingei mongna chôipu han ko kôm a hong, “Hong roh, male Belrite lômnun rang Moi hah nang min mu ki tih,” ni tia.
- ¹⁰Ratha'n mi manga, male vântîrton han muol insângtak sîpa ni tuonga. Pathien kôm invân renga juong chum Khopuilien Inthieng, Jerusalem hah mi min mua
- ¹¹male Pathien roiinpuinân ântêrdapa. Khopuilien hah lungmantam jasper lung angin, crystal lung anghan avâra.
- ¹²Kulpuilien roiinpui, insâng a dôna, mokotngei sômleinik hah vântîrtonngei sômleinik a enkol rang an oma. Mokotngei chung a han Israel jât sômleinik ngei riming ânziêka.

- 13** Akângtieng zet han mokotngei inthum aom paka: nisuotieng inthum, simtieng inthum, mârtieng inthum, nitâktieng inthum.
- 14** Khopuilien kulpui hah lungphûm sômleinik chung a sin ania, mangei chung a han Belrite tîrton sômleinik ngei riming ânzieka.
- 15** Vântîrton mi chongpuipu han khopuilien mokotngei le a kulpuingei minkhî rangin rângkachak minkhîna rotuon a dôna.
- 16** Khopuilien hah arikil atabanga, adung akhang an êlbanga. Vântîrton han minkhîna rotuon leh khopuilien hah a minkhia: adung hah mile isângkhat raza rangnga ania, akhang le ânsâng khom adung dôr ani.
- 17** Vântîrton han kulpui khom a minkhi sa nôka, male ânsâng hah feet 216 ania, minkhîna an mang ngâi a chôi dungjûiin.
- 18** A kulpui hah jasper lunga sin ania, male khopuilien hah rângkachak ânthârlaka sin ania, lîm-en dôra vârliei ani.
- 19** Khopuilien kulpui lungphûmngai hah lungmantamngai jât dadangngai leh minvo ani. Lungphûm motontak hah jasper ania, inikna hah sapphire ania, inthumna hah agate ania, minlina hah emerald ania,
- 20** rangngana hah onyks ania, urukna hah carnelien ania, sarina hah kuartz eng ania, irietna hah beryl ania, ikuona hah topaz ania, sômna hah chalcedony ania, sômleikhatna hah turkuoise ania, sômleinikna hah amethyst ani.
- 21** Mokot sômleinik ngei hah lungintêrngai sômleinik an nia; mokot zet hah lungintêr inkhata sin chit an ni. Khopuilien lamlien hah rângkachak ânthârlaka sin ania, lîm-en eninlenpatthei anghan ani.
- 22** Khopuilien sùng han biekin reng mu ma unga, Pumapa Pathien Râtinchung le Belrite hih biekin an ni sikin.
- 23** Khopuilien chung a êlminvâr rangin nisa le thâ nâng khâi maka, Pathien roiinpuinân a êlminvâr ngâi sikin, le Belrite hih a châti ani.
- 24** Rammuola mingai hah avâra han lôn an ta, male pilchunga rêngngai an neinunsampâr hong chôi lût an tih.
- 25** Khopuilien mokotngei hah sântin mo-ongin om a ta; khârin om tet noni ngei, mahan jân aom khâilo rang sikin.
- 26** Khopuilien sunga han namtinngai roiinpuina le neinunsampâr hong chôi lût nîng atih.
- 27** Aniatachu neinun inthiengloi ngei, tukhom inzakpuiom sin thongai le milak thongai chu khopuilien sunga han ite lûtpui thei no ni ngei. Belrite ringna lekhabua an rimingngai mizieka ompu ngei vai kêng ma khopuilien han an lût thei rang ani.

Chongphuong 22

¹ Vântîrton han ringna tuidung khom mi min mu sa, crystal anga ântêdap, le Pathien le Belrite rêngsukmun renga juong luong

² male khopui lamlien alâitaka aluonga. Tuidung pang kângnik han ringna thingkung aoma, thâ tin vêlkhat, a kuma voi sômleinik ânra ngâi aoma; male a buongei hah namtinngai damna rang ani.

³ Khopuilien sûnga han Pathien khomâksâmna nuoia aom ite man nikhâi no nih. Pathien le Belrite rêngsukmun hah khopuilien sûnga han om a ta, male a tîrlâmngai han ama chubaimûk an tih.

⁴ A mâi mûng an ta, male an machalngai han a riming inziek atih.

⁵ Jân om khâi nonia, male châtingai aninônchu nisavâr khom nâng khâi noni ngai, Pumapa Pathien hah an vâi nîng a ta, male tuonsôt tuonsôtin rêngngai anghan roijêk an tih zoi.

Jisua juong rang roi

⁶ Hanchu vântîrton han ko kôm, “Hi chongngai hih adika male iem thei ani. Male Pumapa Pathien, dêipungei kôma ama Ratha pêkpu han neinun hong tung lai ngêt rang ngai hah a tîrlâmngai kôm min mu rangin a vântîrton a tîr ani,” a tia.

⁷ Jisua'n, “Rangâi roh! Ku juong lai rang kêng ani zoi! Hi lekhabua dêipu leiti chongngai jômpu ngai chu satvur an ni!” a tia.

⁸ Keima, John, hin hi neinunngai murdi rietpu le amupu ki ni. Male mangai hah ki rieta, ku mu suole han, ma neinunngai mi min mupu vântîrton ke bula han kêi boka chubaimûk rang ko thoa.

⁹ Hannirese ama han ko kôm, “Ma anghan tho no roh! Keima khom nangma leh na lâibungngai dêipungei le hi lekhabu sûnga chongngai jômpu ngai murdi tîrlâm champui kêng ki ni. Pathien chubaimûk roh!” a tia.

¹⁰ Male ama han ko kôm, “Hi lekhabu sûnga dêipu leiti chongngai hih ipin dar no roh, hingai murdi hong tungna rang zora hih anâi zoi sikin, a tia.

¹¹ Tukhom mi saloi chu asaloi tho bang ngêt a ta, male tukhom mi porinche chu porinchên om bang ngêt a ta; tukhom mi sa chu asa sin bang ngêt a ta, male tukhom mi inthieng chu inthiengin om bang ngêt atih.”

¹² Jisua'n, “Rangâi roh! Ku juong lai rang kêng ani zoi! Mitin an sintho dungjûia pêk ngai chit rangin ka râisânmanngai juong chôi ki tih, a tia.

¹³ Keima amotontak le anûktak, aphutna le amongna ki ni.”

14 Ringna thingkung renga theimara an sâk theina rang le mokotngei renga khopuilien sũaga an lût theina ranga an puonngei rusûk minsâipu ngei chu satvur an ni.

15 Aniatachu khopuilien pêntheng han chu pinkuohurngei le dôitheingei, inditnasaloi thongei le mithatngei, mirmil biekngei le chongngei le sinthoa milak thopungei hah om an tih.

16 “Keima, Jisua'n, hi neinungei hih koiindangngei nin kôma phuong rangin ka vântîrton ku juongtîr ani. Keima David insûngkuo le a richisuonpâr renga; Keima jîng sikhovâr vârtak ki ni.”

17 Ratha le Moi ngei han, “Hong roh!” an tia. Hima hih ariet ngei murdi'n, “Hong roh!” ti sa ngêt rese ngei. A tuiinrâl ngei murdi; hong roi, a nuom ngei murdi'n ringna tui hi amanboiin hong nêk rese ngei.

Chongkhârna

18 Keima, John, tukhom hi lekhabua dêipu leiti chongngei ariet ngei chu inngartakin inningna ki min riet ngei: tumakhatin hi chongngei hih an bôkin chu amapa aninônchu amanu hah hi lekhabua misîra om dûktongnagei hih Pathien'n bôk pe ngei atih.

19 Male tukhom hi lekhabu sũaga dêipu leiti chongngei an paiin chu hi lekhabua misîra om an changrangtum ringna thingkung theimara le Khopuilien Inthieng renga hah Pathien'n lâkpai pe ngei atih.

20 Hi minrietna pêkpu hin, “Ani tatak! Ku juong lai rang kêng ani zoi!” a ti. Ni rese. Juong ta roh, Pumapa Jisua!

21 Pumapa Jisua moroina hah mitin kôm om rese, Amen.

Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira
2021, Vitória/ES - Brasil